

Liabona



Mga Pakigpulong sa Kinatibuk-ang Komperensya

Bag-ong mga Seventy ug
Kinatibuk-ang Kapangulohan
sa Sunday School Gitawag



Usa ka Magbalantay sa Karnero, ni Howard Lyon

Dinhi si Jesukristo mibisita sa mga Nephite sa Amerika agi og katumanan sa panagna nga Iyang gipakigbahin ngadto sa Jerusalem: "Lain nga karnero nga ako aduna, nga dili sakop niining torila: kinahanglan nga pagamandoan ko usab sila, ug sila magapatalinghug sa akong tingog; ug usa ra unya ang panon, ug usa ang magbalantay"

(Juan 10:16; tan-awa usab 3 Nephi 15:21).

SESYON SA SABADO SA BUNTAG

- 4 Welcome sa Komperensya
Presidente Thomas S. Monson
- 6 Ang Bili—ug mga Panalangin—
sa Pagkadisipulo
Elder Jeffrey R. Holland
- 9 Ang Makalipay nga Lulan
[Palas-anon] sa Pagkadisipulo
Elder Ronald A. Rasband
- 12 Si Kristo ang Manunubos
Elder Carlos H. Amado
- 15 Panalipod gikan sa Pornograpiya—
usa ka Panimalay nga Nag-focus
kang Kristo
Linda S. Reeves
- 18 Espirituhanong mga Alimpulos
Elder Neil L. Andersen
- 22 Usa ka Labing Bililhon nga
Kabilin sa Paglaum
Presidente Henry B. Eyring

SESYON SA SABADO SA HAPON

- 26 Ang Pagpaluyo sa mga Opisyaes
sa Simbahan
Presidente Dieter F. Uchtdorf
- 28 Report sa Church Auditing
Department, 2013
Kevin R. Jergensen
- 28 Estatistikanhong Report, 2013
Brook P. Hales
- 29 Ipakita ang Inyong Pagtuo
Elder Russell M. Nelson
- 32 “Usa Ka Panig-ingnan ang
Akong Gihatag Kaninyo”
Elder Richard G. Scott
- 35 “Kon Nahigugma Kamo Kanako,
Inyong Pagatumanon ang Akong
mga Sugo”
Elder Robert D. Hales
- 39 Dili Kita Mosubay sa Sayop
nga Dalan
Elder Claudio D. Zivic
- 41 Unsa May Imong Gihunahuna?
Elder W. Craig Zwick
- 44 Mga Gamut ug mga Sanga
Elder Quentin L. Cook

SESYON SA PRIESTHOOD

- 49 Ang mga Yawe ug Awtoridad
sa Priesthood
Elder Dallin H. Oaks
- 53 Unsa nga Matang sa mga Tawo?
Elder Donald L. Hallstrom

- 56 Ang Pinili nga Henerasyon
Randall L. Ridd
- 58 Wala Ba Kamo Nalambigit
sa Buhat sa Pagpahiuli?
Presidente Dieter F. Uchtdorf
- 62 Ang Tawo nga Adunay Priesthood
Presidente Henry B. Eyring
- 66 Magmakusganon Ka ug Magmaisug
Presidente Thomas S. Monson

SESYON SA DOMINGGO SA BUNTAG

- 70 Mapasalamaton sa Bisan Unsang
Kahimtang
Presidente Dieter F. Uchtdorf
- 78 Pag-Follow Up
Elder M. Russell Ballard
- 81 “Ayaw Kahadlok; kay Ania Ako
uban Kanimo”
Jean A. Stevens
- 84 Ang Inyong Upat ka Minuto
Bishop Gary E. Stevenson
- 87 Makadaug sa Ilang mga Alantuson
uban sa Kasayon
Elder David A. Bednar
- 91 Gugma—ang Kahulugan sa
Ebanghelyo
Presidente Thomas S. Monson

SESYON SA DOMINGGO SA HAPON

- 94 Ang Pagsaksi
Presidente Boyd K. Packer
- 97 Pagpuyo nga Matinud-anon
sa Tinuohan
Elder William R. Walker
- 100 Pagkamasulundon pinaagi
sa Atong Pagkamatindud-anon
Elder L. Tom Perry
- 103 Si Propeta Joseph Smith
Elder Lawrence E. Corbridge
- 106 Hain Gani ang Imong Bahandi
Elder Michael John U. Teh
- 108 Kon Kamo Kulang sa Kaalam
Elder Marcos A. Aidukaitis
- 111 Ang Pagkabanhaw ni Jesukristo
Elder D. Todd Christofferson
- 115 Hangtud sa Sunod Natong
Panagkita
Presidente Thomas S. Monson

KINATIBUK-ANG MITING SA MGA BABAYE

- 116 Ang Pagtuman sa mga Pakigsaad
Moprotekta, Moandam, ug Mohatag
og Gahum Kanato
Rosemary M. Wixom
- 119 Panag-igsoonay sa Kababayan-an:
Nagkinahanglan Gayud Kita sa
Usag Usa
Bonnie L. Oscarson
- 122 Gikinahanglan: Mga Kamot ug mga
Kasingkasing sa Pagpadali sa Buhat
Linda K. Burton
- 125 Anak nga mga Babaye sa
Pakigsaad
Presidente Henry B. Eyring
- 72 Mga General Authority ug
Kinatibuk-ang mga Kapanguloan
sa Ang Simbahan ni Jesukristo sa
mga Santos sa Ulahing mga Adlaw
- 129 Indeks sa mga Istorya sa
Komperensya
- 130 Sila Namulong Kanato: Paghimo
sa Komperensya nga Kabahin sa
Atong Kinabuhi
- 132 Mga Balita sa Simbahan



Summary sa Ika-184 nga Tinuig nga Kinatibuk-ang Komperensya

SABADO SA BUNTAG, ABRIL 5, 2014, KINATIBUK-ANG SESYON

Nagdumala: Presidente Thomas S. Monson. Conducting: Presidente Dieter F. Uchtdorf. Pangbukas nga pag-ampo: Elder Carl B. Cook. Panapos nga pag-ampo: Elder W. Christopher Waddell. Ang musika gidalit sa Tabernacle Choir; Mack Wilberg ug Ryan Murphy, mga direktor; Clay Christiansen ug Richard Elliott, mga organist: “How Firm a Foundation,” *Hymns*, nu. 85; “Press Forward, Saints,” *Hymns*, nu. 81, arr. Wilberg, wala mamantala; “Lead, Kindly Light,” *Hymns*, nu. 97, arr. Wilberg, wala mamantala; “Choose the Right,” *Hymns*, nu. 239; “A New Commandment I Give unto You,” Gates, pub. ni Jackman; “Come, O Thou King of Kings,” *Hymns*, nu. 59, arr. Murphy, wala mamantala.

SABADO SA HAPON, ABRIL 5, 2014, KINATIBUK-ANG SESYON

Nagdumala: Presidente Thomas S. Monson. Conducting: Presidente Henry B. Eyring. Pangbukas nga pag-ampo: Elder Ian S. Arder. Panapos nga pag-ampo: Linda K. Burton. Ang musika gidalit sa hinuysang choir gikan sa Orem Utah Institute; Ryan Eggett, direktor; Bonnie Goodliffe ug Linda Margetts, mga organist: “Glory to God on High,” *Hymns*, nu. 67, arr. Manookin, pub. ni Jackman; “I Lived in Heaven,” *Children’s Songbook*, 4, arr. Beebe, pub. ni Larice Music; “We Thank Thee, O God, for a Prophet,” *Hymns*, nu. 19; “High on the Mountain Top,” *Hymns*, nu. 5, arr. Duffin, pub. ni Duffin.

SABADO SA GABII, ABRIL 5, 2014, SESYON SA PRIESTHOOD

Nagdumala: Presidente Thomas S. Monson. Conducting: Presidente Dieter F. Uchtdorf. Pangbukas nga pag-ampo: Elder LeGrand R. Curtis Jr. Panapos nga pag-ampo: Russell T. Osguthorpe. Ang musika gidalit sa priesthood choir gikan sa Brigham Young University–Idaho; Randall Kempton ug Kevin Brower, mga direktor; Andrew Unsworth, organist: “Saints, Behold How Great Jehovah,” *Hymns*, nu. 28, arr. Kempton, wala mamantala; “Secret Prayer,” *Hymns*, nu. 144, arr. Kasen, pub. ni Jackman; “Rejoice, the Lord Is King,” *Hymns*, nu. 66; “Abide with Me!” *Hymns*, nu. 166, arr. Kempton, wala mamantala.

DOMINGGO SA BUNTAG, ABRIL 6, 2014, KINATIBUK-ANG SESYON

Nagdumala: Presidente Thomas S. Monson. Conducting: Presidente Henry B. Eyring. Pangbukas nga pag-ampo: Elder L. Whitney Clayton. Panapos nga pag-ampo: Neill F. Marriott. Ang musika gidalit sa Tabernacle

Choir; Mack Wilberg, direktor; Richard Elliott ug Andrew Unsworth, mga organist: “Come, We That Love the Lord,” *Hymns*, nu. 119; “On This Day of Joy and Gladness,” *Hymns*, nu. 64; “Let Us All Press On,” *Hymns*, nu. 243, arr. Elliott, wala mamantala; “Teach Me to Walk in the Light,” *Hymns*, nu. 304; “A Child’s Prayer,” *Children’s Songbook*, 12, arr. Perry, pub. ni Jackman; “Guide Us, O Thou Great Jehovah,” *Hymns*, nu. 83, arr. Wilberg, wala mamantala.

DOMINGGO SA HAPON, ABRIL 6, 2014, KINATIBUK-ANG SESYON

Nagdumala: Presidente Thomas S. Monson. Conducting: Presidente Dieter F. Uchtdorf. Pangbukas nga pag-ampo: Bishop Dean M. Davies. Panapos nga pag-ampo: Elder Benjamín De Hoyos. Ang musika gidalit sa Tabernacle Choir; Mack Wilberg ug Ryan Murphy, mga direktor; Linda Margetts ug Bonnie Goodliffe, mga organist: “Sweet Is the Work,” *Hymns*, nu. 147, arr. Murphy, wala mamantala; “I Stand All Amazed,” *Hymns*, nu. 193, arr. Murphy, wala mamantala; “Hark, All Ye Nations!” *Hymns*, nu. 264; “Come, Let Us Anew,” *Hymns*, nu. 217, arr. Wilberg, wala mamantala.

SABADO SA GABII, MARSO 29, 2014, KINATIBUK-ANG MITING SA MGA BABAYE

Nagdumala: Presidente Thomas S. Monson. Conducting: Bonnie L. Oscarson. Pangbukas nga pag-ampo: Emri Elizabeth Smith. Panapos nga pag-ampo: Ofa Kaufusi. Ang musika gidalit sa hinuysang choir sa Primary, Young Women, ug Relief Society gikan sa mga stake sa Wasatch Front; Emily Wadley, direktor; Bonnie Goodliffe, organist: “Hark, All Ye Nations!” *Hymns*, nu. 264; “Daughters in His Kingdom,” Creamer, wala mamantala, giduyugan og organ, flute, violin, ug cello; “I Am a Child of God,” *Hymns*, nu. 301, arr. DeFord, wala mamantala; medley, arr. Mohlman, wala mamantala: “Lord, I Would Follow Thee,” *Hymns*, nu. 220, ug “Love One Another,” *Hymns*, nu. 308; “Let Us All Press On,” *Hymns*, nu. 243, arr. Huff, wala mamantala.

ANG MGA PAKIGPULONG SA KOMPERENSYA ANAA

Sa pag-access sa mga pakigpulong sa kinatibuk-ang komperensya diha sa Internet sa daghang mga pinulongan, bisitaha ang conference.lds.org ug pagpili og pinulongan. Ang mga pakigpulong anaa usab sa sa Gospel Library mobile app. Kasagaran sulod sa unom ka semana human sa kinatibuk-ang komperensya, ang mga rekording sa audio anaa na sa mga sentro sa pagpang-apud-apod.

MGA MENSAHE SA HOME UG VISITING TEACHING

Para sa mga mensahe sa home ug visiting teaching, palihug pagpili og pakigpulong nga labing makatubag sa mga panginahanglan niadtong inyong gibisitahan.

SA HAPIN

Atubangan: Gilitratohan ni Christina Smith. Luyo: Gilitratohan ni Leslie Nilsson.

LITRATO SA KOMPERENSYA

Mga talan-awon sa kinatibuk-ang komperensya sa Siyudad sa Salt Lake gilitratohan ni Welden C. Andersen, Cody Bell, Randy Collier, Weston Colton, Scott Davis, Craig Dimond, Nathaniel Ray Edwards, Lloyd Eldredge, Ashlee Larsen, John Luke, Leslie Nilsson, Christina Smith, ug Byron Warner; sa Gilbert, Arizona, USA, ni Jamie Dale Johnson; sa Highlands Ranch, Colorado, USA, ni Rebecca Morgeneegg; sa Siyudad sa Mexico, Mexico, ni Israel Gutiérrez; sa Norcross, Georgia, USA, ni David Winters; sa Palmyra, New York, USA, ni Brent Walton; sa Pleasant Grove, Utah, USA, ni Jeremy Hall; sa Raymond, Alberta, Canada, ni Rhonda Steed; sa Saint Petersburg, Russia, ni Vladimir Egorov; sa São Paulo, Brazil, ni Lauren Fochetto; sa Sydney, Australia, ni Colin Ligertwood; sa Ulaanbaatar, Mongolia, ni Kylie Sneddon; sa Vienna, Austria, ni Frank Helmrich; ug sa Washington, Utah, USA, ni James Iliff Jeffery.



Internasyonal nga magasin sa Ang Simbahan ni Jesukristo sa mga Santos sa Ulahing mga Adlaw nga giimprinta sa Cebuano

Ang Unang Kapangulohan: Thomas S. Monson, Henry B. Eyring, Dieter F. Uchtdorf

Korum sa Napulog Duha ka mga Apostoles: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Editor: Craig A. Cardon

Mga Adviser: Jose L. Alonso, Mervyn B. Arnold, Shayne M. Bowen, Stanley G. Ellis, Christoffel Golden

Tigdumalang Direktor: David T. Warner

Direktor sa Operasyon: Vincent A. Vaughn

Direktor sa mga Magasin sa Simbahan:

Allan R. Loyborg

Business Manager: Garff Cannon

Tigdumalang Editor: R. Val Johnson

Luyo-luyo sa Tigdumalang Editor: Ryan Carr

Team sa Pagsulat ug Pag-edit: Brittany Beattie, David Dickson, David A. Edwards, Jennifer Grace Fallon, Matthew D. Flitton, Mindy Raye Friedman, Lori Fuller, Garrett H. Garff, LaRene Porter Gaunt, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Tigdumalang Direktor sa Art: J. Scott Knudsen

Direktor sa Art: Tadd R. Peterson

Team sa Pagdesinyo: Jeanette Andrews, Fay P. Andrus, Mandie M. Bentley, C. Kimball Bott, Tom Child, Nate Gines, Colleen Hinckley, Eric P. Johnson, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Coordinator sa Intellectual Property:

Collette Nebeker Aune

Tigdumala sa Produksiyon: Jane Ann Peters

Team sa Produksiyon: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Prepress: Jeff L. Martin

Direktor sa Pag-imprinta: Craig K. Sedgwick

Direktor sa Pagpang-apud-apod: Stephen R. Christiansen

Paghubad: Francisco M. dela Cruz

Sa pag-subscribe ug pag-renew sa magasin, bisitahi ang <http://store.lds.org>. Palihug ayaw kalimti sa pagbutang sa imong ward/branch isip address asa ipadala ang imong subskripsyon.

Kon dunay mga pangutana mahitungod sa subskripsyon palihug tawag sa Church's Global Service Center (GSC) sa 1800-8-680-3950 alang sa mga subscriber sa PLDT ug Smart o 1800-1-441-0687 alang sa mga subscriber sa Globe.


Isumiter ang mga manuskrito ug mga pangutana

online sa liahona.lds.org; kon ipadala ngadto sa *Liahona*, Room 2420, 50 East North Temple Street, Salt Lake City, UT 84150-0024, USA; o i-e-mail sa: liahona@ldschurch.org

Liahona (usa ka termino sa Basahon ni Mormon nga nagpasabot nga "kompas o direktor") gimantala sa Albanian, Armenian, Bislama, Bulgarian, Cambodian, Cebuano, Chinese, Chinese (simplified), Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swahili, Swedish, Tagalog, Tahitian, Thai, Tongan, Ukrainian, Urdu, ug Vietnamese. (Ang kasagad magkalahi sa pinulongan.)

© 2014 sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. Gi-imprinta sa Pilipinas.

Ang teksto ug biswal nga materyal diha sa *Liahona* mahimong kopyahan alang sa sulagma, dili pangkomersyo nga paggamit sa simbahan o panimalay. Ang biswal nga materyal dili mahimong kopyahan kon kini adunay mga pagdili diha sa linya sa kredito sa maong artwork. Ang mga pangutana kinahanglan ipadala ngadto sa Intellectual Property Office, 50 East North Temple Street, Salt Lake City, UT 84150, USA; e-mail: cor-intellectualproperty@ldschurch.org.



INDEKS SA MAMUMULONG

Aidukaitis, Marcos A., 108
Amado, Carlos H., 12
Andersen, Neil L., 18
Ballard, M. Russell, 78
Bednar, David A., 87
Burton, Linda K., 122
Christofferson, D. Todd, 111
Cook, Quentin L., 44
Corbridge, Lawrence E., 103
Eyring, Henry B., 22, 62, 125
Hales, Robert D., 35
Hallstrom, Donald L., 53
Holland, Jeffrey R., 6
Monson, Thomas S., 4, 66, 91, 115
Nelson, Russell M., 29
Oaks, Dallin H., 49
Oscarson, Bonnie L., 119
Packer, Boyd K., 94
Perry, L. Tom, 100
Rasband, Ronald A., 9
Reeves, Linda S., 15
Ridd, Randall L., 56
Scott, Richard G., 32
Stevens, Jean A., 81
Stevenson, Gary E., 84
Teh, Michael John U., 106
Uchtdorf, Dieter F., 26, 58, 70
Walker, William R., 97
Wixom, Rosemary M., 116
Zivic, Claudio D., 39
Zwick, W. Craig, 41

INDEKS SA HILISGUTAN

Awtoridad, 49
Basahon ni Mormon, 18
Dios nga Amahan, 81, 94
Ehemplo, 32, 62
Espiritu Santo, 22, 94, 100
Family history, 44
Gugma, 6, 32, 41, 58, 91, 115, 119
Gugmang Putli, 91
Hugot nga Pagtuo, 29, 78, 81, 97, 100, 108
Integridad, 29, 66
Jesukristo, 6, 9, 12, 18, 22, 29, 32, 35, 39, 58, 70, 87, 94, 103, 111
Joseph Smith, 22, 39, 66, 103
Kaalam, 103, 108
Kaangayan, 111
Kababayan-an, 49, 119
Kabubut-on, 35, 56, 100
Kaisug, 6, 18, 66
Kalisdanan, 9, 18, 70, 81, 87, 106
Kalooy, 91
Kamatayon, 12, 111
Kamatuoran, 29, 94, 103, 108
Kaminyoon, 18, 41, 49
Kasulatan, mga, 29, 56
Katakus, 53
Kinabuhing dayon, 22
Kinatibuk-ang komperensya, 4, 115
Komunikasyon, 41
Misyonaryo nga buhat, 32, 78
Miyembro nga mga Misyonaryo, 78
Ordinansa, mga, 94
Pag-ampo, 15, 56, 62, 81

Pagdisiplina sa kaugalingon, 84
Paghinulsol, 39, 84
Pagkaadik, 15, 58
Pagkabanhaw, 12, 111
Pagkadisipulo, 6, 9, 18, 122
Pagkaginikanan, 94
Pagkahakog, 58
Pagkamabination, 91
Pagkamapainubsanon, 106
Pagkamasulundon, 6, 18, 35, 84, 100
Pagkamatarung, 6
Pagkamatinuoron, 62
Paglaum, 22
Pagpadayag, 103, 108
Pagpahiuli, 58
Pagpamatuod, 94
Pagpanggukod, 6
Pagpasaylo, 91
Pag-ula, 12, 15, 18, 87, 111
Pakigsaad, mga, 22, 84, 87, 116, 122, 125
Pamilya, 44, 49
Panag-igsoonay sa Kababayan-an, 119, 125
Pangalan sa Simbahan, 78
Pasalamat, 70
Pioneer, mga, 70, 97
Pornograpiya, 15, 53, 58
Prayoridad, mga, 58, 106
Priesthood, 49, 53, 62
Propeta, mga, 97, 103, 108
Sakripisyo, 97
Serbisyo, 9, 32, 53, 58, 62, 119, 122
Teknolohiya, 44, 56, 108
Templo, mga, 4, 44, 97, 116
Yawa, 29



Ni Presidente Thomas S. Monson

Welcome sa Komperensya

Kita . . . nagkahiusa sa atong pagtuo ug sa atong tinguha nga maminaw ug magkat-on gikan sa mga mensahe nga ihatag kanato.

Akong minahal nga mga kaigsoonan, pagkamalipayon nako nga mo-welcome ninyo niining tibuok kalibutan nga komperensya sa Ang Simbahan ni Jesukristo sa mga Santos sa Ulahing mga Adlaw. Nagpundok kita isip usa ka dakong pamilya, sobra sa 15 ka milyon nga lig-on, nagkahiusa sa atong pagtuo ug sa atong tinguha nga maminaw ug magkat-on gikan sa mga mensahe nga ihatag kanato.

Ang miaging unom ka bulan dali kaayong milabay samtang ang buhat sa Simbahan nagpadayon sa walay pagkabalda. Akong pribilehiyo sobra sa usa ka bulan pa lang ang pagpahinungod sa Gilbert Arizona Temple, usa ka talagsaong istraktura. Pagkagabii sa wala pa ang pagpahinungod, usa ka kultural nga kalihokan ang gipahigayon sa duol nga Discovery Park. Dose mil ka mga batan-on ang mipasundayag og 90 ka minutos nga programa. Ang pagsayaw, pagkanta, ug ang musikal nga mga pasundayag talagsaon gayud.

Kining dapita nakasinati og grabe nga panahon sa kainit, ug ako

nagtuo nga daghang pag-ampo ang gipadangat ngadto sa kahitas-an sa nangaging mga semana alang sa gikinahanglan kaayo nga ulan. Sa walay palad, miabut kini sa dayong sugod sa pasundayag ug mibunok sulod sa tibuok nga programa! Bisan pa man nga ang mga kabatan-onan nabasa sa ulan ug nagkurog tungod sa katugnaw sa temperatura, kaming tanan mibati sa Espiritu sa Ginoo. Ang tema sa programa, “Pagpuyo nga Matinuoron sa Pagtuo”—hunahunaa kini: “Pagpakabuhi nga Matinuoron sa Pagtuo”—talagsaong gipakita sa mapahiyumon ug madasigong mga kabatan-onan. Bisan pa man sa katugnaw ug sa ulan, usa kini ka puno sa pagtuo ug makapadasig nga kasinatian nga mahandom ug masaysay sa mga batan-on ngadto sa ilang mga anak ug mga apo sa moabut nga katugan.

Pagkasunod adlaw, ang pagpahinungod sa Gilbert Arizona Temple nahitabo. Nahimo kining ika-142 nga templo nga magamit sa Simbahan. Lahi sa miaging gabii, ang adlaw maanindot ug puno sa kahayag.



Ang mga sesyon makapadasig gayud. Uban kanako nga mitambong sila si Presidente Henry B. Eyring, Elder ug Sister Tad R. Callister, Elder ug Sister William R. Walker, ug sila si Elder ug Sister Kent F. Richards.

Inigka-Mayo ang Fort Lauderdale Florida Temple ipahinungod. Lain pang mga templo ang gi-iskedyul nga mahuman ug ipahinungod sa ulahing bahin niining tuiga. Sa 2015 gilauman nato



nga makahuman ug makapahinungod og bag-ong mga templo sa daghang bahin sa kalibutan. Kini nga proseso magpadayon. Kon ang tanang gipahibalo sa una nga mga templo mahuman na, kita adunay 170 ka mga templo nga magamit sa tibuok kalibutan.

Bisan tuod nga kami kasamtangang nag-focus sa among mga paningkamot sa paghuman sa gipahibalo sa una nga mga templo ug dili pa magpahibalo og

bisan unsa nga templo sa umaabut nga mga adlaw, magpadayon kami sa proseso sa pagtino sa mga panginahanglan ug pagpangita og mga luna alang sa umaabut nga mga templo. Ang mga pagpahibalo pagahimoon dayon sa umaabut nga mga kinatibuk-ang komperensya. Mga katawhan kita nga tigtukod ug tigtambungan og templo.

Karon, mga kaisogon, madasigon kitang maminaw sa mga mensahe nga

ihatag kanato karon ug ugma. Kad-tong mamulong kanato nagtinguha sa panabang ug giya sa kahitas-an samtang nangandam sila sa ilang mga mensahe.

Hinaut nga kita—kitang tanan, nga ania ug sa bisan asang dapit—mapuno sa Espiritu sa Ginoo ug madasig samtang kita maminaw ug magkat-on. Sa pangalan ni Jesukristo, atong Manluluwas, amen. ■



Ni Elder Jeffrey R. Holland

Sa Korum sa Napulog Duha ka mga Apostoles

Ang Bili—ug mga Panalangin—sa Pagkadisipulo

Pagmalig-on. Pagpuyo nga matinud-anon sa ebanghelyo bisan og ang uban sa inyong palibut dili matinud-anon.

Gimahal ka namo, Presidente Monson. Imong gihatag ang imong kasingkasing ug imong kahimsog sa matag calling nga gihatag sa Ginoo kanimo, ilabi na sa sagra-dong katungdanan nga anaa kanimo karon. Ang tibuk Simbahan nag-pasalamat kanimo sa imong walay kaluya nga pagserbisyo ug sa imong walay pagkapakyas nga debosyon sa katungdanan.

Uban sa pagdayeg ug pag-awhag alang sa tanan kinsa kinahanglan nga magpabiling lig-on niining ulahing mga adlaw, ako moingon sa tanan ug ilabi na sa kabatan-onan sa Simbahan nga kon wala pa kamo tawaga, moabut ang adlaw nga kamo pagatawgon sa pagpanalipod sa inyong tinuohan o tingali bisan sa paglahutay sa personal nga mga pang-abuso tungod kay kamo mga miyembro sa Ang Simbahan ni Jesukristo sa mga Santos sa Ulahing mga Adlaw. Ang maong higayon magkinahanglan og kaisug ug maayong pamatasan sa inyong bahin.

Pananglit, usa ka sister missionary misulat bag-o lang ngari nako: “Ang

akong kompanyon ug ako nakakita og tawo nga naglingkod sa plasa sa lungsod nga naniudto. Sa among pagduol, mitan-aw siya ug nakita ang among mga missionary name tag. Lain kaayo ang iyang tinan-awan, mitindog siya ug mihunat sa pagsumbag nako. Nakahupo dayon ko, pero iyang gitutho ang iyang gikaon diri nako ug nagsugod sa pagpamalikas kanamo. Mipalayo mi nga walay gisulti. Pagtrapo na nako sa akong nawong, nahinolan nako ang dinugmok nga patatas nga miigo sa luyo sa akong ulo. Usahay lisud nga mahimong misyonaryo kay diha-diha gusto unta akong mobalik, liaban kadtong gamayng tawo, ug ingnon, ‘NGANO MAN KA!’ Apan wala ko kini buhata.”

Alang niining mahalarong misyonaryo, moingon ko, pinalangga nga anak, ikaw sa imong kaugalingong ubos nga paagi miapil sa pundok sa inilang mga babaye ug mga lalaki kinsa, sama sa gisulti ni propeta Jacob sa Basahon ni Mormon “mopalandong sa kamatayon ni [Kristo], ug mopas-an sa iyang krus ug [moantus] sa pagbiaybiay sa kalibutan.”¹

Sa pagkatinuod, mahitungod ni Jesus Mismo, ang igsoong lalaki ni Jacob nga si Nephi misulat: “Ug ang kalibutan, tungod sa ilang kadautan, mohukom kaniya nga usa ka butang nga walay bili; busa sila mohampak kaniya, ug siya mag-antus niini; ug sila mobunal kaniya ug siya mag-antus niini. Oo, sila moluwa kaniya, ug siya mag-antus niini, tungod sa iyang mahigugmaon nga pagbati ug sa iyang pagkamainantuson ngadto sa mga katawhan.”²

Sa pagtan-aw sa kaugalingong kasinatian sa Manluluwas, dihay dugay na nga kasaysayan sa pagkasinalikway ug masakit nga bili nga gibayad sa mga propeta ug mga apostoles, mga misyonaryo ug mga miyembro sa matag henerasyon—ngadto sa tanang naningkamot sa pagsunod sa tawag sa Dios sa pagbayaw sa tawhanong pamilya ngadto sa “usa ka labing maayo nga paagi.”³

“Ug unsa pay uban nga akong isulti [bahin kanila]?” ang tigsulat sa basahon sa mga Hebreohanon nangutana.

“[Sila] kinsa . . . gipanagtak-om nila ang mga ba-ba sa mga leon,

“Gipalong nila ang mabangis nga kalayo, nakaikyasa sila sa sulab sa espada, . . . nangahimo sila nga makagagahum sa panggubatan, ilang gipatibulaag ang mga kasundalohan . . .

“[Nakakita] sa nangamatay nga mangabanhaw . . . [samtang] ang uban gipanagsakit, . . .

“Ug . . . nanag-antus sa mga pagbiaybiay ug mga paghampak, . . . sa mga talikala ug sa mga pagbilanggo:

“Gipangbato sila, . . . gipanagpamutol sila pinaagi sa gabas, gipamatay sila pinaagi sa espada: . . . sila nanag-panglakaw nga nanagsaput og mga panit sa mga karnero ug mga kanding; nanag-antus sa kawad-on, mga sinakit, [ug] mga dinagmalan;

“([Sila] nga kanila ang kalibutan dili takus:) . . . nahadiindiin sila sa mga kaawaawaan ug mga kabukiran, ug mga lungib ug mga langub sa yuta.”⁴

Sigurado ang mga anghel sa langit nagbakho samtang sila nagrekord niining bili sa pagkadisipulo sa usa ka kalibutan nga sa kasagaran masupilon sa mga sugo sa Dios. Ang Manluluwas



Mismo mipaagas sa Iyang kaugalingong mga luha niadtong kinsa sulod sa gatusan ka tuig gisalikway ug gipatay tungod sa pagserbisyo Kaniya. Ug karon Siya gisalikway ug patyunon.

“O Jerusalem, Jerusalem,” singgit ni Jesus, “nga nagapatay sa mga propeta ug nagabato sa mga sinugo nganha kanimo, sa makadaghan gipangandoyko ang pagtigum unta sa imong mga anak, maingon sa himongaan nga nagatigum sa iyang mga piso ilalum sa iyang mga pako, apan nagadumili kamo!

“Tan-awa, mabiniyaan ug magamingaw ang inyong balay.”⁵

Ug kana ang mensahe alang sa matag batan-ong lalaki ug babaye niini nga Simbahan. Tingali maghunahuna mo kon may bili ba ang maisugong pagpanalipud sa pagka-moral atol sa inyong pag-high school o magmisyon diin ang inyong gitamud pagayo nga mga gituohan biay-biayan o makigbatok sa katilingban nga usahay motamay sa pagpakabuhi nga dunay relihiyosong debosyon. Oo, may bili kini, tungod kay ang alternatibo mao nga ang atong “mga balay” nga gibilin kanato “mabiniyaan”—biyaan ang mga indibidwal, biyaan nga mga pamilya, biyaan nga kasilinganan, ug biniyaan nga mga nasud.

Niini makita nato ang palas-anon niadtong gitawag sa pagsangyaw sa

mensahe sa mesiya. Dugang sa mga pagtulun-an, pag-awhag, ug paglipay sa mga tawo (kana mao ang nindot nga bahin sa pagkadisipulo), matag karon ug unya kining mao nga mga mensahero tawagon aron nga mabalaka, mopasidaan, ug usahay sa paghilak (kana ang masakit nga bahin). Sila nasayud gayud nga ang dalan padulong sa gisaad nga yuta sa “nagapaagay sa gatas ug dugos”⁶ kinahanglang moagi sa dalan sa Bukid sa Sinai nga nagapaagay sa “kinahanglan ka” ug “kinahanglang dili ka.”⁷

Subo lang kay ang mga mensahero nga balaanong gitugahan sa mga sugo sa kasagaran dili ingon ka popular karon kay sa kaniadto, sama sa gipamatuod sa sister missionary nga gituthoan og patatas. *Ang pagdumot* usa ka ngil-ad nga pulong, apan sa karon adunay mga moingon sama sa dautan nga si Achab, “Ako nagadumot [ni propeta Micheas]; kay siya wala magpanagna sa maayo mahitungod kanako, apan kanunay [nanagna] sa kadautan.”⁸ Kana nga matang sa pagdumot alang sa kamatinuoron sa propeta maoy nakaingon sa kamatayon ni Abinadi. Sama sa iyang gisulti ngadto ni Haring Noah: “Tungod kay ako misulti kaninyo sa kamatuoran kamo nangasuko kanako. . . . Tungod kay ako nakasulti sa pulong sa Dios kamo naghukom

kanako nga ako buang”⁹ o, mahimo natong dugangan, binukid, tigulang nga lalaki, dili matugtanon, dili mabination, tinaphaw, kinaraan, ug tiniguwang

Ingon og ang Ginoo Mismo nagsubo ngadto ni propeta Isaias:

“[Kining] mga anak . . . dili mamati sa kasugoan ni Jehova:

“[Sila] nanag-ingon sa mga magtatan-aw: Ayaw kamo pagtan-aw; ug sa mga manalagna: Ayaw kamo pagtagna kanamo sa mga butang nga matarung, pagsulti kanamo og malumo nga mga butang, pagtagna ug mga paglimbong:

“Pahawa kamo sa alagianan, tipas kamo gikan sa dalan, himoa nga ang Balaan sa Israel mopahawa gikan sa among atubangan.”¹⁰

Subo kaayo, batan-ong mga higala, kinaiya kini sa atong panahon nga kon ang mga tawo gusto og bisan unsa nga dios, gusto sila sa mga dios nga dili magkinahanglan og daghan, komportable nga mga dios, kinsa dili manghilabot sa ilang kahimtang karon apan dili gani mohatag og direksyon, ang dios nga mopikipik sa atong ulo, makalipay kanato, sama sa gustong itudlo sa mga dagko ngadto sa mga bata¹¹

Mao gayud kana nga ang tawo gilalang sumala sa Iyang kaugalingong hitsura! Usahay—ug ingon og kini

mao ang binali sa tanan—kining mga tawhana nga naggamit sa ngalan ni Jesus mao kadtong matanga sa mga tawo nga dunay “komportable” nga Dios. Tinuod ba? Siya kinsa miingon nga kinahanglang dili kita mosupak sa mga sugo, apan gani kinahanglang dili kita *maghunahuna* sa pagsupak niini. Ug kon kita naghunahuna sa pagsupak niini, nakasupak na kita niini sa atong kasingkasing. “Komportable” ba kana nga doktrina, nindot paminawon ug popular alang sa pundok sa mga tawo nga namalandong?

Ug unsa man kadtong gusto lang motan-aw sa sala o mohikap niini gikan sa layo? Klarong miingon si Jesus, kon ang inyong mata makasala ninyo, lugita kini. Kon ang inyong mga kamot makasala ninyo, putla kini.¹² “Ayaw kamo pagdahum nga mianhi ako sa [pagdalag] pagdinaitay dinhi sa yuta, kondili espada,”¹³ Siya mipasidaan niadtong kinsa nagtuo nga Siya mosulti lang og nindot nga mga pulong. Dili ikatingala nga, sa sermon human sa usa ka sermon, ang lokal nga mga komunidad “nangamuyo

kang Jesus sa pagpahawa sa ilang kayutaan.”¹⁴ Dili ikatingala, nga milagro human sa usa ka milagro, ang Iyang gahum giingong dili iya sa Dios kondili sa yawa.¹⁵ Klaro kaayo nga ang inila nga pagya nga “Unsay buhaton ni Jesus?” dili kanunay makaagni og popular nga tubag.

Sa kinatumyan sa Iyang mortal nga pangalagad, miingon si Jesus, “Maghigugmaay kamo sa usag usa, sama sa akong paghigugma kaninyo.”¹⁶ Aron sa pagsiguro nga ila gyung nasabtan unsa nga matang sa gugma kadto, Siya miingon, “Kon nahigugma kamo kanako, inyong pagatumanon ang akong mga sugo”¹⁷ ug bisan kinsa . . . magpahuyang sa usa [sa] mga labing diyutay niini nga mga sugo, *ug magapanudlo sa mga tawo sa pagbuhat sa ingon*, kini siya . . . iwit didto sa gingharian sa langit.”¹⁸ Ang Kristohanong gugma maoy atong labing gikinahanglan niini nga planeta tungod kay ang pagkamatarung sa kanunay gituohan nga magauban niini. Mao nga kon ang gugma mao ang atong motto, nga mao *gayud*, nan pinaagi sa Iyang

pulong nga maoy simbolo sa gugma kinahanglan nga atong isalikway ang kalapasan ug awhagon ang uban sa pagsunod niini. Klaro nga nakasabut si Jesus kon unsa ang nakalimtan sa kadaghanan sa atong moderno nga kultura: nga dunay importante nga kalainan tali sa sugo sa pagpasaylo sa sala (diin anaa Kaniya ang walay katapusan nga kapasidad sa pagbuhat) ug pagpasidaan batok sa pag-uyon niini (diin wala gayud Niya buhata bisan makausa).

Mga higala, ilabi na sa akong batan-ong mga higala, pagmaisugon. Ang putli nga Kristohanong gugma nga nagagikan sa tinuod nga pagkamatarung makausab sa kalibutan. Ako mopamatuod nga ang tinuod ug buhi nga ebanghelyo ni Jesukristo ania sa yuta ug kamo mga miyembro sa Iyang tinuod ug buhi nga Simbahan, naningkamot sa pagpaambit niini. Ako mosaksi niana nga ebanghelyo ug niana nga Simbahan, uban sa piho nga saksi sa gipahiuli nga mga yawe sa priesthood nga miabli sa gahum ug kaepektibo sa makaluwas nga



mga ordinansa. Ako mas sigurado nga kadto nga mga yawe gipahiuli ug nga kadto nga mga ordinansa sa makausa ania sa Ang Simbahan ni Jesukristo sa mga Santos sa Ulahing mga Adlaw nga ako sigurado nga ako nagbarug sa inyong atubangan niini nga pulpito ug kamo naglingkod sa akong atubangan niini nga komperensya.

Pagmalig-on. Pagpuyo nga matitud-anon sa ebanghelyo bisan og ang uban sa inyong palibut dili matitud-anon. Panalipdi ang inyong mga gituohan uban sa maayong pamatasan ug kamanggiloy-on, panalipdi kini. Ang taas nga kasaysayan sa dinasig nga mga tingog, lakip niadtong inyong madunggan niini nga komperensya, ug ang tingog nga bag-o lang ninyong nadungog gikan ni Presidente Thomas S. Monson naggiya kaninyo sa dalan padulong sa Kristohanong pagkadisipulo. Tul-id ug higpit kini nga dalan, nga walay dakong kapilian, apan madasi-gon ug malampuson kini nga agian, “uban sa . . . pagkamakanunayon kang Kristo, . . . usa ka hingpit nga kahayag sa paglaum, ug usa ka gugma sa Dios ug sa tanan nga mga tawo.”¹⁹ Sa paglakaw sa dalan nga maisugon, inyong makaplakan ang dili matarug nga pagtuo, makakaplag kamo og kaluwasan batok sa mga dautan, bisan ang gilis sa unos, ug makaplakan ang sama sa bato nga kalig-on sa atong Manunubos diin kamo natukod kon kamo motukod sa inyong mahaloron nga pagkadisipulo, kamo *dili* mapukan.²⁰ Sa sagradong pangalan ni Jesukristo, amen. ■

MUBO NGA MGA SULAT

1. Jacob 1:8.
2. 1 Nephi 19:9.
3. 1 Mga Taga-Corinto 12:31; Ether 12:11.
4. Mga Hebreohanon 11:32–38.
5. Mateo 23:37–38.
6. Exodo 3:8.
7. Tan-awa sa Exodo 20:3–17.
8. 2 Cronicas 18:7.
9. Mosiah 13:4.
10. Isaias 30:9–11.
11. Tan-awa sa Henry Fairlie, *The Seven Deadly Sins Today* (1978), 15–16.
12. Tan-awa sa Mateo 5:29–30.
13. Mateo 10:34.
14. Marcos 5:17.
15. Tan-awa sa Mateo 9:34.
16. Juan 15:12.
17. Juan 14:15.
18. Mateo 5:19; emphasis gidugang.
19. 2 Nephi 31:20.
20. Tan-awa sa Helaman 5:12.



Ni Elder Ronald A. Rasband
Sa Kapangulohan sa Seventy

Ang Makalipay nga Lulan [Palas-anon] sa Pagkadisipulo

Ang pagpaluyo sa atong mga lider usa ka pribilehiyo; moabut kini uban sa personal nga responsibilidad sa pagpakigbahin sa ilang palas-anon ug mahimong mga disipulo sa Ginoo.

Niadtong Mayo 20 sa miaging tuig usa ka kusog nga buhawi ang grabing miguba sa Siyudad sa Oklahoma, sa kinapusuran sa Amerika, miguba sa nga agianan sobra sa usa ka milya (1.6 km) ang gilapdon ug 17 ka milya (27 km) ang gitason. Kini nga unos, usa ka hasmag sa makaguba nga buhawi, miusab sa kahimantang ug sa kinabuhi sa mga tawo nga naagian niini.

Usa ka semana pagkahuman sa hitabo sa grabe nga unos, gi-assign ko sa pagbisita sa dapit diin ang mga balay ug mga kabtangan nagkatag sa nahapay, naguba nga kasilinganan.

Sa wala pa ko mobiya, nakigsulti ko sa atong pinalangga nga propeta, si Presidente Thomas S. Monson, kinsa nalipay kaayo sa mga buluhaton alang sa Ginoo. Inubanan sa respeto dili lang sa iyang katungdanan ug sa iyang kabuotan usab, nangutana ko, “Unsay gusto nimo nga akong buhaton? Unsay gusto nimo nga akong isulti?”

Hinay niyang gigunitan ang akong kamot, sama sa iyang buhaton sa matag usa sa mga biktima ug matag usa niadtong mitabang sa nagun-ob kon siya pa ang moadto, ug miingon:

“Una, sultihi sila nga gihigugma nako sila.

“Ikaduha, sultihi sila nga nag-ampo ko alang kanila.

“Ikatulo, palihug pasalamat ang tanan nga mitabang.”

Isip sakop sa Kapangulohan sa Seventy, akong gibati ang kaimportante niining responsibilidad diha sa mga pulong sa Ginoo nga gipamulong ngadto kang Moises:

“Tigumon mo alang kanako ang kapitoan ka tawo sa mga anciano sa Israel, nga imong hing-ilhan nga mga anciano sa katawhan ug mga pangulo ibabaw kanila; . . .

“Ug ako mokunsad ug makigsulti kanimo didto: ug ako magakuha sa Espiritu nga anaa kanimo [Moises], ug kini igabutang ko kanila; ug sila magadala sa lulan [palas-anon] sa



katawhan uban kanimo, aron dili ka magpas-an niini nga mag-inusara lamang.”¹

Mga pulong kini gikan sa karaang panahon, apan ang mga paagi sa Ginoo wala mausab.

Sa kasamtangan dinhi sa Simbahan, ang Ginoo mitawag og 317 ka Seventy, nagserbisyo sa 8 ka korum, aron pagtabang sa Napulog Duha ka mga Apostoles sa pagpas-an sa palas-anon nga gisangun sa Unang Kapangulohan. Malipayon akong mibati nianang responsibilidad sa kahiladman gayud sa akong kalag, sama sa akong isigka-Kaigsoonan. Hinoon, dili lamang kami ang bugtong nga mitabang niining mahimayaong buhat. Isip mga miyembro sa Simbahan sa tibuok kalibutan, kitang tanan adunay talagsaong oportunidad sa pagpanalangin sa kinabuhi sa uban.

Akong nakat-unan gikan sa atong minahal nga propeta unsa ang gikinahanglan sa atong katawhan nga gihampak sa unos—gugma, mga pagampo, ug pasalamat alang sa matina-bangong mga kamot.

Karong hapon matag usa kanato mopataas sa atong tuong kamot ug mopaluyo sa Unang Kapangulohan ug Korum sa Napulog Duha ka mga Apostoles isip mga propeta, mga manalagna, ug mga tigpadayag sa Ang Simbahan ni Jesukristo sa mga

Santos sa Ulahing mga Adlaw. Dili kini kay basta naandan lang nga buhaton, wala sab kini ireserba alang niadtong gitawag sa kinatibuk-ang pagserbisyo sa Simbahan. Ang pagpaluyo sa atong mga lider usa ka pribilehiyo; moabut kini uban sa personal nga responsibilidad sa pagpakigbahin sa ilang palas-anon ug mahimong mga disipulo ni Ginoong Jesukristo.

Si Presidente Monson miingon:

Gilibutan kita niadtong nanginahanglan sa atong pagtagad, atong pagdasig, atong suporta, atong paghupay, atong kamabination—mga sakop man sila sa pamilya, mga higala, mga kaila, o mga estranghero. Kita ang mga kamot sa Ginoo dinhi sa yuta, uban sa mando nga moserbisyo ug motabang sa Iyang mga anak. Nagdepende Siya sa matag usa kanato. . . .

“ . . . Nga maingon nga gibuhat ninyo kini ngadto sa usa sa labing gagmay niini . . . , gibuhat usab ninyo kini kanako.’ [Mateo 25:40].”²

Molihok ba kita uban sa gugma kon ang oportunidad moabut kanato aron mobisita, motawag sa telepono, mohatag og sulat, o mogahin og adlaw sa pagtubag sa mga panginahanglan sa uban? O sama ba kita sa batan-ong lalaki nga mimatuod nga misunod sa tanang mga sugo sa Dios:

“Kanang tanan ako nang ginabantayan: unsa pa may akong kulang?”

“Kaniya mitubag si Jesus nga nag-ingon, Kon buot ikaw mamahingpit, lumakaw ka, ibaligya ang imong kabtangan, ug ang halin ihatag sa mga kabus, ug makabaton kag bahandi didto sa langit: ug unya umanhi ka ug sumunod kanako.”³

Ang batan-ong lalaki gitawag ngadto sa mas dako nga serbisyo sa kiliran sa Ginoo sa paghimo sa buhat sa gingharian sa Dios dinhi sa yuta, apan iya kining gitalikdan, “kay daghan man ugod siyag katigayunan.”³

Unsa man diay mahitabo sa atong yutan-ong mga katigayunan? Atong makita unsay mahimo sa usa ka buhawi ngadto niini sa pipila lamang ka minutos. Importante kaayo kini alang sa matag usa kanato nga maningkamot sa pagtigum og mga bahandi didto sa langit—gamit ang atong panahon, mga talento, ug kabubut-on diha sa pagserbisyo sa Dios.

Si Jesukristo padayon nga mipadangat sa tawag nga “Umanhi ka ug sumunod kanako.”⁵ Iyang gilicut ang Iyang yutang natawhan kauban ang Iyang mga sumusunod sa paagi nga wala maghunahuna sa kaugalingon. Siya padayon nga naglakaw uban kanato, nagbarug tupad kanato, ug naggiya kanato. Ang pagsunod sa Iyang hingpit nga ehemplo mao ang pag-ila ug pagtahud sa Manluluwas, kinsa mipas-an sa tanan natong mga

palas-anon pinaagi sa Iyang sagrado ug makaluwas nga Pag-ula, ang labing importante nga buhat sa pagserbisyo. Unsay Iyang gihangyo sa matag usa kanato mao nga kita makahimo ug andam nga mopas-an sa makalipay nga “lulan” [palas-anon] sa pagkadisipulo.

Samtang didto ko sa Oklahoma, duna koy oportunidad nga mahimamat ang pipila ka pamilya nga nagub-an tungod sa grabe nga alimpulos. Samtang nakig-istorya ko sa pamilya Sorrels, natandog gayud ako ilabi na sa kasinatian sa ilang anak nga babaye, si Tori, nga nianang higayuna grade five sa Plaza Towers Elementary School. Siya ug ang iyang inahan ania uban kanato karon.

Si Tori ug pipila ka mga higala namasok sa kasilyas aron mopasilong samtang ang buhawi miguba sa eskwelahan. Paminaw samtang akong basahon ang kaugalingong asoy ni Tori bahin nianang adlaw:

“Nakadungog ko nga adunay miigo sa atup. Abi nako og mibagtik lang to nga ulan. Ang ugong nagkakusog. Nag-ampo ko nga ang Langitnong Amahan manalipod namong tanan ug maluwas kami. Sa kalit lang nakadungog kami og kusog nga tingog nga morag vacuum cleaner, ug ang atup sa ibabaw gayud namo nahanaw. Adunay grabe kaayo nga hangin ug ang mga butang nga nangahulog nanglupad bisag asa ug miigo sa lainlaing parte sa akong lawas. Mas ngitngit sa gawas ug morag itom tan-awon ang kalangitan, apan dili—mao kadto ang sulod sa buhawi. Mipiyong lang ko, nga naglaum ug nag-ampo nga mahuman ra kini dayon.

“Sa kalit lang nahilum kini.

“Dihang gibuka nako ang akong mga mata, akong nakita ang napadpad nga stop sign diha gayud sa akong atubangan! Hapit gani kini mosabud sa akong ilong.”⁶

Si Tori, iyang inahan, tulo sa iyang mga igsoon, ug daghang higala nga didto usab sa eskwelahan uban niya milagrusong naluwas niana nga buhawi; pito sa ilang mga kauban sa eskwelahan wala maluwas.

Nianang tapos sa semana ang mga kaisaonang priesthood mihatag og

daghang panalangin ngadto sa mga miyembro nga nag-antus sa unos. Mapainubsanon kong mihatag ni Tori og panalangin. Samtang akong gipandong ang akong mga kamot sa iyang ulo, usa ka paboritong kasulatan ang misantup sa akong hunahuna: “Ako molakaw diha sa inyong atubangan. Ako anaa sa inyong tuo nga kamot ug sa inyong wala, ug ang akong Espiritu mahimo nga anaa sa inyong mga kasingkasing, ug ang akong mga anghel anaa libut kaninyo, aron sa pagtabang kaninyo.”⁷

Akong gitambagan si Tori sa paghinumdom sa adlaw dihang ang sulugoon sa Ginoo mipandong sa iyang mga kamot sa iyang ulo ug namulong nga siya gipanalipdan sa mga anghel atol sa unos.

Ang pagtabang aron pagluwas sa usag usa, bisan sa unsang kahimtang, usa ka mahangturong pagsukod sa gugma. Kini nga matang sa pagserbisyo ang akong nasaksihan nianang semanaha sa Oklahoma.

Kasagaran mahatagan kita og oportunidad sa pagtabang sa uban sa panahon sa ilang panginahanglan. Isip mga miyembro sa Simbahan, matag usa kanato adunay sagradong responsibilidad “sa pagtambayayong sa usag



usa nga mga alantuson, nga sila mahimo nga magaan,”⁸ “sa pagbangutan uban niadto nga nagbangutan,”⁹ ug “ipataas ang mga kamot sa nawad-an og paglaum, ug lig-una ang mga tuhod nga mahuyang.”¹⁰

Mga kaisaonang, ang Ginoo mapasalamaton kaayo alang sa matag usa kaninyo, tungod sa dili maihap nga mga oras ug mga buhat sa pagserbisyo, madako man o magamay, nga inyong gihatag matag adlaw.

Si Haring Benjamin mitudlo diha sa Basahon ni Mormon, “Kon kamo anaa sa pag-alagad sa inyong mga isigkawatawo kamo anaa lamang sa pag-alagad sa inyong Dios.”¹¹

Ang pag-focus sa pagserbisyo sa atong mga kaisaonang makagiya kanato sa paghimo og balaanong mga desisyon sa atong inadlaw nga pagpakabuhi ug makaandam kanato sa paghatag og bili ug gugma sa unsay gihigugma sa Ginoo. Kon buhaton nato kini, kita makasaksi sa ato mismong kinabuhi nga kita Iyang mga disipulo. Kon kita manginlabut sa Iyang buhat, atong mabati ang Iyang Espiritu uban kanato. Molambo ang atong pagpamatuod, pagtuo, pagsalig, ug gugma.

Ako nasayud nga ang akong Manunubos buhi, nga mao si Jesukristo, ug Siya nakigsulti pinaagi sa Iyang propeta, ang minahal nga si Presidente Thomas S. Monson, karon, sa atong panahon.

Unta kitang tanan makakaplag og hingpit nga kalipay nga moabut gikan sa sagradong pagserbisyo sa pagtambayayong sa mga alantuson sa usag usa, bisan kadtong mga yano ug gagmay, mao ang akong pag-ampo sa pangalan ni Jesukristo, amen. ■

MUBO NGA MGA SULAT

1. Numeros 11:16–17.
2. Thomas S. Monson, “Unsa may Akong Nabuhat alang sa Usa ka Tawo Karon?” *Liahona*, Nob. 2009, 86, 87.
3. Mateo 19:20–21.
4. Mateo 19:22.
5. Mateo 19:21.
6. Kasinatian ni Victoria (Tori) Sorrels, giasoy pagbalik pagka-Ene. 16, 2014.
7. Doktrina ug mga Pakigsaad 84:88.
8. Mosiah 18:8.
9. Mosiah 18:9.
10. Doktrina ug mga Pakigsaad 81:5.
11. Mosiah 2:17.



Ni Elder Carlos H. Amado
Sa Seventy

Si Kristo ang Manunubos

[Ang sakripisyo sa Manluluwas] mipanalangin sa tanan, gikan ni Adan, nga nag-una, hangtud sa kinaulahan sa tanang katawhan.

Si Jesukristo, ang Anak sa Dios, natawo ug namatay sa talagsaon nga mga kahintang. Siya nagpakabuhi ug nagtubo sa ubos nga mga kahintang, nga walay materyal nga mga butang. Siya namulong bahin sa Iyang kaugalingon, “Ang mga milo adunay kalobluban, ug ang mga langgam sa kalangitan adunay kabatugan; apan ang Anak sa Tawo walay dapit nga kapahulayan sa iyang ulo” (Lucas 9:58).

Wala Siyay nadawat nga mga pasidungog, pabor, pag-ila, o espesyal nga pagtratar gikan sa politikanhong mga lider sa kalibutan o gikan sa relihiyusong mga lider sa Iyang panahon. Wala Siya maglingkod sa labing maayong lingkuranan sa mga sinagoga.

Simple ra ang Iyang pagsangyaw, ug bisan kon ang mga pundok sa katawhan misunod Kaniya, ang Iyang pangalagad naglangkob kanunay sa tagsa-tagsa nga pagpanalangin sa katawhan. Mipahigayon Siya og dili maihap nga mga milagro taliwala niadtong midawat Kaniya isip ang Usa nga pinadala sa Dios.

Mihatag Siya sa Iyang mga Apostoles og awtoridad ug gahum sa

pagbuhat og mga milagro “ug labi pagani ka dagkung mga buhat” kay sa niadtong Iyang gibuhat (Juan 14:12), apan wala gayud Niya idelegar kanila ang pribilehiyo sa pagpasaylo sa mga sala. Naglagot ang Iyang mga kaaway pagkadungog nila Kaniya nga miingon, “Lumakaw ka ug ayaw na pagpakasala” (Juan 8:11) o “Ang imong mga sala gipasaylo na” (Lucas 7:48). Kana nga katungod anaa lamang Kaniya tungod kay Siya ang Anak sa Dios ug tungod kay Siya ang mobayad nianang mga sala uban sa Iyang Pag-ula.

Ang Iyang Gahum ibabaw sa Kamatayon

Ang Iyang gahum ibabaw sa kamatayon usa ka balaanong kinaiya. Ang bantugan nga si Jairo, usa ka punoan sa sinagoga, nangamuyo “Kaniya sa pag-adto sa iyang balay: kay siya may bugtong man nga anak nga babaye, . . . ug kini siya himalatyon” (Lucas 8:41–42). Ang Magtutudlo midungog sa iyang pangamuyo, ug samtang naglakaw sila, usa ka sulugoon miduol ni Jairo ug miingon kaniya, “Ang imong anak patay na; ayaw na lang paghagoa

ang Magtutudlo” (Lucas 8:49). Pagsulod sa balay, si Jesus mihangyo sa tanan sa pagpanggawas, ug diha dayon, gikupitan ang kamot sa bata, Siya miingon kaniya, “Bumangon ka!” (Lucas 8:54).

Sa laing okasyon, samtang Siya nagbiyahe padulong sa siyudad sa Nain, nakakita Siya og prosesyon sa paglubong sa patay, usa ka biyuda naghilak tungod sa kamatayon sa iyang bugtong anak nga lalaki. Puno sa kalooy, Iyang gihikap ang lungon ug miingon, “Dong, ingnon ko ikaw, bangon” (Lucas 7:14). Ang katawhan, sa pagkakita sa milagro, miingon, “Usa ka dakong propeta nahitungha sa atong kinataliwad-an; ug, . . . ang Dios nagduaw sa iyang katawhan” (Lucas 7:16). Kini nga milagro mas talagsaon kay gideklarar na nila nga patay na ang batan-on ug padulong na sa paglubong kaniya. Niining duha ka batan-on nga gibuhi og balik, ang ebidensya sa Iyang awtoridad ug gahum ibabaw sa kamatayon nagpahingangha sa mga tumotoo ug mihatag og kahadlok sa mga naglagot Kaniya.

Ang ikatulong okasyon maoy labing impresibo. Si Marta, Maria, ug Lazaro managsuon nga kanunay nga bisitahon ni Kristo. Dihang ang mga tawo mipahibalo Niya nga nasakit si Lazaro, didto pa siya og duha ka adlaw una Siya miadto sa pamilya. Sa paghupay ni Marta human sa kamatayon sa iyang igsoon, Siya walay likoliko nga mipamatuod kaniya, “Ako mao ang pagkabanhaw ug ang kinabuhi: ang mosalig kanako, bisan siya mamatay, mabuhi siya” (Juan 11:25).

Dihang gihangyo sa Manluluwas ang mga tigbangutan sa pagtangtang sa bato gikan sa lubnganan, si Marta maulawong mihunghong Kaniya, “Ginoo, baho na siya karon: kay upat na man ka adlaw sa iyang pagkamatay” (Juan 11:39).

Dayon gipahinumdoman siya ni Jesus, “Wala ba ako mag-ingon kanimo nga kon motuo ikaw makita mo ang himaya sa Dios?” (Juan 11:40). Ug sa nakasulti na siya niini, Siya misinggit sa makusog nga tingog:

“Lazaro, gula ngari.

“Ug ang namatay migula” (Juan 11:43–44).



Human sa upat ka adlaw nga naa sa lubnganan si Lazaro, ang mga kaaway sa Anak sa Dios nag-atubang og dili malalis nga ebidensya nga dili mabaliwala, makapakubos, o matuis, ug sa walay hinungdan ug sa dautan nga paagi “sukad niadtong adlaw . . . ang ilang sabut mao ang pagpatay kaniya” (Juan 11:53).

Ang Bag-ong Sugo

Wala madugay, ang buhi nga Kristo nagsaulog sa Jerusalem, uban sa Iyang mga Apostoles, sa Iyang katapusang Pasko sa Pagpalabay, miestablisar sa ordinansa sa sakrament, ug mihatag kanila sa sugo nga maghigugma sa usag usa pinaagi sa sinserong pagserbisyo.

Ang Iyang Pag-antus sa Getsemani

Human niana, sa labing halangdon nga pagpakita sa Iyang gugma alang sa katawhan, ug sa hingpit nga paggamit sa Iyang kabubut-on, Siya milakaw nga maisugon ug determinado nga miatubang sa Iyang labing lisud nga pagsulay. Sa Tanaman sa Getsemani, sa tumang kamingaw, Siya misinati og pinakagrabe nga pag-antus, midugo ang matag lungag sa iyang panit. Sa hingpit nga pagkamanunoton ngadto sa Iyang Amahan, Iyang gitubos ang atong mga sala ug midala diha Kaniya sa atong mga kasakit ug balatian aron masayud unsaon sa pagtabang kanato (tan-awa sa Alma 7:11–13).

Kita may utang Kaniya ug ngadto sa atong Langitnong Amahan kay

ang Iyang sakripisyo mipanalangin sa tanan, gikan ni Adan, nga nag-una, hangtud sa kinaulahian sa tanang katawhan.

Ang Pagkondenar ug Paglansang sa Krus sa Manluluwas

Sa nahuman na ang Iyang pag-antus sa Getsemani, boluntaryo Siyang mitugyan sa Iyang kaugalingon ngadto sa Iyang mga kaaway. Gibudhian sa usa sa mga Iyaha, gidali Siya sa pagkondenar, sa paagi nga dili makiangayon ug ilegal, sa husay nga gimao-mao ug dili kompleto. Nianang samang gabii Siya giakusahan sa krimen nga panamastamas ug gihukman og kamatayon. Sa ilang kasilag ug kauhaw sa panimalos—tungod kay

misaksi Siya kanila nga Siya Anak sa Dios—ang Iyang mga kaaway nag-kunsabo aron ikondenar Siya ni Pilato. Alang niana nga katuyoan, giusab nila ang pasangil nga panamastamas ngadto sa rebelyon aron ang Iyang kamatayon ipaagi sa paglansang sa krus.

Ang pagkondenar Kaniya taliwala sa mga Romano labaw pang mapintas: ang ilang mga pamugalbugal ug pagtamay bahin sa Iyang espirituhanong gingharian, ang makauulaw nga pagkorona gamit ang korona nga mga tunok, ang masakit nga paglatigo Kaniya, ug ang dugayng pag-antus sa Iyang Pagkalansang sa krus maoy tawataw nga pasidaan sa matag tawo kinsa tingali makaako sa pagdeklarar sa iyang kaugalingon nga Iyang disipulo.

Sa matag yugto sa Iyang pag-antus, ang Manunubos sa kalibutan mipakita og talagsaong pagkontrolar sa kaugalingon. Kanunay Siyang naghunahuna sa pagpanalangin sa uban; uban sa kamabination ug kalumo, mihangyo Siya kang Juan sa pag-amuma sa Iyang inahan, si Maria. Mihangyo Siya sa Iyang Amahan sa Langit sa pagpasaylo sa mga tigpatay kinsa milansang Kaniya. Sa pagkatuman sa Iyang buhat dinhi sa yuta, Iyang gitugyan ang Iyang espiritu ngadto sa Dios ug mihimo sa Iyang katapusang pagginhawa. Ang pisikal nga lawas ni Kristo gidala

ngadto sa lubnganan ug nagpabilin didto sulod sa tulo ka adlaw.

Ang Buhat sa Manunubos taliwala sa mga Patay

Samtang ang Iyang mga disipulo nag-antus sa kagulan, pagkadismaya, ug kawalay kasiguroan, ang atong Manluluwas, sa laing hugna sa mahimayaong plano sa Iyang Amahan, mipalugway sa Iyang pangalagad sa bag-ong paagi. Sa mubong panahon nga tulo ka adlaw, walay puas Siya nga mitrabaho sa pag-organisar sa dakong buhat sa kaluwasan sa mga patay. Kadto maoy nahimong pipila sa labing puno sa paglaum nga mga adlaw alang sa pamilya sa Dios. Niadto nga pagbisita Siya miorganisar sa Iyang matinud-anong mga sumusunod aron sila modala sa maayong balita sa katubsanian niadtong kinsa sa buhi pa wala masayud sa mahimayaong plano o misalikway niini. Karon duna na silay oportunidad nga makalingkawas sa ilang pagkabinilanggo ug matubos sa Dios sa mga buhi ug sa mga patay (tan-awa sa D&P 138:19, 30–31).

Unang mga Bunga sa Pagkabanhaw

Kay nahuman na ang Iyang buhat sa kalibutan sa espiritu, mibalik Siya sa yuta—sa paghiusa sa Iyang espiritu uban sa Iyang pisikal nga lawas sa

kahangturan. Bisan kon Siya klarong mipakita sa Iyang gahum ibabaw sa kamatayon, ang mga asoy sa kasulatan niadtong Iyang gibuhi pag-usab sa wala pa ang Iyang Pagkabanhaw nagpakita nga sila mibalik lang sa usa ka kinabuhi nga milagrusong gipatas-an; mamatay gihapon sila.

Si Kristo ang unang nabanhaw ug dili na gayud mamatay, naghupot sa kahangturan og usa ka hingpit, mahangturon nga lawas. Sa Iyang nabanhaw na nga kahimtang, mipakita Siya ngadto ni Maria, kinsa sa pagkaila kaniya, misugod dayon sa pagsimba Kaniya. Ang atong Manunubos, uban sa dakong kalumo, mipasidaan kaniya kabahin sa Iyang bag-o ug mahimayaong kahimtang. “Ayaw na ako pagkupti; kay wala pa ako makasaka ngadto sa Amahan” (Juan 20:17)—naghatag og dugang nga saksi nga ang Iyang pangalagad sa kalibutan sa espiritu tinuod ug kompleto. Sa wala madugay, gamit ang mga pulong nga mikumpirma sa katinuod sa Iyang Pagkabanhaw, Siya miingon, “Mosaka ako ngadto sa akong Amahan ug inyong Amahan; sa akong Dios ug inyong Dios” (Juan 20:17). Human moadto sa Iyang Amahan, mibalik Siya pag-usab ug mipakita sa Iyang mga Apostoles. “Iyang gipakita kanila ang iyang mga kamot ug ang iyang kilid. Busa ang mga tinun-an nangalipay, sa ilang pagkakita sa Ginoo” (Juan 20:20).

Ang Manunubos Mobalik

Mopamatuod ko nga si Kristo mobalik sa paagi nga lahi kaayo kay sa Iyang unang pag-anhi. Moabut Siya uban sa gahum ug himaya uban sa mga matarung ug matinud-anong mga Santos. Moabut Siya isip Hari sa mga Hari ug Ginoo sa mga Ginoo, isip ang Prinsipe sa Kalinaw, ang gisaad nga Mesiyas, ang Manluluwas ug Manunubos, sa paghukom sa mga buhi ug mga patay. Siya akong gihigugma ug giserbisuhan sa tibuok nakong kasingkasing, ug nangamuyo ko nga kita unta moserbisyo uban sa kalipay ug pahinungod, ug nga kita magpabilin nga matinud-anong ngadto Kaniya hangtud sa katapusan. Sa Iyang pangalan, si Jesukristo, amen. ■





Ni Linda S. Reeves

Ikaduhang Magtatambag sa Kinatibuk-ang
Kapanguloan sa Relief Society

Panalipod gikan sa Pornograpiya—usa ka Panimalay nga Nag-focus kang Kristo

Ang pinakamaayong filter sa kalibutan, . . . mao ang personal nga filter nga naggikan sa kahiladman ug sa malungtarong pagpamatuod.

Minahal kong mga kaigsoonan, karon bulahan kaayo ko nga nia sa kongregasyon ang akong 13 ka kinamagulangang mga apo. Tungod niini nakapangutana ko “Unsay gusto nakong mahibaloan sa akong mga apo?” Karong buntaga gusto kong mopranka og sulti sa akong pamilya ug kaninyo.

Kaming mga lider nagkadako ang kabalaka bahin sa kadaot nga dala sa pornograpiya sa kinabuhi sa mga miyembro ug sa ilang mga pamilya. Si Satanas, miatake gamit ang makalingla kaayong paagi.

Usa ka rason nga nia ta sa yuta mao ang pagkat-on sa pagkontrolar sa atong pagbati sa mortal nato nga lawas. Kining hinatag sa Dios nga mga pagbati nag-aghat kanato sa pagminyo ug pagpanganak. Ang pagminyo sa lalaki ug babaye nga magdala og mga anak sa mortalidad nagpasabut sab

nga mahimong matahum, maanindot nga kasinatian nga magbugkos sa managhigugmaay, mohiusa sa espiritu ug sa lawas, ug magdala sa hingpit nga kalipay samtang magkat-on kita nga unahon ang uban. Si Presidente Spencer W. Kimball mitudlo nga sa kaminyoon, “ang kapikas . . . mahimong mas labaw pa sa kinabuhi sa bana o sa asawa, ug . . . [walay] laing interes [o] tawo [o] butang nga himoong pryoridad labaw kay sa kapikas. . . .

“Ang kaminyoon nagkinahanglan gayud og hingpit nga pagdapig ug hingpit nga pagkamaunungon”¹

Daghang tuig nang milabay usa sa among anak maklaro nga nagsubo. Misulod ko sa iyang kwarto, diin didto kinasingkasing siyang mitug-an ug giingnan ko niya nga didto siya sa balay sa iyang higala ug wa tuyoa nga nakakita ug law-ay ug hugawng mga hulagway ug buhat sa telebisyon

tali sa usa ka lalaki ug babaye nga walay mga saput. Mibakho siya ug misulti unsa kalain sa iyang gibati bahin sa iyang nakita ug nangandoy nga mapapas kini sa iyang hunahuna. Nagpasalamat kaayo ko nga mitug-an siya nako, nakahigayon ko sa paghupay sa iyang inosente ug nagsubo nga kasingkasing ug gitabangan siya unsaon sa paglingkawas niini pinaagi sa Pag-ula sa atong Manluluwas. Nahinumdom ko sa sagrado nakong mga pagbati dihang nangluhod mi, isip inahan ug anak, ug nangayo og tabang sa atong Langitnong Amahan.

Daghang mga bata, kabatan-onan, ug mga hingkod ang inosenteng nabantang sa pornograpiya, apan nagkadaghang lalaki ug babaye ang mipili nga mobalik-balik og tan-aw niini hangtud maadik niini. Kini sila tingali nagtinguha sa tibuok nilang kasingkasing nga makalingkawas niini nga lit-ag apan sagad dili makahimo niini nga sila ra. Pagkaanindot kon kining atong mga minahal mopili nga motug-an diri kanato nga mga ginikanan o sa lider sa Simbahan. Magmaalamon kita nga dili magpakita nga nakalitan, nasuko, o mosalikway, kay hinungdan kini nga ila na lang usab kining ihilom.

Kita isip mga ginikanan ug lider kinahanglang padayong magtudlo ug motambag sa atong mga anak ug kabatan-onan, maminaw uban sa gugma ug kamasinabuton. Kinahanglan silang masayud sa mga peligro sa pornograpiya ug nganong mopildi kini sa kinabuhi, makawala sa Espiritu, ngil-ad ang pagbati, molingla, moguba sa relasyon, kawalay kontrol sa kaugalingon, ug usik-usik sa tanang panahon, hunahuna, ug kusog.

Ang pornograpiya sobra ka hugaw, dautan, ug dayag kaayo kay sa kaniadto. Samtang motambag kita sa atong mga anak, atong planohon ang paghimo og mga sumbanan sa pamilya ug mga limitasyon, aron mapanalipdan gayud ang atong panimalay pinaagi sa paggamit og mga filter ug settings sa elektronik nga mga himan. Mga ginikanan, nasayud ba kita nga ang mga cellphone nga dunay Internet, dili ang mga computer, ang pinakadangkong problema?²



Raymond, Alberta, Canada

Mga batan-on ug mga hingkod, kon nabitik mo ni Satanas sa pornograpiya, hinumdumi ang kamaloloy-on sa pinalangga natong Manluluwas. Nasayud ba kamo sa dakong gugma ug pagpangga ug pag-amuma sa Ginoo kaninyo, bisan karon? Ang atong Manluluwas dunay gahum sa paglimpyo ug pag-ayo kaninyo. Iyang matangtang ang kahapdos ug kasubo nga inyong gibati ug limpyuhon kamo pag-usab pinaagi sa gahum sa Iyang Pag-ula.

Kami isip mga lider, nabalaka usab kaayo bahin sa mga magtiayon ug mga pamilya niadtong mga naadik sa pornograpiya: Si Elder Richard G. Scott mihangyo: “Kon gawason kamo sa seryusong sala, ayaw itugot nga kamo ang mag-antus sa sangputanan sa mga sala sa uban. . . . Bation kamo og kalooy. . . . Bisan pa ayaw ninyo soloha ang pagbati nga responsable niana nga mga binuhatan”³ Hinumdumi wala kamo mag-inusara. Anaa ang panabang. Ang mga miting sa pagpaayo sa pagkaadik alang sa mga magtiayon anaa na, lakip ang phone-in meetings, diin ang magtiayon manawag ug moapil sa usa ka miting diha ra sa ilang balay.

Mga kaigsoonan unsaon nato pagpanalipod sa atong mga anak ug kabatan-onan? Ang filter makatabang nga mga himan, apan ang pinakamaayong filter sa kalibutan, ug ang pinakaepektibo, mao ang personal nga filter nga naggikan sa kahiladman ug sa malungtarong pagpamatuod sa gugma sa atong Langitnong Amahan ug sa maulaong sakripisyo sa atong Manluluwas sa matag usa kanato.

Unsaon nato paggiya ang atong mga anak ngadto sa tinuorayng pagkakabig ug pag-akses sa Pag-ula sa Manluluwas? Ganahan ko sa gipahayag ni propeta Nephi bahin sa gibuhay sa iyang katawhan sa paglig-on sa kabatan-onan sa iyang panahon. “Ug kami naghisgot kang Kristo, kami nalipay diha kang Kristo, kami nagsangyaw kang Kristo, [ug] kami nanagna kang Kristo . . . nga ang among mga anak mahimo nga masayud sa unsa nga tinubdan sila mahimo nga mangita alang sa kapasayloan sa ilang mga sala.”⁴

Unsaon nato sa paghimo niini diha sa atong mga panimalay? Ang uban ninyo nakadungog na sa akong gisulti sa kalisud nga gibati sa akong bana, si Mel, ug nako isip mga ginikanan ngadto sa among upat ka

batang mga anak. Samtang among giatubang ang hagit sa pagkaginkan ug pag-apas sa mga gikinahanglan sa kinabuhi, nagkinahanglan gyud mi og tabang. Kami nag-ampo ug nangaliyupo aron masayud unsay buhaton. Ang tubag klaro: “Ok ra ang mga katag sa balay ug ang mga bata wala pa kailisi ug ang ubang responsibilidad wala pa mahimo. Ang bugtong butang nga angayan gayud nga mahimo sa balay mao ang inadlawng pagtuon sa kasulatan ug pag-ampo ug ang sinemanang family home evening.”

Naningkamot mi nga mahimo kini, apan dili kini ang kanunay nga giprayoridad ug, taliwala sa kasamok, usahay makalimtan na. Giusab namo ang among focus ug gisulayan nga dili kaayo mabalaka sa dili kaayo importanting mga butang. Ang among focus mao ang pag-istoryahay, malipay, magsangyaw, ug magpamatuod kang Kristo pinaagi sa inadlawng pag-ampo ug pagtuon sa kasulatan ug sinemanang family home evening.

Usa ka higala bag-o lang mipahimangno, “Kon padugangan pa ninyo sa mga sister ang pagpabasa sa kasulatan ug pag-ampo, mas maluya na sila.

May pagbati na sila nga daghan na kaayo silag buluhaton.”

Mga kaigsoonan, kay ako nasayud gumikan sa akong kasinatian, ug sa kasinatian sa akong bana, kinahanglan kong mopamatuod sa mga panalangin sa inadlawng pagtuon sa kasulatan, pag-ampo, ug sa sinemana nga family home evening. Mao gayud kini ang mga buhat nga makawagtang sa kakapoy, mogiya sa atong kinabuhi, ug sa dugang nga proteksyon sa atong panimalay. Dayon, kon ang pornograpiya o ubang hagit moigo sa atong pamilya, makapangayo kita og tabang sa Ginoo ug makalaum og talagsaong giya gikan sa Espiritu, nasayud nga ato nang nabuhat ang gipabuhar sa atong Amahan.

Mga kaigsoonan, kon wala pa kini mahimo diha sa atong panimalay, sugdan natong tanan karon. Kon dagko na ang atong mga anak ug dili moapil kanato, atong sugdan sa atong kaugalingon. Kon ato kining buhaton, ang impluwensya sa Espiritu mosulod sa atong panimalay ug sa atong kinabuhi, sa ngadto-ngadto, mosunod ra ang mga anak.

Hinumdumi nga ang buhi nga mga Apostoles misaad sab nga kon magsiksik kita sa atong katigulangan ug mag-andam og kaugalingon natong mga ngalan alang sa templo, mapanalipdan kita karon ug sa tibuok kinabuhi samtang takus kita sa rekomend sa templo⁵. Pagkaanindot nga saad!

Mga batan-on, dawata ang responsibilidad alang sa kaugalingon ninyong espirituhanong kaayohan. Palunga ang inyong cellphone kon mahimo, mokanta og Primary song, mag-ampo og panabang, maghunahuna og kasulatan, mogawas sa sinehan, hunahunaa ang Manluluwas, takus nga moambit sa sakrament, tun-an ang *Alang sa Kalig-on sa Kabatan-onan*, mahimong ehemplo sa inyong mga higala, motug-an sa ginikanan, duola ang bishop, pagpakitabang, ug pangayo og maayong mga tambag, kon gikinahanglan.

Unsay gusto nakong mahibaloan sa akong mga apo? Gusto ko nga sila ug kamo mahibalo nga ako nasayud nga ang Manluluwas buhi ug nahigugma

kanato. Iyang gibayaran ang kantidad sa atong mga sala, apan kita kinahanglang moluhod atubangan sa atong Amahan sa Langit, sa kamapainubsanon, maghinulsol sa atong mga sala, ug mangayo Kaniya og pasaylo. Tinguhaon nato ang kausaban sa atong kasingkasing ug mga gana ug magmapainubsanon sa pagpangayo og tabang ug pasaylo sa atong mga napasakitan o napasagdan.


Nasayud ko nga si Joseph Smith nakakita sa Dios, atong Amahan, ug sa atong Manluluwas, si Jesukristo. Mopamatuod sab ko nga kita dunay buhi nga propeta dinhi sa yuta, si Presidente Thomas S. Monson. Mopamatuod sab ko nga dili gayud kamo masaag kon sundon ninyo ang tambag sa propeta sa Dios. Mopamatuod ko sa gahum sa atong mga pakigsaad ug mga panalangin sa templo.

Nasayud ko nga ang Basahon ni Mormon tinuod! Dili ko makapasa-brit sa gahum niining talagsaon nga

basahon. Nasayud lang ko nga, inubanan sa pag-ampo, ang Basahon ni Mormon adunay gahum sa pagpanalipod sa mga pamilya, paglig-on sa mga relasyon, ug paghatag og personal nga pagsalig sa Ginoo. Kining tanan akong ipamatuod sa pangalan ni Jesukristo, amen. ■

MUBO NGA MGA SULAT

1. *Mga Pagtulun-an sa mga Presidente sa Simbahan: Spencer W. Kimball* (2006), 249–250.
2. Tan-awa sa Clay Olsen, “What Teens Wish Parents Knew” (pakigpulong nga gihatag atol sa Utah Coalition Against Pornography conference, Mar. 22, 2014), utahcoalition.org.
3. Richard G. Scott, “To Be Free of Heavy Burdens,” *Liahona*, Nob. 2002, 88.
4. 2 Nephi 25:26.
5. Tan-awa sa David A. Bednar, “Ang mga Kasingkasing sa mga Anak Mobati,” *Liahona*, Nob. 2011, 24–27; Richard G. Scott, “Ang Hingpit nga Kalipay sa Pagtubos sa mga Patay,” *Liahona*, Nob. 2012, 93–95; Neil L. Andersen, “Find Our Cousins!” (pakigpulong nga gipamulong atol sa RootsTech 2014 Family History Conference, Feb. 8, 2014); lds.org/prophets-and-apostles/unto-all-the-world/find-our-cousins.





Ni Elder Neil L. Andersen
Sa Korum sa Napulog Duha ka mga Apostoles

Espirituhanong mga Alimpulos

Ayaw tuguti nga ang mga alimpulos mobuntog kaninyo. Kini ang inyong panahon—nga lig-ong mobarug isip mga disipulo ni Ginoong Jesukristo.



Mangumusta ko ninyo niining buntaga—ilabi na sa mga kabatan-onan nga ania dinhi sa Conference Center ug sa tibuok kalibutan. Kamo pinili nga henerasyon nga may piho nga padulungan, ug ako mamulong ilabi na kaninyo.

Daghang tuig ang milabay samtang mibisita mi sa among pamilya sa Florida, usa ka alimpulos ang miigo sa dili kaayo layo kanamo. Ang usa ka babaye nga nagpuyo sa mobile home misulod sa iyang kaligoanan aron motago. Ang mobile home misugod sa pag-uyog. Milabay ang pipila ka gutlo. Dayon nakadungog siya og tingog sa

iyang silingan: “Nia ko sa atubangan nga lawak.” Migawas siya sa kaligoanan, sa iyang kahingangha, iyang nadiskubrihan nga ang alimpulos mialsa ug mipadpad sa iyang mobile home, gitugpa nga nagbarug ibabaw sa mobile home sa iyang silingan.

Batan-ong mga higala, walay kalinaw sa kalibutan samtang nagkaduol ang Ikaduhang Pag-anhi sa Manluluwas. Ang kasulatan namahayag nga “ang tanan nga mga butang magkaguliyang.”¹ Si Brigham Young miingon, “Gipadayag kini ngari kanako sa pagsugod niining Simbahan, nga ang Simbahan mokatap, molambo, motubo ug molapad, ug dungan sa pagkatap sa Ebanghelyo sa taliwala sa mga kanasuran sa yuta, ang gahum ni Satanas magkakusog.”²

Dugang pa sa mga gipanagna nga mga linog ug mga gubat³ mao ang espirituhanong mga alimpulos nga makaibut kaninyo gikan sa inyong espirituhanon nga pundasyon ug mopadpad sa inyong espiritu ngadto

Ang kahoy nga nagtubo sa hangin nga palibut mas lig-on.

sa mga dapit nga wala ninyo dahuma, usahay dili kaayo ninyo mamatngunan nga naalsa na kamo.

Ang labing kuyaw nga mga alimpulos mao ang mga tintasyon sa kaaway. Ang sala kanunay nga usa ka bahin sa kalibutan, apan lisud kaayong likayan, ibaliwala, ug dili dawaton. Siyempre, dunay gamhanang pwersa nga mobuntog sa mga alimpulos sa pagpakasala. Gitawag kini og paghinulsol.

Dili tanang alimpulos sa kinabuhi inyong kaugalingong minugna. Ang uban moabut tungod sa sayop nga mga pagpili sa uban, ug ang uban moabut lang tungod kay kini ang mortalidad.

Sa bata pa, si Presidente Boyd K. Packer nag-antus sa makapabakol nga sakit nga polio. Dihang si Elder Dallin H. Oaks siyete anyos pa, ang iyang amahan kalit nga namatay. Dihang si Sister Carol F. McConkie sa Kinatibuk-ang Kapangulohan sa Young Women tin-edyer pa, ang iyang mga ginikanan nagbulag. Ang mga hagit moabut kaninyo, apan kon mosalig kamo sa Dios, makapalig-on kini sa inyong pagtuo.

Sa kalikupan, ang mga kahoy nga nagtubo sa hanginon nga palibut mas lig-on. Samtang ang hangin mohuroso sa linghod nga tanom, ang pwersa sa sulod sa kahoy mohimo og duha ka butang. Una, moaghat kini sa mga gamot nga mas mopaspas og tubo ug mas mokatay. Ikaduha, ang mga pwersa diha sa kahoy magmugna og mga cell structure nga mas mopabaga ug mas mopalig-on sa lawas ug mga



sanga sa kahoy aron mas makasugakod sa huros sa hangin. Kining mas lig-on nga mga gamot ug mga sanga moprotekta sa kahoy gikan sa hangin nga siguradong mobalik.⁴

Kamo mas bililhon gayud ngadto sa Dios kay sa kahoy. Kamo Iyang mga anak. Siya mihimo sa inyong espiritu nga lig-on ug dili mabali sa mga alimpulos sa kinabuhi. Ang mga alimpulos sa inyong kabatan-on, sama sa mga hangin nga mohuros sa linghod nga kahoy, makapalambo sa inyong espirituhanong kalig-on, mag-andam kaninyo alang sa katuigan nga moabut.

Unsaon ninyo pagpangandam sa inyong mga alimpulos? “Hinumdumi . . . kini diha sa lig-on nga sukaranan sa atong Manunubos, kinsa mao si Kristo, ang Anak sa Dios, nga kamo kinahanglan gayud nga motukod sa inyong tukuranan; nga sa panahon nga ang yawa mopadala sa iyang mapintas nga mga hangin, . . . ang iyang mga pana diha sa alimpulos, . . . sa diha nga ang tanan niya nga ulan nga yelo ug ang iyang mapintas nga unos mohampak diha kaninyo, kini walay gahum . . . sa pagbitad kaninyo . . . tungod sa lig-on nga sukaranan diin kamo natukod.”⁵ Kini ang inyong tagoanan gikan sa alimpulos.

Si Presidente Thomas S. Monson miingon, “Diin kanhi ang mga sumbanan sa Simbahan ug mga sumbanan sa katilingban hapit nahiangay, karon aduna nay halapad nga kal-ang tali-wala kanato, ug kini mas nagkadako pa.”⁶ Kini nga gintang, alang sa uban, makamugna og kusog nga espirituhanong mga alimpulos. Mopakigbahin ko og sanglitanan.

Sa miaging bulan ang Unang Kapanulohan ug ang Korum sa Napulog Duha mimantala og sulat ngadto sa mga lider sa Simbahan sa tibuok kalibutan. Ang porsyon niini mabasa: “Ang kausaban sa sibil nga balaod dili, ug sa pagkatinuod dili makausab sa moral nga balaod nga giestablisar sa Dios. Ang Dios naglaum kanato nga mosuporta ug mosunod sa Iyang mga sugo bisan pa man sa managlahing mga opinyon ug mga uso sa katilingban. Ang Iyang balaod sa kaputli klaro: ang



sekswal nga relasyon tukma lamang tali sa lalaki ug babaye kinsa legal nga naminyo isip bana ug asawa. Kami nag-awhag ninyo sa pagribyu . . . sa doktrina diha sa ‘Ang Pamilya: Usa ka Pamahayag ngadto sa Kalibutan.’”⁷

Bisan kon ang kalibutan mopalayo sa sumbanan sa balaod sa Ginoo bahin sa kaputli, kita dili. Si Presidente Monson miingon: “Ang Manluluwas sa katawhan mihulagway sa Iyang kaugalingon nga anaa sa kalibutan apan dili iya sa kalibutan. Kita usab mahimong anaa sa kalibutan apan dili iya sa kalibutan samtang atong isalikway ang sayop nga mga konsepto ug sayop nga mga pagtulunan ug magpabiling matinuoron nianang gisugo sa Dios.”⁸

Bisan kon daghang gobyerno ug inila nga mga indibidwal ang miusab sa kahulugan sa kaminyoon, ang Ginoo wala. Sukad sa sinugdanan, ang Dios mipasiugda sa kaminyoon tali sa usa ka lalaki ug usa ka babaye—si Adan ug si Eva. Gitakda niya ang mga katuyoan sa kaminyoon nga mas molabaw pa sa personal nga katagbawan ug katumanan sa mga hamtong ngadto, sa mas importante,

sa pagpatunhay og maayo nga kahimtang alang sa mga anak nga matawo, mapadako, ug maamuma. Ang mga pamilya mao ang bahandi sa langit.⁹

Nganong padayon man kita sa paghisgut bahin niini? Sama sa giingon ni Pablo, “Kami nagasud-ong man dili sa mga butang nga makita, kondili sa mga butang nga dili makita.”¹⁰ Isip mga Apostoles ni Ginoong Jesukristo, among responsibilidad ang pagtudlo sa plano sa atong Tiglalang alang sa Iyang mga anak ug sa pagpasidaan sa mga sangputanan sa pagbaliwala sa Iyang mga sugo.

Bag-ohay lang, nakig-istorya ko sa usa ka Laurel gikan sa Estados Unidos. Mokutlo ko gikan sa iyang email:

“Niining milabayng tuig pipila sa akong mga higala sa Facebook misugod na og pang-post sa ilang opinyon bahin sa kaminyoon. Daghan ang mipabor sa kaminyoon sa managsama og sekso, ug pipila sa LDS nga mga kabatan-onan ‘mi-like’ sa mga gi-post. Wala ko mokomentaryo.

“Nakahukom ko nga akong ipahayag ang akong pagtuo bahin sa tradisyonal nga kaminyoon sa mahunahunaong paagi.

“Gamit ang akong profile picture, gidugang nako ang caption nga ‘Mituo ako sa kaminyoon nga tali sa usa ka lalaki ug usa ka babaye.’ Ingon og diha-diha dayon nakadawat ko og mga mensahe. ‘Hakog ka.’ ‘Mahukmanon ka.’ Ang usa mitandi kanako



Human sa makapahayag sa iyang pagtuo sa tradisyonal nga mga kaminyoon, usa ka Laurel nakadawat og daghang negatibo nga mga mensahe gikan sa mga higala.

sa usa ka tigpanag-iyang ug ulipon. Ug nadawat nako kini nga post gikan sa suod nga higala nga lig-ong miyembro sa Simbahan: ‘Kinahanglan mouyon-uyon ka sa dagan sa panahon. Ang mga butang nag-usab-usab ug busa kinahanglang usbon nimo ang kinara-ang hunahuna.’

“Wala ko makiglalis,” siya miingon, “apan wala nako tangtanga ang akong pamahayag.”

Siya mitapos: “Usahay, sama sa giingon ni Presidente Monson, ‘Kamo kinahanglan nga mobarug nga mag-inusara.’ Unta isip mga kabatan-onan, kita maghiusang mobarug nga matinuoron sa Dios ug sa mga pagtulun-an sa Iyang buhi nga mga propeta.”¹¹

Angayan kitang mabalaka ilabi na niadtong nanlimbasug sa pagkaibog sa sama og sekso. Ang ingon nga panlimbasug grabe kaayo nga pag-sulay. Gusto nakong ipahayag ang akong gugma ug pagdayeg niadtong maisugong miatubang niining pagsulay sa pagtuo ug nagpabiling matinuoron sa mga sugo sa Dios!¹² Apan ang tanan, bisan unsa pa man ang ilang mga desisyon ug gituohan, angayan

lamang hatagan sa atong kaayo ug konsiderasyon.¹³

Ang Manluluwas nagtudlo nato sa paghigugma dili lang sa atong mga higala apan niadtong mosupak usab kanato—ug bisan kadtong mosalikway kanato. Siya miingon: “Kay kon mao ray inyong higugmaon ang mga nahigugma kaninyo, unsa may balus nga madawat ninyo?” . . . Ug kon mao ray inyong yukboan ang inyong mga kaigsoonan, unsa may inyong nahimo nga labaw pa kay sa uban?”¹⁴

Si Propeta Joseph Smith mipasidaan kanato sa “pagbantay sa pagpakaaron-ingnong katarung sa kaugalingon” ug sa pagpalambo sa atong gugma sa tanang mga tawo hangtud nga kita mobati “nga kita buot mopas-an kanila.”¹⁵ Sa ebanghelyo ni Jesukristo, walay luna ang pamugal-bugal, pagpanlupig, o pagtamay.

Kon kamo dunay pangutana bahin sa tambag gikan sa mga lider sa Simbahan, palihug isulti ang inyong tinuod nga mga problema ngadto sa inyong mga ginikanan ug mga lider. Nagkinahanglan kamo og kalig-on nga naggikan sa pagsalig sa mga propeta sa Ginoo. Si Presidente Harold B. Lee miingon: “Ang bugtong kasiguroan nga anaa kanato isip mga miyembro niini nga simbahan mao . . . magkat-on sa pagpaminaw sa tanan nga mga pulong ug mga sugo nga ang Ginoo mohatag pinaagi sa Iyang propeta. . . . Maanaay pipila ka mga butang nga nagkinahanglan og pailub ug hugot nga pagtuo. Mahimo nga kamo dili makauyon unsa ang moabut. . . . Mahimo nga kini mosupak sa inyong politikanhong mga panghunahuna . . . inyong sosyal nga mga panghunahuna . . . mosamok . . . sa inyong sosyal nga kinabuhi. Apan kon kamo maminaw niini nga mga butang, ingon og kini gikan sa ba-ba sa Ginoo Mismo, . . . ‘ang mga ganghaan sa impyerno dili makabuntog batok kanimo . . . ug ang Ginoong Dios mopatibulaag sa mga gahum sa kangitngit gikan sa imong atubangan . . .’ (D&P 21:6).”¹⁶

Ang laing lig-on nga proteksyon gikan sa mga alimpulos sa kinabuhi mao ang Basahon ni Mormon.

Dihang si Presidente Henry B.

Eyring usa pa ka tin-edyer, ang iyang pamilya mibalhin sa usa ka bag-ong siyudad. Nakita niya nga ang pagbalhin dili makalingaw ug diyutay ra ang mga higala. Mibati siya nga wala siya mahiangay sa mga estudyante sa iyang gieskwelahan. Ang iyang alimpulos nagliyok-liyok. Unsay iyang gihimo? Migahin siya og daghang panahon sa Basahon ni Mormon, mi-basa niini og kadaghan.¹⁷ Milabay ang katuigan, si Presidente Eyring mipamatuod: “[Ganahan] ko nga mobalik-balik og basa sa Basahon ni Mormon ug mokuha og espirituhanong kalig-on niini sa kanunay.”¹⁸ “[Kini] ang labing impluwensyal nga sinulat nga pagpamatuod nga anaa kanato nga si Jesus mao ang Kristo.”¹⁹

Ang Ginoo mihatag kaninyo og laing paagi sa pagbarug nga lig-on, usa ka espirituhanong gasa nga mas gamhanan kay sa mga alimpulos sa kaaway! Siya miingon, “Magbarug . . . sa balaan nga mga dapit, ug dili mabalhin.”²⁰

Dihang tin-edyer pa ko, dunay 13 lang ka templo sa Simbahan. Karon 142 na. Otsentay singko porsiyento sa mga miyembro sa Simbahan nagpuyo na sulod sa 200 ka milya (320 km) sa usa ka templo. Ang Ginoo mihatag sa inyong henerasyon nga adunay mas daghan sa Iyang balaang mga templo nga magamit kay sa uban pang henerasyon sa kasaysayan sa kalibutan.

Nakasulay na ba kamo nga magbarug sulod sa templo, nagsinina og puti, naghulat aron mopahigayon og bunyag? Unsay inyong gibati? Dunay pagbati sa kabalaan diha sa templo. Ang kalinaw sa Manluluwas mobuntog sa nagliyok-liyok nga mga alimpulos sa kalibutan.

Ang inyong pagbati sulod sa templo usa ka sumbanan sa unsay gusto ninyong bation sa inyong kinabuhi.²¹

Pangitaa ang inyong mga apohan ug inyong kaparyentihan nga naguna kaninyo. Dad-a ang ilang mga ngalan ngadto sa templo.²² Kon kamo makaila sa inyong mga katigulangan, makita ninyo ang mga sumbanan sa kinabuhi, kaminyoon, mga anak; mga sumbanan sa pagkamatarung;



ug usahay mga sumbanan nga gusto ninyong likayan.²³

Kadugayan diha sa templo kamo makakat-on og daghan pa bahin sa Paglalang sa kalibutan, bahin sa mga sumbanan diha sa kinabuhi nila ni Adan ug ni Eva, ug ang labing importante, bahin sa atong Manluluwas, nga si Jesukristo.

Akong minahal nga batan-ong mga kaigsoonan, gihigugma namo kamo, gidayeg namo kamo, ug nag-ampo alang kaninyo. Ayaw tuguti nga ang mga alimpulos mobuntog kaninyo. Kini ang inyong panahon—nga lig-ong mobarug isip mga disipulo ni Ginoong Jesukristo.²⁴

Pagtukod kamo og mas lig-ong tukuranan diha sa lig-on nga sukaranan sa inyong Manunubos.

Hatagi og mas hingpit nga pagtagad ang Iyang dili hitupngan nga kinabuhi ug mga pagtulun-an.

Mas makugihong mosunod sa Iyang ehemplo ug sa Iyang mga sugo.

Mas mohangup og maayo sa Iyang gugma, sa Iyang kalooy ug grasya, ug sa gamhanang mga gasa sa Iyang Pag-ula.

Kon buhaton ninyo kini, ako mo-saad kaninyo nga makita ninyo kon para sa unsa kining mga alimpulos—mga pagsulay, mga tintasyon, mga

makabalda, o mga hagit nga makatabang alang sa inyong paglambo. Ug kon magpuyo kamo nga matarung matag tuig, akong ipaniguro kaninyo nga ang inyong mga kasinatian sa kanunay momatuod kaninyo nga si Jesus mao ang Kristo. Ang espirituhanong tukuranan nga inyong gitumban mahimong lig-on ug luwas. Magmaya kamo nga ang Dios mibutang kaninyo dinhi aron mahimong kabahin sa katapusang pagpangandam alang sa mahimayaong pagbalik ni Kristo.

Ang Manluluwas miingon, “Dili ko kamo pagabiyaan nga daw mga ilo: Ako mobalik ra kaninyo.”²⁵ Kini ang Iyang saad kaninyo. Nasayud ko nga kini nga saad tinuod. Ako nasayud nga Siya buhi, sa pangalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 88:91.
2. *Discourses of Brigham Young*, sel. John A. Widtsoe (1954), 72.
3. Tan-awa sa Dallin H. Oaks, “Pagpangandam alang sa Ikaduhang Pag-anhi,” *Liahona*, Mayo 2004, 7–10.
4. Tan-awa sa A. Stokes, A. H. Fitter, ug M. P. Coutts, “Responses of Young Trees to Wind and Shading: Effects on Root Architecture,” *Journal of Experimental Botany*, vol. 46, no. 290 (Sept. 1995), 1139–46.
5. Helaman 5:12.
6. Thomas S. Monson, “Gahum sa Prie-
sthood,” *Liahona*, Mayo 2011, 66.
7. Sulat sa Unang Kapangulohan, Mar. 6,

2014; tan-awa usab sa David A. Bednar, “Kita Nagtuo sa Kaputli,” *Liahona*, Mayo 2013, 41–44; Dallin H. Oaks, “Dili Magbaton og Laing Dios,” *Liahona*, Nob. 2013, 72–75; *Alang sa Kalig-on sa Kabatan-onan* (booklet, 2011), 35–37.

8. Thomas S. Monson, *Liahona*, Mayo 2011, 67.
9. Si Elder Russell M. Nelson miingon: “Ang kaminyoon mao ang sinugdanan sa katinglan. . . . Kini nga kahiusahan dili kay sa bana ug asawa lamang; naglangkob kini sa panagsangga uban sa Ginoo” (“Pag-amuma sa Kaminyoon,” *Liahona*, Mayo 2006, 36). Tan-awa usab sa Mateo 19:5–6.
10. 2 Mga Taga-Corinto 4:18.
11. Personal correspondence and conversation, Mar. 17, 2014; tan-awa usab sa Thomas S. Monson, “Magmaisugon sa Pagbarug nga Mag-inusara,” *Liahona*, Nob. 2011, 60–67.
12. Tan-awa sa Jeffrey R. Holland, “Pagtabang Niadtong Nanglimbasug sa Pagkaibog sa Sama og Sekso,” *Liahona*, Okt. 2007, 40–43.
13. Bisan sa dihang ang antikristo nga si Korihor nagtinguha sa pagguba sa pagtuo sa mga tawo, ang mga balaod sa Dios nana-lipod kaniya batok sa silot: “Walay balaod batok sa usa ka tinuohan sa tawo; kay kini hingpit nga supak sa mga sugo sa Dios nga adunay usa ka balaod nga kinahanglan modala sa tawo ngadto sa dili managsama nga mga baruganan. . . . Kon ang tawo nagtinguha sa pag-alagad sa Dios, kini iyang kahigayunan; . . . apan kon siya dili motuo diha kaniya walay balaod nga mo-silot kaniya” (Alma 30:7, 9). Ang ika-onse nga artikulo sa hugot nga pagtuo mabasa, “Kami nag-angkon sa kahigayunan sa pag-simba sa Dios nga Makagagahum sumala sa pagmando sa among kaugalingon nga tanlag, ug nagtugot sa tanan nga mga tawo sa sama nga kahigayunan, sa pagpasimba kanila sa bisan unsa nga paagi, asa, o unsa ang ilang buot simbahon.”
14. Mateo 5:46–47.
15. *Mga Pagtulun-an sa mga Presidente sa Simbahan: Joseph Smith* (2007), 518, 519.
16. *Mga Pagtulun-an sa mga Presidente sa Simbahan: Harold B. Lee* (2000), 84–85; tan-awa usab sa Robert D. Hales, “Kinatibuk-ang Komperensya: Paglig-on sa Pagtuo ug Pagpamatuod,” *Liahona*, Nob. 2013, 6–8.
17. Tan-awa sa Robert I. Eaton ug Henry J. Eyring, *I Will Lead You Along: The Life of Henry B. Eyring* (2013), 40.
18. Henry B. Eyring, *Choose Higher Ground* (2013), 38.
19. Henry B. Eyring, *To Draw Closer to God* (1997), 118.
20. Doktrina ug mga Pakigsaad 87:8; tan-awa usab Doktrina ug mga Pakigsaad 45:32.
21. Tan-awa sa Doktrina ug mga Pakigsaad 52:14.
22. Tan-awa sa Neil L. Andersen, “Find Our Cousins!” (pakigpulong nga gihatag atol sa RootsTech 2014 Family History Conference, Feb. 8, 2014); lds.org/prophets-and-apostles/unto-all-the-world/find-our-cousins.
23. Tan-awa sa David A. Bednar, “Ang mga Kasingkasing sa mga Anak Mobati,” *Liahona*, Nob. 2011, 24–27.
24. Tan-awa sa Helaman 7:9.
25. Juan 14:18.



Ni Presidente Henry B. Eyring
Unang Magtatambag sa Unang Kapangulohan

Usa ka Labing Bilihon nga Kabilin sa Paglaum

Kon kamo mopili sa paghimo o pagtuman og pakigsaad uban sa Dios, kamo ang mopili kon magbilin ba kamo og kabilin sa paglaum niadtong mosunod sa inyong ehemplo.

Minahal nga mga kaigsoon, ang uban ninyo gidapit nganhi sa miting pinaagi sa mga misyonaryo sa Ang Simbahan ni Jesukristo sa mga Santos sa Ulahing mga Adlaw. Kadto nga mga misyonaryo tingali midapit na kaninyo sa pagpili nga makigsaad sa Dios pinaagi sa pagpabunyag.

Ang uban ninyo naminaw tungod kay inyong gidawat ang pagdapit gikan sa usa ka ginikanan, sa usa ka asawa, o tingali sa usa ka bata, nga midapit kaninyo sa paglaum nga kamo mopili aron ang mga pakigsaad nga inyong gihimo uban sa Dios masentro og balik sa inyong kinabuhi. Pipila kaninyo nga naminaw mipili na nga mobalik sa Manluluwas ug mibati na karon sa tumang kalipay sa Iyang paghangup.

Kinsa ug bisan asa man kamo, anaa sa inyong mga kamot ang kalipay sa mas daghan pang mga tawo kay sa inyong mahunahunaan karon. Matag adlaw ug matag oras makapili kamo

sa paghimo o pagtuman og pakigsaad uban sa Dios.

Sa matag higayon nga naa kamo sa dalan aron mapanunod ang gasa sa kinabuhing dayon, anaa sa inyong mga kamot ang oportunidad nga ikapakita sa daghang tawo ang dalan paingon sa mas dakong kalipay. Kon kamo mopili sa paghimo o pagtuman og pakigsaad uban sa Dios, kamo ang mopili kon magbilin ba mo og kabilin sa paglaum niadtong mosunod sa inyong ehemplo.

Kamo ug ako napanalanginan og saad sa ingon niana nga kabilin. Utang nako ang akong kalipay sa kinabuhi ngadto sa usa ka tawo nga wala pa nako mahimamat sa mortal nga kinabuhi. Siya usa ka ilo nga nahimong usa sa akong apohan sa tuhod. Nagbilin siya kanako og labing bililhong kabilin sa paglaum. Mosulti ko ninyo og gamay bahin sa iyang parte sa pagmugna nianang kabilin alang nako.

Iyang ngalan mao si Heinrich Eyring. Natawo siya sa adunahan kaayo

nga pamilya. Ang iyang amahan, si Edward, dunay dakong yuta sa Coburg, nga karon mao ang Germany. Ang iyang inahan si Viscountess Charlotte Von Blomberg. Ang amahan ni Viscountess mao ang tinugyanan sa mga yuta sa Hari sa Prussia.

Si Heinrich mao ang unang anak nga lalaki nila ni Charlotte ug Edward. Si Charlotte namatay sa edad nga 31, human sa pagpanganak sa iyang ikatulong anak. Si Edward namatay sa wala madugay, sa pagkahurot sa tanan niyang kabtangan ug kwarta sa wala molampus nga negosyo. Siya 40 anyos pa. Gibiyaan niya ang tulo ka nailo nga mga anak.

Si Heinrich, ang akong apohan sa tuhod, nawad-an og mga ginikanan ug dakong kalibutanong kabilin. Walay kwarta. Girekord niya sa iyang kasaysayan nga ang iyang paglaum mao na lang ang pag-adto sa Amerika. Bisan kon siya walay pamilya o mga higala didto, mibati siya og paglaum bahin sa pag-adto sa Amerika. Giuna niya og adto ang New York City. Dayon mibalhin siya sa St. Louis, Missouri.

Didto sa St. Louis ang usa ka kauban niya sa trabaho usa ka Santos sa Ulahing mga Adlaw. Gikan niya nakakuha siya og kopya sa pamphlet nga gisulat ni Elder Parley P. Pratt. Gibasa niya kini ug dayon gitun-an ang matag pulong nga iyang makuha bahin sa mga Santos sa Ulahing mga Adlaw. Nag-ampo siya aron masayud kon duna ba gayuy mga anghel nga magpakita sa mga tawo, kon duna bay buhi nga propeta, ug kon nakaplagan na ba niya ang tinuod ug gipadayag nga relihiyon.

Human sa duha ka bulan nga ma-inampingong pagtuon ug pag-ampo, si Heinrich nagdamgo nga giingnan siya nga magpabunyag. Ang usa ka tawo kansang ngalan ug priesthood akong gipasidunggan, si Elder William Brown, mao ang mopahigayon sa ordinansa. Si Heinrich nabunyagan sa usa ka linaw nga tubig sa ulan pagka-Marso 11, 1855, sa alas 7:30 sa buntag.

Mituo ko nga si Heinrich Eyring nasayud nianang higayuna nga ang akong gitudlo ninyo karon tinuod. Siya nasayud nga ang kalipay sa

kinabuhing dayon naggikan sa panaghiusa sa pamilya nga magpadayon sa kahangturan. Bisan kon bag-ohay pa lang kaayo niyang nakaplagn ang plano sa Ginoo alang sa kalipay, nasayud siya nga ang iyang paglaum sa mahangturong kalipay magdepende sa gawasong mga pagpili sa uban nga mosunod sa iyang ehemplo. Ang iyang paglaum sa mahangturong kalipay nagdepende sa mga tawo nga wala pa matawo.

Isip kabahin sa kabilin sa paglaum sa among pamilya, nagbilin siya og journal ngadto sa iyang mga kaliwatan.

Niana nga journal mabati nako ang iyang gugma ngari kanamo kinsa mosunod kaniya. Sa iyang mga pulong mabati nako ang iyang paglaum nga ang iyang mga kaliwatan mopili unta sa pagsunod kaniya diha sa dalan balik ngadto sa atong langitnong panimalay. Siya nasayud nga dili usa ka dakong pagpili ang paghimo niini apan daghang ginagmay nga mga pagpili. Mokutlo ko gikan sa iyang journal:

“Sukad niadtong nakadungog ko ni Elder Andrus nga namulong . . . kanunay na ko nga motabong sa miting sa mga Santos sa Ulahing mga Adlaw ug panagsa ra kaayo ko nga dili makatambong sa miting, kay akong katungdanan ang pagtambong niini.

“Gisulat nako kini sa akong journal aron ang akong mga anak unta mosunod sa akong ehemplo ug dili gayud mobaliwala niining importante nga katungdanan [nga makigtigum] uban sa mga Santos.”¹

Si Heinrich nasayud nga sa mga sakrament miting makabag-o kita sa atong saad nga kanunayng mohinumdom sa Manluluwas ug magbaton sa Iyang Espiritu uban kanato.

Kana nga Espiritu ang mitabang kaniya sa misyon diin siya gitawag mga pipila lang ka bulan human niya gidawat ang pakigsaad sa bunyag. Gibilin niya isip kabilin ang iyang ehemplo sa pagpabiling matitud-anon sa iyang misyon sulod sa unom ka tuig didto sa gitawag nga Indian Territories. Sa pag-release kaniya sa iyang misyon, siya milakaw ug mikuyog sa wagon train



gikan sa Oklahoma ngadto sa Salt Lake City, gibana-banang mga 1,100 ka milya (1,770 km) ang gilay-on.

Wala madugay human niana gitawag siya sa propeta sa Dios nga mobalhin ngadto sa southern Utah. Gikan didto midawat siya og laing tawag nga magmision sa iyang yutang natawhan sa Germany. Unya gidawat niya ang pagdapit sa usa ka Apostol ni Ginoong Jesukristo nga motabang sa pagpalambo sa pundok sa mga Santos sa Ulahing mga Adlaw sa amihanang Mexico. Gikan didto gitawag na usab siya isip full-time nga misyonaryo sa Mexico City. Gituman niya kadto nga mga tawag. Gilubong siya sa usa ka gamayng sementeryo sa Colonia Juárez, Chihuahua, Mexico.

Akong gisulti kini nga mga kama-tuoran dili sa pagpangangkong nga halangdon kaayo siya o sa iyang mga gihimo o sa iyang mga kaliwatan. Kini akong gisulti aron pagpasidungog kaniya sa ehemplo sa hugot nga pagtuo ug paglaum nga anaa sa iyang kasingkasing.

Gidawat niya kadto nga mga tawag tungod sa iyang hugot nga pagtuo nga ang nabanhaw nga Kristo ug ang

atong Langitnong Amahan mipakita kang Joseph Smith didto sa kakahoyan sa estado sa New York. Gidawat niya kini tungod kay siya dunay hugot nga pagtuo nga ang mga yawe sa priesthood sa Simbahan sa Ginoo gipahiuli uban sa gahum sa pagbugkos sa mga pamilya sa kahangturan, kon sila may igong hugot nga pagtuo lamang sa pagtuman sa ilang mga pakigsaad.

Sama ni Heinrich Eyring, nga akong katigulangan, tingali kamo ang una sa inyong pamilya nga mogiya sa dalan paingon sa kinabuhing dayon diha sa dalan sa sagradong mga pakigsaad nga gihimo ug gituman uban sa kakugi ug hugot nga pagtuo. Matag pakigsaad nagdala og mga katungdanan ug mga saad. Kanatong tanan, sama kang Heinrich, kadto nga mga katungdanan usahay yano apan kasagaran lisud. Apan hinumdumi, ang mga katungdanan usahay kinahanglang lisud tungod kay ang katuyoan niini mao nga kita makapadayon sa dalan aron magpuyo sa kahangturan uban sa Langitnong Amahan ug sa Iyang Hinigugmang Anak, si Jesukristo, kauban ang pamilya.

Hinumdumi ninyo ang mga pulong sa basahon ni Abraham:

“Ug dihay usa nga nagtindog uban kanila nga sama sa Dios, ug siya mii-ngon ngadto kanila kinsa uban kaniya: Kita manaog, kay adunay luna didto, ug modala kita niini nga mga butang, ug kita magbuhat og usa ka yuta diin kini sila mahimo nga makapuyo;

“Ug kita mosulay kanila dinhi, aron pagsuta kon sila mobuhat ba sa tanan nga mga butang bisan unsa ang isugo sa Ginoo nga ilang Dios ngadto kanila;

“Ug sila kinsa nagpuyo sumala sa ilang kinabuhi sa wala pa dinhi sa yuta pagatugahan; ug sila kinsa wala magpuyo sumala sa ilang kinabuhi sa wala pa dinhi sa yuta walay himaya diha sa sama nga gingharian uban niadto kinsa nagpuyo sumala sa ilang kinabuhi sa wala pa dinhi sa yuta; ug sila kinsa nagpuyo sumala sa ilang kinabuhi dinhi sa yuta adunay himaya nga idugang diha sa ilang mga ulo hangtud sa kahangturan.”²

Ang pagpuyo sumala sa atong kinabuhi dinhi sa yuta magdepende sa atong paghimo og mga pakigsaad uban sa Dios ug matinud-anong mobuhat sa mga katungdanan nga gikinahanglan niini ngari kanato. Nagkinahanglan kini og hugot nga pagtuo kang Jesukristo isip atong Manluluwas sa pagtuman sa sagradong mga pakigsaad sa tibuok kinabuhi.

Tungod kay sila si Adan ug Eva napukan, kita dunay tintasyon, mga pagsulay, ug kamatayon isip atong kinatibuk-ang kabilin. Apan, ang atong mahigugmaong Langitnong Amahan mihatag kanato og gasa sa Iyang Hinigugmang Anak, si Jesukristo, isip atong Manluluwas. Kanang mahinungdanong gasa ug panalangin sa Pag-ula ni Jesukristo nagdala og kinatibuk-ang kabilin: sa saad nga Pagkabanhaw ug posibilidad sa kinabuhing dayon sa tanang matawo.

Ang labing mahinungdanong panalangin sa Dios, ang kinabuhing dayon, moabut lamang kanato kon kita mohimo og mga pakigsaad nga gitanyag diha sa tinuod nga Simbahan ni Jesukristo pinaagi sa Iyang awtorisado nga mga sulugoon. Tungod sa Pagkapukan, kitang tanan nagkinahanglan sa makalimpyong mga epekto sa bunyag ug sa pagpandong sa mga kamot aron madawat ang gasa sa Espiritu Santo. Kini nga mga ordinansa kinahanglang ipahigayon niadtong naghupot og tukmang awtoridad sa priesthood. Dayon, uban sa tabang sa Espiritu ni Kristo ug sa Espiritu Santo, kita makatuman sa tanang mga pakigsaad nga atong gihimo uban sa Dios, ilabi na sa mga gitanyag diha sa Iyang mga templo. Niana lamang nga paagi, ug niana nga tabang, nga ang tawo makapangayo sa iyang makatarungang katungod sa kabilin isip anak sa Dios diha sa pamilya sa kahangturan.

Sa uban nga naminaw nako, kana daw pangandoy nga imposibling matuman.

Kamo nakakita og matinud-anong mga ginikanan nga naguol sa mga anak nga misalikway o mipili sa dili pagtuman sa ilang mga pakigsaad sa Dios. Apan kadto nga mga ginikanan makakaplag og kahupayan ug

paglaum gikan sa ubang mga kasinatian sa mga ginikanan.

Ang anak nga mga lalaki ni Alma ug ni Haring Mosiah nagabasol sa grabe nilang pagrebelde batok sa mga pakigsaad ug mga sugo sa Dios. Si Alma ang Batan-on nakakita sa iyang anak nga si Corianton nga nausab gikan sa grabeng pagpakasala ngadto sa matinud-anong pagserbisyo. Ang Basahon ni Mormon nagrekord usab sa milagro sa mga Lamanite nga misalikway sa ilang tradisyon nga kasilagan ang pagkamatarung gipulihan sa pagpakigsaad nga andam mamatay aron magpabilin ang kalinaw.

Usa ka anghel ang gipadala ngadto sa batan-ong si Alma ug anak nga mga lalaki ni Mosiah. Ang anghel miabut tungod sa hugot nga pagtuo ug mga pag-ampo sa ilang mga amahan ug sa katawhan sa Dios. Tungod niana nga mga ehemplo sa gahum sa Pag-ula nga naglihok diha sa mga kasingkasing sa tawo, makadawat kamo og kadasig ug kahupayan.

Ang Ginoo mihatag natong tanan og tinubdan sa paglaum samtang kita maninguha sa pagtabang sa atong mga minahal nga madawat ang ilang mahangturong kabilin. Siya mihimo og mga saad kanato samtang kita padayong maningkamot sa pagpundok sa katawhan ngadto Kaniya, bisan kon sila mobalibad sa Iyang pagdapit sa paghimo niini. Ang ilang pagbalibad



nakapasubo Kaniya, apan dili Siya mohunong, ingon man usab kita. Mipakita Siya sa hingpit nga ehemplo alang kanato uban sa Iyang makanunayong gugma: “Ug usab, kapila ba Ako magtigum kaninyo ingon sa usa ka himongaan nga magtigum sa iyang mga piso sa ilawom sa iyang mga pako, oo, O kamo nga mga katawhan sa balay ni Israel, kinsa nangapukan; oo, O kamo nga mga katawhan sa balay ni Israel, kamo nga nagpuyo sa Jerusalem, ingon nga kamo nanga-pukan; oo, kapila ba Ako magtigum kaninyo ingon sa usa ka himongaan nga magtigum sa iyang mga piso, ug dili gayud kamo mosunod.”³

Makasalig kita nianang walay pagkapakyas nga tinguha sa Manluluwas nga dad-on ang tanang espiritu nga mga anak sa Langitnong Amahan balik sa ilang panimalay uban Kaniya. Matag matinud-anong ginikanan, apohan, ug apohan sa tuhod adunay ingon niana nga tinguha. Ang Langitnong Amahan ug ang Manluluwas mao ang atong hingpit nga mga ehemplo sa unsay atong mahimo ug angayng himoon. Dili nila ipamugos ang pagkamatarung tungod kay ang pagkamatarung kinahanglang pilion. Gihimo Nila nga ang pagkamatarung dali natong mailhan, ug gipakita Nila kanato nga ang mga bunga niini lamian.

Matag tawo nga natawo sa kalibutan makadawat sa Kahayag ni Kristo, nga motabang nato nga makita ug mabati unsay matarung ug unsay sayop. Ang Dios mipadala og mortal nga mga sulugoon kinsa, pinaagi sa Espiritu Santo, makatabang nato nga makaila unsay gusto Niya nga ipabuhat kanato ug unsa ang Iyang gidili. Ang Dios mihimong madanihon sa pagpili sa matarung pinaagi sa pagpabati kanato sa mga epekto sa atong mga pagpili. Kon kita mopili sa matarung, makakaplag kita og kalipay—sa katapusan. Kon kita mopili sa dautan, moabut ang kagulan ug pagmahay—sa katapusan. Kadto nga mga epekto sigurado. Apan kasagaran malangay kini alang sa usa ka katuyoan. Kon ang panalangin moabut diha-diha dayon, ang pagpili sa matarung dili makamugna

og pagtuo. Ug kay ang kagulan-an usab usahay malangay, nagkinahanglan kini og hugot nga pagtuo alang sa sayo nga pagpangayo og kapasayloan sa sala imbis unya na kon mabati na nato ang makaguol ug sakit nga mga epekto niini.

Si Amahang Lehi naguol sa mga pagpili nga gihimo sa pipila niya ka mga anak ug sa ilang mga pamilya. Siya usa ka halangdon ug buotan nga tawo—usa ka propeta sa Dios. Kanunay siya nga nagpamatuod sa atong Manluluwas, si Jesukristo, ngadto kanila. Usa siya ka ehemplo sa kamasulundon ug pagserbisyo sa dihang ang Ginoo mitawag kaniya sa pagbiya sa iyang tanang kalibutanong mga kabtangan aron maluwas ang iyang pamilya gikan sa kalaglagan. Sa katapusan sa iyang kinabuhi, mipamatuod gihapon siya ngadto sa iyang mga anak. Sama sa Manluluwas—ug bisan pa sa iyang gahum nga masayud sa ilang kasingkasing ug makakita sa subo o nindot nga umaabut—si Lehi padayong mitabang aron madala ang iyang pamilya ngadto sa kaluwasan.

Karon minilyon sa mga kaliwatan ni Amahang Lehi ang naghatag og hinungdan sa iyang paglaum alang kanila.

Unsay inyong mahimo ug akong mahimo aron makakat-on sa ehemplo ni Lehi? Makahimo kamo niini pinaagi sa mainampoong pagtuon sa kasulatan ug pinaagi sa pagpaniid.

Mosugyot ko nga mahimo ninyong hunahunaon ang mubo ug taas nga panglantaw samtang naningkamot kamo sa paghatag og kabilin sa paglaum ngadto sa inyong pamilya. Sa mubo nga panglantaw, dunay mga kagubot ug si Satanas mogamit sa iyang gahum aron manintal kanato. Ug dunay mga butang nga angayng hulaton sa mapailubong paagi, sa hugot nga pagtuo, kay nasayud nga ang Ginoo mobuhat diha sa Iyang kaugalingong panahon ug paagi.

Dunay mga butang nga mahimo ninyong buhaton og sayo, samtang bata pa ang inyong mga minahal. Hinumdumi nga ang kada adlaw nga pamilya nga pag-ampo, pamilya nga pagtuon sa kasulatan,



ug pagpakigbahin sa atong pagpamatuod sa sakrament miting mas sayon ug mas epektibo kon ang mga anak bata pa. Ang mga bata kasagaran mas sensitibo sa Espiritu kay sa atong nasayran.

Kon modako na sila, mahinumduman nila ang mga himno nga ilang gikanta uban kaninyo. Gani mas labaw pa kay sa paghinumdom sa musika, mahinumduman nila ang mga pulong sa kasulatan ug pagpamatuod. Ang Espiritu Santo mopahinumdom kanila sa tanang mga butang, apan ang mga pulong sa kasulatan ug mga himno mas molungtad gayud. Kadto nga panumduman mobitad nila pabalik kon sila mahisalaag sa mubo nga panahon, tingali sa mga katuigan, gikan sa dalan sa kinabuhing dayon.

Kinahanglanon nato ang taas nga panglantaw kon ang atong mga minahal bitaron sa kalibutan ug ang pagduha-duha daw mobuntog sa ilang pagtuo. Kita dunay hugot nga pagtuo, paglaum, ug gugmang putli sa paggiya nato ug sa paglig-on nila.

Ako kanang nakita isip magtatambag sa duha ka buhi nga mga propeta sa Dios. Sila mga indibidwal nga may talagsaong personalidad. Apan sila pareho nga positibo. Kon dunay tawo nga mopahibalo bahin sa problema sa Simbahan, ang kanunay nilang tubag kay “Mamaayo ra ang tanan.” Mas nasayud sila bahin sa problema kay sa tawo nga nagpahibalo sa problema.

Nasayud usab sila sa paagi sa Ginoo, ug busa sila malaumon kanunay bahin sa Iyang gingharian. Sila

nasayud nga Siya ang nangulo niini. Siya gamhanan sa tanan ug Siya nagpakabana. Kon tugutan ninyo Siya nga mangulo sa inyong pamilya, mamaayora ang tanan.

Pipila sa mga kaliwatan ni Heinrich Eyring daw nahisalaag. Apan daghan sa iyang mga apo sa apo sa tuhod moadto sa mga templo sa Dios inigkatalas 6:00 sa buntag aron mopahigayon og mga ordinansa alang sa mga katigulangan nga wala pa nila mahimamat. Moadto sila tungod sa kabilin sa paglaum nga iyang gibilin. Nagbilin siya og kabilin nga giangkong sa daghan sa iyang mga kaliwatan.

Human sa tanan natong mahimo diha sa hugot nga pagtuo, ang Ginoo mohatag og hinungdan sa atong paglaum alang sa mas dakong mga panalangin sa atong pamilya labaw pa sa atong mahunahuna. Gusto niya unsay labing makaayo kanila ug kanato, isip Iyang mga anak.

Kitang tanan mga anak sa buhi nga Dios. Si Jesus sa Nazaret mao ang Iyang Hinigugmang Anak ug atong nabanhaw nga Manluluwas. Kini mao ang Iyang Simbahan. Anaa niini ang mga yawe sa priesthood, ug busa ang mga pamilya mahimong mohangtud. Kini ang atong labing bililhon nga kabilin sa paglaum. Ako mopamatuod nga kini tinuod sa pangalan ni Jesukristo, amen. ■

MUBO NGA MGA SULAT

1. Tan-awa sa Henry Eyring reminiscences, 1896, typescript, Church History Library, 16–21.
2. Abraham 3:24–26.
3. 3 Nephi 10:5.



Gipresentar ni Presidente Dieter F. Uchtdorf
Ikaduhang Magtatambag sa Unang Kapangulohan

Ang Pagpaluyo sa mga Opisyales sa Simbahan

Gisugyot nga atong paluyohan si Thomas Spencer Monson isip propeta, manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga Adlaw; si Henry Bennion Eyring isip Unang Magtatambag sa Unang Kapangulohan; ug si Dieter Friedrich

Uchtdorf isip Ikaduhang Magtatambag sa Unang Kapangulohan.

Kadtong uyon ipakita kini.

Kadtong supak, kon aduna, mahimong mopakita niini.

Gisugyot nga kita mopaluyo kang Boyd Kenneth Packer isip Presidente sa Korum sa Napulog Duha ka mga

Apostoles, ug ang mosunod isip sakop niana nga korum: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, ug Neil L. Andersen.

Kadtong uyon, palihug ipakita kini.

Si bisan kinsa nga mosupak mahimong mopakita niini.

Gisugyot nga atong paluyohan ang mga magtatambag sa Unang Kapangulohan ug ang Napulog Duha ka mga Apostoles isip mga propeta, manalagna, ug tigpadayag.

Ang tanang uyon, palihug ipakita kini.

Ang dili uyon, kon aduna, sa samang paagi.

Karon atong i-release uban sa sinserong pasalamat si Elder Tad R. Callister isip General Authority ug sakop sa Kapangulohan sa mga Korum sa Seventy.

Kadtong moapil namo sa paghatag og pasalamat, palihug ipakita kini.

Gisugyot nga atong paluyohan si Elder Lynn G. Robbins isip sakop sa Kapangulohan sa mga Korum sa Seventy.

Ang tanang uyon, palihug ipakita kini.

Kadtong supak, kon aduna.

Gisugyot nga atong i-release ang mosunod nga mga Area Seventies, sugod sa Mayo 1, 2014: Pedro E. Abularach, Julio A. Angulo, Victor A. Asconavieta, Duck Soo Bae, Juan C. Barros, Colin H. Bricknell, Dennis C. Brimhall, Thomas M. Cherrington, Kim B. Clark, Wynn R. Dewsnup, Rodolfo C. Franco, G. Guillermo Garcia, Julio C. González, Mauro Junot De Maria, Larry S. Kacher, David E. LeSueur, Paulo C. Loureiro, Steven J. Lund, Abraham Martinez, Hugo E. Martinez, Sergey N. Mikulin, Christopher B. Munday, Hirofumi Nakatsuka, Chikao Oishi, Alejandro S. Patanía, Renato M. Petla, Anatoly K. Reshetnikov, Jonathan C. Roberts, J. Craig Rowe, Robert B. Smith, Warren G. Tate, Hesbon O. Usi, Taniela B. Wakolo, Randy Wkinston, ug Chi Hong (Sam) Wong.



Washington, Utah, USA



Kadtong kinsa moapil kanamo sa pagpadayag sa pasalamat sa ilang maayo kaayo nga pagserbisyo palihug ipakita kini.

Gisugyot nga atong i-release uban sa pasalamat sila si Brother Russell T. Osguthorpe, David M. McConkie, ug Matthew O. Richardson isip kinatibuk-ang kapangulohan sa Sunday School.

I-release usab nato ang tanang miyembro sa Sunday School general board.

Ang tanan nga moapil namo sa pagpasalamat niini nga mga kaigsoonan sa ilang talagsaong pagserbisyo ug debosyon, palihug ipakita kini.

Gisugyot nga atong paluyohan isip bag-ong mga sakop sa Unang Korum sa Seventy Chi Hong (Sam) Wong ug Jorg Klebingat, ug isip bag-ong mga sakop sa Ikaduhang Korum sa Seventy Larry S. Kacher ug Hugo E. Martinez.

Ang tanang uyon, palihug ipakita kini.

Ang dili uyon, sa samang paagi.

Gisugyot nga atong paluyohan ang mosunod isip bag-ong mga Area Seventy: Julio Cesar Acosta, Blake R. Alder, Alain C. Allard, Taiichi Aoba, Carlos F. Arredondo, Vladimir N. Astashov, Jorge T. Becerra, Michael H. Bourne, Romulo V. Cabrera, Jose Claudio F. Campos, Nicolas Castañeda, Walter Chatora, Fook Chuen Zeno Chow, J. Kevin Ence, K. Mark Frost,

Mauricio G. Gonzaga, Leonard D. Greer, Jose Isaguirre, Michael R. Jensen, Adolf Johan Johansson, Tae Gul Jung, Wisit Khanakham, Serhii A. Kovalov, Sergio Krasnoselsky, Milan F. Kunz, Bryan R. Larsen, Geraldo Lima, W. Jean-Pierre Lono, Tasara Makasi, Khumbulani Mdletshe, Dale H. Munk, Eduardo A. Norambuena, Yutaka Onda, Raimundo Pacheco De Pinho, Marco Antonio Rais, Steven K. Randall, R. Scott Runia, Alexey V. Samaykin, Edwin A. Sexton, Raul H. Spitale, Carlos Walter Treviño, ug Juan A. Urrea.

Ang tanang uyon, palihug ipakita kini.



Kadtong supak, kon aduna.

Gisugyot nga atong paluyohan si Tad R. Callister isip kinatibuk-ang presidente sa Sunday School, uban ni John S. Tanner isip unang magtatambag ug Devin G. Durrant isip ikaduhang magtatambag.

Kadtong uyon ipakita kini.

Si bisan kinsa nga supak ipakita kini.

Atong nahibaloan nga sila si Brother Tanner ug Brother Durrant nagserbisyo karon isip mga presidente sa misyon ug, busa, wala sila karon sa Conference Center.

Magsugod sila sa ilang opisyal nga pagserbisyo sa kinatibuk-ang kapangulohan sa Sunday School pagkahuman sa ilang pagka-release isip mga presidente sa misyon karong Hulyo 2014.

Gisugyot nga atong paluyohan ang ubang mga General Authority, mga Area Seventy, ug kinatibuk-ang mga kapangulohan sa auxiliary ingon nga naglangkob karon.

Kadtong uyon, palihug ipakita kini.

Ang supak mahimong mopakita niini.

Salamat kaninyo, mga kaigsoonan, alang sa inyong pagboto ug sa inyong nagpadayon nga hugot nga pagtuo, ug mga pag-ampo.

Ato na karong hangyoon ang bag-ong gitawag nga mga General Authorities sa paglingkod sa entablado. ■

Report sa Church Auditing Department, 2013

Gipresentar ni Kevin R. Jergensen

Tigdumalang Direktor, Church Auditing Department

Ngadto sa Unang Kapangulohan sa Ang Simbahan ni Jesukristo sa mga Santos sa Ulahing mga Adlaw

Minahal nga mga Kaigsoonan: Sumala sa gisulti sa pagpada-yag sa sekyon 120 sa Doktrina ug mga Pakigsaad, ang Konseho sa Paggasto sa Ikapulo—naglangkob sa Unang Kapangulohan, sa Korum sa Napulog Duha ka mga Apostoles, ug sa Presiding Bishopric, nagtugot sa paggasto sa mga pundo sa Simbahan. Ang mga departamento sa Simbahan mogasto sa mga pundo nga pinasubay sa giaprubahan nga mga badyet ug sumala sa mga polisiya ug mga pamaagi sa Simbahan.

Ang Church Auditing Department, nga gilangkuban sa mga propesyonal nga dunay mga kredensyal ug independente sa tanang ubang mga departamento sa Simbahan, dunay responsibilidad sa pagpahigayon og mga audit alang sa katuyoan sa paghatag og resonable nga kasiguroan kabahin

sa mga amot nga nadawat, mga galastuhan nga nahimo, ug sa pagbantay sa mga kabtangan sa Simbahan.

Base sa mga pag-audit nga gihimo, ang Church Auditing Department nagtuo nga, ang tanang mga materyal nga butang, mga amot nga nadawat, mga paggasto nga gihimo, ug mga kapanguhaan sa Simbahan alang sa tuig 2013 narekord ug nadumala sumala sa tukmang mga pamaagi sa pagsubay, gitugutan nga mga badyet, ug mga polisiya ug mga pamaagi sa Simbahan. Ang Simbahan nagsunod sa mga pagtulun-an nga gitudlo ngadto sa mga miyembro niini sa pagpuyo sumala sa badyet, paglikay sa utang, ug pagtigum batok sa panahon sa panginahanglan.

Matinahurong gisumiter,
Church Auditing Department
Kevin R. Jergensen
Tigdumalang Direktor ■

Estatistikanhong Report, 2013

Gipresentar ni Brook P. Hales

Secretary sa Unang Kapangulohan

Alang sa impormasyon sa mga miyembro sa Simbahan, ang Unang Kapangulohan miisya sa mosunod nga estatistikanhong report kalabut sa pagtubo ug kahimtang sa Simbahan kutob Disyembre 31, 2013.

Mga Unit sa Simbahan

Mga Stake.....	3,050
Mga Mission.....	405
Mga District.....	571
Mga Ward ug Branch.....	29,253

Mga Miyembro sa Simbahan

Total nga Gidaghanon sa mga miyembro sa Simbahan.....	15,082,028
Bag-ong Children of Record.....	115,486
Mga Kinabig nga Nabunyagan.....	282,945

Mga Misyonaryo

Full-Time nga mga Misyonaryo.....	83,035
Mga Church-Service Missionaries.....	24,032

Mga Templo

Mga Templo nga Napahinugod sa tuig 2013 (Tegucigalpa Honduras Temple).....	1
Mga Templo nga Magamit hangtud sa Katapusan sa Tuig.....	141





Ni Elder Russell M. Nelson

Sa Korum sa Napulog Duha ka mga Apostoles

Ipakita ang Inyong Pagtuo

Sa tanang adlaw, sa inyong pagsubay padulong sa mahangturong padulngan, lig-una ang inyong pagtuo. Ipahayag ang inyong pagtuo! Ipakita ang inyong pagtuo!

Minahal kong mga kaisaanan, among ipahayag ang dako namong gugma ug pasalamat kaninyo. Nagpasalamat mi sa among mga buluhaton nga kauban kamo.

Di pa lang dugay diha sa eroplano, ang among piloto mipahibalo nga masinati namo ang problema sa biyahe ug ang tanang pasahero kinahanglang motaud og tarung sa ilang seat belt. Tuod man, miabut gayud ang pagtay-og. Kusog gyud ang pagtay-og. Atbang sa agianan mga duha ka linya sa akong luyo, dunay ginerbyus nga babaye. Sa matag us-os og kalit ug sa pagtay-og, mosinggit siya og kusog. Nangingkamot ang iyang bana sa paghupay niya apan wala magsilbi. Ang dili kapugngan niyang pagsinggit nagpadayon hangtud nawala na ang pagtay-og ngadto sa luwas nga pagtugpa. Atol sa mga panahon sa iyang kabalaka, nalooy ko niya. Tungod kay ang hugot nga pagtuo mao man ang tambal sa kahadlok, nag-ampo ko nga unta malig-on ang iyang pagtuo.

Unya, sa dihang namiya na ang mga pasahero, ang bana niining babayehana nakig-istorya nako. Mii-ngon siya, “Pasayloa ko nakuyawan



kaayo ang akong asawa. Ang bugtong paagi nga siya akong mahupay mao ra ang pag-ingon niya nga ‘si Elder Nelson sakay niini, dili ka ngayng mabalaka.’”

Di ko sigurado kon ang akong pagkasakay naghatag niya og kahupayan, apan moingon ko nga usa sa mga

reyalidad sa mortal nga kinabuhi mao nga ang atong pagtuo pagasulayan ug hagiton. Usahay ang mga pagsulay moabut nga ingon og modangat na ang kamatayon. Alang niining nahadlok nga babaye, ang pagtay-og sa eroplano nagpakita sa usa sa mga higayon diin atong ipakita ang kalig-on sa atong pagtuo.

Kon hisgutan nato ang pagtuo—ang pagtuo nga makabalhin og mga bungtod—dili pagtuo sa kinatibuk-an ang atong gihisgutan apan pagtuo diha sa Ginoo nga si Jesukristo. Ang pagtuo diha sa Ginoo nga si Jesukristo mapalig-on samtang kita magkat-on Kaniya ug magsunod sa atong tinuohan. Ang doktrina ni Jesukristo gidesinyo sa Ginoo sa pagtabang aron ang atong pagtuo molambo. Sa pinulongan karon, hinoon, ang pulong nga *tinuohan* lahi-lahi ang pagsabut sa managlahi nga mga tawo.

Ang pulong nga *tinuohan* nagpasabut og “pagbugkos” o “kaduha ibugkos” ngadto sa Dios.¹ Ang atong ikapangutana tingali mao, lig-on ba ang atong pagkabugkos ngadto sa Dios aron ikapakita kini, o nabugkos ba kita ngadto sa ubang butang? Sama pananglit, may nadunggan kong nag-istorya niadtong Lunes sa buntag bahin sa propesyonal nga mga dula nga gihimo sa milabayng Domingo. Para niini nga mga fan, naghunahuna ko kon ang butang nga ilang gusto gyud kaayo kabahin lang ba niini nga dula.

Tingali makapangutana kita, asa man diay ang atong pagtuo? Naa ba sa team? Naa ba sa brand? Naa ba sa mga sikat? Bisan ang pinakasikat nga team mapildi. Ang mga sikat molubad. Ngadto lang sa Usa ka Tawo may kasiguroan ang inyong pagtuo, ug kana ngadto ni Ginoong Jesukristo. Ug kinahanglan ninyong ipakita ang inyong pagtuo!

Ang Dios mideklarar sa nag *una* sa Iyang Napulo ka Sugo, “Dili ka magbaton og lain nga mga dios sa atubangan ko.”² Miingon usab Siya, “Paghunahuna ngari kanako sa matag hunahuna; ayaw pagduha-duha, ayaw kahadlok.”³ Apan ang kadaghanan maghunahuna lang sa ilang kwarta



sa banko o sa ilang isigkatawo nga himoon nilang modelo.

Ang mga doktor, mga magtutudlo, ug mga politiko, sagad nga pagasulayan sa pagtuo. Sa paningkamot sa ilang mga tumong, maklaro o matago ba unsay ilang tinuohan? Nabugkos ba sila balik sa Dios o sa tawo?

Ingon niana ang akong pagsulay mga dekadang milabay dihang usa sa akong kaubang magtutudlo sa pagkadoktor nasuko nako sa kapakyas sa pagbulag sa akong propesyunal nga kahibalo gikan sa akong konbiksyon sa tinuohan. Siya mihangyo nga *dili* nako tipunon ang duha. Unsaon nako paghimo ana? Ang tinuod maoy tinuod! Dili kini mabahin, ug bisan ang unsang bahin niini dili ikabaliwala.

Motumaw man ang kamatuoran gikan sa siyentipikong laboratoryo o sa pagpadayag, ang tanang kamatuoran naggikan sa Dios. Ang tanang kamatuoran kabahin sa ebanghelyo ni Jesukristo.⁴ Bisan pa niana, gihangyo ko nga itago ang akong pagtuo. Wala ko motuman sa hangyo sa akong kauban. Akong gipakita ang akong pagtuo!

Sa tanang paningkamot sa propesyon, ang tukma nga sumbanan sa pagkahusto gikinahanglan. Ang mga eskolar malipay sa ilang kagawasan

sa pagpahayag. Apan ang hingpit nga kagawasan dili masinati kon ang porsyon sa kahibalo hukman nga “dili madawat” sa lagda sa tawo.

Ang espirituhanong kamatuoran dili mabaliwala—labi na ang balaang mga sugo. Ang pagtuman sa balaang mga sugo magdala og panalangin, kanunay! Ang pagsupak sa balaang mga sugo makawala sa mga panalangin, kanunay!⁵

Adunay daghang problema niining kalibutan tungod kay kini puno sa dili hingpit nga mga tawo. Ang ilang mga tuyo ug tinguha naimpluwensyahan sa ilang pagtuo o kakulang niini. Daghan ang miuna sa laing prayoridad kay sa Dios. Ang uban mopakita nga ang tinuohan dili importante sa modernong kinabuhi. Sa tanang panahon, ingon man sa karon adunay mamugal-bugal o manaway sa kagawasan sa tinuohan. Ang uban mobasol sa tinuohan nga hinungdan sa mga kasakit sa kalibutan. Tinuod, dunay mga higayon nga ang mga kagubot mahitabo sa ngalan sa tinuohan. Apan ang pagpakabuhi sa putli nga tinuohan, buot ipasabut ang paningkamot nga mahimong disipulo ni Jesukristo, maoy paagi sa kinabuhi ug inadlawng pasalig nga maghatag

og balaang giya. Samtang nagsunod kamo sa inyong tinuohan, inyong gigamit ang inyong pagtuo. Inyong gipakita ang inyong pagtuo.

Nahibalo ang Ginoo nga ang Iyang mga anak kinahanglang magkat-on unsaon sa pagpangita Kaniya. “Kay higpit ang pultahan,” miingon Siya, “ug pig-ot ang agianan nga padulong sa . . . kahimayaan . . . , ug pipila diha ang nakakita niini.”⁶

Ang kasulatan naghatag og usa sa pinakamaayong paagi sa pagpangita sa atong agianan ug magpabilin niini. Ang kahibalo sa kasulatan naghatag usab og talagsaong proteksyon. Sama pananglit, sa tibuok kasaysayan, ang mga sakit sama sa “bughat o impeksyon sa pagpanganak” mikutlo sa kinabuhi sa daghang inosenteng mga inahan ug mga anak. Apan anaa sa Daang Tugon ang hustong mga baruganan sa pag-atiman sa masakitong mga pasyente, gisulat kapin na sa 3,000 ka tuig ang milabay!⁷ Daghang tawo ang nangamatay tungod kay ang pagpangita og kahibalo sa tawo wala madungani sa pagpatalinghug sa pulong sa Ginoo!

Mahal kong mga kaigsoonan, unsay mawala sa atong kinabuhi kon kita “kanunayng managtoon, [apan] bisan

unsaon dili gayud managpakab-ot sa kahibalo sa kamatuoran?”⁸ Kita maka-angkon og dakong kahibalo gikan sa kasulatan ug makabaton og inspirasyon pinaagi sa pag-ampo inuban sa pagtuo.

Ang pagbuhat niini makatabang nato sa paghimo sa inadlaw natong mga desisyon. Ilabi na kon ang mga balaod sa tawo gimugna ug gipatum-an, kinahanglang ang balaod sa Dios mao gayud ang atong sumbanan. Sa pagsulbad sa kontrobersyal nga mga problema, unahon nato sa pagpangita ang giya sa Dios.

Kinahanglan nga kita “mopahisama sa tanan nga mga kasulatan ngari kanato . . . alang sa atong kaayohan ug sa atong pagkat-on.”⁹ Mameligro kita kon bahinon nato ang atong kaugalingon sa pag-ingon nga “sa pribado nako nga kinabuhi” o gani “sa pinakamaayo nakong kinaiya.” Kon ang tawo mobahinbahin sa iyang kinabuhi ngadto sa managlahi nga bahin, dili niya makab-ot ang hingpit nga matang sa personal nga integridad—dili gayud makab-ot ang iyang *tinuod* nga pagkatawo.

Ang tintasyon sa pagkahimong inila moresulta nga iprayoridad ang opinyon sa katawhan labaw kay sa pulong sa Dios. Ang politikal nga pangampanya ug stratehiya sa pagpamaligya sagad mogamit og pagsurvey sa katawhan aron matuman ang ilang plano. Ang resulta niana nga survey mapuslanon. *Apan* dili kini magamit nga ebidensya aron ikapangatarungan ang pagsupak sa mga sugo sa Dios! Bisan og “ang tanan naghimo niini,” ang sayop dili gayud husto. Ang dautan, sayop, ug kangitngit dili gayud husto, bisan gibuhat kini sa kadaghanan. Ang pasidaan gikan sa kasulatan nag-ingon: “Alaut kanila nga nagangalan sa dautan nga maayo, ug sa maayo nga dautan; nga nagabutang sa kangitngit nga ilis sa kahayag ug sa kahayag nga ilis sa kangitngit.”¹⁰

Human sa Ikaduhang Gubat sa Kalibutan, usa ka bastos nga kanta ang misikat. Sa pagpasiugda og imoralidad, nagsaad kini nga ang 50 ka milyong tawo dili masayop. Apan sa

pagkatinuod, ang 50 ka milyon nga tawo *mahimong* masayop—nasayop gayud. Ang pagka-imoral sa gihapon imoral sa mga mata sa Dios, kinsa magahukom sa tanan natong binuhatan ug mga tinguha.¹¹

Ikumpara ang kahadlok ug ang kawalay pagtuo nga nagdagsang sa kalibutan karon ngadto sa pagtuo ug kaisug sa akong pinanggag anak nga si Emily, kinsa tua na sa laing kalibutan. Dihang biyaan na niya ang iyang lawas nga gihugpaan og kanser, dili na siya hapit kasulti. Apan uban sa pahiyum, miingon siya nako, “Pa, ayaw ko kabalak-i. Nahibalo kong ok ra ko!” Ang hugot nga pagtuo nga gipakita ni Emily—sanag nga gipakita—nianang subo nga panahon, diha nga gikinahanglan gyud namo kini.

Kining matahum nga batan-ong inahan sa lima ka anak may hingpit nga pagtuo sa iyang Langitnong Amahan, sa Iyang plano, ug mahangturong kaayohan sa iyang pamilya. Sigurado ang iyang pagkabugkos balik sa Dios. Hingpit siyang nagmatinud-anon sa mga pakigsaad nga gihimo uban sa Ginoo ug sa iyang bana. Gihigugma

niya ang iyang mga anak apan nagmalinawon, bisan sa nagkaduol niyang pagkahimulag kanila. May pagtuo siya sa iyang umaabut, ug sa ilaha usab, kay siya adunay pagtuo sa atong Langitnong Amahan ug sa Iyang Anak.

Niadtong 1986, si Presidente Thomas S. Monson miingon: “Si-yempre kita makasinati og kahadlok, pamugal-bugal, ug oposisyon. Magmaisugon kita sa pagpakigbatok sa panan-aw sa katilingban, kaisug sa pagbarug nga may baruganan. Kaisug, dili kompromiso, ang makapahiyum sa Dios isip pag-aprubar. . . . Hinumdumi ang tanan dunay kahadlok, apan kadtong moatubang sa ilang kahadlok uban sa [hugot nga pagtuo] makaangkon og kaisug.”¹²

Ang tambag ni Presidente Monson magamit sa tanang panahon! Mohangyo ko ninyo, minahal kong mga kaigsoonan: Sa tanang adlaw, sa inyong pagsubay padulong sa mahangturong padulngan, lig-una ang inyong pagtuo. Ipahayag ang inyong pagtuo! Ipakita ang inyong pagtuo!¹³

Mag-ampo ko nga mabugkos kamo og balik sa Dios, nga ang



mahangturon Niya nga mga kamatuoran matisok sa inyong kasingkasing sa hangtud. Ug mag-ampo ko nga, sa tibuok ninyong kinabuhi, inyong ipakita ang inyong pagtuo! Sa pangalan ni Jesukristo, amen. ■

MUBO NGA MGA SULAT

1. Kon ang bata matawo, ang iyang pusod ibugkos og kaduha ug ibalighot. Ang pagbalighot usa ka bugkos—lig-on nga bugkos. Ang pulong nga *tinuohan* naggikan sa Linatin: *usab*, buot pasabut “pag-usab” o “suporta” ug ang *ligare*, nagpasabut nga “ibugkos” o “ibalighot.” Sa ingon, atong masabut nga ang tinuohan “magbugkos sa mga tumutuo ngadto sa Dios.”
2. Exodo 20:3. Agi og dugang, ang Ginoo miingon, “Bumalik kamo, ug biyai ninyo ang inyong mga dios-dios, ug ilingiw . . . gikan sa inyong tanan nga mga dulumtanan” (Ezekiel 14:6).
3. Doktrina ug mga Pakigsaad 6:36.
4. Tan-awa sa Spencer W. Kimball, *The Teachings of Spencer W. Kimball*, ed. Edward L. Kimball (1982), 391.
5. Tan-awa sa Mosiah 2:41; Doktrina ug mga Pakigsaad 58:30–33; 82:10. Kini nga baruganan kinahanglanon sa tanan, kay “ang Dios wala diay pinalabi sa mga tawo” (Mga Buhat 10:34; tan-awa usab sa Moroni 8:12).
6. Doktrina ug mga Pakigsaad 132:22.
7. Tan-awa sa Levitico 15:13.
8. 2 Timoteo 3:7.
9. 1 Nephi 19:23.
10. Isaias 5:20.
11. Gitudlo sa kasulatan: “Duol kamo sa Ginoo, ang Usa nga Balaan. Hinumdumi nga ang Iyang mga dalan matarung. Tan-awa, ang dalan sa tawo mapig-ot, apan kini gihan-ay sa usa ka matul-id nga agianan sa iyang atubangan, ug ang magbalantay sa ganghaan mao ang Usa nga Balaan sa Israel; ug wala siya mogamit og sulugoon didto; ug walay lain nga agianan gawas kon kini sa ganghaan; kay siya dili malimbongan, kay ang Ginoong Dios mao ang iyang ngalan” (2 Nephi 9:41).
12. Thomas S. Monson, “Courage Counts,” *Ensign*, Nob. 1986, 41. Sa laing okasyon, mihatag si Presidente Monson niining makadasig nga pahimangno: “Aron mahimo nga talagsaon ang pagpakabuhi, kinahanglan natong palamboon ang kapasidad sa pag-atubang sa kasamok uban sa kaisug, kasagmuyo uban sa kamaya, ug kadaugan uban sa pagpaubos. . . . Kita mga anak sa buhi nga Dios, kansang panagway kita gilalang. . . . Dili nato bug-os nga mahuptan kini nga konbiksyon kon walay pagsinati sa dako nga pagbati sa kalig-on ug gahum, bisan sa kalig-on sa pagsunod sa mga sugo sa Dios, sa gahum sa pagbatok sa mga tintasyon ni Satanas” (“Yellow Canaries with Gray on Their Wings,” *Ensign*, Hulyo 1973, 43).
13. “Ilimud ang inyong mga kaugalingon sa tanan nga dili diosnon” (Moroni 10:32). Ayaw kahadluki ang tawo labaw pa kay sa Dios (tan-awa sa Doktrina ug mga Pakigsaad 3:7; 59:5).



Ni Elder Richard G. Scott

Sa Korum sa Napulog Duha ka mga Apostoles

“Usa Ka Panig-ingnan ang Akong Gihatag Kaninyo”

Ang labing maayong panig-ingnan kinsa nabuhi dinhi sa kalibutan mao ang atong Manluluwas, si Jesukristo. . . . Nagdapit Siya kanato sa pagsunod sa Iyang hingpit nga panig-ingnan.

Samtang namalandong ko sa akong katungdanan sa pagpakigbahin sa ebanghelyo, ako naghunahuna og maayo sa akong mga minahal kansang malumo nga mga impluwensya nakatabang nga makapalagan ang balaang giya para sa akong espiritwal nga pag-uswag. Sa importanting bahin sa akong kinabuhi, ang Amahan sa Langit mipanalangin kanako og tawo kinsa igong miamuma nako sa paggiya sa akong mga pagpili sa tukma nga direksyon. Ilang gisunod kining mga pulong sa Manluluwas: “Kay usa ka panig-ingnan ang akong gihatag kaninyo, aron nga kamo usab kinahanglan nga magabuhat sama sa akong gibuhat kaninyo.”¹

Sa bata pa ako, ang akong amahan dili miyembro sa Simbahan ug ang akong inahan nahimong dili aktibo. Nagpuyo kami sa Washington, D.C., ug ang mga ginikanan sa akong inahan nagpuyo og 2,500 ka milya (4,000 km) gikan sa estado sa

Washington. Pipila ka bulan human sa akong ikawalong adlaw nga natawhan, si Lola Whittle milatas sa nasud sa pagbisita namo. Si Lola nabalaka nga ako ni ang akong magulang nga lalaki wala mabunyagi. Wala ako mahibalo unsay iyang gisulti ngadto sa akong mga ginikanan mahitungod niini, apan ako nasayud nga usa ka buntag gidala niya ang akong igsoong lalaki ug ako ngadto sa parke ug mipakigbahin kanamo sa iyang mga pagbati mahitungod sa importansya nga mabunyagan ug sa pagsimba kanunay. Wala ko makahinumdom sa partikular nga mga pulong nga iyang gisulti, apan kini nakatandog sa akong kasingkasing, ug sa wala madugay ang akong igsoong lalaki ug ako gibunyagan.

Si Lola mipadayon sa pagsuporta kanamo. Kahinumdom ko nga kon ang akong igsoong lalaki o ako mamulong sa simbahan, teleponohan namo siya alang sa pipila ka sugyot. Sulod sa pipila ka adlaw usa ka sinulat

nga pakigpulong moabut pinaagi sa koreyo. Sa wala madugay ang iyang mga sugyot nausab nga outline na lang nga nagkinahanglan og dugang nga paningkamot sa among bahin.

Si Lola migamit og igo lang kaisug ug pagtahud aron pagtabang sa among amahan nga makaila sa importansya sa paghatud namo sa simbahan para sa among mga miting. Sa tukma kaayong paagi, mitabang siya namo nga among mabati ang kaimportante sa ebanghelyo sa among kinabuhi.

Labing importante, nahibalo kami nga si Lola nahigugma namo ug siya nahigugma sa ebanghelyo. Siya talagsaon kaayo nga panig-ingnan! Mapasalamaton kaayo ko sa pagpamatuod nga iyang gipakigbahin nako niadtong batan-on pa ko. Ang iyang impluwensya miusab sa direksyon sa akong kinabuhi para sa mahangturong kaayuhan.

Sa wala madugay, sa hapit na ko mogradwar sa unibersidad, nahigugma ko sa usa ka matahum nga batan-ong babaye nga ginganlan og Jeanene Watkins. Nagtuo ko nga siya misugod sa pagbaton og lawom nga pagbati usab para nako. Usa ka gabii dihang nag-istoryahanay mi mahitungod sa umaabut, mabinantayon niyang gisal-ot sa diskusyon ang usa ka pahayag nga nakausab sa akong kinabuhi sa hangtud. Miingon siya, “Kon ako magminyo, ngadto kini sa usa ka matinud-anong returned missionary diha sa templo.”

Wala kaayo ko maghunahuna mahitungod sa misyon kaniadto. Nianang gabhiuna ang akong kadasig sa paghunahuna nga moserbisyo sa misyon nausab gayud. Miuli ko sa balay, ug ako walay nay laing mahunahuna pa. Wala ko makatulong sa tibuok gabii. Wala gyud ko ka-focus sa akong pag-eskwela sa sunod nga adlaw. Human sa daghang mga pag-ampo mihukom ko nga makigkita sa akong bishop ug gisugdan akong pag-apply og misyon.

Si Jeanene wala gayud misugo nako nga magmisyon *para niya*. Gihi-gugma ko niya igo nga gipakigbahin ang iyang konbiksyon ug dayon gihtagtan ko og oportunidad sa pagpili sa direksyon sa akong kinabuhi. Kaming



duha miserbisyo og misyon ug sa wala madugay kami na-sealed sa templo. Ang kaisug ug pasalig ni Jeanene ngadto sa iyang tinuohan nakahimo sa tanang kalainan sa among kinabuhi. Ako nakasiguro nga dili unta namo makaplakan ang kalipay nga among natagamtam kon wala ang iyang lig-on nga pagtuo sa baruganan sa pagserbisyo og una sa Ginoo. Siya maayo kaayo, matarung nga panig-ingnan!

Sila ni Lola Whittle ug Jeanene igo nga nahigugma nako sa pagpakigbahin sa ilang konbiksyon nga ang mga ordinansa sa ebanghelyo ug ang pagserbisyo sa Amahan sa Langit mapanalangin sa akong kinabuhi. Walay usa kanila mipugos nako o mipabati nako og dili maayo kabahin sa akong pagkatawo. Sila simpleng nahigugma nako ug sa Amahan sa Langit. Silang duha nahibalo nga Siya makahimo og daghan sa akong kinabuhi kaysa akong mahimo sa akong kaugalingon. Sila maisugong mitabang nako sa mahigugmaong paagi nga makaplakan ang dalan sa dakong kalipay.

Unsaon natong tanan nga mahimong dako nga impluwensya? Kinahanglan gyud natong sigurohon nga

sinsierong higugmaon kadtong atong gusto nga tabangan sa pagkamatarung aron sila makapalambo og pagsalig diha sa gugma sa Dios. Sa kalibutan, para sa kadaghanan ang unang hagit sa pagdawat sa ebanghelyo mao ang pagpalambo og pagtuo diha sa Amahan sa Langit, kinsa hingpit nga nahigugma nila. Mas sayon palambuon kana nga pagtuo kon sila adunay mga higala o sakop sa pamilya kinsa naghi-gugma kanila sa susamang paagi.

Ang pagpabati nila nga sila makasalig sa inyong gugma makatabang nila sa pagpalambo og pagtuo sa gugma sa Dios. Dayon pinaagi sa inyong mahigugmaon, manggihunahunaong pagpakig-istorya, ang ilang kinabuhi mapanalangin pinaagi sa pagpakigbahin nila sa mga leksyon nga inyong nakat-unan, mga kasinatian nga nasinati ninyo, ug mga baruganan nga inyong gisunod aron makakaplag og solusyon sa inyong mga kalisdanan. Ipakita ang inyong sinsierong interes sa ilang kaayohan; dayon ipakigbahin ang inyong pagpamatuod sa ebanghelyo ni Jesukristo.

Makatabang kamo sa daghang paagi pinasikad diha sa baruganan ug doktrina. Awhaga kadtong inyong gihigugma sa pagpaninguha sa pag-sabut unsay gusto sa Ginoo nga ilang buhaton. Usa ka paagi sa paghimo niini mao ang pagpangutana nila og pangutana nga makahunahuna sila ug dayon paghatag nila og igong panahon—mga oras, mga adlaw, mga bulan, o sobra pa—sa pagpamalandong ug sa pagpangita sa mga tubag nga sila-sila lang. Mahimong tabangan ninyo sila nga mahibalo unsaon pag-ampo ug unsaon pag-ila sa mga tubag sa ilang mga pag-ampo. Tabangi sila nga mahibalo nga ang mga kasulatan importanting tinubdan sa pagdawat ug pag-ila sa mga tubag. Nianang paagiha kamo nakatabang nila sa pag-andam sa umaabut nga mga oportunidad ug mga hagit.

Ang katuyoan sa Dios mao “ang pagpahinabo sa pagka-impormal ug sa kinabuhi nga dayon sa tawo.”² Kana importante sa tanan natong gibuhay. Usahay kita malinga og maayo sa mga butang nga madanohon o malambigit

sa kalibutanong mga responsibilidad nga wala na kita maka-focus sa mga tumong sa Dios. Samtang kamo kanunay nga nag-focus sa inyong kinabuhi diha sa labing importanting mga baruganan, makabaton mo og pagsabut sa unsay inyong pagabuhaton, ug kamo mohimo og daghan pa para sa katuyoan sa Ginoo ug kalipay para sa inyong kaugalingon.

Kon inyong i-focus inyong kinabuhi sa sukaranang mga baruganan sa plano sa kaluwasan, mas maka-focus mo sa pagpakigbahin sa inyong nahibaloan tungod kay inyong nasabtan ang mahangturong importansya sa mga ordinansa sa ebanghelyo. Kamo mopakigbahin unsay inyong nahibaloan sa paagi nga makaawhag sa inyong mga higala nga gustong malig-on sa espirituhanong paagi. Kamo motabang sa inyong mga minahal nga mopasalig sa pagsunod sa Iyang mga sugo ug sa pagdala diha kanila sa pangalan ni Jesukristo.

Hinumdumi nga ang pagkakabig sa mga indibidwal tipik lamang sa buhat. Kanunay tinguhaa ang paglig-on sa mga pamilya. Pagtudlo uban ang panan-awon sa kaimportante sa mga pamilya nga ma-sealed sa templo. Sa ubang pamilya kini mahimong modangat og daghang tuig. Ingon niana ang nahitabo sa akong mga ginikanan. Daghang tuig human ko mabunyagi, akong amahan nabunyagan, ug sa wala madugay ang akong pamilya na-sealed sa templo. Ang akong amahan miserbisyo isip sealer diha sa templo, ug ang akong inahan miserbisyo uban niya. Kon kamo adunay mahangturong panglantaw nga naglakip sa mga ordinansa sa sealing diha sa templo, kamo makatabang sa pagtukod sa gingharian sa Dios dinhi sa yuta.

Hinumdumi, ang paghigugma kanila mao ang gamhanang pundasyon sa pag-impluwensya niadtong gusto ninyong tabangan. Ang impluwensya sa akong Lola Whittle ug sa akong asawa, si Jeanene, wala untay kapuslanan kon wala pa nako hibalo-i og una nga ila kong gihigugma ug gusto nga akong maangkon ang labing nindot sa kinabuhi.



Lakip niang paghigugma, mao ang pagsalig kanila. Sa ubang mga sitwasyon kini ingon og lisud ang pagsalig, apan pangita og paagi sa pagsalig kanila. Ang mga anak sa Amahan sa Langit makahimo og katingalahang mga butang kon gibati nila nga gisaligan. Ang matag anak sa Dios nga mortal mipili sa plano sa Manluluwas. Salig nga kon hatagan sa oportunidad, ilang buhaton kini pag-usab.

Pagpakigbahin og mga baruganan nga makatabang sa inyong gihigugma

Sydney, Australia



nga mopadayon sa unahan diha sa dalan sa kinabuhing dayon. Hinumdumi, nga kitang tanan nagtubo sa pagtulun-an human sa usa ka pagtulun-an. Kamo nagsunod niyang sama nga sumbanan sa inyong pagsabut sa ebanghelyo. Himoa ang inyong pagpakigbahin sa ebanghelyo nga *yano*.

Ang inyong personal nga pagpamatuod sa Pag-ula ni Jesukristo usa ka gamhanang himan. Lakip nga mga kapanguhaan mao ang pag-ampo, ang Basahon ni Mormon ug ang ubang mga kasulatan, ug ang inyong pasalig ngadto sa mga ordinansa sa priesthood. Kining tanan makatabang sa direksyon sa Espiritu, nga hilabihan kaimportante nga inyong masaligan.

Aron mahimong epektibo ug magbuhat sama sa gibuhay ni Kristo,³ pag-focus niining nag-unang baruganan sa ebanghelyo: *ang Pag-ula ni Jesukristo nakapaposible nga kita mahimong mas mahisama sa atong Amahan sa Langit aron kita mag-uban sa kahangturan diha sa atong mga unit sa pamilya.*

Walay doktrina nga mas importante sa atong buhat kay sa Pag-ula

ni Jesukristo. Sa kada angay nga oportunidad, pagpamatuod kabahin sa Manluluwas ug sa gahum sa Iyang Maulaong sakripisyo. Gamit og mga kasulatan nga nagtudlo kabahin Kaniya ug nganong Siya ang hingpit nga sumbanan alang sa tanan dinhi sa kinabuhi.⁴ Kinahanglan mong magkugi sa pagtuon. Ayaw kaayo paghunahuna sa walay kapuslanang mga butang nga makalimtan ninyo ang pagkat-on sa doktrina ug pagtulun-an sa Ginoo. Uban sa lig-on, personal nga pundasyon sa doktrina, kamo mahimong lig-ong tinubdan sa pagpakigbahin sa mahinungdanong kamatuoran ngadto sa uban nga nanginahanglan gyud niini.

Kita labing makaserbisyo sa atong Amahan sa Langit pinaagi sa matarung nga pag-impluwensya sa uban ug pagserbisyo kanila.⁵ Ang labing maayong panig-ingnan kinsa nabuhi dinhi sa kalibutan mao ang atong Manluluwas, si Jesukristo. Ang iyang mortal nga pangalagad napuno sa pagtulun-an, pagserbisyo ug paghigugma sa uban. Milingkod Siya uban sa mga indibidwal kinsa gihukman nga dili takus sa Iyang pakig-uban. Iyang gihigugma silang tanan. Gihunahuna Niya ang ilang mga panginahanglan ug gitudloan sila sa Iyang ebanghelyo. Nagdapit Siya kanato sa pagsunod sa Iyang hingpit nga panig-ingnan.

Ako nahibalo nga ang Iyang ebanghelyo mao ang dalan ngadto sa kalinaw ug kalipay niini nga kinabuhi. Hinaut nga kita mahinumdom sa pagbuhat ingon nga Siya nagbuhat pinaagi sa pagpakigbahin sa atong gugma, pagsalig, ug kahibalo sa kamatuoran ngadto sa uban kinsa wala pa modawat sa mahimayaong ebanghelyo. Sa pangalan ni Jesukristo, amen. ■

MUBO NGA MGA SULAT

1. Juan 13:15.
2. Moises 1:39.
3. Tan-awa sa Juan 13:15.
4. Tan-awa, sama pananglit, sa Lucas 22:39–46; Juan 8:3–11; Mga Taga-Filipos 4:13; Santiago 5:15–16; 1 Juan 1:7; 2 Nephi 1:15; 2; 25:17–30; 31; Jacob 4; Alma 7; 42; 3 Nephi 11–30; Moroni 10:32–33; Doktrina ug mga Pakigsaad 18:10–16; 19:13–19; 29:3; 88:1–13; 138:2–4; Moises 5:6–12.
5. Tan-awa sa Mateo 22:35–40; Mosiah 2:17.



Ni Elder Robert D. Hales

Sa Korum sa Napulog Duha ka mga Apostoles

“Kon Nahigugma Kamo Kanako, Inyong Pagatumanon ang Akong mga Sugo”

Ang paggamit sa atong kabubut-on sa pagsunod nagpasabut sa pagpili sa “pagbuhat gayud unsa ang matarung.”

Mga kaigsoonan, sa tanang leksyon nga atong nakatun-an gikan sa kinabuhi sa Manluluwas, walay laing mas tin-aw ug gamhanan kay sa leksyon sa pagkamasulundon.

Ang Ehempla sa Manluluwas

Sa Konseho sa Langit sa kinabuhi sa wala pa dinhi sa yuta, si Lucifer mi-batok sa plano sa Langitnong Amahan. Kadtong misunod ni Lucifer mitapos sa ilang mahangturong kauswagan—pagmatngon kinsa ang inyong sundon!

Dayon si Jesus mipahayag sa Iyang pasalig sa pagsunod, miingon, “Amahan, ang imong pagbuot mao ang matuman, ug ang himaya imo sa kahangturan.”¹ Sa tibuok Niyang pagpangalagad, “siya nag-antus sa mga pagtintal ug wala manumbaling kanila.”² Gani, “siya [nakakat-on] sa pagkamasinugtanon pinaagi sa mga butang nga iyang giantus.”³

Tungod kay masulundon ang atong Manluluwas, gitubos Niya ang atong mga sala, nakapahimong posible nga kita mabanhaw ug nag-andam sa agianan aron kita makabalik sa atong Langitnong Amahan, kinsa nahibalo nga masayop kita samtang nagkat-on sa pagsunod dinhi sa mortalidad. Kon mosunod kita, atong gidawat ang Iyang sakripisyo, kay kita nagtuo nga pinaagi sa Pag-ula ni Kristo, ang tanan nga mga katawhan mahimo nga maluwas, pinaagi sa pagsunod sa mga balaod, mga ordinansa, ug mga sugo diha sa ebanghelyo.⁴

Si Jesus mitudlo nato gamit ang yanong pulong nga sayon sabton: “Kon nahigugma kamo kanako, inyong pagatumanon ang akong mga sugo,”⁵ ug “Umanhi ka, sumunod kanako.”⁶

Dihang gibunyagan kita, kita “midala diha [kanato] sa ngalan ni Kristo” ug misulod “ngadto sa pakigsaad uban sa Dios nga [kita] magmasulundon

ngadto sa katapusan sa [atong] kinabuhi.”⁷ Matag Dominggo mobag-o kita niana nga pakigsaad sa bunyag pinaagi sa pag-ambit sa sakrament ug pagsaksi nga kita andam sa pagtuman sa iyang mga sugo. Magtinguha kita nga mapasaylo sa bisan unsang hunahuna, pagbati, o mga lihok nga wala mahiuyon sa kabubut-on sa atong Langitnong Amahan. Samtang kita maghinulsol pinaagi sa paghunong sa pagkamasupilon ug sa pagkamasulundon pag-usab, atong gipakita atong gugma para Kaniya.

Mga Matang sa Pagkamasulundon

Samtang magsunod kita sa ebanghelyo, naglambo ang atong panabut kabahin sa pagkamasulundon. Usahay matintal kita nga mobuhat niining akong gitawag og “pagsunod sa

kinaiyanhon nga tawo,” diin atong gisalikway ang balaod sa Dios pabor sa atong kaalam ug mga tinguha o gani popularidad. Kay daghan man ang mi-buhat niini, ang pagkadili-masulundon mipakunhod sa mga sumbanan sa Dios diha sa atong kultura ug sa atong balaod.

Usahay ang mga miyembro moapil sa “pagpili sa ganahang sundon,” mangangkong ta nga nahigugma sa Dios ug nagtahud sa Dios samtang mipili lang asa sa Iyang mga sugo ug pagtulun-an—ug mga pagtulun-an ug tambag sa Iyang mga propeta—nga hingpit nilang sundon.

Ang uban magpili lang kay dili nila masabtan ang tanang rason sa usa ka sugo, sama sa mga bata nga dili kanunayng makasabut sa mga tambag ug balaod sa ilang mga ginikanan. Apan

kanunay kitang nahibalo nganong mosunod kita sa mga propeta, kay mao kini ang Simbahan ni Jesukristo, ug ang Manluluwas ang nagdumala sa Iyang mga propeta sa tanang dispensasyon.

Kon ang atong kahibalo sa pagkamasulundon magkalawom, atong mailhan ang kaimportante sa kabubut-on. Sa dihang si Jesus didto sa Tanaman sa Getsemani, tulo ka higayon Siyang nag-ampo sa Iyang Amahan sa Langit, “O Amahan ko, kon mahimo man, isaylo lang kanako kining kopa: ngani dili sumala sa akong pagbuot, kondili sa imo.”⁸ Ang Dios wala mokuha sa kabubut-on sa Manluluwas, bisan pa sa kalooy mipadala Siya og anghel sa paglig-on sa Iyang Pinalanggang Anak.

Ang Manluluwas nakasinati og laing pagsulay sa Golgota, diin mahimora unta Niyang tawagon ang panon sa mga anghel aron ipaubos Siya sa krus, apan Siya Mismo mipili nga masulundong molahutay sa katapusan ug humanon ang Iyang maulaong pagsakripisyo, bisan kini nagpasabut sa hilabihang kasakit, gani kamatayon.

Ang hingkod nga espirituhanong pagkamasulundon mao “ang pagsunod sa Manluluwas.” Gidumala kini sa tinuod nga gugma alang sa Langitnong Amahan ug sa Iyang Anak. Kon andam kita sa pagsunod, sama sa atong Manluluwas, atong tumanon ang mga pulong sa atong Langitnong Amahan: “Kini mao ang akong Anak nga pinalangga, kaniya may kalipay ako.”⁹ Ug kita nanghinaut nga madungog, sa pagsulod sa presensya sa atong Langitnong Amahan, “Maayong pagkabuhat, maayo ug kasaligang ulipon: . . . dumuyog . . . sa kalipay sa imong agalon.”¹⁰

Ang paggamit sa atong kabubut-on sa pagsunod nagpasabut sa pagpili sa “pagbuhat gayud unsa ang matarung.”¹¹ Nagkinahanglan kini nga mahanas sa kaugalingon ug magdala og pasalig, mahangturong kalipay, ug pagbati og katagbawan, ug pinaagi sa ehemplo, sa nagpalibut kanato; ug naglakip kini kanunay sa dakong personal nga pasalig sa pagpaluyo sa mga lider sa priesthood ug pasunod sa ilang mga pagtulun-an ug tambag.





Mga Sangputanan

Sa pagpili kon kini ato bang sundon, makatabang kanunay ang paghinumdom sa mga sangputanan sa atong pagpili. Si Lucifer ba ug ang iyang mga sumusunod nakasabut sa mga sangputanan sa pagpili sa pagsalikway sa plano sa Langitnong Amahan? Kon mao, nganong gihimo man nila ang ingon ka teribling pagpili? Tingali makapangutana kita sa samang pangutana: nganong duna man kanato ang mopili sa pagsupak kon kita nahibalo sa mahangturong sangputanan sa sala? Mihatag og tubag ang kasulatan: ang rason nganong si Cain ug pipila sa mga anak ni Adan ug Eva mipili sa pagsupak tungod kay “sila nahigugma ni Satanas labaw pa kay sa Dios.”¹²

Ang atong gugma sa Manluluwas mao ang yawe sa pagkamasulundon sama sa Manluluwas. Samtang maningkamot kita sa pagkamasulundon sa kalibutan karon, atong ipahayag ang atong gugma ug pagtahud sa tanang anak sa Langitnong Amahan. Apan dili mahimo nga kining paghigugma sa uban makausab sa mga sugo sa Dios, nga gihatag para sa atong kaayohan! Sama pananglit, ang

sugo nga “dili kamo . . . magpatay, ni magbuhat sa bisan unsa nga butang nga sama niini”¹³ pinasikad sa espirituhonong balaod nga nanalipod sa tanang anak sa Dios, bisan niadtong wala pa matawo. Ang dugay na nga kasinatian nagsugyot nga kon atong ibaliwala kini nga balaod, kini mresulta sa dili masukod nga kasubo. Gani daghan ang nagtuo nga ok ra ang pagkutlo sa kinabuhi sa bata nga wala pa matawo tungod kay gusto lang o aron dili mahasol.

Ang pagpangatarungan sa pagsupak dili makausab sa espirituhonong balaod o sa mga sangputanan niini apan modangat kini sa kalibug, walay kasiguroan, kahisalaag, mawala, ug kasub-anan. Isip mga disipulo ni Kristo, may sagrado kitang obligasyon sa pagsuporta sa Iyang balaod ug mga sugo ug mga pakigsaad nga atong gidala sa atong kaugalingon.

Niadtong Disyembre 1831 pipila sa mga kaigsoonan gitawag sa paghupay sa madumtanong mga pagbati nga migrabe batok sa Simbahan. Pinaagi ni Propeta Joseph Smith, ang Ginoo migiya kanila sa dili kasarangan, gani makatingala nga paagi:

“Busa, buntuga ang inyong mga kaaway; magtawag kanila sa pagpakigkita kaninyo diha sa dayag, ug diha sa tago. . . .

“Busa, himoa nga sila modala sa ilang lig-on nga mga pangatarungan batok sa Ginoo.

“. . . Walay hinagiban nga gihimo batok kaninyo nga mouswag;

“Ug kon bisan kinsa nga mopataas sa iyang tingog batok kaninyo siya mabuntog diha sa akong kaugalingon nga tukma nga panahon.

“Busa, hupti ang akong mga sugo; sila mga tinuod ug matinud-anon.”¹⁴

Mga Leksyon nga anaa sa Kasulatan

Ang kasulatan puno sa mga ehemplo sa mga propeta kinsa nakakat-on sa mga leksyon sa pagkamasulundon sa ila mismong kasinatian.

Si Joseph Smith gitudloan sa mga sangputanan sa pagsunod sa mga pagpamugos sa iyang tagasuporta, higala, ug eskriba nga si Martin Harris. Agig tubag sa hangyo ni Martin, nangayo si Joseph og pagtugot sa Ginoo nga ipahulam ang unang 116 ka pahina nga manuskrito sa Basahon ni Mormon aron ikapakita ni Martin ngadto sa



makalahutay sa mga pagsulay sa umaabut. Ang pagkamasulundon diha sa Getsemani nakaandam sa Manluluwas nga makatuman ug makalahutay sa katapusan didto sa Golgota.

Minahal kong mga kaigsoonan, ang mga pulong ni Alma nagpahayag sa mga pagbati sa akong kasingkasing:

“Ug karon akong hinigugma nga mga kaigsoonan, ako nakasulti niini nga mga butang nganha kaninyo nga ako unta makapukaw kaninyo ngadto sa usa ka balatian sa inyong katungdanan ngadto sa Dios, nga kamo makahimo sa paglakaw nga walay sala sa atubangan kaniya. . . .

“Ug karon ako manghinaut nga kamo magpaubos, ug magmasinugtanon ug magmalumo; . . . makugihon sa paghupot sa mga sugo sa Dios sa tanan nga mga panahon.”²¹

Mohatag ko sa espesyal nakong pagsaksi nga buhi atong Manluluwas. Tungod kay Siya misunod, “ang matag tuhod moluhod, ug matag dila mokumpisal . . . nga siya [atong Manluluwas].”²² Unta atong higugmaon ug tuohan Siya sa hingpit nga kita motuman sa Iyang mga sugo, ug makabalik uban Kaniya sa kahangturan diha sa gingharian sa Dios mao akong pag-ampo sa ngalan ni Jesukristo, amen. ■

MUBO NGA MGA SULAT

1. Moises 4:2.
2. Doktrina ug mga Pakigsaad 20:22.
3. Mga Hebreohanon 5:8.
4. Tan-awa sa Mga Artikulo sa Hugot nga Pagtuo 1:3.
5. Juan 14:15.
6. Lucas 18:22.
7. Mosiah 5:8.
8. Mateo 26:39; tan-awa usab sa mga bersikulo 42, 44.
9. Mateo 3:17; tan-awa usab sa 3 Nephi 11:7.
10. Mateo 25:21.
11. “Buhata Unsa Ang Matarung,” *Mga Himno ug mga Awit sa mga Bata*, nu. 34.
12. Moises 5:13.
13. Doktrina ug mga Pakigsaad 59:6.
14. Doktrina ug mga Pakigsaad 71:7–11.
15. Joseph Fielding Smith, *Essentials in Church History*, (1922) 65; tan-awa usab sa Doktrina ug mga Pakigsaad 3.
16. Numeros 12:8.
17. Doktrina ug mga Pakigsaad 28:3.
18. Doktrina ug mga Pakigsaad 28:2.
19. Doktrina ug mga Pakigsaad 130:21; tan-awa usab sa bersikulo 20.
20. Alma 37:35.
21. Alma 7:22–23.
22. Mosiah 27:31.

iyang pamilya, apan giingnan si Joseph sa Ginoo nga ayaw. Si Martin mihangyo og usab ni Joseph nga hangyoon pag-usab ang Ginoo. Human sa ikatulong paghangyo gitugutan sa Ginoo si Joseph nga ipakita sa piho nga lima ka tawo ang manuskrito. “Sa pinakabalaang pakigsaad si Martin miuyon niini nga kasabutan. Sa iyang pag-abut sa balay, ug siya nakasinati og pagpamugos, iyang nakalimtan ang iyang balaang pakigsaad ug mitugot nga makita sa uban ang manuskrito, ang resulta iyang nawala ang mga manuskrito.”¹⁵ Agig sangputanan, gikasukan si Joseph sa Ginoo ug wala na tuguti nga ipadayon og hubad ang Basahon ni Mormon. Giantus ug gihinulsulan ni Joseph ang iyang kalapasan sa pagsunod sa mga pagpamugos sa uban. Paglabay sa panahon, si Joseph gitugutan nga mopadayon sa iyang paghubad. Nakakat-on si Joseph og bililhong lektyon sa pagkamasulundon nga iyang gituman sa tibuok niyang kinabuhi!

Si propeta Moises mao ang laing ehemplo. Sa dihang si Moises masulundong nakigminyo og taga-Ethiopia, si Miriam ug Aaron wala

gyud mouyon niya. Apan gibadlong sila sa Ginoo, nag-ingon, “Uban ni [Moises] makigsulti ako kaniya sa baba ug baba.”¹⁶ Gigamit sa Ginoo kining talagsaong insidente sa pagtudlo sa mga miyembro sa Simbahan sa atong dispensasyon. Niadtong 1830 si Hiram Page nangangkon nga nakadawat og pagpadayag sa Simbahan. Ang Ginoo mikorihir kaniya ug mitudlo sa mga Santos, “Ug ikaw magmasulundon ngadto sa mga butang diin Ako mohatag ngadto kang [Joseph], gani sama kang Aaron,”¹⁷ “kay siya modawat kanila gani sama kang Moises.”¹⁸

Ang pagkamasulundon magdala og panalangin, “ug kon kita makadawat og bisan unsa nga panalangin gikan sa Dios, kini tungod sa pagsunod niana nga balaod diin diha kini gipasikad.”¹⁹

Ang pagkamasulundon gitudlo pinaagi sa ehemplo. Giunsa nato sa pagpakabuhi, atong gitudloan atong mga anak, “Pagkat-on og kaalam diha sa imong kabatan-on; oo, pagkat-on diha sa imong kabatan-on sa paghupot sa mga sugo sa Dios.”²⁰

Ang pagkamasulundon makahimo natong mas lig-on, matinud-anong



Ni Elder Claudio D. Zivic
Sa Seventy

Dili Kita Mosubay sa Sayop nga Dalan

Nag-ampo ko nga dili kita mahisalaag sa dalan aron kanunay kitang konektado ngadto sa kalangitan.

Usa ka gamayng batang lalaki nagpraktis sa piano, ug usa ka ahente, pagkakita kaniya sa bintana, nangutana, “Naa ba ang imong mama?”

Diin mitubag ang bata, “Ug . . . unsay hunahuna nimo?”

Ang among lima ka pinalanggang mga anak makatugtog sa piano, salamat sa pagdasig sa akong asawa! Kon ang magtutudlo moabut sa among balay, ang among anak nga si Adrian modagan ug motago aron makalikay sa leksyon. Apan usa ka adlaw adunay nindot nga nahitabo! Giganahan na siya og maayo sa musika nga siya na mismo ang nagpadayon sa pagpraktis.

Kon atong maabut kana nga punto sa proseso sa atong pagkakabig, nindot gyud kaayo. Maanindot kaayo nga dunay tinguha diha sa atong kasingkasing sa pagsunod sa mga sugo nga wala nay magsige og pahinumdom nato ug makaangkon og lig-ong konbiksyon nga kon mosunod ta sa matarung nga dalan, maangkon nato ang mga panalangin nga gisaad sa kasulatan.

Pipila ka tuig ang milabay miadto ko sa Arches National Park uban sa akong asawa; among anak nga

babaye, si Evelin; ug usa ka higala sa pamilya. Usa sa labing sikat nga mga arko didto gitawag og Delicate Arch. Mihukom mi nga molakaw og mga 1.5 ka milya (2 km), mosaka sa bukid aron maabot ang arko.

Misubay mi sa agianan uban sa dakong kadasig, apan human makalakaw og duol, kinahanglan mopahuway ang uban. Tungod sa akong tinguha nga moabut didto, mipadayon

ko nga nag-inusara. Wala magtagad sa dalan nga angay nakong subayon, misunod ko sa tawo nga nag-una nako kinsa daw sigurado kaayo sa iyang gilaktan. Ang agianan nagkalisud, ug kinahanglan ko nga molukso gikan sa usa ka bato ngadto sa laing bato. Tungod sa kalisud, sigurado ko nga ang mga babaye sa akong grupo dili gyud makahimo niini. Sa kalit lang akong nakita ang Delicate Arch, apan nasurprisa ko, anaa kini sa dapit nga dili nako maadto.

Uban sa dakong kapakyas, mibalik ko sa agi. Wala koy pasensya nga naghulat hangtud nag-abut mi pag-usab. Ang ako dayong pangutana mao ang “Nakaabut mo sa Delicate Arch?” Malipayon silang miingon nga didto sila. Mipasabut sila nga ilang gisunod ang mga timaan nga nagtudlo sa agianan, ug uban sa pag-amping ug paningkamot, nakaabut sila sa ilang destinasyon.

Walay swerte, sayop ang akong gisubay nga agianan. Kamahinungdanon sa leksyon nga akong nakat-unan anang adlaw!

Kapila kita makahimo og sayop kabahin sa saktong dalan, gitugutan atong kaugalingon nga madala sa mga uso sa kalibutan? Kinahanglan kanunay kitang mangutana sa kaugalingon kon nagtuman ba kita sa mga pulong ni Jesukristo.

Usa ka nindot nga pagtulun-an makita diha sa basahon ni Juan.





“Pabilin kamo kanako, ug pabilin ako kaninyo. Maingon nga ang sanga sa iya rang kaugalingon dili makabunga, gawas kon magapabilin kini sa tanum, sa ingon usab kamo dili makapamunga gawas kon magapabilin kamo kanako.

“Ako mao ang tanum nga parras, kamo mao ang mga sanga: Ang magapabilin kanako, kang kinsa magapabilin ako, mao siya ang magapamungag daghan: kay gawas kanako wala gayud kamoy arang mahimo” (Juan 15:4–5).

Gamit niining pagkasusama, atong makita ang suod kaayo, talagsaon natong relasyon uban ni Jesukristo ug ang importansya nga Iyang gibutang sa matag usa kanato. Siya ang gamut ug ang punoan nga nagdala sa buhing tubig kanato, ang duga nga nagtugot kanato nga maamuma aron kita makapamunga. Si Jesukristo nagtudlo kanato sa paagi nga isip mga sanga—o mga nilalang nga nagsalig Kaniya—dili gyud nato ipakaubos ang bili sa Iyang mga pagtulun-an.

Adunay mga sayop nga tingali seryuso, ug kon dili nato dayon kini makorihian, permanenting modala kini kanato palayo sa saktong dalan.

Kong maghinulsol kita ug modawat og koreksyon, kini nga mga kasinatian makahimo nato nga mopaubos sa kaugalingon, mousab sa binuhatan, ug mopaduol pag-usab ngadto sa Langitnong Amahan.

Mohatag ko og ehemplo niini nga konsepto pinaagi sa paghisgut sa usa sa labing mahinuklugong mga higayon nga nasinati ni Propeta Joseph Smith. Pinaagi niini nga kasinatian, ang Manluluwas naghatag kanato og bililhong mga pagtulun-an kabahin sa mga baruganan nga angay natong timan-an sa tibuok natong kinabuhi. Nahitabo kini dihang nawala ni Martin Harris ang 116 ka hinubad nga mga pahina sa unang bahin sa Basahon ni Mormon.

Human maghinulsol sa pagsupak sa tambag sa Dios, ang Propeta nakadawat og pinadayag nga makita sa seksyon 3 sa Doktrina ug mga Pakigsaad (tan-awa sa *Mga Pagtulun-an sa mga Presidente sa Simbahan: Joseph Smith* [2007], 81–84). Gikan sa nasulat sa mga bersikulo 1 ngadto 10, gusto nakong mo-focus sa tulo ka mga baruganan nga angay natong hinumduman kanunay:

1. Ang mga buhat ug mga katuyoan sa Dios dili gyud mapakyas.
2. Dili kita mahadlok sa tawo labaw pa kay sa Dios.
3. Gikinahanglan ang kanunayng paghinulsol.

Sa bersikulo 13, ang Ginoo nagtudlo kanato sa upat ka mga buhat nga dili nato angay buhaton:

1. Mopahimutang sa mga tambag sa Dios sa walay kapuslanan.
2. Molapas sa labing sagrado nga mga saad nga nahimo atubangan sa Dios.
3. Mosalig sa atong kaugalingong paghukom.
4. Manghambog sa atong kaugalingong kaalam.

Nag-ampo ko nga dili kita mahisalaag sa dalan aron kanunay kitang konektado ngadto sa kalangitan, aron ang mga sulog sa kalibutan dili moanud kanato.

Kon dunay usa ninyo nga miabot sa punto nga mibiya sa dalan sa Ginoo—bisan asa nga punto niana nga dalan—uban sa dakong kasubo

inyong bation ang kapait sa pagpahimutang sa mga tambag sa Dios sa walay kapuslanan, sa paglapas sa labing sagrado nga mga saad nga nahimo atubangan sa Dios, sa pagsalig sa inyong kaugalingong paghukom, o sa pagpanghambug sa inyong kaugalingong kaalam.

Kon mao kini ang nahitabo, moawhag ko kaninyo sa paghinulsol ug sa pagbalik ngadto sa saktong dalan.

Usa ka higayon ang usa ka apo mitawag sa iyang lolo aron sa pagtimbaya kaniya og happy birthday. Nangutana siya kaniya pila na iyang edad. Miingon siya nga nakaabut na siya og 70 ka tuig. Ang iyang apo mihunahuna sa makadiyot ug dayon nangutana, “Lolo, nagsugod gyud ka sa 1?”

Panahon sa pagkabata ug kabatanonan, ang mga tawo nagtuo nga dili gyud sila matigulang; ang ideya sa kamatayon wala pa gyud mogamut—alang ra na sa mga tigulang kaayo—ug ang pag-abot ana nga punto dugay pa kaayo. Sa paglabay sa panahon, mga bulan ug kapanahunan nanglabay hangtud ang mga kunot mosugod pagpanggawas, mosugod na og kaluya, magkadaghan na ang pagpa-check up ngadto sa doktor, ug uban pa.

Moabut ang adlaw nga makigtagbo kita pag-usab sa atong Manunubos ug Manluluwas, si Jesukristo. Mangamuyo ko nga nianang sagrado ug halangdong okasyon makaila kita kaniya tungod sa atong kahibalo mahitungod Niya ug tungod sa atong pagsunod sa Iyang mga pagtulun-an. Iyang ipakita kanato ang mga marka sa Iyang mga kamot ug tiil, ug maghiusa kita sa malungtarong paggakos, mohilak sa kalipay kay misunod sa Iyang dalan.

Magpamatuod ko ngadto sa upat ka suok sa kalibutan nga si Jesukristo buhi. Nag-awhag Siya kanato, “Patalinghug, O kamo nga mga nasud sa yuta, ug paminaw sa mga pulong sa Dios kinsa nagbuhat kaninyo” (D&P 43:23). Unta aduna kitay kapasidad sa pag-ila, pagpatalinghug, pagsabut, ug saktong paghubad sa mensahe sa “Dios kinsa nagbuhat [kanato]” aron dili mahisalaag gikan sa Iyang dalan, ako naghangyo sa pangalan ni Jesukristo, amen. ■



Ni Elder W. Craig Zwick
Sa Seventy

Unsa May Imong Gihunahuna?

Mohangyo ko ninyo sa pagbansay nga malumong mangutana niining pangutana, kabahin sa kasinatian sa uban: “Unsa may imong gihunahuna?”

Mga kwarenta ka tuig na ang milabay, misaka ko sa draybanan sa 18-wheeler nga semitruck uban sa matahum nakong asawa, si Jan, ug sa among gamayng anak, si Scotty. Among ihatud ang bug-at nga kargamento para sa konstruksyon ngadto sa lain-laing estado.

Kaniadto pwede ra nga walay seat belt o walay lingkuranan sa bata. Gigunitan ra sa akong asawa ang pinangga namong anak. Miingon siya “Pagkahabog niini” nakahatag unta ni nako og ideya sa iyang gibati nga kabalaka.

Dihang milugsong mi sa makasaysayanong Donner Pass, diha sa usa ka lugsungon nga bahin sa highway, ang atubangan nga bahin sa semitruck kalit lang ug wala damhang grabe nga mi-aso. Lisud nga makakita sa dalan, ug naglisud mi og ginhawa.

Sa kabug-at sa sakyanan, ang mga brake dili paigo aron mapahinay dayon ang pagdagan. Gigamit ang engine brake ug gibalhin ang kambyo, naratol kong misulay sa pagpahunong.

Mopadaplin na unta ko sa karsada, apan sa wala pa mahingpit ang akong

paghunong, giablihan sa akong asawa ang pultahan ug milukso nga naggakos sa among anak. Wala koy nahimo nga nagtan-aw nila nga nali-gid sa yuta.

Dihang mihunong na, milayat ko gikan sa nag-aso nga sakyanan. Tungod sa grabeng kabalaka, gidagan nako ang kabatoan ug kasagbutan ug sila akong gigakos. Ang bukton ug siko ni Jan nasamad ug nagkadugo, apan salamat nalang kay siya ug ang among anak nagginhawa pa. Gigakos lang nako sila og hugot samtang ang abug sa highway nawagtang.

Dihang naulian na ang akong kakulba ug gininhawa, misingka ko, “Unsa may imong gihunahuna? Kahibalo ka ba unsa to kapeligro? Mahimo mong mamatay!”

Mitan-aw siya nako, midagayday ang luha sa iyang nagkabuling nga aping, ug misulti og usa ka butang nga nakatandog og maayo sa akong kasingkasing ug klaro nakong mahinum-duman: “Naninkamot kong maluwas atong anak.”

Nakaamgo ko dayon nga naghunahuna siya nga nasunog ang makina,



paghigugma ug pagtagad sa tanan uban sa kamabination ug pagtahud—bisan kon supak kita” (First Presidency letter, Ene. 10, 2014). Pagkanindot nga pahinumdom nga kita makahimo ug kinahanglang moapil sa nagpadayon nga sibil nga pag-istoryahanay, ilabi na kon atong lantawon ang kalibutan sa managlahi nga panglantaw.

Ang tagsulat sa Proverbio mitambag, “Ang tubag nga malumo maka-hupay sa kapungot: apan ang pulong nga mahait makapapukaw sa kasuko” (Proverbio 15:1). Ang “tubag nga malumo” tubag nga may katarungan—mabinantayong mga pulong gikan sa mapainubsanong kasingkasing. Wala ni magpasabut nga dili ta kapamulong og direkta o ikompromiso ang doktrinal nga kamatuoran. Ang mga pulong nga may direktang impormasyon mamahimo nga usa ka malumo sa espiritu.

Ang Basahon ni Mormon adunay talagsaong ehemplo sa pinulongan kabahin sa panagsumpaki sa magtiayon. Ang mga anak ni Sariah ug Lehi gipabalik sa Jerusalem sa pagkuha sa mga palid nga tumbaga ug wala mauli. Nagtuo si Sariah nga nameligro ang iyang mga anak, ug nasuko siya ug nangita og tawo nga basulon.

Paminawa ang istorya gikan sa panglantaw sa iyang anak nga si Nephi: “Kay [ang akong inahan] nagdahum nga kami nangamatay didto sa kamingawan; ug siya usab nagmulo batok sa akong amahan, nagsulti kaniya nga siya usa ka tawo nga may panan-awon; nag-ingon: Tan-awa ikaw midala kanamo gikan sa yuta sa among kabilin, ug ang akong anak nga mga lalaki wala na, ug kita mangamatay sa kamingawan” (1 Nephi 5:2).

Karon, atong ikonsiderar unsay gihunahuna ni Sariah. Nabalaka siya sa iyang mga anak nga mga palaaway nga mibalik sa dapit diin gihulga ang kinabuhi sa iyang bana. Ug iyang gibaylo ang matahum niyang balay ug mga higala sa usa ka tolda sa layo nga kamingawan sa panahon nga siya mahimo pang manganak. Grabe nga naugtug tungod sa kabalaka, ingon og bayanihon siyang miambak, nga walay igong rason, gikan sa habog

nahadlok nga mobuto kini, ug mangamatay mi. Hinoon, ako, nasayud nga elektrikal ang problema—peligro apan dili makamatay. Gitan-aw nako akong pinalanggang asawa, malumong gihapuhap ang ulo sa among anak, ug naghunahuna unsa nga matang sa babaye nga mohimo og ingon kaisug.

Kini nga sitwasyon sama ra gyud unta ka peligro sa pagkadaut sa among makina. Mapasalamaton, human sa igong panahon nga wala magtingganay, nagtuo ko nga siya ang sayop ug siya nagtuo nga akoy sayop, sa katapusan amo nang napagawas ang mga pagbati nga hinungdan sa among panaglalis. Ang paghigugmaay ug kabalaka aron maluwas ang usag usa nakapugong niining peligro nga insidente nga moguba sa giumama namong kaminyoon.

Mipasidaan si Pablo, “Kinahanglang walay sulting [masakit] nga magagula gikan sa inyong baba, kondili kanang mga maayo lamang [ug] makapalig-on ug angay sa higayon, aron makahatag kinig kaayohan ngadto sa mga magapatalinghug” (Mga Taga-Efeso 4:29). Ang iyang mga pulong mihatag og katin-awan.

Para ninyo unsay ipasabut sa “walay sulting [masakit]”? Tanan kita nakasulay nga mobati og grabeng kasuko—sa kaugalingon ug sa uban. Makakita kita og wala mapugngi nga kasuko sa publikong mga dapit. Nakasinata kita og daw “makapasakit” sa emosyon atol sa mga sport, sa natad sa politika, ug bisan gani sa atong panimalay.

Usahay ang mga anak mosulti og sakit ngadto sa mapinanggaong mga ginikanan. Ang magtiayon, kinsa dunay susama ka buhong ug pinakanindot nga kasinatian, mawad-an sa panan-awon ug pailub sa usag usa ug magpalabwanay sa tingog. Tanan kita, bisan mga anak sa pakigsaad sa mapinanggaong Langitnong Amahan, nagmahay sa wala hunahuna nga paghukom ug mosulti og ngil-ad nga mga pulong sa wala pa nato masabti nga panglantaw sa uban. Tanan kita may oportunidad sa pagkat-on kon sa unsang paagi ang makadaut nga pulong mosangput sa peligro ngadto sa makamatay nga sitwasyon.

Ang bag-o lang nga sulat sa Unang Kapangulohan nag-ingon, “Ang ebanghelyo ni Jesukristo nagtudlo nato sa

nga nameligrong sakyanan aron panalipdan iyang pamilya. Gipahayag ang makatarungang kabalaka ngadto sa iyang bana pinaagi sa kasuko ug pagduha-duha ug pasangil—pinulongan diin ang tanang katawhan ingon og hanas na kaayo niini.

Si propetang Lehi naminaw sa kabalaka sa tinubdan sa kasuko sa iyang asawa. Dayon mihatag siya sa disiplinadong tubag gamit ang manggiloy-ong pinulongan. Una, gidawat niya ang kamatuoran kon unsa ang napanglantawan ni Sariah: “Ug . . . ang akong amahan misulti kaniya nga nag-ingon: Ako nahibalo nga ako usa ka tawo nga may panan-awon; . . . apan [kon ako] nagpabilin unta sa Jerusalem, [kita] namatay uban sa akong mga kaigsoonan” (1 Nephi 5:4).

Dayon gisulti sa iyang bana ang iyang kabalaka bahin sa kaayohan sa iyang mga anak, sama sa walay pagpanuko nga gipamatuod kaniya sa Espiritu Santo, nag-ingon:

“Apan tan-awa, ako nakapanag-iya og usa ka yuta sa saad, ug niini nga mga butang ako nalipay; oo, ug ako nasayud nga ang Ginoo moluwas sa akong anak nga mga lalaki gikan sa mga kamot ni Laban. . . .

“Ug human niini nga matang sa sinultihan sa akong amahan, si Lehi, mialam-alam aron pagdasig sa akong inahan . . . mahitungod kanamo” (1 Nephi 5:5–6).

Dako ang panginahanglan karon sa mga lalaki ug babaye nga mopalambo og pagtahud sa usag usa sa magkalahi nga pagtuo ug kinaiya ug



sa managsukwahi kaayo nga mga tinguha. Lisud ang pagkahibalo sa tanang mosulod sa atong hunahuna ug kasingkasing o gani ang hingpit nga pagsabut kon unsa nga mga pagsulay ug pagpili ang atubangon.

Bisan pa, unsay mahitabo sa “sulting [masakit]” nga gihisgutan ni Pablo kon sa atong kaugalingon naglakip kini una sa pagkamabination ug pagsabut sa mga kasinatian sa uban? Nag-angkon sa akong kaugalingon nga dili pagkahingpit ug mga kahuyang, mohangyo ko ninyo sa pagbansay nga malumong mangutana niining pangutana, kabahin sa kasinatian sa uban: “Unsa may imong gihunahuna?”


Nahinumdom ba mo nga ang Ginoo misurpresa ni Samuel ug ni Saul pinaagi sa pagpili og usa ka bata nga tigbalantay sa karnero, si David sa Bethlehem, isip hari sa Israel? Ang Ginoo miingon sa Iyang propeta,

“Kay ang Ginoo nagatan-aw dili ingon sa makita sa tawo; kay ang tawo nagatan-aw sa panagway sa gaw-as, apan ang Ginoo nagatan-aw sa kasingkasing” (1 Samuel 16:7).

Sa dihang ang among trak grabe nga mi-aso, ang akong asawa mihimo sa iyang kinaisugan nga mahunahuna sa pagpanalipod sa among anak. Ako sab nanalipod pinaagi sa pagduha-duha sa iyang pagpili. Makatingala, dili igsapayan kon si kinsa ang mas husto. Ang importante mao ang pagpaminaw sa usag usa ug pagsinabtanay sa matag usa nga panglantaw.

Ang kaandam nga mosabut sa panglantaw sa uban makausab sa “sulting [masakit]” ngadto sa “makahatag [og] kaayohan.” Si Apostol Pablo nakasabut niini, ug sa pipila ka dapit kitang tanan makasinati sab niini. Tingali dili kini makausab o makasulbad sa problema, apan ang mas importante mao ang posibilidad nga ang paghatag og kaayohan makausab nato.

Mopamatuod ko nga kita “makahatag [og] kaayohan” pinaagi sa malumong pinulongan kon ang naamumahang gasa sa Espiritu Santo modulot sa atong kasingkasing nga makasabut sa pagbati ug sa ideya sa uban. Kini makapahimo nato nga mausab ang peligrong mga sitwasyon ngadto sa pagkabalaan. Ako mopamatuod kabahin sa usa ka mahigugmaong Manluluwas kinsa “nagatan-aw sa [atong] kasingkasing” ug nahibalo unsay atong gihunahuna. Sa pangalan ni Jesukristo, amen. ■





Ni Elder Quentin L. Cook
Sa Korum sa Napulog Duha ka mga Apostoles

Mga Gamut ug mga Sanga

Ang pagpadali sa family history ug buhat sa templo sa atong panahon importante alang sa kaluwasan ug kahimayaan sa mga pamilya.

Sa wala pa siya mamatay sa kanser niadtong 1981, ang nakontrober-siya nga tagsulat nga si William Saroyan miingon sa press, “Ang tanan mamatay, apan nagtuo gyud ko nga wala koy labut. Karon unsa man?”¹

Ang “karon unsa man” atubangan sa kamatayon ning kinabuhi ug ang “karon unsa man” sa paghunahuna sa kinabuhi human sa kamatayon mao ang sentro sa mga pangutana sa kalag nga maayong pagkatubag sa gipahiuli nga ebanghelyo ni Jesukristo sa plano sa Amahan sa kalipay.

Niining kinabuhia kita mokatawa, mohilak, motrabaho, modula, mabuhi, ug dayon mamatay. Si Job nangutana, “Kon ang tawo mamatay, mabuhi ba siya pag-usab?”² Ang tubag mao ang lanog nga oo tungod sa maulaong sakripisyo sa Manluluwas. Kabahin sa nag-unang pagpasabut ni Job sa pangutana maka-interes: “Ang tawo, nga natawo sa usa ka babaye, hamubo ra sa panuigon. . . . Siya mobuswak sama sa usa ka bulak, ug pagaputlon. . . . Adunay kalauman sa usa ka kahoy, kong kana pagaputlon aron nga manalingsing pag-usab, ug nga ang diyutayng sanga niana dili mohunong

. . . ug mananga ingon sa usa ka tanom.”³

Ang plano sa atong Amahan ka-labut sa mga pamilya. Pipila sa mga kasulatan migamit sa konsepto sa kahoy uban sa mga gamut ug mga sanga niini isip pasumbingay.

Sa panapos nga kapitulo sa Daang Tugon, si Malaquias, sa paghulagway sa Ikaduhang Pag-anhi sa Manluluwas, migamit niini nga sumbingay.



Namulong kabahin sa mapagarbuhon ug dautan, siya mihatag og gibug-aton nga sila pagasunogon daw tuod sa balili ug “nga kini dili magbilin kanila bisan gamut, ni sanga.”⁴ Si Malaquias mitapos niining kapitulo uban sa saad sa Ginoo:

“Ania karon, akong ipadala kaninyo si Elias ang manalagna, sa dili pa moabut ang dako ug makalilisan nga adlaw sa Ginoo:

“Ug iyang pabalikon ang kasingkasing sa mga amahan ngadto sa mga bata, ug ang kasingkasing sa mga bata ngadto sa ilang mga amahan, tingali unya ako moanhi ug samaran ko ang yuta pinaagi sa usa ka panghimaraut.”⁵

Sa pagsugod sa Pagpahiuli, si Moroni mihatag og gibug-aton niining mensahe sa iyang unang instruksyon sa batan-ong Joseph Smith niadtong 1823.⁶

Mga Kristiyano ug mga Judeo sa tibuok kalibutan midawat sa asoy ni Elijah sa Daang Tugon.⁷ Siya ang katapusang propeta nga naghupot sa gahum sa pagbugkos sa Melchizedek Priesthood sa wala pa si Jesukristo.⁸

Si Elijah Mipahiuli sa mga Yawe

Ang pagbalik ni Elijah nahitabo sa Kirtland Temple niadtong Abril 3, 1836. Iyang gipahayag nga siya nag-tuman sa saad ni Malaquias. Iyang gihatag ang mga yawe sa priesthood sa pagbugkos sa mga pamilya niining dispensasyon.⁹ Ang misyon ni Elijah gitabangan nianang usahay pagatawgon nga espiritu ni Elijah, nga, sa gitudlo ni Elder Russell M. Nelson, maoy “evidensya sa Espiritu Santo nga nagsaksi sa balaanong kinaiya sa pamilya.”¹⁰

Ang Manluluwas tataw kon unsa ka kinahanglan ang bunyag. Siya mitudlo, “Gawas kon ang tawo igaanak sa tubig ug sa Espiritu, dili siya makasulod sa gingharian sa Dios.”¹¹ Ang Manluluwas mismo gibunyagan isip ehemplo. Unsa na man ang nangamatay nga wala mabunyagi?

Ang Doktrina sa Buhat sa Templo ug Family History

Niadtong Oktubre 11, 1840, sa Nauvoo, si Vilate Kimball misulat

ngadto sa iyang bana, si Elder Heber C. Kimball, kinsa nagserbisyo og misyon sa Great Britain kauban sa ubang sakop sa Napulog Duha. Ang kinatibukang komperensya sa Oktubre pipila ka adlaw pa lang nga gipahigayon.

Mokutlo ko sa mga parte sa personal nga sulat ni Vilate. “Kadto ang labing dako ug labing makaikag nga komperensya sukad naorganisar ang Simbahan. . . . Si Presidente [Joseph] Smith mihisgut og bag-o ug mahimayaong hilisgutan. . . . Kana, ang mabunyagan alang sa patay. Si Pablo namulong niini, sa Unang Mga Taga-Corinto kapitulo 15 bersikulo 29. Si Joseph nakadawat og mas hingpit nga pagpasabut niini pinaagi sa pagpadayag. Siya miingon nga pribilehiyo [sa mga sakop] niini nga simbahan nga mabunyagan alang sa tanan nilang kaparyentehan nga namatay sa wala pa moabut kini nga ebanghelyo. . . . Sa pagbuhat niini, nahimo kitang tigtabang nila, ug naghatag nila sa pribilehiyo nga mobangon sa Unang Pagkabanhaw. Miingon siya nga ang ebanghelyo isangyaw kanila sa bilangoan.”

Si Vilate midugang: “Gusto ko nga mabunyagan alang sa akong mama. . . . Dili ba mahimayaon kini nga doktrina?”¹²

Ang doktrina sa paghiusa sa mga pamilya miabut pagtulun-an ngadto sa lain nga pagtulun-an ug lagda ngadto sa lain nga lagda. Ang gitugyan nga mga ordinansa maoy sentro sa pagbugkos og mahangturong mga pamilya, nagsumpay sa mga gamut ngadto sa mga sanga.

Ang doktrina sa pamilya kalabut sa family history ug buhat sa templo klaro. Ang Ginoo sa Iyang orihinal nga pagpadayag nagpasabut sa “bunyang alang sa *inyong* mga patay.”¹³ Ang atong doktrinal nga obligasyon mao ang ngadto sa atong mga katigulangan. Kini tungod kay ang celestial nga pag-organisar sa langit gibasi sa mga pamilya.¹⁴ Ang Unang Kapangulohan nag-awhag sa mga miyembro, ilabi na ang kabatan-onan ug mga young single adult, nga hatagan og gibug-aton ang buhat sa family history ug mga ordinansa alang sa ilang



kaugalingong ngalan sa pamilya o sa mga ngalan sa katigulangan sa mga miyembro sa ilang ward ug stake.¹⁵ Kinahanglang makonektar kita ngadto sa atong mga gamut ug mga sanga. Ang hunahuna nga makonektar kita sa mahangturong dapit mahimayaon gayud.

Mga Templo

Si Wilford Woodruff mipasabut nga igo nga nabuhi si Propetang Joseph Smith aron mahan-ay ang pundasyon sa buhat sa templo. Sa katapusang higayon, si Joseph Smith, nakigkita sa Korum sa Napulog Duha, iyang gipahigayon kanila ang ilang endowment.¹⁶



Human gipatay ang Propeta, ang mga Santos mihuman sa Nauvoo Temple, ug ang gahum sa pagbugkos gigamit sa pagpanalangin sa liboan ka matitud-anong mga miyembro sa wala pa molalin ngadto sa bukirang kasadpan. Paglabay sa treynta ka tuig, sa pagkahuman sa St. George Temple, si Presidente Brigham Young mihatag og gibug-aton sa mahangturong importansya nga ang makaluwas nga mga ordinansa anaa na alang sa mga buhi ug mga patay.¹⁷

Yano kining gisulti ni Presidente Wilford Woodruff: “Wala pa gyuy bisan unsang baruganan nga gipadayag sa Ginoo nga akong gikalipay og dakokaysa pagtubos sa atong mga patay; nga makauban nato ang atong mga amahan, atong mga inahan, atong mga asawa, ug atong mga anak sa organisasyon sa pamilya, sa buntag sa unang pagkabanhaw ug sa Celestial nga Ginghamarian. Kini mao ang labing taas nga baruganan. Takus gyud kini sa tanang sakripisyo.”¹⁸

Pagkanindot nga panahon nga mabuhi. Kini ang katapusang dispensasyon, ug atong mabati ang pagpadali sa buhat sa kaluwasan sa matag dapit diin ang makaluwas nga ordinansa nalakip.¹⁹ Duna na kitay mga templo sa halos tibuok bahin sa kalibutan aron sa pagsangkap niining makaluwas nga mga ordinansa. Ang pagtambong sa templo alang sa

espirituhanong pagbag-o, kalinaw, pagkaluwas sa kakuyaw, ug direksyon sa atong mga kinabuhi usa usab ka dakong panalangin.²⁰

Wala pay tuig human gitawag si Presidente Thomas S. Monson isip Apostol, iyang gipahinungod ang Los Angeles Temple Genealogical Library. Siya namulong sa patay nga mga katigulangan “naghulat [alang] sa adlaw nga kita mobuhat sa pagsiksik nga gikinahanglan sa pag-andam sa dalan, . . . [ug] mosulod sa balay sa Dios ug mobuhat nianang buhat . . . nga sila . . . dili makahimo.”²¹

Dihang si Elder Monson mihatag sa pahinungod nga pagpamulong niadtong Hunyo 20, 1964, aduna lay 12 ka magamit nga mga templo. Sa panahon nga si Presidente Monson nagserbisyo sa taas nga mga konseho sa Simbahan, 130 sa atong 142 nga magamit nga mga templo una na nga napahinungod. Milagruso gyud nga makita ang pagpadali sa buhat sa kaluwasan sa atong panahon. Beynte-otso pa ka dugang nga templo ang napahibalo na ug anaa na sa lain-laing ang-ang sa pagkumpleto. Otsentay-singko porsiyento sa mga sakop sa Simbahan nagpuyo sulod sa 200 ka milya (320 km) gikan sa usa ka templo.

Teknolohiya sa History Technology

Ang teknolohiya sa family history milambo na usab og maayo. Si

Presidente Howard W. Hunter namahayag niadtong Nobyembre 1994: “Misugod na kita paggamit sa teknolohiya sa impormasyon sa pagpadali sa sagradong buhat sa pagsangkap og mga ordinansa alang sa mga patay. Ang tahas sa teknolohiya . . . gipadali sa Ginoo mismo. . . Hinoon, sinugdanan pa lang kini sa unsay atong mabuhat niini nga mga himan.”²²

Sa 19 ka tuig sukad niini nga propetikanhong pamahayag, halos dili matuohan ang paglambo sa teknolohiya. Usa ka 36 anyos nga inahan bag-o lang miingon kanako, “Hunahunaa lang—gikan sa paggamit namo og mga microfilm reader sa gipahinungod nga mga sentro sa family history ngadto sa akong lamesa gamit ang akong computer nagbuhat sa family history kon matulog na ang akong mga anak.” Mga kaigsoonan, ang mga sentro sa family history anaa na sa atong mga panimalay.

Ang buhat sa templo ug family history dili lang kabahin nato. Hunahunaa kadtong naa sa pikas bahin sa tabil nga naghulat sa makaluwas nga mga ordinansa nga magbuhi kanila gikan sa bilangoan sa espiritu. Ang *bilanggoan* gipasabut nga “kahimtang sa pagkapinugngan o pagkadinakpan.”²³ Kadtong anaa sa pagkadinakpan tingali mangutana sama kang William Saroyan: “Karon unsa man?”

Usa ka matitud-anon nga sister mipaambit og usa ka espesyal nga kasinatian sa Salt Lake Temple. Samtang anaa sa lawak sa kumpirmasyon, human ang ordinansa sa kumpirmasyon gisulti, iyang nadungog, “Ang binilanggo mahimo nga gawasnon!” Mibati siya nga magdali og maayo alang niadtong naghulat nga himoon ang bunyag ug kumpirmasyon alang nila. Sa pagpauli, gisiksik niya ang kasulatan alang sa mga pulong nga iyang nadungog. Iyang nakit-an ang pamahayag ni Joseph Smith sa seksyon 128 sa Doktrina ug mga Pakigsaad: “Himoa ang inyong mga kasingkasing nga magmaya, ug paglipay sa hilabihan. Himoa ang yuta sa kalit motungha ngadto sa pag-awit. Himoa ang mga patay nga mopahayag og mga awit sa walay katapusan nga

pagdayeg ngadto ni Haring Immanuel, kinsa na-orden, sa wala pa ang kalibutan, niana nga nakahimo kanato sa pagtubos kanila gikan sa ilang bilanggoan; kay ang binilanggo mahimo nga gawasnon.”²⁴

Ang pangutana mao, unsay kinahanglan natong buhaton? Ang tambag ni Propetang Joseph mao ang pag-presentar ngadto sa templo sa “mga talaan sa atong mga patay, nga takus sa tanan nga pagdawat.”²⁵

Ang kapanguloan sa Simbahan nanawagan ngadto sa nagtubo nga kaliwatan nga mag-una sa paggamit sa teknolohiya aron masinati ang Espiritu ni Elijah, sa pagsiksik sa ilang katigulangan, ug sa pagpahigayon sa mga ordinansa sa templo alang kanila.²⁶ Kadaghanan sa lisud nga mga buhat sa pagpadali sa buhat sa kaluwasan alang sa mga buhi ug mga patay buhaton ninyo nga kabatan-onan.²⁷

Kon ang kabatan-onan sa matag ward dili lang moadto sa templo ug mobuhat sa mga bunyag sa ilang mga patay apan motabang usab sa ilang mga pamilya ug ubang sakop sa ward sa paghatag og mga pangalan alang sa ordinansa nga ilang buhaton, sila ug ang Simbahan mapanalanginan og maayo. Ayaw og ipakamenos ang impluwensya sa patay sa pagtabang sa inyong paningkamot ug sa kalipay nga sa katapusan inyong mahimamat kadtong inyong giserbisyoan. Ang mahinungdanong panalangin sa paghiusa sa atong mga pamilya halos lapas pa sa atong panabut.²⁸

Sa kinatibuk-ang miyembro sa Simbahan, singkwentay uno porsyento sa mga hamtong wala malista ang duha ka ginikanan sa Family Tree nga seksyon sa FamilySearch Internet site sa Simbahan. Sais sentay singko porsyento sa mga hamtong walay lista sa upat ka mga apohan.²⁹ Hinumdumi, kita nga wala ang atong mga gamut ug mga sanga dili maluwas. Ang mga miyembro sa Simbahan kinahanglang mobutang niini nga impormasyon.

Sa katapusan anaa na kanato ang doktrina, mga templo, ug teknolohiya aron mabuhat sa mga pamilya kining mahimayaong buhat sa kaluwasan. Mosugyot ko og usa ka paagi nga

mahimo kini. Ang mga pamilya mahimong magmiting alang sa “Family Tree Gathering.” Kinahanglang pabalik-balik kini nga paningkamot. Ang tanan magdala og unsay anaa na nga family history, mga istorya, ug mga litrato, lakip ang gipanggang mga kabtangan sa mga apohan ug ginikanan. Ang atong kabatan-onan naghinamhinam makat-on kabahin sa kinabuhi sa mga sakop sa pamilya—asa sila gikan ug unsa ang kahimtang sa ilang pagpuyo. Daghan nila mibati ngadto sa ilang mga amahan. Ganahan sila sa mga istorya ug mga litrato, ug duna silay kahanas sa teknolohiya sa pag-scan ug pag-upload niining mga istorya ug litrato ngadto sa Family Tree ug pagkonektar sa mga dokumento ngadto sa mga katigulangan aron mapreserbar kini. Siyempre, ang nag-unang tuyo mao ang pagtino unsa nga mga ordinansa ang gikinahanglan pa nga buhaton ug pagpahiluna sa kinahanglang buhat sa templo. Ang booklet nga *My Family* magamit sa pagtala sa mga impormasyon, istorya,

ug mga litrato sa pamilya nga mahimo dayong ma-upload sa Family Tree.

Ang mga pasalig ug gilauman sa pamilya kinahanglang maoy labing prayoridad aron sa pagpanalipod sa atong balaanong padulngan. Alang niadtong nangita og mas mabungahong paggamit sa Adlawng Igpapahulay alang sa tibuok pamilya, ang pagpadali niini nga buhat maoy nindot buhaton. Usa ka inahan magarbuhong nanugid nga ang iyang 17 anyos nga anak nga lalaki mogamit sa computer human sa pagsimba sa Dominggo aron mobuhat sa family history ug ang iyang 10 anyos nga anak nga lalaki ganahang maminaw sa mga istorya ug motan-aw sa litrato sa iyang katigulangan. Mipanalangin kini sa ilang tibuok pamilya nga masinati ang espiritu ni Elijah. Ang atong bililhong mga gamut ug mga sanga kinahanglang maamumahan.

Si Jesukristo mihatag sa Iyang kinabuhi diha sa Pag-ula. Iyang gitubag ang importanteng pangutana ni Job. Iyang gibuntog ang kamatayon





alang sa tanang katawhan, nga dili nato mahimo sa atong kaugalingon. Hinoon, makapahigayon kita sa gitug-yan nga mga ordinansa ug tinud-anay nga mahimong manluluwas sa Bukid sa Zion³⁰ alang sa atong pamilya aron kita, uban kanila, mahimaya ug maluwas.

Ako mosaksi sa maulaong sakripisyo sa Manluluwas ug sa kasiguroan sa plano sa Amahan alang nato ug sa atong pamilya. Sa pangalan ni Jesukristo, amen. ■

MUBO NGA MGA SULAT

1. William Saroyan, sa Henry Allen, “Raging against Aging,” *Wall Street Journal*, Dis. 31, 2011–Ene. 1, 2012, C9.
2. Job 14:14.
3. Job 14:1, 2, 7, 9.
4. Malaquias 4:1. Bag-ohay lang pipila ka mga artikulo mitaho sa nagkadaghang mga tawo nga mipili nga dili makabaton og anak aron mouswag ang ilang matang sa pagpuyo (tan-awa sa Abby Ellin, “The Childless Plan for Their Fading Days,” *New York Times*, Feb. 15, 2014, B4). Daghang nasud nagkagamay ang populasyon tungod niini nga mga pagpili. Usahay pagatawgon kini nga “demographic winter” (tan-awa sa *The New Economic Reality: Demographic Winter* [documentary], byutv.org/shows).
5. Malaquias 4:5–6.
6. Tan-awa sa *History of the Church*, 1:12; Doktrina ug mga Pakigsaad 2.
7. Ang mga Judeo naghulat sa pagbalik ni Elias sulod sa 2,400 ka tuig. Hangtud karon, sa ilang tinuig nga Passover Seders,

o mga panihapon, moandam sila og luna alang niya ug moadto sa pultahan naglaum nga siya miabut na sa pagbutyag sa pagbalik sa Mesiyas.

8. Tan-awa sa Giya Ngadto sa mga Kasulatan, “Elijah.”
9. Tan-awa sa Doktrina ug mga Pakigsaad 110:14–16; tan-awa usab sa Doktrina ug mga Pakigsaad 2.
10. Russell M. Nelson, “A New Harvest Time,” *Ensign*, Mayo 1998, 34.
11. Juan 3:5.
12. Vilate M. Kimball ngadto ni Heber C. Kimball, Okt. 11, 1840, Vilate M. Kimball letters, Church History Library; ang spelling ug capitalization gi-estandard.
13. Doktrina ug mga Pakigsaad 127:5; emphasis gidugang.
14. Tan-awa sa *Mga Pagtulun-an sa mga Presidente sa Simbahan: Joseph Fielding Smith* (2013), 76.
15. Tan-awa sa First Presidency letter, Okt. 8, 2012.
16. Tan-awa sa *The Discourses of Wilford Woodruff*, sel. G. Homer Durham (1946), 147.
17. Si Brigham Young miingon, “Ang gusto lang nako nga makita kining katawhan nga nagpahinungod sa ilang katigayunan ug interes sa pagtukod sa gingharian sa Dios, pagtukod og mga templo, ug dinhi mangalagad alang sa mga buhi ug mga patay . . . nga sila pagakoronahan isip mga anak sa Makagagahum” (*Deseret News*, Sept. 6, 1876, 498). Ang bunyag sa mga patay gisugdan niadtong Enero 9, 1877, ug ang endowment alang sa mga patay gipahigayon paglabay sa duha ka adlaw. Ang kalipay niini gipadayag ni Lucy B. Young, kinsa miingon “mapasalamatan siya sa posibilidad nga dawaton sa [iyang patay nga kaparyentehan] uban sa paghangup,

sama sa tanan pinaagi niadtong kinsa dili makabuhay alang sa ilang kaugalingon” (sa Richard E. Bennett, “Which Is the Wisest Course? The Transformation in Mormon Temple Consciousness, 1870–1898,” *BYU Studies Quarterly*, vol. 52, nu. 2 [2013], 22).

18. *Mga Pagtulun-an sa mga Presidente sa Simbahan: Wilford Woodruff* (2004), 213–14.
19. Si Presidente Wilford Woodruff (kinsa naila nga usa sa labing maayo nga misyonaryo sa tanang panahon alang sa buhi), namulong kabahin sa buhat alang sa patay, miingon: “Gihunahunako kini nga bahin sa atong pangalagad ingon nga misyon ingon ka importante sa pagtudlo sa mga buhi; ang mga patay makadungog sa tingog sa mga sulugoon sa Dios sa kalibutan sa espiritu, ug dili sila makaapil sa buntag sa [unang] pagkabanhaw, gawas lang kon usa ka piho nga ordinansa gihimo, alang [kanila].” Miingon usab siya, “Kini sama kaimportante sa pagluwas sa patay . . . og usa ka tawo nga buhi” (*Mga Pagtulun-an sa mga Presidente sa Simbahan: Wilford Woodruff*, 208).
20. Si Presidente Howard W. Hunter midapit sa mga miyembro sa Simbahan sa pag-adto sa templo kanunay “alang sa personal nga panalangin sa pagsimba diha sa templo, alang sa kasagrado ug maluwas sa kakuyaw nga anaa sulod nianang balaan ug gipahinungod nga mga bongbong. . . . Balaan kini ngadto sa Ginoo. Kinahanglang balaan kini ngari kanato” (“The Great Symbol of Our Membership,” *Tambuli*, Nob. 1994, 6).
21. “Messages of Inspiration from President Thomas S. Monson,” *Church News*, Dis. 29, 2013, 2.
22. Howard W. Hunter, “We Have a Work to Do,” *Ensign*, Mar. 1995, 65.
23. *Merriam-Webster’s Collegiate Dictionary*, 11th ed. (2003), “prison.”
24. Doktrina ug mga Pakigsaad 128:22; tan-awa usab sa Doktrina ug mga Pakigsaad 138:42. “Sa wala pa [ang] kalibutan, ang Ginoo mi-orden nianang nagtugot sa mga espiritu sa [bilanggoan] nga matubos” (index to the triple combination, “Prison”).
25. Doktrina ug mga Pakigsaad 128:24.
26. Tan-awa sa First Presidency letter, Okt. 8, 2012; tan-awa usab sa David A. Bednar, “Ang mga Kasingkasing sa mga Anak Mobati,” *Liahona*, Nob. 2011, 24–27; R. Scott Lloyd, “Find Our Cousins’: Apostle [Neil L. Andersen] Counsels LDS Youth at RootsTech Conference,” *Church News*, Feb. 16, 2014, 8–9.
27. Usa ka bag-ong pagtuon nagpakita nga usa sa gihatagan og gibug-aton niini nga henerasyon mao ang kinabuhi nga makahuluganon diin sila “mohatag ngadto sa uban ug ipunting ang ilang kaugalingon ngadto sa mas dako nga katuyoan” (Emily Esfahani Smith ug Jennifer L. Aaker, “Millennial Searchers,” *New York Times Sunday Review*, Dis. 1, 2013, 6).
28. Tan-awa sa Howard W. Hunter, “A Temple-Motivated People,” *Liahona*, Mayo 1995, 2–7.
29. Ang mga estatistika gihatag pinaagi sa Family History Department.
30. Tan-awa sa Abdias 1:21.



Ni Elder Dallin H. Oaks

Sa Korum sa Napulog Duha ka mga Apostoles

Ang mga Yawe ug Awtoridad sa Priesthood

Ang mga yawe sa priesthood modumala sa kababayan-an ingon man sa kalalakin-an, ug ang mga ordinansa ug awtoridad sa priesthood may kalabutan sa kababayan-an ingon man sa kalalakin-an.

I.

Niining komperensya nakita nato ang pag-release sa pipila ka matinud-anong mga kaigsoonan, ug kita mipaluyo sa pagtawag sa uban. Niining pag-puli-puli—pamilyar kaayo sa Simbahan—wala kita “gipaubos” kon kita ma-release, ug wala kita “gipataas” kon kita tawagon. Walay “pataas o paubos” sa pagserbisyo sa Ginoo. Dunay “abante o atras” lamang, ug kana nga kalainan magdepende kon giunsa nato pagdawat ug paghimo ang atong pagka-release ug pagkatawag. Kausa nakadumala ko og pag-release sa batan-ong presidente sa stake nga nakahatag og maayong serbisyo sulod sa siyam ka tuig ug karon nalipay sa iyang pagka-release ug sa bag-ong calling nga nadawat niya ug sa iyang asawa. Gitawag sila nga mahimong lider sa nursery sa ilang ward. Niining Simbahana lang nga makita kana isip pareho nga talahuron!

II.

Samtang namulong sa komperensya sa kababayan-an, ang kinatibukang presidente sa Relief Society nga si



Linda K. Burton miingon, “Nanghinaut kami nga *masilsil* sa matag usa nato ang mas dakong tinguha nga mas masabtan ang priesthood.”¹ Kana nga panginahanglan alang natong tanan, ug ipadayon nako kini pinaagi sa paghisgut kabahin sa mga yawe ug awtoridad sa priesthood. Tungod kining mga hilisgutan parehong may kalabutan sa kalalakin-an ug kababayan-an, nalipay ko nga kining pakigpulong masibya ug mamantala sa tanang miyembro sa Simbahan. Ang gahum sa priesthood makapanalangin natong tanan. Ang mga yawe sa priesthood modumala sa kababayan-an ingon man sa kalalakin-an, ug ang mga ordinansa ug awtoridad sa priesthood may kalabutan sa kababayan-an ingon man sa kalalakin-an.

III.

Si Presidente Joseph F. Smith mihulagway sa priesthood isip “gahum sa Dios nga gihatag ngadto sa tawo aron ang tawo makalihok sa yuta alang sa kaluwasan sa tawhanong pamilya.”² Ang ubang lider mitudlo nato nga ang priesthood mao “ang kompleto nga gahum niini nga kalibutan. Kini ang gahum nga gigamit sa paglalang sa kalibutan.”³ Ang mga kasulatan nagtudlo nga “kining mao nga Pagkapari, nga diha sa sinugdanan, maanaa usab sa katapusan sa kalibutan” (Moises 6:7). Busa, ang priesthood mao ang gahum diin kita pagabanhawon ug magpadayon sa kinabuhing dayon.

Ang panabut nga atong gitinguha nagsugod sa pagsabut sa mga yawe sa priesthood. “Ang mga yawe sa priesthood mao ang awtoridad nga gihatag sa Dios ngadto sa [mga naghupot sa] priesthood aron pagmando, pagkontrolar, ug pagdumala sa paggamit sa Iyang priesthood dinhi sa yuta.”⁴ Matag buhat o ordinansa nga gipahigayon sa Simbahan gihimo ubos sa direkta o dili direkta nga pagtugot sa tawo nga naghupot sa mga yawe ni-ana nga kalihokan. Sama sa gipasabut ni Elder M. Russell Ballard, “Kadtong adunay mga yawe sa priesthood . . . sa tinuoray naghimong posible nga ang tanan kinsa matinud-anong naghago ubos sa ilang direksyon makagamit sa



awtoridad sa priesthood ug makagamit sa gahum sa priesthood.”⁵

Sa pagkontrolar sa paggamit sa awtoridad sa priesthood, ang katuyoan sa mga yawe sa priesthood mapalapdan ug malimitahan. Mapalapdan kini pinaagi sa paghimong posible nga ang awtoridad ug mga panalangin sa priesthood maanaa alang sa tanang mga anak sa Dios. Malimitahan kini pinaagi sa pagdumala kon kinsa ang hatagan sa awtoridad sa priesthood, kinsa ang maghupot sa mga katungdanan niini, ug unsaon paghatag sa mga katungod ug gahum niini. Pananglitan, ang tawo nga naghupot sa priesthood dili makahatag sa iyang katungdanan o awtoridad ngadto sa lain gawas kon gitugutan sa tawo nga naghupot sa mga yawe. Kon wala kanang pagtugot, ang ordinasyon dili balido. Mao ni ang rason nganong ang naghupot sa priesthood—bisan unsa nga katungdanan—dili makaorden sa sakop sa iyang pamilya o mopahigayon og sakrament sa iyang kaugalingong balay nga walay pagtugot sa tawo nga naghupot sa tukmang mga yawe.

Gawas lang sa sagradong buhat nga gihimo sa mga sister diha sa templo ubos sa mga yawe nga gihuptan sa presidente sa templo, nga akong ihulagway unya, usa lang ka tawo nga naghupot sa priesthood office ang makapahigayon sa ordinansa sa priesthood. Ug ang tanang gitugutan nga mga ordinansa sa priesthood girekord sa mga rekord sa Simbahan.

Labaw sa tanan, ang tanang yawe sa priesthood gihuptan ni Ginoong Jesukristo, kansang priesthood iya. Siya ang motino kon unsa nga mga yawe ang ihatag ngadto sa mga mortal ug kon unsaon kana paggamit. Naa-nad kita nga maghunahuna nga ang tanang yawe sa priesthood gihatag kang Joseph Smith didto sa Templo sa Kirtland, apan ang kasulatan namahayag nga ang gihatag lang mao “ang mga yawe niini nga kapaigoan” (D&P 110:16). Sa kinatibuk-ang komperensya daghang katuigan na ang milabay, si Presidente Spencer W. Kimball mipahinumdom nato nga dunay lain pang mga yawe sa priesthood nga wala pa ihatag sa tawo dinhi sa yuta, lakip ang mga yawe sa paglalang ug pagkabanhaw.⁶

Ang balaanong kahimtang sa mga limitasyon sa paggamit sa mga yawe sa priesthood mopasabut sa mahinungdanong kalainan tali sa mga desisyon bahin sa administrasyon sa Simbahan ug sa mga desisyon nga makaapekto sa priesthood. Ang Unang Kapangulohan ug ang Konseho sa Unang Kapangulohan ug ang Korum sa Napulog Duha, nga nagdumala sa kinatibuk-an sa Simbahan, gitugutan sa paghimo og daghang desisyon kalabut sa mga polisiya ug pamaagi sa Simbahan—mga butang sama sa mga luna sa mga building sa Simbahan ug mga edad sa pagmisyon. Apan bisan kon kining nagdumala nga mga awtoridad naghupot ug naggamit sa tanang yawe nga gihatag ngadto sa mga tawo niini nga dispensasyon, dili sila gawasnong makausab sa balaanong sumbanan nga mga lalaki lang ang maghupot sa katungdanan sa priesthood.

IV.

Moadto na ko sa hilisgutan kabahin sa awtoridad sa priesthood. Sugdan nako sa tulo ka mga baruganan nga bag-ohay lang nga gihisgutan: (1) ang priesthood mao ang gahum sa Dios nga gihatag ngadto sa tawo aron ang tawo makalihok alang sa kaluwasan tawhanong pamilya, (2) ang awtoridad sa priesthood gidumala sa mga naghupot sa priesthood kinsa naghupot sa mga yawe sa priesthood, ug (3) tungod ang kasulatan namahayag nga “tanang gihimo ubos sa direksyon niana nga mga yawe sa priesthood gihimo uban sa awtoridad sa priesthood.

Sa unsang paagi nga magamit kini sa kababayen-an? Sa pakigpulong ngadto sa Relief Society, si Presidente Joseph Fielding Smith, nga nianang hi-gayuna Presidente sa Korum sa Napulog Duha ka mga Apostoles, miingon niini: “Samtang ang mga sister wala hatagi og Priesthood, wala kini ihatag kanila, wala kana magpasabut nga ang Ginoo wala mohatag nila og awtoridad. . . . Ang usa ka tawo mahimong

gihatagan og awtoridad, o ang usa ka sister, aron paghimo sa piho nga mga butang sa Simbahan nga mahinungdanon ug gikinahanglan gayud sa atong kaluwasan, sama sa buhat nga gihimo sa atong mga sister diha sa Balay sa Ginoo. Gihatagan sila og awtoridad sa paghimo sa mahinungdanon ug talagsaon nga mga butang, sagrado ngadto sa Ginoo, ug ingon ka mahinungdanon sama gayud sa mga panalangin nga gihatag sa kalalakin-an nga naghupot sa Priesthood.”⁷

Nianang talagsaong pakigpulong, si Presidente Smith mibalik-balik og sulti nga ang kababayan-an gihatagan og awtoridad. Ngadto sa kababayan-an miingon siya, “Makasulti kamo nga may awtoridad, kay ang Ginoo mihatag ninyo og awtoridad.” Miingon usab siya nga ang Relief Society “[g]ihatagan og gahum ug awtoridad sa paghimo og daghang dagkong mga butang. Ang buhat nga ilang gibuhat gihimo nga may balaanong awtoridad.” Ug, siyempre, ang buhat sa Simbahan nga gibuhat sa kababayan-an o kalalakin-an, sa templo man o sa mga ward o mga branch, gihimo ubos sa direksyon nianang naghupot sa mga yawe sa priesthood. Busa, kon maghisgot bahin sa Relief Society, si Presidente Smith mipasabut, “[Ang Ginoo] mihatag kanila niining importante nga organisasyon diin sila adunay awtoridad sa pagserbisyo ubos sa mga pagdumala sa mga bishop sa ward . . . , motabang sa espirituhanon ug temporal nga kinahanglanon sa atong katawhan.”⁸

Busa, ginaingon nga ang Relief Society dili lang usa ka klase alang sa kababayan-an apan usa ka butang nga sila nahisakop—balaanong gi-establisar nga sumpay sa priesthood.⁹

Wala kita maanad nga mosulti bahin sa kababayan-an nga dunay awtoridad sa priesthood diha sa ilang mga calling sa Simbahan, apan unsa man diay kanang laing awtoridad? Kon ang usa ka babaye—batan-on o tigulang—i-set apart sa pagsangyaw sa ebanghelyo isip full-time nga misyonaryo, gihatagan siya og awtoridad sa priesthood sa pagpahigayon og buluhaton sa priesthood. Ingon usab



niana kon ang usa ka babaye i-set apart aron molihok isip opisyal o magtutudlo diha sa organisasyon sa Simbahan ubos sa pagdumala sa tawo nga naghupot sa mga yawe sa priesthood. Bisan kinsa nga naglihok diha sa katungdanan [office] o calling nga nadawat gikan sa tawo nga naghupot sa mga yawe sa priesthood naggamit sa awtoridad sa priesthood sa paghimo sa iyang gisangun nga mga katungdanan.

Bisan kinsa nga naggamit sa awtoridad sa priesthood kinahanglang kalimtan ang bahin sa ilang mga katungod ug mo-focus sa ilang mga



responsibilidad. Kana ang baruganan nga gikinahanglan sa tanan. Ang sikat nga Russian writer nga si Aleksandr Solzhenitsyn gikutlo nga nag-ingon, “Panahon na . . . nga modepensa dili tungod kay kini tawhanong katungod kondili tungod kay kini tawhanong obligasyon.”¹⁰ Ang mga Santos sa Ulahing mga Adlaw nasayud gayud nga ang pagbaton og kahimayaan walay kalabutan sa pag-angkon og mga katungod kondili sa pagtuman sa mga responsibilidad.

V.

Ang Ginoo mimando nga kalalakin-an lang ang i-orden sa mga katungdanan sa priesthood. Apan, sama sa gipasabut sa daghang nga lider sa Simbahan, ang kalalakin-an dili mao “ang priesthood.”¹¹ Ang kalalakin-an naghupot sa priesthood, uban sa sagradong katungdanan nga gamiton kini sa pagpanalangin sa tanang anak sa Dios.

Ang kinadak-an nga gahum nga gihatag sa Dios sa Iyang anak nga mga lalaki dili magamit kon dili kauban ang usa sa Iyang anak nga mga babaye, kay ngadto lang sa Iyang anak nga mga babaye gihatag sa Dios ang gahum nga “mahimong tiglalang og mga lawas . . . aron ang plano sa Dios ug ang Dakong Plano mahimong matuman.”¹² Kana ang mga pulong ni Presidente J. Reuben Clark.

Siya mipadayon: “Kini ang papel sa atong mga asawa ug atong mga inahan diha sa Mahangturong Plano. Dili sila ang naghupot sa Priesthood; dili sila ang magdumala sa pagbuhat sa mga katungdanan ug mga buluhaton sa Priesthood; ni sila gisangunon niini nga mga responsibilidad; sila ang mga tigtukod ug tig-organisar ubos sa gahum niini, ug tig-ambit sa mga panalangin niini, mosuporta sa gahum sa Priesthood ug molihok kon tawagon sa balaanong paagi, nga ingon ka importante sa kahangturan ang papel niini sama sa Priesthood mismo.”¹³

Nianang dinasig nga mga pulong, si Presidente Clark naghisgot bahin sa pamilya. Sama sa gipahayag diha sa pamahayag sa pamilya, ang amahan ang mangulo sa pamilya, siya ug ang



mga sulugoon mao kita, sa pangalan ni Jesukristo, amen. ■

MUBO NGA MGA SULAT

1. Linda K. Burton, "Priesthood: 'A Sacred Trust to Be Used for the Benefit of Men, Women, and Children'" (pakigpulong sa Brigham Young University Women's Conference, Mayo 3, 2013), 1; ce.byu.edu/cw/womensconference/transcripts.php.
2. Joseph F. Smith, *Gospel Doctrine*, 5th ed. (1939), 139.
3. Boyd K. Packer, "Priesthood Power in the Home" (worldwide leadership training meeting, Peb. 2012); lds.org/broadcasts; tan-awa usab sa James E. Faust, "Power of the Priesthood," *Ensign*, Mayo 1997, 41–43.
4. *Handbook 2: Administering the Church* (2010), 2.1.1.
5. M. Russell Ballard, "Ang mga Lalaki ug mga Babaye diha sa Buhat sa Ginoo," *Liahona*, Abr. 2014, 48; tan-awa usab sa *Anak nga mga Babaye sa Akong Ginghamarian: Ang Kasaysayan ug Buhat sa Relief Society* (2011), 166.
6. Tan-awa sa Spencer W. Kimball, "Our Great Potential," *Ensign*, Mayo 1977, 49.
7. Joseph Fielding Smith, "Relief Society—an Aid to the Priesthood," *Relief Society Magazine*, Ene. 1959, 4.
8. Joseph Fielding Smith, "Relief Society—an Aid to the Priesthood," 4, 5; tan-awa usab sa *Mga Pagtulun-an sa mga Presidente sa Simbahan: Joseph Fielding Smith* (2013), 344.
9. Tan-awa sa Boyd K. Packer, "The Relief Society," *Ensign*, Mayo 1998, 72; tan-awa usab sa *Anak nga mga Babaye sa Akong Ginghamarian*, 166.
10. Aleksandr Solzhenitsyn, "A World Split Apart" (commencement address nga gipamulong sa Harvard University, Hunyo 8, 1978); tan-awa usab sa Patricia T. Holland, "A Woman's Perspective on the Priesthood," *Ensign*, Hulyo 1980, 25; *Tambuli*, Hunyo 1982, 23; Dallin H. Oaks, "Rights and Responsibilities," *Mercer Law Review*, vol. 36, nu. 2 (winter 1985), 427–42.
11. Tan-awa sa James E. Faust, "Kamong Tanan nga Pinadala sa Langit," *Liahona*, Nob. 2002, 113; M. Russell Ballard, "Kini ang Akong Buhat ug Himaya," *Liahona*, Mayo 2013, 19; Dallin H. Oaks, "Katungod sa Priesthood diha sa Pamilya ug sa Simbahan," *Liahona*, Nob. 2005, 26. Kita usahay moingon nga ang Relief Society mao ang "kauban sa priesthood." Mas tukma nga moingon nga sa buhat sa Ginoo ang Relief Society ug ang kababayan-an sa Simbahan "mga kauban sa mga naghupot sa priesthood."
12. J. Reuben Clark Jr., "Our Wives and Our Mothers in the Eternal Plan," *Relief Society Magazine*, Dis. 1946, 800.
13. J. Reuben Clark Jr., "Our Wives and Our Mothers," 801.
14. "Ang Pamilya: Usa ka Pamahayag ngadto sa Kalibutan," *Liahona*, Nob. 2010, 129.
15. Spencer W. Kimball, "Privileges and Responsibilities of Sisters," *Ensign*, Nob. 1978, 106.
16. M. Russell Ballard, *Liahona*, Abr. 2014, 48; tan-awa usab sa Sheri L. Dew, *Women and the Priesthood* (2013), ilabi na sa kapitulo 6, alang sa mahinungdanong pagpasabot bahin sa mga doktrina nga gipahayag dinhi.

inahan dunay managlahi nga mga responsibilidad, apan sila "adunay katungdanan sa pagtabang sa usag usa ingon nga magkauban."¹⁴ Pipila ka tuig sa wala pa ang pamahayag sa pamilya, si Presidente Spencer W. Kimball mihatag niining dinasig nga pagpasabot: "Kon maghisgot kita bahin sa kaminyoon isip panag-uban, maghisgot kita sa kaminyoon isip *hingpit* nga panag-uban. Dili kita gusto nga ang atong LDS nga kababayan-an mahimong mga kauban nga *maghilum-hilum* ra o may *limitasyon* nianang mahangturong buluhaton! Palihug magmahimong usa ka kauban nga *dunay ikatampo* ug *hingpit* nga kauban."¹⁵

Sa panan-aw sa Dios, sa Simbahan man o sa pamilya, ang kababayan-an ug kalalakin-an pareho ra, nga may managlahi nga mga responsibilidad.

Tapuson nako uban sa pipila ka kamatuoran bahin sa mga panalangin sa priesthood. Dili sama sa mga yawe ug mga ordinasyon sa priesthood, ang mga panalangin sa priesthood maanaa alang sa kababayan-an ug kalalakin-an. Ang gasa sa Espiritu Santo ug ang mga panalangin sa templo mao ang pamilyar nga paghulagway niining kamatuoran.

Sa iyang makahuluganong pakigpulong sa BYU Education Week sa

miaging summer, si Elder M. Russell Ballard mihatag niining mga pagtulun-an:

"Ang doktrina sa atong Simbahan nagbutang sa mga babaye nga pareho apan lahi sa mga lalaki. Wala isipa sa Dios nga ang lalaki mas importante kay sa babaye o ang babaye mas importante kay sa lalaki. . . .

"Kon ang mga lalaki ug mga babaye mangadto sa templo, mahatagan sila sa pareho nga gahum, nga mao ang gahum sa priesthood. . . . Ang paggamit sa gahum ug mga panalangin sa priesthood anaa alang sa tanang anak sa Dios."¹⁶

Ako mopamatuod sa gahum ug mga panalangin sa Dios, nga anaa alang sa Iyang anak nga mga lalaki ug anak nga mga babaye. Ako mopamatuod sa awtoridad sa priesthood, nga naglihok sa tanang mga katungdanan ug mga kalihokan sa Ang Simbahan ni Jesukristo sa mga Santos sa Ulahing mga Adlaw. Ako mopamatuod sa balaanong gidumala nga buluhaton sa mga yawe sa priesthood, nga gihuptan ug gigamit sa kahingpitan niini pinaagi sa atong propeta/presidente, si Thomas S. Monson. Sa katapusan ug labaw sa tanan, ako mopamatuod sa atong Ginoo ug Manluluwas, si Jesukristo, kansang priesthood iya ug kansang



Ni Elder Donald L. Hallstrom
Sa Kapangulohan sa Seventy

Unsa nga Matang sa mga Tawo?

Unsa nga mga kausaban ang gikinahanglan nato aron mahimong matang sa mga tawo nga kita mahisama?

Kon atong hunahunaon kining tibuk kalibutan nga miting, mapahinumduman kita nga walay ikatandi niini nga panagtigum—bisan asa. Ang katuyoan sa sesyon sa priesthood sa kinatibuk-ang komperensya mao ang pagtudlo sa mga naghupot sa priesthood kon unsa nga matang sa mga tawo kita angay nga mahisama (tan-awa sa 3 Nephi 27:27) ug

pagdasig kanato nga makab-ot kana.

Sa katuigan sa akong Aaronic Priesthood sa Hawaii tunga sa siglo na ang milabay ug isip usa ka misyonaryo sa England, magtigum kami diha sa mga meetinghouse ug (sa tumang paningkamot) maminaw sa sesyon sa priesthood gamit ang koneksyon sa telepono. Milabay ang katuigan ang mga satellite makasibya na sa pinili

nga mga dapit sa Simbahan gamit ang talagsaong mga dish receiver aron kita makakita ug makapaminaw sa mga panghitabo. Nakadayeg kita niana nga teknolohiya! Ang pipila maghunahuna nga sa kalibutan karon, diin bisan kinsa nga dunay Internet gamit ang smartphone, tablet, o computer makadawat sa mga mensahe niining miting.

Hinoon, kining gipalapdan nga pag-access sa mga tingog sa mga sulugoon sa Ginoo, nga sama ra sa kaugalingon nga tingog sa Ginoo (tan-awa sa D&P 1:38), wala kaayoy bili gawas kon andam kita nga modawat sa pulong (tan-awa sa D&P 11:21) ug dayon sundon kini. Sa yanong pagkasulti, ang katuyoan sa kinatibuk-ang komperensya ug niining sesyon sa priesthood matuman kon andam lang kita nga molihok—kon andam kita nga mag-usab.

Pipila ka dekada ang milabay miserbisyo ko isip bishop. Sulod sa daghang katuigan nakaila nako ang usa ka tawo sa among ward nga magulang kaayo nako. Kini nga brother dunay problema sa relasyon sa iyang asawa ug nalayo sa iyang mga anak. Naglisud siya nga makatrabaho, walay suod nga higala, ug naglisud sa pagpakigsuod sa mga miyembro sa ward nga sa kadugayan dili na siya ganahan nga moserbisyo sa Simbahan. Atol sa usa ka grabe nga panaghisgot bahin sa mga hagit sa iyang kinabuhi, mipaduol siya nako—*isip iyang panapos sa among daghang giistoryahan—ug mii-
ngon, “Bishop, dali kaayo ko masuko, ug ingon gyud ko niana!”*

Kana nga pamahayag nakapahnuktok kanako nianang gabhiuna ug nakapahasol nako pag-ayo. Sa higayon nga kini nga tawo nakahukom—sa higayon nga kita mohukom—*“Ingon gyud ko niana,”* atong giputol ang atong abilidad nga mag-usab. Sama lang nga kita miisa sa puting bandila, mibutang sa atong hinagiban, miatras sa gubat, ug misurender—ang paglaum nga makadaug nawala. Samtang ang uban nato naghunahuna nga wala kana maghulagway nato, tingali kitang tanan dunay usa o duha ka bati nga kinaiya, *“Ingon gyud ko niana.”*



Nagtigum kita niining miting sa priesthood tungod kay kon kinsa kita karon dili kana mao kita sa umaabut. Nagtigum kita karong gabhiona diha sa pangalan ni Jesukristo. Nagtigum kita uban sa pagsalig nga ang iyang Pag-ula makahatag sa matag usa nato—bisan unsa pa ang atong mga kahuyang, kakulangan, pagkaadik—og abilidad nga mag-usab. Nagtigum kita uban sa paglaum nga ang atong umaabut, bisan unsa pa ang atong mga kaagi, mahimong mas maayo.

Kon kita moapil niini nga miting uban sa “tinuod nga katuyoan” nga mag-usab (Moroni 10:4), ang Espiritu hingpit nga makasulod sa atong kasingkasing ug hunahuna. Sama sa gipadayag sa Ginoo kang Propeta Joseph, “Ug mahinabo, nga tungod kay sila . . . naggamit sa hugot nga pagtuo ngari kanako”—hunahunaa nga ang hugot nga pagtuo usa ka baruganan sa gahum ug buhat—“Ako mobu-bu sa akong Espiritu diha kanila sa adlaw nga sila magtigum sa ilang mga kaugalingon nga maghiusa” (D&P 44:2). Nagpasabut kana nga karong gabhiona!

Kon naghunahuna kamo nga ang inyong mga hagit daghan kaayo, mosulti ko ninyo bahin sa usa ka tawo nga among nakaila sa gamayng bala-ngay gawas sa Hyderabad, India, niadtong 2006. Kini nga tawo nagpakita og kaandam nga mag-usab. Si Appa Rao Nulu natawo sa probinsya sa India. Dihang tres anyos pa siya, nasakit siya og polio ug maoy hinungdan sa pisikal nga kakulangan. Ang iyang katilingban mitudlo niya nga ang iyang potensyal limitado kaayo. Apan, pagkahamtong niya iyang nakaila ang atong mga misyonaryo. Sila mitudlo niya bahin sa mas dakong potensyal, niini nga kinabuhi ug sa kahangturan nga moabut. Nabunyagan ug nakumpirmahan siya nga miyembro sa Simbahan. Nakabaton og dakong panglantaw, mihimo siya og tumong nga makadawat sa Melchizedek Priesthood ug magserbisyo og full-time nga misyon. Niadtong 1986 gi-orden siya pagka-elder ug nagmisyon sa India. Ang paglakaw dili sayon—gihimo niya ang tanan, gamit ang sungkod sa kada



kamot, ug siya kanunayang matumba—apan wala gyud mohunong. Mihimo siya og pasalig nga madungganon ug maunungon siya nga moserbisyo sa misyon, ug gihimo niya kini.

Dihang nagkita kami ni Brother Nulu, dul-an sa 20 ka tuig human sa iyang misyon, malipayon siya nga misugat namo ug midala namo sa dili sementado nga dalan ngadto sa duha ka kwarto nga balay nga gipuy-an nila sa iyang asawa ug tulo ka anak. Grabe kaayo kainit ug alimuot nga panahon. Naglisud gihapon siya og lakaw, apan wala mobati nga luoy ang iyang kahimtang. Pinaagi sa personal nga kakugi, nahimo siyang magtutudlo, naghatag og edukasyon sa mga bata sa balangay. Dihang misulod kami sa iyang gamay nga balay, gidala dayon ko niya sa daplin ug gikuha ang usa ka kahon nga gisudlan sa iyang labing importante nga mga kabtangan. Gusto niyang ipakita nako ang usa ka piraso

nga papel. Mabasa kini, “Nanghinaut ko nga moabut ang maayo nga mga butang ug mga panalangin kang Elder Nulu, ang maisugon ug malipayong misyonaryo; [gipetsahan] Hunyo 25, 1987; [gipirmahan] Boyd K. Packer.” Adtong higayuna, sa dihang si Elder Packer mibisita sa India ug namulong ngadto sa grupo sa mga misyonaryo, siya mimatuod kang Elder Nulu sa iyang potensyal. Sa lintunganay, ang gisulti ni Brother Nulu nianang adlaw niadtong 2006 mao nga ang ebanghelyo ang nakapausab niya—sa kanunay!

Niining pagbisita sa balay sa mga Nulu, gikuyugan kami sa presidente sa misyon. Miadto siya aron interbyuhon si Brother Nulu, iyang asawa, ug mga anak—aron ang mga ginikanan makadawat sa ilang endowment ug ma-sealed ug aron ang mga anak ma-sealed sa ilang mga ginikanan. Gipresentar usab namo sa pamilya ang mga sabut nga mobiyahe sila ngadto sa Hong Kong China Temple para niining mga ordinansa. Mihilak sila sa tumang kalipay kay ang ilang dugay na nga gipangandoy matuman na.

Unsa ang gilauman sa usa ka nag-hupot sa priesthood sa Dios? Unsa nga mga kausaban ang gikinahanglan nato aron mahimong matang sa mga tawo nga kita mahisama? Maghimo ko og tulo ka sugyot:

1. Kita kinahanglan nga mahimong mga lalaki nga takus nga naghupot sa priesthood! Batan-ong lalaki man kita nga naghupot sa Aaronic Priesthood o mga lalaki nga naghupot sa Melchizedek Priesthood, kinahanglang mga lalaki kita nga takus nga naghupot sa priesthood, mopakita og espirituhanong kahingkod tungod kay mihimo kita og mga pakigsaad. Sama sa gisulti ni Pablo, “Sa bata pa ako, nagsulti ako nga ingon og bata, nagpanghunahuna ako nga ingon og bata, nagpangatarungan ako nga ingon og bata: apan sa nahamtong na ako, gihiklin ko ang mga paaging binata” (1 Mga Taga-Corinto 13:11). Kinahanglang lahi kita tungod kay naghupot kita og priesthood—dili



arogante o magarbhon o mag-hunahuna nga labaw kita sa uban apan magmapainubsanon ug matudloan ug maaghup. Ang pagdawat sa priesthood ug sa lain-laing katungdanan kinahanglang makahuluganon kanato. Dili kini usa lang ka “tulumanon” nga awtomatik nga mahitabo sa piho nga edad kondili usa ka sagradong buhat sa pakigsaad nga mahunahunaong gihimo. Kita kinahanglang mobati nga bulahan ug mapasalamaton kaayo nga ang atong matag buhat nagpakita niini. Kon panagsa lang kitang naghunahuna sa priesthood, kita kinahanglang mag-usab.

2. Kinahanglan kita nga moserbisyo! Ang katuyoan sa paghupot sa priesthood mao ang pagpalambo sa atong calling (tan-awa sa D&P 84:33) pinaagi sa pagserbisyo sa uban. Ang paglikay sa atong labing importanting katungdanan nga moserbisyo sa atong asawa ug mga anak, dili modawat o dili kaayo mobuhat sa mga calling sa Simbahan, o dili magpakabana sa uban gawas kon kita ganahan lang dili gyud angay nga kita ingon niana. Mideklarar ang Manluluwas, “Higugmaa ang Ginoo nga imong Dios

sa tibuok mong kasingkasing, ug sa tibuok mong kalag, ug sa tibuok mong salabutan” (Mateo 22:37) ug unya midugang, “Kon kamo nahigugma kanako kamo mag-alagad kanako” (D&P 42:29). Ang pagkahakog mao ang babag sa responsibilidad sa priesthood, ug kon mao kana ang atong kinaiya, kinahanglang mag-usab kita.

3. Kinahanglan nga takus kita! Tingali ako walay sama nga abilidad ni Elder Jeffrey R. Holland sa dihang namulong siya sa sesyon sa priesthood pipila ka tuig na ang milabay nga “mopaduol ko og gamay kaninyo . . . , mainiton nga mamulong” (“Apil Kitang Tanan,” *Liahona*, Nob. 2011, 45); apan, minahal nga kaigsoonan, kinahanglan atong masayran nga ang komon nga mga binuhatan sa kalibutan makababag sa atong gahum diha sa priesthood. Kon naghunahuna kita nga mahimo kita nga monunot sa pornograpiya o mosupak sa kaputli o dili magmatinuoron sa bisan unsa nga matang ug kini walay dautang epekto kanato ug sa atong pamilya, kita nalingla. Si Moroni namahayag, “Tan-awa nga kamo mohimo sa tanan nga butang diha sa katakus”

(Mormon 9:29). Ang Ginoo kusganong mimando, “Ug Ako karon mohatag nganha kaninyo og sugo sa pagbantay mahitungod sa inyong mga kaugalingon, sa paghatag og makugihon nga pagsunod sa mga pulong sa kinabuhi nga dayon” (D&P 84:43). Kon dunay wala masulbad nga mga sala nga nakapugong sa atong katakus, mag-usab kita.

Ang kompleto lang nga tubag sa pangutana ni Jesukristo nga “Unsa nga matang sa mga tawo kamo angay nga mahisama?” mao kanang mubo ug klaro Niyang gihatag: “Gani sama nga Ako mao” (3 Nephi 27:27). Ang pagdapit nga “duol ngadto kang Kristo, ug paghingpit diha kaniya” (Moroni 10:32) parehong nagkinahanglan ug nagpaabut og kausaban. Sa kalooy, Siya wala mobiya nato nga nag-inusara. “Ug kon ang mga tawo moduol ngari kanako Ako mopakita ngadto kanila sa ilang kahuyang. . . . Niana Ako mohimo sa mahuyang nga mga butang nga mahimo nga malig-on” (Ether 12:27). Mosalig sa Pagula sa Manluluwas, kita makahimo sa pag-usab. Sigurado ako niini. Sa pangalan ni Jesukristo, amen. ■



Ni Randall L. Ridd

Ikaduhang Magtatambag sa Kinatibuk-ang
Kapangulohan sa Young Men

Ang Pinili nga Henerasyon


Gipili kamo sa pag-apil sa Iyang buhat karon kay Siya misalig kaninyo nga makahimo og maayong pagpili.

Mga young men, tingali nakadungog na mo nga kamo ang “pinili nga henerasyon,” buot pasabut nga kamo gipili ug giandam sa Dios sa pag-anhi sa yuta karon alang sa talagsaong katuyoan. Nasa-yud kong tinuod kini. Apan karon gusto kong mamulong kaninyo isip “pinili nga henerasyon” kay wala pa sukad sa kasaysayan nga ang usa ka tawo gipanalangin og ingon ka daghang kapilian. Ang daghang kapilian nagpasabut og daghang oportunidad; daghang oportunidad nagpasabut og daghang potensyal sa paghimo og maayo ug, kon way swerte, sa dautan. Mituo ko nga gipadala kamo sa Dios karong panahona kay Siya misalig kaninyo nga malampusong moila sa mga makalibog nga kapilian.

Niadtong 1974, si Presidente Spencer W. Kimball miingon, “Nagtuo ko nga ang Ginoo mahinamong mi-hatag kanato sa mga imbensyon nga lisud masabtan sa ingon natong mga dili batid” (“When the World Will Be Converted,” *Ensign*, Okt. 1974, 10).

Ug Iyang gituman! Nagtubo kamo uban sa pinakatalagsaong mga himan alang sa kaayohan sa kasaysayan sa tawo: ang Internet. Uban niini anaa

ang daghang kapilian. Ang kadaghan og kapilian, sa laing bahin, nagdala og katugma nga tulubagon. Dali ra kini ninyong i-access alang sa pinakamaayo ug dali usab alang sa pinakadautan dinhi sa kalibutan. Gamit niini dali ra kaayo ninyo mahimo ang dagkong butang, o pwede sab nga mausikan ninyo sa internet ang tanan ninyong panahon ug moubos ang inyong potensyal. Sa usa lang ka pag-klik, inyong ma-access kon unsay inyong ganahan pag-ayo. Mao kana ang prinsipyo—unsay inyong ganahan



pag-ayo? Unsay makapalingaw ninyo? Asa mo ihatud sa inyong mga tinguha?

Hinumdumi nga ang Dios “mohatag ngadto sa mga tawo sumala sa ilang gitinguha” (Alma 29:4) ug Siya “mohukom sa tanan nga mga tawo sumala sa ilang mga buhat, sumala sa tinguha sa ilang mga kasingkasing” (D&P 137:9; tan-awa usab sa Alma 41:3).

Si Elder Bruce R. McConkie miingon: “Sa tinuod bisan kini paghulagway lang, ang *libro sa kinabuhi* mao ang rekord sa binuhatan sa tawo sama nga kini gipatik diha sa ilang lawas. . . . Nga ang, matag hunahuna, pulong, ug buhat dunay [epekto] sa lawas sa tawo; tanan magbilin og marka, mga marka nga Siya nga Mahangturon ang mobasa nga sama ra ka sayon sa pagbasa og libro” (*Mormon Doctrine*, 2nd ed. [1966], 97).

Ang Internet morekord sa inyong mga tinguha, nga ipahayag pinaagi sa pag-search ug pag-klik. Daghan kaayong naghulat niana nga mga tinguha. Kon mag-surf mo sa Internet, magbilin mo og mga marka—unsay inyong gisulti, unsay inyong gitan-aw, unsa mo kadugay diha, ug unsa nga mga butang ang inyong ganahan. Niining paagiha, ang Internet magmugna og inyong profile—maingon ta, “naka-internet nga libro sa kinabuhi.” Sama sa kinabuhi, ang Internet mohatag ninyo og daghan sa unsay inyong gipangita. Kon ang inyong tinguha putli, ang Internet mopadako pa niini, mopasayon sa paglihok sa maayong butang nga gitinguha. Apan ang kaatbang niini tinuod usab.

Si Elder Neal A. Maxwell mipasabut niining paagiha:

“Unsay hugot natong gitinguha, o labaw pa, maoy modangat kanato ug maoy atong madawat didto sa kahangturan. . . .

“. . . Sa pagkontrol ug pagbansay lamang sa atong mga tinguha kini mahimo nga dapig kanato imbis kaaway!” (“According to the Desire of [Our] Hearts,” *Ensign*, Nob. 1996, 21, 22).

Batan-on kong mga igsoon, kon dili ninyo buhatan ang pagkontrol sa inyong mga tinguha, ang kalibutan ang mobuhat niini alang ninyo.



Kada adlaw tinguha sa kalibutan ang pagkontrolar sa inyong mga tinguha, mag-agni kaninyo sa pagpalit, pagklik, pagdula, pagbasa o pagtan-aw. Sa katapusan, kamo ra ang mopili. Kamo ang magbuot. Gahum kini dili lang sa pagbuhat sa inyong gitinguha apan sa pagpalunsay sab niini, ug pagpanindot sa inyong mga tinguha. Ang inyong kabubut-on maoy makahimo niini. Ang matag pagpili mahimong mopaduol o motabang sa unsay angay unta ninyo nga mamahimo; ang kada-klik dunay kahulugan. Mangutana mo kanunay, “Unsa kahay resulta ani nga pagpili?” Palambo ang abilidad aron makita ang sangputanan.

Gustong i-kontrol ni Satanas ang inyong kabubut-on aron mahimo niya ang iyang gusto kaninyo. Nasayud siya nga ang pinakamaayong paagi mao ang paglit-ag kaninyo sa makaadik nga buhat. Ang inyong pagpili maoy ilhanan kon ang teknolohiya makatabang ba o moulipon kaninyo.

Mohatag ko og upat ka baruganan nga makatabang ninyo, mga pinili nga henerasyon, i-kontrol ang inyong mga tinguha ug pagmatngun sa inyong paggamit sa teknolohiya.

Una: Ang Pagkaila kon si Kinsa Gayud Kamo Makapasayon sa Pagdesisyon

Duna koy higala kinsa nakakat-on niini sa personal kaayong paagi. Nagdako ang iyang lalaking anak sa ebanghelyo, apan sa espirituhanong paagi naglibug pa. Balibaran niya kanunay

ang mga oportunidad nga makagamit sa priesthood. Nasagmuyo ang iyang mga ginikanan dihang midesisyon siya nga dili siya magmisyon. Kinasingkasing nga nag-ampo ang akong higala alang sa iyang anak, unta mausab ang iyang kasingkasing. Napusgay ang mga paglaum dihang mipahibalo ang iyang anak nga siya magminyo na. Mihangyo ang iyang papa sa iyang anak nga mokuha sa iyang patriyarkal nga panalangin. Misugot ra ang anak apan miinsister nga mag-inusara siyang moadto sa patriyarka.

Sa iyang pag-uli human sa pagpanalangin, emosyonal kaayo siya. Iyang gidala ang iyang hinigugma sa gawas, aron pribado siyang makaistorya kaniya. Mili-li ang amahan sa bintana diin nakita ang mga batan-on nga nanrapo sa ilang mga luha.

Dayon gisultihan sa anak ang iyang papa unsay nahitabo. Uban sa talagsaong emosyon mipasabut ang anak nga atol sa pagpanalangin, daklit niyang nakita kon si kinsa siya didto sa kalibutan sa wala pa dinhi sa yuta. Nakita niya kon unsa siya ka maisugon ug epektibo sa pag-aghat sa uban aron mosunod kang Kristo. Dihang nakaila siya kinsa siya, mahimo kaha nga siya dili magmisyon?

Mga batan-on, hinumdumi kon si kinsa kamo. Hinumdumi nga naghupot kamo sa balaang priesthood. Modasig kini kaninyo sa husto nga pagpili samtang mag-Internet kamo ug sa tibuok ninyong kinabuhi.

Ikaduha: Pag-charge Diha sa Tinubdan sa Gahum

Sa cellphone nga inyong gigunitan mabasa ninyo diha ang mga kaalam sa kapanahonan—labaw sa tanan, ang mga pulong sa mga propeta, gikan sa Daang Tugon hangtud sa panahon ni Thomas S. Monson. Apan kon dili ninyo i-charge kanunay ang inyong cellphone, walay pulos kini, dili mo kakontak sa uban. Ayaw itugot nga dili ma-charge kada adlaw ang inyong bateriya.

Sama kaimportante nga kanunayng full charge ang inyong cellphone, mas importante sab nga full charge ta sa espirituwal nga paagi. Sa matag higayon nga mag-charge mo sa cellphone, gamita kini isip pahinumdom sa pagpangutana sa inyong kaugalingon kon kamo ba naka-charge sa pinaka-importanting tinubdan sa espirituhanong gahum—pag-ampo ug pagtuon sa kasulatan, kini makaandam alang sa inspirasyon pinaagi sa Espiritu Santo (tan-awa sa D&P 11:12–14). Makatabang kini aron inyong mahibaloan ang hunahuna ug gusto sa Ginoo sa paghimo sa ginagmay apan importanting mga pagpili nga mogiya sa inyong direksyon. Daghan nato ang mohunong dayon sa atong gibuhay aron lang mobasa og text—dili ba mas hatagan unta nato og dugang nga importansya ang mga mensahe gikan sa Ginoo? Ang pagbaliwala nga makonektar niini nga gahum dili gayud angay para nato (tan-awa sa 2 Nephi 32:3).

Ikatulo: Ang Pagpanag-iya og Smartphone Dili Makapahimo Ninyo nga Smart; kondili kon Giunsa kini sa Paggamit

Young men, ayaw mo pagbinugo sa paggamit sa smartphone. Kahibalo mong tanan unsay akong ipasabut (tan-awa sa Mosiah 4:29). Adunay daghan kaayong paagi diin ang teknolohiya makabalda kaninyo sa pinakaimportanting butang. Sunda ang karaang panultihon “Kon unsay inyong gihimo, maoy buhata.” Kon nagdrayb mo, pag-drayb. Kon naa mo sa klase, paminaw sa leksyon. Kon inyong kauban inyong higala, hatagi sila sa pagtagad. Dili makahunahuna og duha ka butang ang inyong utok sa usa ka higayon. Ang multi-tasking mahimo pinaagi sa dali nga pagbalhin sa focus gikan sa usa ngadto sa lain. Ang karaang panultihon nag-ingon, “Kon ang duha ka rabbit ang inyong gukdon, wala moy madakpan.”

Ikaupat: Ang Ginoo Mihatag og Teknolohiya aron Matuman ang Iyang mga Katuyoan

Ang balaang tuyo sa teknolohiya mao ang pagpadali sa buhat sa kaluwasan. Isip mga sakop sa pinili nga henerasyon, kasabut mo unsa ang teknolohiya. Gamita kini sa pagpalambo sa inyong dalan sa pagkahingpit. Kay kamo gihatagan og daghan, mohatag sab kamo (tan-awa sa “Because I Have Been Given Much,” *Hymns*, nu. 219). Ang Ginoo naglaum nga gamiton ninyo kini nga mga himan sa pagpalambo sa Iyang buhat, sa pagpaambit sa ebanghelyo sa mga paagi nga dili mahunahuna sa akong henerasyon. Sa milabayng henerasyon sila makaimpluwensya lang sa ilang mga silingan ug sa ilang lungsod, kamo naay impluwensya pinaagi sa Internet ug sa social media nga molapas pa ug moimpluwensya sa tibuok kalibutan.

Mopamatuod ko nga kini Simbahan sa Ginoo. Gipili kamo sa pag-apil sa Iyang buhat karon kay Siya misalig kaninyo nga makahimo og maayong pagpili. Kamo ang pinili nga henerasyon. Sa pangalan ni Jesukristo, amen. ■



Ni Presidente Dieter F. Uchtdorf

Ikaduhang Magtatambag sa Unang Kapangulohan

Wala Ba Kamo Nalambigit sa Buhat sa Pagpahiuli?

Dako kaayo ang peligro alang kanato isip mga indibidwal, isip pamilya, ug isip Simbahan ni Kristo sa dili paghatag og kinasingkasing nga paningkamot niining sagrado nga buhat.


Dul-an sa 200 ka tuig na ang milabay, ang American short story nga “Rip Van Winkle” nahimong sikat diha-diha. Ang nag-unang karakter, si Rip, usa ka ambisyoso nga tawo nga maayo kaayong molikay sa duha ka butang: trabaho ug iyang asawa.

Usa ka adlaw, samtang nagsuroy-suroy sa kabukiran uban sa iyang iro, iyang nadiskubrihan ang usa ka grupo sa lain og sinul-uban nga mga lalaki nga nag-inum ug nagdula. Human modawat sa ilang ilimnon, si Rip nalipong ug mipiyong sa makadiyot. Dhang mimata na siya, nasurprisa siya nga nawala ang iyang iro, gitay-an

na ang iyang pusil, ug karon duna na siyay taas nga bungot.

Si Rip miuli sa iyang baryo aron lang madiskubrihan nga ang tanan nausab. Ang iyang asawa namatay na, ang iyang mga higala wala na, ug ang litrato ni Haring George III gipulihan na sa litrato sa laing tawo nga wala niya mailhi—kang Heneral George Washington.

Si Rip Van Winkle nakatulog sulod sa 20 ka tuig! Ug sa maong kahimtang, wala na niya masinati ang usa sa labing makapahinam nga panahon sa kasaysayan sa iyang nasud—nakatulog siya panahon sa American Revolution.



Niadtong Mayo 1966, si Dr. Martin Luther King Jr. migamit niini nga istorya isip paghulagway sa iyang pagkigpulong nga “Don’t Sleep Through the Revolution.”¹

Karon, gusto nakong gamiton ang sama nga tema ug mangutana kanatong tanan nga naghupot sa priesthood sa Dios: wala ba kamo nalambigit sa buhat sa Pagpahiuli?

Nagpuyo Kita sa Panahon sa Pagpahiuli

Usahay maghunahuna kita sa Pagpahiuli sa ebanghelyo ingon nga kompleto, butang nga nahitabo na—si Joseph Smith mihubad sa Basahon ni Mormon, nadawat niya ang mga yawe sa priesthood, ang Simbahan naorganisar. Apan sa tinuod lang, ang Pagpahiuli usa ka nagpadayon nga proseso; nagpuyo kita niini karon mismo.

Naglakip kini sa “tanan nga gipadayag sa Dios, sa tanan nga gipadayag Niya karon,” ug sa “daghan nga dagko ug mahinungdanon nga mga butang” nga “Siya mopadayag pa.”² Mga kaigsoonan, ang makapahinam nga mga kalamboan karon kabahin nianang dugay nang gipanagna nga panahon sa pagpangandam nga matapos sa mahimayaong Ikaduhang Pag-anhi sa atong Manluluwas, si Jesukristo.

Usa kini sa labing talagsaon nga panahon sa kasaysayan sa kalibutan! Ang karaang mga propeta nangandoy nga makita ang atong panahon.

Kon mahuman na ang atong panahon sa mortalidad, unsa nga mga kasinatian ang atong mapakigbahin kalabut sa atong kaugalingong kontribusyon niining importante nga panahon sa atong kinabuhi ug sa pagpalambo sa buhat sa Ginoo? Makaingon ba kita nga nagkugi kita og maayo ug mitrabaho sa tibuok natong kasingkasing, gahum, hunahuna, ug kusog? O kinahanglan ba natong angkunon nga ang atong tahas kasagaran mao lang ang tig-oberbar?

Tingali adunay lainlaing mga rason nganong sayon ra nga dili malambigit kalabut sa pagtukod sa gingharian sa Dios. Tuguti kong mohisgut sa tulo ka mahinungdanong butang. Sa pagbuhat nako niini, dapiton ko kamong mamalandong kon adunay magamit ninyo.



Kon kamo makakita nga adunay posibilidad nga molambo, ako kamong gihangyo sa pagkonsiderar kon unsay inyong mabuhat aron mausab alang sa mas maayo.

Kahakog

Una, kahakog.

Kadtong mga hakog magtinguha sa ilang kaugalingong interes ug kalipay labaw sa tanan. Ang labing importante nga pangutana alang sa hakog nga tawo mao ang “Unsa may akong makuha niana?”

Mga kaigsoonan, sigurado ko nga makita ninyo nga kini nga kinaiya klaro nga sukwahi sa diwa nga gikinahanglan aron pagtukod sa gingharian sa Dios.

Kon magtinguha kita nga unahon ang atong kaugalingon kay sa moserbisyo sa uban, ang atong mga prayoridad mahimong masentro sa atong kaugalingong pagka-inila ug kalipay.

Ang miaging mga henerasyon adunay panlimbasug sa nagkalainlaing matang sa pagkaaku-akohon, apan naghunahuna ko nga karon aduna kitay susama o mas daghan pa nga matang sa pagkaaku-akohon. Sulagma lang ba kaha nga ang Oxford Dictionary bag-ohay lang nga miproklamar sa “selfie” isip pulong karong tuiga?³

Natural lang, kitang tanan adunay tinguha nga mainila, ug walay dautan sa pagrelaks ug paglingaw-lingaw sa atong kaugalingon. Apan kon ang pagtinguha sa “bahandi ug pagdayeg sa kalibutan”⁴ mao na ang sentro sa atong tinguha, mawala nato ang matubsanon ug makapalipay nga kasinatian nga moabut kon manggihatagon kita sa atong kaugalingon ngadto sa buhat sa Ginoo.

Unsa man ang solusyon?

Ang tubag, sama ra gihapon, anaa sa mga pulong ni Kristo:

“Kon adunay buot mosunod kanako, kinahanglan magadumili siya sa iyang kaugalingon, ug magpas-an sa iyang krus, ug magasunod kanako.

“Kay bisan kinsa nga buot magapatunhay sa iyang kinabuhi mawagtangan hinoon siya niini; apan bisan kinsa nga magawagtang sa iyang kinabuhi tungod kanako ug tungod sa maayong balita, magapatunhay niini.”⁵

Kadtong hingpit nga motugyan sa ilang kinabuhi ngadto sa atong Manluluwas ug moserbisyo sa Dios ug sa isigkatawo makadiskobre og kabuhong ug kaabunda sa kinabuhi nga dili gayud masinati sa hakog o naghunahuna lang sa kaugalingon. Ang dili hakog mohatag sa ilang kaugalingon.



Mahimo nga kini ginagmay lang nga mga gasa sa gugmang putli nga adunay dakong epekto sa kaayohan: pahiyum, paglamano, gakus, panahon nga gigahin sa pagpaminaw, malumong pulong sa pagdasig, o lihoc sa pagpakabana. Kining tanan nga mga buhat sa kamabination makapausab sa kasingkasing ug kinabuhi. Kon kita mopahimulos sa walay kinutuban nga mga oportunidad sa paghigugma ug pagserbisyo sa atong isigkatawo, lakip ang atong kapikas ug pamilya, ang atong kapasidad sa paghigugma sa Dios ug pagserbisyo sa uban hilabihan nga molambo.

Kadtong moserbisyo sa uban malambigit sa Pagpahiuli.

Pagkaadik

Laing butang nga mahimong hinungdan nga kita dili malambigit niining importante nga panahon sa kalibutan mao ang pagkaadik.

Ang pagkaadik sa kasagaran dili mamatikdan sa sinugdanan. Ang pagkaadik ginagmay kaayo nga mga lihoc nga kon padayon nga gibalik-balik moresulta ngadto sa kinaiya nga

mokontrolar nato. Ang negatibong kinaiya adunay potensyal nga mahimong hilabihan nga makaadik.

Kining pagkaadik nga nagkontrol nato adunay daghang matang, sama sa pornograpiya, alkohol, pakighilawas, drugas, tabako, sugal, pagkaon, trabaho, ang Internet, o virtual reality. Si Satanas, ang atong kaaway, adunay daghang paborito nga mga pamaagi nga iyang gigamit aron paghikaw nato sa atong balaanong potensyal sa pagtuman sa atong misyon sa gingharian sa Ginoo.

Nakapaguol kini sa atong Langitnong Amahan nga makita unsa kaandam ang pipila sa Iyang halangdon nga mga anak nga lalaki sa pagtugot nga makontrolar sa makalaglag nga pagkaadik.

Mga kaigsoonan, naghupot kita sa mahangturong priesthood sa Labawng Makagagahum nga Dios. Kita tinud-anay mga anak nga lalaki sa Labing Halangdon ug gipanalanginan og dakong potensyal. Gitakda kita nga makakab-ot sa atong labing balaanong potensyal. Wala gitumong nga malimitahan kita tungod sa yutan-ong

tinguha, makontrolar sa kaugalingong binuhatan.

Unsa man ang solusyon?

Ang unang butang nga kinahanglan natong masabtan mao nga ang pagkaadik mas sayon nga malikayan kay sa matambalan. Sa mga pulong sa Manluluwas, “Dili motugot nga kini nga mga butang mosulod sa inyong kasingkasing.”⁶

Pipila ka tuig na ang milabay, si Presidente Thomas S. Monson ug ako gitanyagan nga molibut sa Air Force One—ang talagsaong eroplano nga sakyan sa presidente sa Estados Unidos. Dihay mabinantayon kaayo nga pagsusi nga gihimo ang mga Secret Service, ug mipahiyum ko og gamay samtang ang mga agent mikapkap sa atong pinalanggang propeta sa wala pa mosakay.

Dayon ang piloto nga maoy nagdumala midapit nako nga molingkod sa lingkuranan sa kapitan. Talagsaon kadto nga kasinatian nga makalingkod pag-usab sa nindot nga flying machine sama sa klase nga akong gipalupad sulod sa daghang katuigan. Mga handumanan sa paglupad tabok sa kadagatan ug mga kontinente ang mipuno sa akong kasingkasing ug hunahuna. Akong napanan-awan ang makahinam nga pag-takeoff ug pag-landing sa mga airport sa tibuok kalibutan.

Wala ko maghunahuna, akong gibutang ang akong kamot sa upat ka throttle sa 747. Diha-diha dayon, ang malumo ug dili masaypan nga tingog ang nadungog gikan sa likod—ang tingog ni Thomas S. Monson.

“Dieter,” miingon siya, “ayaw gyud paghunahuna niana.”

Wala koy gibuhay, apan siguro nabasa ni Presidente Monson ang akong hunahuna.

Kon matintal kita sa pagbuhay sa mga butang nga dili nato angayang buhaton, maminaw kita sa mahigugmaong pasidaan sa gisaligan nga pamilya ug mga higala, atong minahal nga propeta, ug kanunay sa Manluluwas.

Ang pinakamaayong depensa batak sa pagkaadik mao ang dili gayud pagsugod.

Apan unsay mahitabo niadtong nanlimbasug na sa pagkaadik?

Palihug hibalo, una sa tanan, nga adunay paglaum. Pagtinguha og tabang gikan sa mga minahal sa kinabuhi, mga lider sa Simbahan, ug gibansay nga mga tigtabang. Ang Simbahan naghatag og tabang aron mabuntog ang pagkaadik pinaagi sa lokal nga mga lider sa Simbahan, sa Internet,⁷ ug sa pipila ka dapit, ang LDS Family Services.

Hinumdumi kanunay, nga pinaagi sa tabang sa Manluluwas, makalingkawas kamo gikan sa pagkaadik. Mahimong dugay kini, lisud nga dalan, apan ang Ginoo dili mohunong og tabang ninyo. Siya nahigugma kaninyo. Si Jesukristo miantus sa Pag-ula aron pagtabang ninyo nga mausab, aron sa pagpalingkawas ninyo gikan sa pagkaadik sa sala.

Ang labing importante nga butang mao ang padayon nga paningkamot—usahay magkinahanglan kini og pipila ka pagsulay sa dili pa molampus ang mga tawo. Busa ayaw paghunong. Ayaw kawala og pagtuo. Ipaduol ang inyong kasingkasing ngadto sa Ginoo, ug Siya mohatag ninyo og gahum nga makalingkawas. Siya mohimo ninyo nga gawasnon.

Akong minahal nga mga kaigsoonan, kanunayng magpadayon sa pagpalayo sa mga kinaiya nga moresulta sa pagkaadik. Kadtong mohimo niini makapahinungod sa ilang kasingkasing, gahum, hunahuna, ug kusog ngadto sa pagserbisyo sa Dios.

Malambigit sila sa Pagpahiuli.

Nagkompetensya nga mga Prayoridad

Ang ikatulo nga babag nga makapugong nato sa hingpit nga pagkalambigit niini nga buhat mao ang daghang nagkompetensya nga mga prayoridad nga atong giatubang. Ang pipila nato nagkapuliki og maayo nga sama kita sa usa ka karomata nga giguroy sa usa ka dosena nga mga hayop—matag usa misulay pag-adto sa lainlaing direksyon. Daghang kusog ang nagahin, apan ang karomata walay gipadulngan.

Kasagaran atong ipahinungod ang atong labing maayo nga paningkamot

alang sa usa ka hobby, sport, mga interes sa panginabuhì, ug mga isyu sa komunidad o politika. Kining mga butanga mahimong maayo ug halangdon, apan gibinlan ba kita og panahon ug kusog alang sa unsa untay atong pinakaprayoridad?

Unsa man ang solusyon?

Sa makausa pa, nagagikan kini sa mga pulong sa Manluluwas:

“Higugmaa ang Ginoo nga imong Dios sa tibuok mong kasingkasing, ug sa tibuok mong kalag, ug sa tibuok mong salabutan.

“Mao kana ang dako ug unang sugo.

“Ug ang ikaduha sulosama ra, nga mao kini, Higugmaa ang imong silingan sama sa imong kaugalingon.”⁸

Ang uban pa sa kinabuhi kinahanglan nga ikaduha lang niining duha ka dagkong mga prayoridad.

Bisan sa pagserbisyo sa Simbahan, sayon ang paggahin og daghang panahon sa paglihok nga dili kinasingkasing o wala ang kahulugan sa pagkadisipulo.

Mga kaigsoonan, kita isip mga naghupot sa priesthood mipasalig nga mahimong katawhan nga naghigugma sa Dios ug sa atong silingan ug kinsa andam sa pagpakita niana nga gugma

pinaagi sa pulong ug buhat. Kana ang kahulugan kon si kinsa kita isip mga disipulo ni Jesukristo.

Kadtong nagsunod niini nga mga baruganan nalambigit sa Pagpahiuli.

Usa ka Tawag sa Pagpahigmata

Si Apostol Pablo misulat, “Pagmata ikaw nga nagakatulog, ug bumangon ka gikan sa mga patay, ug pagahayagan ikaw ni Kristo.”⁹

Mahal kong kahigalaan, hibalo nga kamo nga anak sa kahayag.

Ayaw tuguti ang kahakog! Ayaw tuguti ang mga kinaiya moresulta sa pagkaadik! Ayaw tuguti ang nagkompetensya nga mga prayoridad nga maoy mogiya ninyo ngadto sa kawalay pagbati o pagpalayo gikan sa bulahan nga pagkadisipulo ug halangdon nga serbisyo sa priesthood!

Dako kaayo ang peligro alang kanato isip mga indibidwal, isip pamilya, ug isip Simbahan ni Kristo sa dili paghatag og kinasingkasing nga paningkamot niining sagrado nga buhat.

Ang pagkadisipulo ni Jesukristo dili usa ka paningkamot nga kausa lang sa usa ka semana o kausa sa usa ka adlaw. Usa kini ka paningkamot nga kinahanglang kanunay natong buhaton.



Ang saad sa Ginoo ngadto sa Iyang tinuod nga mga naghupot sa priesthood hilabihan ka mahimayaon aron masabtan.

Kadtong matinud-anon sa Aaronic ug Melchizedek Priesthood ug mopalambo sa ilang mga calling “pagabalaanon pinaagi sa Espiritu ngadto sa pagbag-o sa ilang mga lawas.” Busa, ang tanan nga iya sa atong Amahan ihatag ngadto kanila.¹⁰

Ako mopamatuod nga ang makalimpyo nga gahum sa Pag-ula ni Jesukristo ug ang makapausab nga gahum sa Espiritu Santo makaayo ug makaluwas sa katawhan. Kini atong pribilehiyo, atong sagradong katungdanan, ug atong kalipay ang pagpatalinghug sa tawag sa Manluluwas sa pagsunod Kaniya nga may andam nga hunahuna ug hingpit nga katuyoan sa kasingkasing. Atong “iwakli ang mga kadena nga naggapos [kanato], ug [mo]gawas [kita] gikan sa kangiub, ug [mo]bangon gikan sa abug.”¹¹

Kinahanglan kitang magmata ug dili maluya diha sa maayo nga buhat, kay kita “nagpahimutang sa tukuranan sa usa ka mahinungdanon nga buhat,”¹² gani mangandam alang sa pagbalik sa Manluluwas. Mga kaigsoonan, kon atong idugang ang kahayag sa atong ehemplo isip saksi sa katahum ug gahum sa gipahiuli nga kamatuoran, malambigit kita sa Pagpahiuli. Niini ako mopamatuod ug mobilin kaninyo sa akong panalangin sa balaang pangalan sa atong Agalon, gani si Jesukristo, amen. ■

MUBO NGA MGA SULAT

1. Tan-awa sa Martin Luther King Jr., “Don’t Sleep Through the Revolution” (1966 Ware Lecture, Unitarian Universalist Association General Assembly, Hollywood, Florida, Mayo 18, 1966).
2. Mga Artikulo sa Hugot nga Pagtuo 1:9.
3. Tan-awa sa blog.oxforddictionaries.com/press-releases/oxford-dictionaries-word-of-the-year-2013.
4. 2 Nephi 26:29.
5. Marcos 8:34–35.
6. 3 Nephi 12:29.
7. Tan-awa, sama pananglit sa, lds.org/topics/addiction.
8. Mateo 22:37–39.
9. Mga Taga-Efeso 5:14.
10. Tan-awa sa Doktrina ug mga Pakigsaad 84:33, 38.
11. 2 Nephi 1:23.
12. Tan-awa sa Doktrina ug mga Pakigsaad 64:33.



Ni Presidente Henry B. Eyring

Unang Magtatambag sa Unang Kapangulohan

Ang Tawo nga Adunay Priesthood

Mahimo kamo nga usa ka talagsaon nga modelo, kasarangan, o bati nga modelo. Tingali para ninyo dili kini importante, apan sa Ginoo importante kini.

Tanan kita dunay mga bayani, ilabi na kon bata pa ta. Natawo ug nagtubo ko sa Princeton, New Jersey, sa Estados Unidos. Ang pinakasikat nga mga team sa sport nga duol sa among gipuy-an nahimutang sa New York City. Kini ang dapit sa tulo ka propesyonal nga mga team sa baseball niadtong dugay na nga panahon: ang Brooklyn Dodgers, ang New York Giants, ug ang New York Yankees. Ang Philadelphia mas duol gani sa amoa ug mao kini ang dapit sa mga team sa baseball nga Athletics ug Phillies. Adunay daghang potensyal nga mga bayani sa baseball alang nako niadto nga mga team.

Si Joe DiMaggio, nga midula sa New York Yankees, nahimo nako nga bayani sa baseball. Dihang ang akong mga igsoon ug mga higala midula og baseball sa nataran sa eskwelahan nga tupad ra sa among balay, gisulayan nako paghapos ang bat sama sa akong gihunahuna nga ingon aton paghapos ni Joe DiMaggio. Kaniadto kini nga wala pay telebisyon (karaan ni nga kasaysayan), mao nga mga litrato ra gikan sa mga newspaper ang akong gitan-aw aron sundon ang iyang paghapos.

Sa nagdako ko, gidala ko sa akong papa ngadto sa Yankee Stadium. Mao ra kadtong higayona nga akong nakita





si Joe DiMaggio nga midula. Mura og tua gihapon ko didto, sa akong hunahuna siya akong makita nga mihapos sa bat ug makita ang puti nga bola nga milupad lahus ngadto sa mga lingkuranan sa may center field.

Karon, ang akong kahanas sa baseball layo ra gyud kaayo sa kahanas sa akong bayani sa bata pa ko. Apan sa pipila ka higayon nga naigo nako og tarung ang bola, kinopya to nako sa iyang kusganong paghapos kutob sa akong mahimo.

Kon magpili kita og mga bayani, ato dayong kopyahon, sa tinuyo o dili tinuyo, unsay atong giganahan kaayo kanila.

Nalipay ko, nga ang akong mga ginikanan mibutang og maayong mga bayani sa akong dalan niadtong bata pa ko. Gidala ko sa akong papa sa Yankee Stadium kausa ra aron kakita ko sa akong bayani sa baseball nga modula, apan matag Domingo iya kong pakit-on og usa ka tawo nga dunay priesthood nga nahimong bayani. Kadto nga bayani mihulma sa akong kinabuhi. Si papa ang branch president sa gamayng branch nga adto mag-abut sa among balay. Lain pay ato, kon monaug ka ngadto sa silong

kon Domingo sa buntag, naa na ka sa simbahan. Ang among branch wala gayud mosobra sa 30 ka tawo ang manambong.

Dunay batan-ong lalaki kinsa midala sa iyang mama sa among balay alang sa mga miting, apan siya wala gayud mosulod sa balay. Dili siya miyembro. Ang akong papa ang milampos pinaagi sa pag-adto kaniya diin siya mi-park sa sakyanan ug pagdapit niya nga mosulod sa among balay Nabunyagan siya ug siya ang una ug bugtong nakong lider sa Aaronic Priesthood. Siya nahimo nakong bayani sa priesthood. Mahinumduman gihapon nako ang kahoy nga estatuwa nga gihatag niya nako dihang among nakompleto ang proyekto sa pagbugha og kahoy alang sa usa ka biyuda. Nankingamot kong mapareha kaniya sa matag higayon nga mohatag kog makatarunganong pagdayeg sa sulugoon sa Dios.

Mipili ko og laing bayani nianang gamay nga branch sa Simbahan. Siya usa ka United States Marine kinsa mitambong sa among mga miting nga nagsul-ob sa iyang green nga uniporme sa marine. Panahon kadto sa gubat, kadto mismo naghimo niya

nga akong bayani. Gipadala siya ngadto sa Princeton University sa mga marine aron ipadayon ang iyang edukasyon. Apan labaw pa kay sa pagdayeg sa iyang uniporme sa militar, mitan-aw ko sa iyang dula sa Palmer Stadium isip captain sa football team sa Princeton University. Nakakita ko niya nga midula sa university basketball team ug mitan-aw sab niyang midula isip sinaligan nga catcher sa ilang baseball team.

Apan mas labaw pa, iya kong giadto sa akong balay panahon sa semana aron tudloan kon unsaon pag-itsa sa bola sa basketball gamit ang akong tuo ug wala nga kamot. Giingnan ko niya nga akong gikinahanglan kana nga kahanas kay ugma damlag makadula ko og basketball sa maayo nga mga team. Wala ko makaamgo kaniadto, apan sulod sa katuigan, alang kanako, siya usa ka modelo sa tinuod nga tawo nga dunay priesthood.

Matag usa ninyo mahimong modelo nga tawo nga dunay priesthood sa gusto ninyo o dili. Nahimo kamong dinagkutan nga kandila dihang gidawat ninyo ang priesthood. Ang Ginoo mibutang kaninyo sa usa ka tungtungan aron moiwig sa tanan nga

naglibut kaninyo. Tinuod gayud kana alang niadtong anaa sa inyong korum sa priesthood. Mahimo kamo nga usa ka talagsaon nga modelo, kasarangan, o bati nga modelo. Tingali para ninyo dili kini importante, apan sa Ginoo importante kini. Siya misulti sa ingon niini nga paagi:

“Kamo mao ang kahayag alang sa kalibutan. Ang siyudad nga mahimutang sa ibabaw sa bungtod dili gayud mahisalipdan.

“Ang mga tawo dili usab magdagkot og suga aron ibutang kini sa ilawom sa gantangan, kondili sa ibabaw sa tongtonganan; ug kini magaiwag kanilang tanan nga anaa sa sulod sa balay.

“Pasigaa ninyo ang inyong kahayag sa atubangan sa mga tawo, aron makita nila ang inyong maayong mga buhat ug dayegon nila ang inyong Amahan nga anaa sa langit.”¹

Napanalangingan ko tungod sa mga ehemplo sa talagsaong mga naghupot sa priesthood sa mga korum diin bulahan kong nakaserbisyo. Inyong mahimo ang unsay ilang nahimo kanako pinaagi sa pagkahimong ehemplo nga angay sundon sa uban.

Nakabantay ko og tulo ka komon nga kinaiya sa mga naghupot sa priesthood kinsa akong mga bayani. Usa mao ang sumbanan sa pag-ampo, ikaduha ang kinaiya sa pagserbisyo, ug ikatulo mao ang lig-ong desisyon nga magmatinuoron.

Tanan kita mag-ampo, apan ang naghupot sa priesthood nga maoy gusto ninyo nga mamahimo kanunay nga mag-ampo nga sinsero. Inig kagabii moluhod kamo ug magpasalamat sa Dios sa tanang panalangin nianang adlaw. Kamo magpasalamat Kaniya alang sa mga ginikanan, sa mga magtutudlo, ug sa talagsaong mga ehemplo nga angay sundon. Ihulagway ninyo sa inyong mga pag-ampo sa piho kon kinsa ang mipanalangin sa inyong kinabuhi ug giunsa, atol nianang adlaw. Mokabat kana og sobra sa pipila lang ka minutos ug sobra sa ginagmayng paghunahuna. Mosurprisa kini ninyo ug makausab kaninyo.

Samtang mag-ampo kamo og kapasayloan, kamo mopasaylo usab sa uban. Samtang magpasalamat kamo sa Dios

sa Iyang kamabination, mahunahuna ninyo ang uban, sa ilang ngalan, kinsa nagkinahanglan sa inyong pagbati. Usab, kana nga kasinatian mosurprisa kaninyo sa matag adlaw, ug sa ngadto-ngadto makausab kini kaninyo.

Usa ka paagi nga kamo mausab sa ingon ka hugot nga pag-ampo mao, mosaad ko kaninyo, nga inyong bation nga tinuod kamo nga anak sa Dios. Kon mahibaloan ninyo nga kamo anak sa Dios, mahibalo sab mo nga daghan Siya og gilauman diha kaninyo. Tungod kay kamo Iyang anak, Siya naglaum nga inyong sundon ang Iyang mga pagtulun-an ug ang mga pagtulun-an sa Iyang mahal nga Anak, si Jesukristo. Naglaum Siya nga kamo magmanggihatagon ug magmabination sa uban. Masagmuyo Siya kon magmapahitas-on kamo ug kaugalingon ra ang hunahunaon. Siya mopanalangin kaninyo og tinguha aron maghunahuna kamo sa uban labaw kay sa inyong kaugalingon.

Ang uban ninyo mga modelo na sa dili hinakog nga priesthood nga pagserbisyo. Sa mga templo sa kalibutan, ang mga naghupot sa priesthood mangabut sa dili pa mosubang ang adlaw. Ug ang uban nagserbisyo pa bisan dugay na nga misawop ang adlaw. Walay pasidungog o pagpamakpak niini nga kalibutan alang niana nga pagsakripisyo sa oras ug pagpaningkamot. Nakakuyog ko sa mga batan-on samtang giserbisuhan nila ang mga tua na sa kalibutan sa espiritu, kinsa dili makadawat sa mga panalangin sa templo nga sila ra.

Dihang akong nakita ang kalipay imbis kakapoy diha sa mga nawong niadtong miserbisyo og sayo ug sa kagabhion, nasayud ko nga dunay talagsaong ganti niining kinabuhia alang niana nga matang sa walay hinakog nga pagserbisyo sa priesthood, apan kini usa lamang ka timaan sa kalipay nga ilang ikapaambit sa mga tawo nga ilang giserbisuhan nga tua sa kalibutan sa espiritu.

Akong nakita kana nga samang kalipay sa mga nawong niadtong misugilon sa uban bahin sa mga panalangin nga moabut tungod sa pagkahisakop sa gingharian sa Dios.

May nailhan kong branch president kinsa hapit matag adlaw modala og tawo ngadto sa mga misyonaryo aron ilang matudloan. Pipila pa lang ka bulan ang milabay dili pa siya miyembro sa Simbahan. Karon naa ang mga misyonaryo nga nagtudlo ug usa ka branch nga naglambo ug nalig-on tungod kaniya. Apan labaw pa niana, kahayag siya ngadto sa uban kinsa mobuka sa ilang ba-ba ug mopadali sa pagpundok sa Ginoo sa mga anak sa Langitnong Amahan.

Samtang mag-ampo og magserbisyo kamo sa uban, ang inyong kahibalo nga kamo anak sa Dios ug ang inyong mga pagbati ngadto Kaniya molambo. Mas mahibalo kamo nga magsubo Siya kon kamo dili matinuoron sa bisan unsang paagi. Mas madeterminado kamo sa pagtuman sa inyong gisulti ngadto sa Dios ug sa uban. Mas dili kamo manghilabut sa mga butang nga dili inyoha. Mas matinuoron kamo sa inyong mga employer. Mas madeterminado kamo nga moabut sa oras ug mokompleto sa tanang buluhaton nga gihatag sa Ginoo nga inyong gidawat nga buhaton.

Kay sa maghunahuna lang kon moabut ba ang ilang mga home teacher, ang mga bata sa pamilya nga inyong tudloanan magpaabut gayud uban sa paghinamhinam sa inyong pagbisita. Ang akong mga anak nakadawat niana nga panalangin. Samtang nagtubo sila, sila dunay mga bayani sa priesthood nga mitabang nila nga mohimo og ilang kaugalingong mga plano sa pagserbisyo sa Ginoo. Kana nga bulahang ehemplo gipasa na karon ngadto sa ikatulong henerasyon.

Ang akong mensahe usa sab ka mensahe sa pasalamat.

Salamat sa inyong mga pag-ampo. Salamat sa inyong pagluhod sa pagila sa kamatuoran nga wala ninyo ang tanang tubag. Mag-ampo kamo sa Dios sa langit sa pagpahayag sa inyong pasalamat ug paghangyo sa Iyang mga panalangin diha sa inyong kinabuhi ug mga pamilya. Salamat sa inyong pagserbisyo sa uban ug sa mga panahon nga gibati ninyong wala ninyo kinahanglana ang pasidungog sa inyong pagserbisyo.

Atong gidawat ang pasidaan sa Ginoo nga kon mangita kita og pasidungog sa kalibutan sa atong pagserbisyo, basin mawala kanato ang mas dagkong panalangin. Inyong mahinumduman kini nga mga pulong:

“Magmatngon kamo nga ang inyong maayong mga buhat dili ninyo himoon sa atubangan sa mga tawo, aron lamang sa pagpasundayag niini ngadto kanila: kay sa ingon niana wala kamoy balus gikan sa inyong Amahan nga anaa sa langit.

“Busa sa magahatag kag limos, ayaw pagpatingog og trumpeta sa atubangan mo, ingon sa ginahimo sa mga maut sa sulod sa mga sinagoga ug diha sa kadalanan, aron sila pagadayegon sa mga tawo. Sa pagkatinuod magaingon ako kaninyo, sila nakadawat na sa ilang balus.

“Apan ikaw sa magahatag kag limos, ayaw pahibaloo ang kamot mong wala sa gibuhay sa kamot mong tuo:

“Aron matago ang imong limos: ug ang imong Amahan nga nagatan-aw sa tago magabalos kanimo.”²

Ang nahimo nakong mga modelo nga talagsaong mga naghupot sa priesthood wala diha dayon mahibalo nga sila dunay bayanihong mga kalidad. Gani, ingon og dili nila makita ang mga butang nga akong giganahan kanila. Misulti ko nga ang akong papa usa ka matitud-anong presidente sa gamay nga branch sa Simbahan sa New Jersey. Dayon nahimo siyang sakop sa general board sa Sunday School sa Simbahan. Gani, nagmatngon ko nga mapaubsanong mamulong karon bahin sa iyang priesthood nga panerbisyo, tungod kay siya mapaubsanon.

Mao usab niadtong marine kinsa akong bayani sa bata pa ko. Wala ko niya istoryahi bahin sa iyang priesthood nga panerbisyo o sa iyang mga kalamposan. Miserbisyo lang siya. Akong nahibaloan ang iyang pagkamatinud-anon gikan sa uban. Kon iyang nakita ang iyang mga kinaiya nga akong giganahan, dili ko makasulti.

Mao nga ang akong tambag ninyo kinsa gustong manalangin sa uban gamit ang inyong priesthood kini may kalabutan sa inyong kinabuhi nga



pribado ngadto sa tanan gawas lang sa Dios.

Mag-ampo Kaniya. Pasalamat Siya sa tanang maayo sa inyong kinabuhi. Pangutan-a Siya kinsang mga tawhana ang Iyang giandam aron inyong serbisuhan. Pangamuyo nga Iya kamong tabangan niana nga pagserbisyo. Pag-ampo aron kamo mapasaylo ug aron kamo mapasaylo. Dayon serbisuyhi sila, higugmaa sila, ug pasaylo sila.

Labaw sa tanan, hinumdumi nga sa tanan ninyong serbisyo nga gihatag, walay mas labaw kay sa pagtabang sa mga tawo nga mipili nga mahimong takus aron maangkon ang kinabuhing dayon. Gihatag sa Dios ang malukpanong direksyon kon unsaon nato sa paggamit ang atong priesthood. Siya ang hingpit nga ehemplo niini. Kini ang ehemplo nga atong nakita sa gamayng bahin sa pinakamaayo sa Iyang mortal nga mga sinugo:

“Ug ang Ginoong Dios misulti ngadto kang Moises, nga nag-ingon: Ang mga langit, sila daghan kaayo, ug sila dili maihap sa tawo; apan sila maihap ngari kanako, kay sila ako.

“Ug ingon nga ang usa ka yuta molabay, ug ang mga langit diha niini bisan pa niana ang lain moabut; ug walay katapusan ang akong mga buhat, ni ngadto sa akong mga pulong.

“Kay tan-awa, mao kini ang akong buhat ug ang akong himaya—ang pagpahinabo sa pagka-impormal ug sa kinabuhi nga dayon sa tawo.”³

Motabang kita niana nga buhat. Matag usa kanato makahimo og kalainan. Giandam kita alang sa atong panahon ug dapit sa katapusang mga adlaw nianang sagrado nga buhat. Ang matag usa kanato gipanalangin og mga ehemplo niadtong mihimo niana nga buhat nga maoy pinakaimportanting katuyoan sa ilang panahon dinhi sa yuta.

Akong iampo nga kita magtinabangay aron magamit kana nga oportunidad.

Ang Dios nga Amahan buhi ug kanunay motubag sa inyong mga pag-ampo alang sa tabang nga inyong gikinahanglan aron makaserbisyo gayud Kaniya. Si Jesukristo ang nabanhaw nga Ginoo. Iya kini nga Simbahan. Ang priesthood nga inyong gihuptan mao ang gahum sa paglihok sa Iyang ngalan sa Iyang buhat sa pagserbisyo sa mga anak sa Dios. Samtang inyong ihatag ang tibuok ninyong kasingkasing niini nga buhat, kamo Iyang palamboon. Mosaad ko sa pangalan ni Jesukristo, atong Manluluwas, amen. ■

MUBO NGA MGA SULAT

1. Mateo 5:14–16.
2. Mateo 6:1–4.
3. Moises 1:37–39.



Ni Presidente Thomas S. Monson

Magmakusganon Ka ug Magmaisug

Himoon nato—kitang tanan—nga magbaton og kaisug sa pagpakigbatok sa panan-aw sa katilingban, kaisug sa pagbarug alang sa prinsipyo.

Minahal kong mga kaigsoonan, kanindot nga makauban kamo pag-usab. Nag-ampo ko sa langitnong tabang sa akong pagtuman sa oportunidad sa pagpamulong kaninyo.

Sa gawas niining Conference Center mao ang dugang liboan ka mga tawo nga nagpundok sa mga chapel ug sa ubang lugar sa tibuok kalibutan.

Usa ka komon nga butang ang naghi-usa natong tanan, kay gisaligan kita sa priesthood sa Dios.

Ania kita sa kalibutan sa talagsaong panahon sa kasaysayan niini. Ang atong mga oportunidad hapit walay kinutuban, ug nag-atubang usab kita og daghang mga hagit, ang uban niini nahitabo lamang sa atong panahon.

Nagpuyo kita sa kalibutan nga

ang moral nga mga hiyas, sa daghang paagi, gibaliwala, diin ang sala dayag nga gipakita, ug diin ang mga tintasyon sa pagpalayo sa higpit ug pig-ot nga agianan naglibut kanato. Nag-atubang kita og kanunay nga pagpamugos ug malinglahon nga mga impluwensya nga nagguba sa unsay desente ug mosulay sa pag-ilis sa taphaw nga mga pilosopiya ug binuhatan sa sekular nga katilingban.


Tungod niini ug sa ubang mga hagit, kanunay kitang nag-atubang og mga desisyon nga maoy motino sa atong kapalaran. Aron makahimo kita og saktong mga desisyon, gikinahanglan ang kaisug—ang kaisug sa pagsulti og dili kon gikinahanglan nato, ang kaisug sa pagsulti og oo kon angay, ang kaisug sa pagbuhat sa matarung nga butang tungod kay kini husto.

Tungod kay ang sumbanan karon sa katilingban dali kaayong modis-tansya gikan sa mga hiyas ug mga baruganan nga gihatag sa Ginoo nato, kita tawagon gayud sa pagpanalipod nianang atong gituohan. Makabaton ba kaha kita og kaisug sa pagbuhat sa ingon?

Miingon si Presidente J. Reuben Clark Jr., kinsa sulod sa daghang katui-gan sakop sa Unang Kapangulohan: “Adunay mga hitabo diin [kadtong] nagtuo nga sila adunay pagtuo . . . mi-bati nga, kon ilang ipamatuod sa hing-pit ang ilang gituohan sila biay-biayon sa ilang dili matuohon nga mga kau-ban, mao nga ilang usbon o sayop nga mopasabut sa ilang mga gituohan, o mohatag sila og huyang nga pagpasabut bahin niini, o magpakaaron-ingon nga milimud sila niini. Ang mao mga maut.”¹ Walay usa nato nga gustong tawgon nga maut, apan magduha-duha ba kita sa pagpahayag sa atong pagtuo sa ubang sitwasyon?

Matabangan nato ang atong mga kaugalingon sa atong tinguha sa pagbuhat sa unsay matarung kon atong ibutang ang atong mga kaugali- ngon sa mga dapit ug moapil sa mga kalihokan diin ang atong mga hunahuna maimpluwensahan og maayo ug diin ang Espiritu sa Ginoo mobati nga komportable.





Nakahinumdom ko nga nakabasa sa tambag kaniadto nga gihatag sa amahan ngadto sa iyang anak nga lalaki sa dihang mipalayo siya aron moeskwela: “Kon imong makita ang imong kaugalingon nga anaa sa lugar nga dili unta angay, pahawa!” Akong itanyag sa matag unsa ninyo ang samang tambag: “Kon inyong makita ang inyong kaugalingon nga anaa sa lugar nga dili unta angay, pahawa!”

Ang tawag sa kaisug moabut ka-nunay sa matag usa nato. Kada adlaw sa atong kinabuhi gikinahanglan ang kaisug—dili lang sa importanting mga kalihokan apan sa kasagaran kon kita mohimo og mga desisyon o motubag sa mga kahimtang sa atong palibut. Matud pa sa magbabalak ug manunulat nga taga-Scotland nga si Robert Louis Stevenson: “Wala kaayoy daghang mga saksi sa mga buhat sa kaisug. Apan halangdon gihapon ang inyong kaisug bisan walay nagdasig kaninyo ug walay nagdayeg kaninyo.”²

Ang kaisug makita sa daghang matang. Ang Kristiyanong tagsulat nga si Charles Swindoll misulat: “Ang kaisug dili lang sa panggubatan . . . o

sa maisugong manakop og kawatan sa inyong balay. Ang tinuod nga pagsulay sa kaisug mas hilom. Mao kini ang pagsulay sa kaugalingon, sama sa magpabiling matinud-anon bisan walay nagtan-aw, . . . mag-inusarang magbarug kon kamo wala masabti.”³ Modugang ko nga kining kaisug sa kaugalingon naglakip sa pagbuhat sa matarung nga butang bisan og kita nahadlok, pagpanalipod sa atong mga gituohan bisan sa risgo nga biay-biayon, ug mopadayon niadto nga mga gituohan bisan hulgaon nga mawad-an og mga higala o kahimtang sa katilingban. Siya kinsa magbarug nga makanunayon alang nianang un-say matarung kinahanglang morisgo usahay bisan ang uban mobiy-biay.

Samtang nagserbisyo sa United States Navy sa Ikaduhang Gubat sa Kalibutan, akong nakat-unan ang maisug nga mga binuhatan, kaisug sa makuyaw nga kahimtang, ug mga ehemplo sa kaisug. Usa niini nga dili gayud nako makalimtan mao ang mahilom nga kaisug sa 18 anyos nga seaman—dili nato kauban sa tinu-ohan—kinsa wala mahadlok nga

mag-ampo. Sa 250 ka mga tawo sa pundok, siya lamang ang moluhod matag gabii sa kilid sa iyang higda-anan, taliwala sa mga dili matuohon nga mobiy-biay niya. Sa pagduko, siya nag-ampo ngadto sa Dios. Wala gayud siya mahadlok. Wala gayud siya magduha-duha. Duna siyay kaisug.

Dili pa lang dugay naminaw ko sa usa ka ehemplo sa usa ka tawo kinsa ingon og kulang niining kaisug sa kaugalingon. Usa ka higala misulti sa espirituhanon ug makapalambo sa pagtuo nga sakrament miting nga gitambongan niya ug sa iyang bana sa ilang ward. Usa ka batan-ong lalaki nga naghupot sa katungdanan sa priest sa Aaronic Priesthood mitandog sa mga kasingkasing sa tibuok kongregasyon samtang siya naghisgot sa mga kamatuoran sa ebanghelyo ug sa kalipay sa pagsunod sa mga sugo. Mipamatuod siya og kinasingka-sing, makatandog nga pagpamatuod samtang nagbarug siya sa pulpito, makita nga limpyo sa puti nga polo ug kurbata.

Unya sa samang adlaw, samtang kini nga babaye ug ang iyang bana



nagbiyahe pagawas sa ilang dapit, ilang nakita kining maong batan-ong lalaki nga nakapadasig nila og maayo pipila lang ka oras sa sayo pa. Apan karon, nagpakita siya nga lahi kaayo samtang naglakaw sa daplin sa dalan nga nagsinina og binagis—ug nanigarilyo. Ang akong higala ug ang iyang bana nasagmuyo pag-ayo ug naguol, apan naglibug usab sila kon giunsa niya nga makakombinser pag-ayo diha sa sakrament miting ug dayon dali kaayong nausab.

Mga kaigsoonan, kamo ba pareho ra nga tawo bisan asa kamo ug bisan unsa ang inyong gibuhit—ang tawo nga gusto sa atong Langitnong Amahan kaninyo ug ang tawo nga inyong nahibaloan kon unsa kamo angayang mahimo?

Sa usa ka interbyu nga gimantala sa usa ka nasyonal nga magasin, ang inila nga Amerikano nga NCAA basketball player nga si Jabari Parker, usa ka miyembro sa Simbahan, gi-hangyo sa pagpakigbahin sa labing nindot nga tambag nga iyang nadawat gikan sa iyang amahan. Mitubag si Jabari, “[Ang akong amahan] miingon, Kinahanglang mao ra ka nga tawo kon anaa sa tago o kon anaa sa publiko.”⁴

Importante nga tambag, mga kaigsoonan, alang natong tanan.

Ang atong kasulatan puno sa mga ehemplo sa matang sa kaisug nga gikinahanglan sa matag usa nato karon. Si propeta Daniel nagpakita og dakong kaisug pinaagi sa pagbarug unsay iyang nahibaloan nga matarung ug pinaagi sa pagpakita og kaisug sa pagampo, bisan og gihulga nga patyon kon buhaton niya kadto.⁵

Ang kaisug makita sa kinabuhi ni Abinadi, nga makita sa iyang pagkandam sa paghalad sa iyang kinabuhi kay sa molimud sa kamatuoran.⁶

Dili ba kitang tanan nadasig sa mga kinabuhi sa 2,000 ka mga anak ni Helaman, kinsa nagtudlo ug nagpakita sa panginahanglan sa kaisug sa pagsunod sa mga pagtulunan sa ilang mga ginikanan, nga mahimong putli ug lunsay?⁷

Tingali ang matag usa niining mga asoy sa kasulatan nalabwan sa ehemplo ni Moroni, kinsa adunay kaisug sa pagpadayon diha sa pagkamatarung hangtud sa katapusan.⁸

Sa iyang tibuk kinabuhi, si Propeta Joseph Smith naghatag og dili maihap nga mga ehemplo sa kaisug. Usa sa labing talagsaong panghitabo

nahitabo samtang siya ug ang ubang kaigsoonan gikadinahan—hunahunaa, gikadinahan—ug gibutang sa wala mahuman nga cabin tupad sa korte [courthouse] sa Richmond Missouri. Si Parley P. Pratt, kinsa kauban nga dinakpan, misulat sa usa ka gabii niana: “Naghigda kami ingon og nakatulog hangtud miabut ang tungang gabii, ug ang among mga dunggan ug mga kasingkasing anaa sa tumang kasakit, samtang kami taud-taod nang naminaw sa mga pagbiay-biay, sa mga pamalikas, sa mga pagtamas-tamas ug binastos nga sinultihan sa among mga gwardiya.”

Nagpadayon si Elder Pratt:

“Naminaw ko hangtud naglagot ko pag-ayo, nayugot, nangurog, ug napuno pag-ayo sa espiritu sa masilagon nga hustisya nga hapit dili na ako makalikay sa pagbarug ug mamadlong sa mga gwardiya; apan wala [nako] sultihni si Joseph, o bisan kinsa, bisan naghigda ako tupad kaniya ug nasayud nga nagmata siya. Sa kalit lang mibangon siya, ug misulti sa tingog nga daw dugdog, o ingon sa ngulob nga liyon, nagsulti, ingon ka duol sa akong mahinumduman, ang mosunod nga mga pulong:

“*HILOM. . . Sa ngalan ni Jesukristo ako mobadlong kaninyo, ug momando kaninyo sa paghilom; dili ko mabuhi og laing minuto nga makadungog sa ingon nga pinulongan. Hunong sa ingon nga sinultihan, o ikaw o ako mamatay KARON DAYON!*”

Si Joseph “tul-id kaayong nagbarug sa makagagahum nga kahalangdon,” sumala sa paghulagway ni Elder Pratt. Gikadinahan siya, walay hinagiban, apan kalma ug talahuron siya. Mitan-aw siya sa nahadlok nga mga gwardiya, kinsa miuk-ok sa daplin o mitikubo. Kining ingon og dili mabadlong nga mga tawo nangayo og pasaylo ug mihilom.⁹

Dili tanang mga buhat sa kaisug makahatag og talagsaon o diha-diha nga mga resulta, apan kining tanan makahatag og kalinaw sa hunahuna ug kahibalo nga ang matarung ug ang kamatuoran napanalipdan.

Imposible nga magpabiling matarung sa inyong mga sumbanan kon



ang inyong mga aksyon gibase sa nag-usab-usab nga opinyon ug pag-aprubar sa uban. Gikinahanglan ang kaisug ni Daniel, ni Abinadi, ni Moroni, o ni Joseph Smith aron kita magpabiling dili matarug nianang atong nahibaloan nga matarung. Sila adunay kaisug sa pagbuhat dili kanang unsay sayon apan kanang unsay matarung.

Kitang tanan mag-atubang og kahadlok, makasinati og pagbiay-biay, ug makasugat og pagsupak. Himoon nato—kitang tanan—nga magbaton og kaisug sa pagpakigbatok sa panan-aw sa katilingban, kaisug sa pagbarug alang sa prinsipyo. Ang kaisug, dili kompromiso, ang mopanalangin nato og pagtugot sa Dios. Ang kaisug mamahimong kusganon ug madanihong hiyas kon isipon kini dili lang ang kandam nga mamatay nga may dungog, apan isip determinasyon sa tinarung nga pagpakabuhi. Samtang kita magpadayon, maningkamot sa pagpakabuhi kon unsay gikinahanglan natong buhaton, sigurado kitang makadawat og tabang gikan sa Ginoo ug makakaplag og kahupayan sa Iyang mga pulong. Ganahan ko sa Iyang saad nga narekord sa basahon ni Josue:

“Ikaw dili ko kawangon, ni biyaan ko ikaw. . . .

“ . . . Magmakusganon ka ug magmaisug; ayaw pagkahadlok, ug dili ka magmaluya: kay ang Ginoo nga imong Dios magauban kanimo bisan asa ikaw paingon.”¹⁰

Minahal kong mga kaisugon, uban sa kaisug sa atong konbiksyon, hinaut nga kita mopahayag, uban ni Apostol Pablo, “Kay wala ko igakaulaw ang ebanghelyo ni Kristo.”¹¹ Ug dayon, uban nianang sama nga kaisug, hinaut nga kita mosunod sa tambag ni Pablo: “Sa mga magtutuo, pagkinabuhi ingon nga panig-ingnan sa sinultihan, ug sa paggawi, sa gugma, sa pagtuo, sa kapuli.”¹²

Makagun-ob nga mga panagbingkil moabut ug mahanaw, apan ang gubat nga gipakigbatukan alang sa mga kalag sa katawhan magpadayon sa walay paghunong. Sama sa klaro nga tawag moabut ang pulong sa Ginoo nganha kaninyo, ngari kanako, ug sa mga naghupot sa priesthood bisan asa: “Busa, karon himoa ang matag tawo nga

makakat-on sa iyang katungdanan, ug pagbuhat sa buhatan diin siya natudlo, diha sa tanan nga kakugi.”¹³ Dayon kita mahimong, sama sa gipahayag ni Apostol Pedro, gani “harianong sacerdote,”¹⁴ nagkahiusa sa katuyoan ug natugahan sa gahum gikan sa kahitas-an.¹⁵

Hinaut nga ang matag usa nga mobiya dinhi karong gabhiona adunay determinasyon ug kaisug sa pagsulti, uban ni Job sa karaan, “Kay bug-os pa man ang akong kinabuhi dinhi kanako, . . . dili ko gayud isalikway ang pagkahingpit sa kasingkasing gikan kanako.”¹⁶ Hinaut nga kini unta ang mahitabo mao ang akong mapabsanong pag-ampo sa pangalan ni Jesukristo, ang atong Ginoo, amen. ■

MUBO NGA MGA SULAT

1. J. Reuben Clark Jr., *The Charted Course of the Church in Education*, rev. ed. (1994), 7.
2. Robert Louis Stevenson, sa Hal Urban, *Choices That Change Lives* (2006), 122.
3. Charles Swindoll, sa Urban, *Choices That Change Lives*, 122.
4. Jabari Parker, sa “10 Questions,” *Time*, Mar. 17, 2014, 76.
5. Tan-awa sa Daniel 6.
6. Tan-awa sa Mosiah 11:20; 17:20.
7. Tan-awa sa Alma 53:20–21; 56.
8. Tan-awa sa Moroni 1–10.
9. Tan-awa sa *Autobiography of Parley P. Pratt*, ed. Parley P. Pratt Jr. (1938), 210–11.
10. Josue 1:5, 9.
11. Mga Taga-Roma 1:16.
12. 1 Timoteo 4:12.
13. Doktrina ug mga Pakigsaad 107:99.
14. 1 Pedro 2:9.
15. Tan-awa sa Doktrina ug mga Pakigsaad 105:11.
16. Job 27:3, 5.





Ni Presidente Dieter F. Uchtdorf

Ikaduhang Magtatambag sa Unang Kapangulohan

Mapasalamaton sa Bisan Unsang Kahimtang

Wala ba kitay katarungan aron mapuno sa pagkamapasalamaton, bisan unsa pa ang atong mga kahimtang?

Sa akong kinabuhi, ako adunay sagradong oportunidad nga makahimamat og daghang mga tawo kansang mga kasubo daw midulot sa kinahiladman sa ilang kalag. Niining mga gutloa, naminaw ko sa akong minahal nga mga kaigsoonan ug nagbangutan uban nila kalabut sa ilang mga kasakit. Namalandong ko kon unsay angayng isulti ngadto kanila, ug nanlimbasug ko nga masayud unsaon paghupay ug pagsuporta nila sa ilang mga pagsulay.

Kasagaran ang ilang kasub-anan resulta sa alang nila daw katapusan sa usa ka butang. Ang uban nakasinati og katapusan sa gihambin nga relasyon, sama sa kamatayon sa usa ka minahal o paglayo sa sakop sa pamilya. Ang uban mobati nga nag-atubang sila sa katapusan sa paglaum—ang paglaum nga maminyo o makapanganak o makabuntog sa sakit. Ang uban tingali mobati nga nag-atubang sila sa

katapusan sa ilang pagtuo, samtang ang makalibog ug sukwahi nga mga tingog sa kalibutan motintal nila sa pagduha-duha, gani sa pagsalikway, sa unsay ilang kanhi nasayran nga tinuod.

Sa dili madugay, nagtuo ko nga kintang tanan makasinati og mga higayon nga daw gidat-ugan kita sa kalibutan, bation ang pag-inusara, kasagmuyo, ug walay tumong.

Mahitabo kini ni bisan kinsa. Walay usa nga dili makasinati niini.

Kita Mahimong Magmapasalamaton

Ang sitwasyon sa usag usa managlahi, ug ang mga detalye sa matag kinabuhi talagsaon. Bisan pa man, akong nakat-unan nga dunay makapawagtang sa kasakit nga mahimong moabut sa atong kinabuhi. Dunay usa ka butang nga mahimo natong buhaton aron ang atong kinabuhi mas nindot, mas malipayon, gani mahimayaon.

Kita mahimong magmapasalamaton! Tingali sukwahi kini paminawon sa kaalam sa kalibutan nga mosugyot nga ang tawo nga napuno sa kasubo kinahanglang mopasalamat sa Dios. Apan kadtong mihiklin sa gibati nga kasakit ug mopili sa pagpasalamat makasinati og kaayohan, kalinaw, ug pagsabut.

Isip nga disipulo ni Kristo, kita gisugo nga “mopasalamat sa Ginoo ang [atong] Dios sa tanan nga mga butang,”¹ nga “manag-awit kamo ngadto sa Ginoo nga adunay mga pasalamat,”² ug nga “ang [atong] kasing-kasing puno sa mga pasalamat ngadto sa Dios.”³

Nganong ang Dios misugo man nato nga magmapasalamaton?

Tanan Niya nga mga sugo gihatag aron ang mga panalangin maanaa kanato. Ang mga sugo mao ang mga oportunidad sa pagpalambo sa atong kabubut-on ug pagdawat sa mga panalangin. Ang atong mahigugmaon nga Langitnong Amahan nasayud nga ang pagpili sa pagpalambo sa usa ka diwa sa pagpasalamat magdala kanato og tinuod ug dakong kalipay.

Pagkamapasalamaton alang sa mga Butang

Apan ang uban tingali moingon, “Alang sa unsa man ko magpasalamat nga hilabihan man ang problema nga akong nasinati sa akong kinabuhi?”





Mga General Authority ug Kinatibuk-ang mga Kapangulohan sa Ang Simbahan ni Jesukristo sa mga Santos sa Ulahing mga Adlaw

ANG UNANG KAPANGULOHAN



Henry B. Eyring
Unang Magtarambag



Thomas S. Monson
Presidente



Dieter F. Uchtdorf
Ikaduhang Magtarambag

ANG KORUM SA NAPULOG DUHA KA MGA APOSTOLES



Boyd K. Packer



L. Tom Perry



Russell M. Nelson



Dallin H. Oaks



M. Russell Ballard



Richard G. Scott



Robert D. Hales



Jeffrey R. Holland



David A. Bednar



Quentin L. Cook



D. Todd Christofferson



Neil L. Andersen

ANG KAPANGULOHAN SA SEVENTY



Ronald A. Rasband



L. Whitney Chynon



Donald L. Haldeman



Richard J. Maynes



Craig C. Christensen



Ulisses Soares



Lynn G. Robbins



Mga Santos sa Ulahing mga Adlaw sa tibuok kalibutan nagpundok alang sa ika-184 nga Tinuig nga Kinatibuk-ang Komperensya. Litrato gikan sa wala sa ibabaw mao ang mga miyembro sa Simbahan ug mga misyonaryo sa Vienna, Austria; São Paulo, Brazil; Siyudad sa Mexico, Mexico; Ulaanbaatar, Mongolia; Highland Ranch, Colorado, USA; Sydney, Australia; Saint Petersburg, Russia; ug Norcross, Georgia, USA.





Tingali ang pag-focus kon *alang* sa unsa man kita magpasalamat usa ka sayop nga paagi. Lisud mapalambo ang diwa sa pagpasalamat kon ang atong pagkamapasalamaton gibagay-bagay ra sa gidaghanon sa mga panalangin nga atong maihap. Tinuod, importante nga kanunayng “iphon ang atong mga panalangin”—ug kadtong misulay niini nasayud nga duna diay daghan—apan dili ko motuo nga ang Ginoo nagdahum nato nga dili kaayo magpasalamat panahon sa pagsulay kay sa panahon sa kaabunda ug kaharuhay. Gani, sagad sa mga pakisayran sa kasulatan wala maghisgut bahin sa pagpasalamat *alang* sa mga butang kondili nagsugyot nga magbaton og diwa o kinaiya sa pagkamapasalamaton.

Sayon ra nga magpasalamat *alang* sa mga butang kon nindot ang atong kinabuhi. Apan unsa man kaha nianang mga higayon nga daw dili gyud nato makab-ot ang unsay atong gipangandoy?

Mahimo ba kong mosugyot nga atong isipon ang pagkamapasalamaton nga usa ka disposisyon, usa ka paagi sa kinabuhi nga dili magdepende sa atong kasamtangang

sitwasyon? Sa laing pagkasulti, nagsugyot ko nga imbis magpasalamat *alang* sa mga butang, mag-focus kita sa pagkamapasalatong *diha* sa atong mga kahintang—bisan unsa man kini.

Dunay karaang sugilanon bahin sa usa ka waiter nga nangutana sa kustomer kon nalipay ba siya sa iyang pagkaon. Ang bisita mitubag nga maayo ra ang tanan, apan mas maayo unta kon duna pay daghang pan. Pagkasunod adlaw, dihang mibalik ang tawo, gidoble sa waiter ang gidaghanon sa pan, mihatag kaniya og upat ka hiwa imbis duha, apan ang tawo wala gihapon malipay. Pagkasunod adlaw, gidoble na usab sa waiter ang pan, wala lang gihapon.

Sa ikaupat ka adlaw, ang waiter determinado gayud sa paghimo sa tawo nga malipayon. Ug busa mikuha siya og siyam ka pye (3-m) nga gitason sa pan, gitunga kini, ug nagpahiyom, misilbi niini ngadto sa kustomer. Ang waiter naghinam-hinam sa reaksyon sa tawo.

Human og kaon, ang tawo mitan-aw ug miingon, “Maayo sama sa gihapon. Apan mibalik na pod ka sa pagsilbi nako og duha na lang ka hiwa nga pan.”

Magmapasalamatong *diha* sa Atong mga Kahintang

Minahal nga mga kaigsoonan, ang pagpili anaa ra nato. Makapili kita nga limitahan ang atong pagkamapasalamaton, base sa mga panalangin nga atong gibati nga kulang ra. O makapili kita nga mahimong sama ni Nephi, kansang mapasalamatong kasingkasing walay paglubad. Dihang ang iyang igsoong mga lalaki migapos niya diha sa barko—nga iyang gihimo aron sakyan nila paingon sa gisaad nga yuta—ang iyang mga buol-buol ug mga kamot nanakit og maayo nga “sila nanghubag sa hilabihan” ug ang mabangis nga unos mihulga sa paglamoy niya sa kahiladman sa dagat. “Bisan pa niini,” si Nephi miingon, “ako midangop sa akong Dios, ug ako midayeg kaniya sa tibuok adlaw; ug wala ako magbagulbol batok sa Ginoo tungod sa akong mga kasakit.”⁴

Makapili kita nga mahimong sama ni Job, nga daw anaa na kaniya ang tanan apan nawala kining tanan. Bisan pa si Job miingon, “Ako hubo nga migula sa tiyan sa akong inahan, ug hubo usab ako nga mopauli didto . . . : ang Ginoo mihatag, ug ang

Ginoo mikuha; bulahan ang ngalan sa Ginoo.”⁵

Makapili kita nga mahimong sama sa mga Mormon pioneer, nga nagpa-dayon ang diwa sa pagkamapasalamaton sa panahon sa ilang hinay ug sakit nga panaw paingon sa Great Salt Lake, gani nanag-awit ug nanagsayaw ug naghimaya sa kaayo sa Dios.⁶ Kadaghanan nato tingali moundang na, moreklamo, ug maghigwaos bahin sa kalisud sa panaw.

Makapili kita nga mahimong sama ni Propeta Joseph Smith, kinsa, samtang usa ka binilanggo sa pait nga kahintang sa Liberty Jail, misulat niining dinasig nga mga pulong: “Minahal ug hinigugma nga mga kaigsoonan, kita magmalipayon sa pagbuhat sa tanan nga mga butang nga ubos sa atong gahum; ug unya kita magmalinawon, uban ang labing dako nga kasiguroan, nga makasaksi sa kaluwasan sa Dios, ug sa iyang mga bukton nga ipadayag.”⁷

Makapili kita nga magmapasalamat, bisan unsa pa man.

Kining matang sa pagkamapasalamaton mopatigbabaw bisan unsa pa ang mahitabo sa atong palibut. Mopatigbabaw kini sa kasagmuyo, kawalay kadasig, ug kawalay paglaum. Mobukhad kini sama katahum diha sa bugnaw kaayo nga yuta sa tingtugnaw



Raymond, Alberta, Canada



ingon man diha sa nindot nga kainit sa ting-init.

Kon kita mapasalamaton sa Dios *diha* sa atong mga kahintang, makasinati kita og kalinaw taliwala sa kalisdanan. Sa kasubo, makabayaw gihapon kita sa atong kasingkasing diha sa pagdayeg. Sa kasakit, kita makahimaya diha sa Pag-ula ni Kristo. Diha sa pait nga kasub-anan, makasinati kita sa kaduol ug mainitong gakos sa langit.

Usahay maghunahuna kita nga ang kamapasalamaton mao ang atong buhaton *human* masulbad ang atong mga problema, apan pagkahiktin ni-ana nga panglantaw. Unsa ka daghan ang atong mataligam-an sa kinabuhi pinaagi sa paghulat sa bangaw una pa kita mopasalamat sa Dios nga dunay ulan?

Ang kamapasalamaton panahon sa kasakit *wala* magpasabut nga nahimuot kita sa atong kahintang. Nagpasabut *kini* nga pinaagi sa hugot nga pagtuo naglantaw kita lapas sa atong mga hagit karon.

Dili kini pagkamapasalamaton sa sulti lang apan sa kalag. Kini pagkamapasalamaton nga moayo sa kasingkasing ug mopalapad sa hunahuna.

Pagkamapasalamaton isip Buhat sa Hugot nga Pagtuo

Ang kamapasalamaton *diha* sa atong mga kahintang usa ka buhat

sa hugot nga pagtuo diha sa Dios. Nagkinahanglan kini nga kita mosalig sa Dios ug molaum sa mga butang nga wala nato makita apan tinuod.⁸ Pinaagi sa kamapasalamaton, kita nagsunod sa ehemplo sa atong minahal nga Manluluwas, nga miingon, “Dili ang akong pagbuot maoy matuman, kondili ang imo.”⁹

Ang tinuod nga pagkamapasalamaton usa ka pagpahayag sa paglaum *ug* pagpamatuod. Naggikan kini sa pag-ila nga kita dili kanunay makasabut sa mga pagsulay sa kinabuhi apan nagsalig nga usa ka adlaw kita makasabut ra.

Sa bisan unsang kahintang, ang atong kamapasalamaton mapalambo pinaagi sa daghan ug sagradong mga kamatuoran nga *atong* nasayran: nga ang atong Amahan mihatag sa Iyang mga anak sa mahinungdanong plano sa kaluwasan; nga pinaagi sa Pag-ula sa Iyang Anak, si Jesukristo, kita makapuyo sa kahangturan uban sa atong mga minahal; nga sa katapusan, kita makabaton og mahimayaon, hingpit, ug imortal nga mga lawas, dili masakit o walay kakulangan; ug ang atong mga luha sa kaguol ug kapakyasan mapulihan og dakong kalipay ug kamaya, “takus nga pinaugdo, dinasok ug tinantan, ug magaaawas.”¹⁰

Tingali mao kini ang matang sa pagpamatuod nga nakapausab sa mga Apostoles sa Manluluwas gikan

sa mahadlukon, maduha-duhaon nga mga tawo ngadto sa walay kahadlok, malipayon nga mga sulugoon sa Agalon. Sa mga oras human sa Iyang Paglansang sa Krus, sila hilabihan nga nawad-an og paglaum ug nasubo, wala makasabut sa bag-ohay lang nga nahitabo. Apan usa ka panghitabo ang miusab nianang tanan. Ang ilang Ginoo mipakita kanila ug miingon, “Tan-awa ninyo ang akong mga kamot ug mga tiil, nga mao gayud ako.”¹¹

Dihang ang mga Apostoles nakaila na sa nabuhi nga Kristo—dihang ilang nasinati ang mahimayaong Pagkabanhaw sa ilang minahal nga Manluluwas—lahi na sila nga mga tawo. Walay makapugong nila sa pagtuman sa ilang misyon. Sila midawat uban sa kaisug ug determinasyon sa pagsakit, pagpanlupig, ug bisan ang kamatayon nga moabut nila tungod sa ilang pagpamatuod.¹² Dili sila mapugngan sa pagdayeg ug pagserbisyo sa ilang Ginoo. Sila miusab sa kinabuhi sa mga tawo sa tanang dapit. Sila miusab sa kalibutan.

Dili kinahanglan nga makakita kamo sa Manluluwas, sama sa mga Apostoles, aron makasinati sa samang kausaban. Ang inyong pagpamatuod kang Kristo, nga gikan sa Espiritu Santo, makatabang ninyo nga masagubang ang makasagmuyo nga mga katapusan sa pagka-mortal ug makita ang hayag nga umaabut nga giandam sa Manunubos sa kalibutan.

Kita Wala Gihimo alang sa mga Katapusan

Sa atong nahibaloan bahin sa atong mahangturong padulngan, ikatingala ba nga kon mag-atubang kita og pait nga mga katapusan sa kinabuhi, daw dili kini nato madawat? Daw adunay butang sa atong kinahiladman nga dili modawat og mga katapusan.

Ngano man kini? Tungod kay kita hinimo gikan sa mahangturong maternal. Kita mahangturong mga binuhat, mga anak sa Labawng Makagagahum nga Dios, kansang ngalan mao ang Walay Katapusan¹³ ug misaad og mahangturong mga panalangin nga dili maihap. Ang mga katapusan dili maoy atong padulngan.

Kon mas makat-on kita sa ebanghelyo ni Jesukristo, mas makaamgo kita nga ang mga katapusan dinhi sa pagka-mortal dili mao ang katapusan. Kini mga pagbalda lamang—temporaryo nga mga paghunong og kadiyot nga usa ka adlaw daw gamay ra kaayo kon itandi sa mahangturong kalipay nga naghulat sa mga matinud-anon.

Mapasalamaton kaayo ko sa akong Langitnong Amahan nga sa Iyang plano walay tinuod nga mga katapusan, mahangturong mga sinugdanan lamang.


Kadtong Kinsa Mapasalamaton Mahimong Mahimayaon

Mga kaigsoonan, wala ba kitay katarungan aron mapuno sa pagpasalamat, bisan unsa pa ang atong mga kahimantang?

Nagkinahanglan ba kita og mas dako nga katarungan aron ang atong kasingkasing “puno sa mga pasalamat ngadto sa Dios?”¹⁴

“Kita wala bay dako nga katarungan sa paglipay?”¹⁵

Pagkabulahan nato kon atong maila ang binuhatan sa Dios sa talagsaong paglala sa kinabuhi. Ang pagpasalamat ngadto sa atong Amahan sa Langit makapalapad sa atong panglantaw ug makapaklaro sa atong panan-aw.



Makadasig kini og kamapainubsanon ug makaugmad og kalooy ngadto sa atong isigkatawo ug sa tanang nilalang sa Dios. Ang pagkamapasalamaton usa ka mahinungdanong bahin sa tanang sama kang Kristo nga mga kinaiya! Ang mapasalamatong kasingkasing mao ang tinubdan sa tanang hiyas.¹⁶

Ang Ginoo mihatag kanato sa Iyang saad nga kadtong “kinsa [modawat] sa tanan nga mga butang uban sa pagpasalamat mahimo nga *mahimayaon*; ug ang mga butang dinhi sa yuta madugang ngadto [kanila], gani sa gatusan ka pilo-pilo, oo, labaw pa.”¹⁷

Unta kita “mopuyo sa pagkama-pasalamaton matag adlaw”¹⁸—ilabi na panahon sa daw dili matukib nga mga katapusan nga kabahin sa pagka-mortal. Unta kita motugot sa atong mga kalag nga molambo diha sa pagkama-pasalamaton ngadto sa atong maloloyong Langitnong Amahan. Unta kita sa kanunay moisa sa atong tingog ug mopakita pinaagi sa pulong ug sa buhat sa atong pagpasalamat sa atong Amahan sa Langit ug sa Iyang Pinalanggang Anak, si Jesukristo. Niini ako nag-ampo, ug ibilin kaninyo ang akong pagpamatuod ug panalangin, sa pangalan sa atong Agalon, si Jesukristo, amen. ■

MUBO NGA MGA SULAT

1. Doktrina ug mga Pakigsaad 59:7; tan-awa usab sa Mga Taga-Efeso 5:20; 1 Mga Taga-Tesalonica 5:18; Mosiah 26:39; Alma 7:23; Doktrina ug mga Pakigsaad 98:1.
2. Salmo 147:7.
3. Alma 37:37.
4. Tan-awa sa 1 Nephi 18:10–16.
5. Job 1:21.
6. Alang sa mga sanglitanan bahin sa mga pioneer nga nagpabiling malipayon bisan sa grabe nga kalisud, tan-awa sa Andrew D. Olsen, *The Price We Paid: The Extraordinary Story of the Willie and Martin Handcart Pioneers* (2006), 10, 366–67.
7. Doktrina ug mga Pakigsaad 123:17.
8. Tan-awa sa Alma 32:21.
9. Lucas 22:42.
10. Lucas 6:38.
11. Lucas 24:39.
12. Tan-awa sa Mga Taga-Roma 5:3; 2 Mga Taga-Corinto 4:17; 12:10.
13. Tan-awa sa Moises 1:3.
14. Alma 37:37.
15. Alma 26:13.
16. Tan-awa sa Marcus Tullius Cicero, *Oratio Pro Cnaeo Plancio*, XXXIII, section 80; gikutlo sa Joseph B. Wirthlin, “Live in Thanksgiving Daily,” *Ensign*, Sept. 2001, 8.
17. Doktrina ug mga Pakigsaad 78:19; emphasis gidugang.
18. Alma 34:38.



Ni Elder M. Russell Ballard

Sa Korum sa Napulog Duha ka mga Apostoles

Pag-Follow Up

Kitang tanan makahimo nga mas makanunayong moapil sa misyonaryo nga buhat pinaagi sa pag-ilis sa atong kahadlok og tinuod nga hugot nga pagtuo.

Saysenta og upat ka tuig sumad karong Septyembre, miuli ko gikan sa akong misyon sa England. Tulo ka adlaw gikan sa pag-abut, mitambong ako og Hello Day dance didto sa Unibersidad sa Utah uban sa akong higala. Iya kong gisulihan kabahin sa usa ka maanyag nga babaye nga 2nd year sa kolehiyo nga ginganlan og Barbara Bowen, nga iyang gihunahuna nga angay nakong mahimamat. Gikuha niya siya ug gipailaila kami, ug misugod kami og sayaw.

Sa kawalay swerte, kini maoy gitawag kaniadto og “tag dance,” nga nagpasabut nga imong ikasayaw ang babaye hangtud lang nga may laing tawo nga motapik sa imong abaga og mopuli nimo. Si Barbara masadyaon ug inila, busa nakasayaw lang ko niya og wala moabut og minuto sa dihang laing batan-ong lalaki ang mitapik kanako.

Kana dili nako madawat. Kay nakat-unan man nako ang importansya sa follow-up diha sa akong misyon, gipangayo ko ang iyang numero sa telepono ug gitawgan siya sa sunod dayon nga adlaw aron makig-date kaniya, apan busy siya sa eskwelahan ug sosyal nga mga kalihokan. Maayo gani, ang akong misyon mitudlo kanako nga magmakanunayon bisan

atubangan sa kadismaya, ug ako sa kadugayan nakatakda og date. Ug kana nga date nasundan pa og uban. Hinoon niadto nga mga date nakumbinsir ko siya nga ako lamang ang tinuod ug buhing returned missionary—sa labing minus kutob nga may kalabutan kaniya. Karon, 64 ka tuig ang milabay, may pito ka anak, daghang apo ug apo sa tuhod kinsa nagbarug nga ebidensya sa importanting kamatuoran nga bisan unsa ka importante ang imong mensahe, ikaw dili makahigayon sa paghatag niini kon walay makanunayon, magpadayon nga follow-up.

Kini mao tingali nganong gibati ko ang tataw nga hunahuna sa pag-follow up karon sa duha sa akong mga mensahe sa miaging mga kinatibuk-ang komperensya.

Sa Oktubre 2011 nga komperensya, akong giawhag nga atong hinumduman kining importanting mga pulong sa Ginoo: “Kay sa ingon ang akong simbahan pagatawgon sa katapusan nga mga adlaw, gani Ang Simbahan ni Jesukristo sa mga Santos sa Ulahing mga Adlaw.”¹

Uban niini nga mga pulong, gitataw sa Ginoo nga dili lamang kini usa ka pormal nga ulohan apan ang pangalan usab diin ang Iyang Simbahan pagatawgon. Tungod sa Iyang tataw nga pahayag, kita kinahanglan nga dili motawag sa Simbahan og bisan unsang lahi nga pangalan, sama sa “Mormon Church” o “LDS Church.”

Ang pulong nga *Mormon* angay nga magamit sa ubang kahulugan nga nagpasabut sa mga miyembro sa Simbahan, sama sa mga pioneer nga Mormon, o sa mga institusyon, sama sa Mormon Tabernacle Choir. Ang mga miyembro sa Simbahan naila pagayo isip mga Mormon, ug sa pakigsagol sa uban nga dili sa atong tinuohan, kita mahimong motawag sa atong mga kaugalingon nga mga Mormon, kon atong sumpayan kini sa hingpit nga pangalan sa Simbahan.

Kon ang mga miyembro makat-on sa paggamit sa hustong pangalan sa Simbahan kalabut sa pulong nga *Mormon*, kini mohatag og gibug-aton



nga kita mga Kristiyano, mga miyembro sa Simbahan sa Manluluwas.

Mga kaigsoonan, atong i-follow up ug mag-anad sa kaugalingon nga kanunayng klarohon nga kita sakop sa Ang Simbahan ni Jesukristo sa mga Santos sa Ulahing mga Adlaw.

Ang ikaduhang mensahe nga akong gibati nga kinahanglan nga akong i-follow up gihatag kaniadto lang gyud nga milabay nga kinatibukang komperensya, sa dihang giawhag ko ang mga miyembro sa pag-ampo nga magiyahan ngadto sa dili mominos og usa ka tawo kinsa ilang maimbitar sa pagkat-on mahitungod sa gipahiuli nga ebanghelyo sa wala pay Pasko. Daghang miyembro sa Simbahan mipakigbahin kanako og pipila ka espesyal nga mga kasinatian isip sangputanan sa ilang pagpangayo sa Ginoo og mga misyonaryong mga oportunidad.

Usa ka returned missionary, sama pananglit, nag-ampo sa piho nga magiyahan ngadto “sa usa ka tawo” nga iyang ikasulti. Ang pangalan sa kanhiay kauban sa klase sa kolehiyo misantop sa iyang hunahuna. Iyang gipangita siya sa Facebook, ug iyang nahibaloan nga siya nag-ampo alang sa katuyoan ug kahulugan sa iyang kinabuhi. Ang iyang pag-follow up naatol gyud sa panahon nga siya nagpangita sa kamatuoran, ug sa pagka-Disyembre gibunyagan siya.

Daghang susama nga mga pag-imitar gi-report ngari kanako, apan pipila lang ka mga tawo ang mi-follow up sama sa gibuhit niini nga brother.

Ako usa ka hugot nga magtutuo sa follow-up nga baruganan. Sama sa gisulti diha sa giya sa misyonaryo nga *Isangyaw ang Akong Ebanghelyo*, “ang paghatag og pagdapit nga walay pag-follow up sama ra sa misugod og usa ka biyahe unya wala kini tiwasa, o pagpalit og usa ka tiket sa usa ka konserto unya wala moadto sa teyatro. Kon wala ang pagkompleto sa aksyon, ang pasalig walay unod.”²

Ang *Isangyaw ang Akong Ebanghelyo* nagtudlo sa tanan dili lamang unsaon sa pag-imitar apan unsaon usab ang pag-follow up sa atong mga imbitasyon. Ang katuyoan sa



misionaryong buhat gipasabut isip ang pag-imitar sa “uban sa pag-duol ngadto kang Kristo pinaagi sa pagtabang kanila nga makadawat sa gipahiuli nga ebanghelyo pinaagi sa pagbaton og hugot nga pagtuo kang Jesukristo ug sa Iyang Pag-ula, paghinulsol, pagpabunyang, pagdawat sa gasa sa Espiritu Santo, ug paglahutay hangtud sa katapusan.”³

Ang pag-imitar tinud-anay nga kabahin sa proseso. Apan timan-i nga aduna pay daghan sa misyonaryo nga buhat alang sa mga miyembro kay sa yano lamang nga paghatag og imbitasyon sa mga tawo sa pagpaminaw ngadto sa mga misyonaryo. Kini naglakip usab sa pag-follow up sa mga misyonaryo sa pag-ugmad sa hugot nga pagtuo, sa pagpadasig sa paghinulsol, sa pagpangandam alang sa paghimo og mga pakigsaad, ug sa paglahutay hangtud sa katapusan.

Kining follow-up nga baruganan gihulagway diha sa basahon sa Mga Buhat:

“Unya si Pedro ug si Juan nagkuyog sa pagsaka sa templo sa takna sa pag-ampo. . . .

“Ug didtoy gidala nga usa ka lalaki nga bakul sukad pa sa iyang pagkahimugso, nga sa adlaw-adlaw didto gibutang sa pultahan sa templo nga ginganlag Pultahang Matahum, aron sa pagpalimos kanila nga nanagpanulod sa templo;

“Sa pagkakita niya kang Pedro ug kang Juan nga nagpaingon na sa sulod sa templo siya nangayo kanilag limos.

“Ug si Pedro, kinuyogan ni Juan, mitutok ug miingon kaniya, Tan-aw kanamo.

“Ug siya naminaw kanila, nagpaabut nga adunay madawat gikan kanila.

“Apan si Pedro miingon kaniya, ako walay salapi o bulawan, apan sa ania kanako hatagan ko ikaw: Sa ngalan ni Jesukristo nga Nazarenon, paglakaw.”

Gamhanan kana nga imbitasyon gikan sa suluguon sa Ginoo, dili ba? Apan wala mohunong si Pedro diha sa imbitasyon. Ang kasulatan nga asoy nagsulti kanato sa sunod nga “*iyang gikuptan siya sa tuo nga kamot, ug gialsa*: ug diha-diha nabaskog ang iyang mga tiil ug mga buolbuol.

“Ug sa pag-ugpo pa niya siya nakatindog, ug nakalakaw, ug *kuyog kanila nga misulod sa templo*, naglakaw, ug nagluksolukso ug nagdayeg sa Dios.”⁴

Sa lain nga pagkasulti, si Pedro wala lamang naggamit sa iyang awtoridad sa priesthood ug nag-imitar sa tawo sa pagtindog ug sa paglakaw. Iya usab nga gi-follow up ang iyang imbitasyon pinaagi sa pagkab-ut ngadto sa tawo, paggunit kaniya sa tuong kamot, pag-alsa kaniya, ug paglakaw sulod sa templo uban kaniya.

Nianang diwa sa ehemplo ni Pedro, mosugyot ako nga kitang tanan maka-himo nga mas makanunayong moapil sa misyonaryo nga buhat pinaagi sa pag-ilis sa atong kahadlok og tinuod nga hugot nga pagtuo, pag-imbatar og usa ka tawo nga dili mominos kausa sa tulo ka bulan—o upat ka higayon kada tuig—nga tudloan sa full-time nga mga misyonaryo. Andam sila sa pagtudlo pinaagi sa Espiritu, uban sa sinsero ug kinasingkasing nga inspirasyon gikan sa Ginoo. Mag-uban kitang maka-follow up sa atong mga imbitasyon, motabang sa uban, mobayaw kanila, ug mogiya kanila sa ilang espirital panaw.

Aron sa pagtabang kaninyo niini nga proseso, giimbatar ko ang tanang miyembro, walay pagsapayan sa inyong calling karon o pagkaaktibo sa Simbahan, sa pagbaton og kopya sa *Isangyaw ang Akong Ebanghelyo*. Kini anaa sa atong mga sentro sa tig-apud-apud ug sa Internet usab. Ang bersyon sa internet mabasa o ma-download nga walay bayad. Kini usa ka giya nga basahon alang sa misyonaryo nga buhat—nga nagpasabut nga kini giya nga basahon alang kanatong tanan. Basaha kini, tun-i kini, ug dayon gamita unsay inyong nakat-unan aron sa pagtabang kaninyo sa pagsabut kon unsaon pagdala og mga kalag ngadto kang Kristo pinaagi sa imbitasyon ug follow-up. Sama sa gisulti ni Presidente Thomas S. Monson, “Karon ang panahon sa mga miyembro ug misyonaryo sa pagtinabangay, sa pagtambayayong, sa paghago diha sa ubasan sa Ginoo sa pagdala og mga kalag ngadto Kaniya.”⁵

Si Jesukristo mitudlo sa iyang mga disipulo:

“Daghan unta ang anihon, apan diyutay ra ang mga mamumuo;

“Busa pangamuyo kamo sa Ginoo sa anihon, nga makapadala unta siyag mga mamumuo ngadto sa iyang anihon.”⁶

Gitubag sa Ginoo kana nga pagampo sa atong panahon uban sa labing daghan nga full-time nga mga misyonaryo sa kasaysayan sa kalibutan. Niining bag-ong pagdaghan sa matinud-anong mga mamumuo,



ang Ginoo naghatag kanato og laing oportunidad sa pagtabang Kaniya diha nianang dako nga pag-ani og mga kalag.

Adunay sayon nga mga paaagi alang sa mga miyembro aron sa pagtabang ug sa pagsuporta sa atong talagsaon nga mga misyonaryo. Sama pananglit, inyong masultihan ang mga misyonaryo nga kamo nagtuon sa *Isangyaw ang Akong Ebanghelyo* ug pangutan-a sila sa pagpakita kaninyo unsay ilang nakat-unan sa ilang mga pagtuon. Samtang kamo makigbahin sa usag usa, dugang nga pagsalig tali sa mga miyembro ug full-time nga mga misyonaryo siguradong mapalambo, sama sa gisugo sa Ginoo.

“Apan nga ang matag tawo unta mamulong sa ngalan sa Dios ang Ginoo, gani ang Manluluwas sa kalibutan.”⁷

Ug “Tan-awa, Ako mipadala kaninyo sa pagpamatuod ug pagpasidaan sa mga katawhan, ug matag tawo kinsa napasidan-an magpasidaan sa iyang silingan.”⁸

Mga kaigsoonan, makahanduraw ba kamo sa epekto kon ang pamilya ug mga higala molakip sa mga butang nga ilang gikat-unan gikan sa personal nga pagtuon sa *Isangyaw ang Akong Ebanghelyo* diha sa ilang mga sulat ug mga email ngadto sa ilang full-time nga mga misyonaryo? Makahunahuna ba kamo sa mga panalangin nga moabut sa mga pamilya kon mas mahibaloan ug mas masabtan nila unsa ang tun-an ug itudlo sa ilang mga anak diha sa ilang mga misyon? Gani makasugod ba kamo sa

pagtugkad sa talagsaong pagdagaya sa matubsanong grasya nga maato, sa indibidwal ug sa kadaghanan, sumala sa saad sa Manluluwas ngadto sa tanan kinsa mopamatuod samtang nag-imbatar og mga tawo sa pagduol ngadto Kaniya—ug dayon i-follow up kadtong mga imbitasyon?

“Kamo mga bulahan,” ang Ginoo namulong pinaagi ni Propeta Joseph Smith, “kay ang pagpamatuod nga inyong napamulong gitala diha sa langit alang sa pagtan-aw sa mga anghel, ug sila magmaya diha kaninyo, ug ang inyong mga sala gipasaylo diha kaninyo.”⁹

“Kay Ako mopasaylo kaninyo sa inyong mga sala uban niini nga sugo—nga kamo magpabilin nga magmakanunayon . . . diha sa pagpamatuod ngadto sa tibuok kalibutan niadto nga mga butang nga gipahayag nganha kaninyo.”¹⁰

Kon kita mo-follow up, dili kita pakyason sa Ginoo. Akong nakita ang dili ikasulti nga hingpit nga kalipay nga nag-uban sa nadasig sa pagpamatuod ug matinud-anong pagfollow up taliwala sa mga miyembro sa Simbahan sa tibuok kalibutan. Samtang didto sa Argentina bag-ohay lang, akong giawhag ang mga miyembro sa pag-imbatar og usa ka tawo ngadto sa simbahan sa wala pa kini nga kinatibuk-ang komperensya. Usa ka otso anyos nga ginganlag Joshua naminaw ug miimbatar sa iyang labing suod nga higala ug sa pamilya sa iyang higala ngadto sa open house sa ilang ward sa Buenos Aires. Tuguti nga akong basahon gikan sa usa ka

sulat nga bag-o ko pang nadawat nga nagpasabut sa imbitasyon ug matinud-anong pag-follow up ni Joshua:

“Kada pila ka minuto [si Joshua] modagan ngadto sa gate sa pagtan-aw kon moabut na ba sila. Misulti siya nga siya nahibalo nga sila [moanha].

“Nagkalawom ang gabii ug ang higala ni Joshua wala pa moabut, apan wala mobiya si Joshua. Matinud-anon niyang gitan-aw ang atubangang gate kada pila ka minuto. Panahon na nga mosugod sa pagpanghipos sa dihang si Joshua misugod sa paglukso-lukso nagpahibalo, ‘Nia sila! Nia sila!’ Mihangad ako sa pagtan-aw sa usa ka tibuok pamilya nga nagsingabut sa simbahan. Midagan si Joshua sa pagtagbo kanila ug paghangop sa iyang higala. Silang tanan misulod ug ingon og nalingaw pag-ayo sa open house. Mikuha sila og pipila ka mga pamphlet ug migahin og daghang oras sa pag-ilaila sa pipila ka bag-ong mga higala. Nindot kaayong tan-awon ang hugot nga pagtuo niining gamay nga batang lalaki ug mahibalo nga ang Primary nga mga bata mahimong misyonaryo usab.”¹¹

Akong pagpamatuod nga samtang kita maghiusa nga molihok, sa pag-pangita og usa ka tawo, pag-imitar, ug sa pag-follow up uban ang pagsalig ug hugot nga pagtuo, ang Ginoo mopahiyom kanato ug gatusan ka libo ka mga anak sa Dios makakaplag og katuyoan ug kalinaw sa Ang Simbahan ni Jesukristo sa mga Santos sa Ulahing mga Adlaw. Hinaut panalanginan kitang tanan sa Ginoo sa atong mga paningkamot sa pagpadali sa buhat sa kaluwasan, mapainubsanon akong nag-ampo diha sa pangalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 115:4.
2. *Isangyaw ang Akong Ebanghelyo: Usa ka Giya sa Misyonaryo nga Pangalagad* (2004), 243.
3. *Isangyaw ang Akong Ebanghelyo*, 1.
4. Mga Buhat 3:1–8; emphasis gidugang.
5. Thomas S. Monson, “Welcome sa Kompetensya,” *Liahona*, Nob. 2013, 4.
6. Mateo 9:37–38.
7. Doktrina ug mga Pakigsaad 1:20.
8. Doktrina ug mga Pakigsaad 88:81.
9. Doktrina ug mga Pakigsaad 62:3.
10. Doktrina ug mga Pakigsaad 84:61.
11. Personal nga sulat, Mar. 10, 2014.



Ni Jean A. Stevens

Unang Magtatambag sa Kinatibuk-ang Kapangulohan sa Primary

“Ayaw Kahadlok; kay Ania Ako uban Kanimo”

Sa atong pagpalambo og mas hugot nga pagtuo ug pagsalig sa Ginoo, atong magamit ang Iyang gahum sa pagpanalangin ug pagluwas kanato.

Pipila lang ka pagbati ang ikakumpara sa malumo nga emosyon sa pagkahimong ginikanan. Walay sama ka tam-is sa pagdawat og usa ka bililhong masuso, direkta gikan sa langit. Usa sa akong mga igsuong lalaki nakasinati niini nga pagbati sa emosyonal kaayo nga paagi. Kulang sa bulan nga natawo ang iyang unang anak nga lalaki ug mitimbang lang og 1.3 kilos. Si Hunter migahin sa iyang unang 2 ka bulan sa kinabuhi diha sa neonatal intensive care unit sa ospital. Kadto nga mga bulan malumo nga panahon alang sa tibuok pamilya samtang kami naglaum ug nangamuyo sa Ginoo alang sa Iyang tabang.

Ang gamay nga si Hunter nagkinahanglan gyud og suporta. Nanlimbasug siya nga makaangkon og kusog nga gikinahanglan aron mabuhì. Ang lig-on nga kamot sa iyang mahigugmaong amahan kanunayng mokab-ot sa gamayng kamot sa iyang anak sa pag-awhag sa talandugon nga masuso.

Ug mao kini alang sa tanang anak sa Dios. Ang atong Amahan sa Langit mokab-ot ngadto sa matag usa kanato uban sa Iyang mahangturong gugma. Aduna Siyay gahum ibabaw sa tanang mga butang ug nagtinguha sa pagtabang kanato nga makat-on, molambo, ug mobalik ngadto Kaninya. Kini nagpasabut sa katuyoan sa atong Amahan: “ang pagpahinabo sa pagka-imortal ug sa kinabuhi nga dayon sa tawo.”¹

Sa atong pagpalambo og mas hugot nga pagtuo ug pagsalig sa Ginoo, atong magamit ang Iyang gahum sa pagpanalangin ug pagluwas kanato.

Ang Basahon ni Mormon naghan-ay niining matahum nga tema sa gahum sa Ginoo sa pagluwas sa Iyang mga anak diha sa mga pahina niini. Si Nephi mipaila niini sa pina-kauna nga kapitulo sa basahon. Sa bersikulo 20, atong mabasa, “Tanawa, ako si Nephi, mopakita kaninyo nga ang malumo nga mga kalooy sa Ginoo anaa ibabaw sa tanan kinsa

siya mipili, tungod sa ilang hugot nga pagtuo, aron mahimo sila nga malig-on maingon ngadto sa gahum sa kaluwasan.”²

Daghang tuig na ang milabay akong nasayran sa personal kaayo nga paagi ang mga kamatuoran nga gipadayag niini nga bersikulo. Akong nasayran unsa gayud ka duol ang atong Amahan sa Langit ug unsa ka dako sa Iyang tinguha sa pagtabang kanato.

Usa ka gabii samtang nag-anam og kangitngit, nagdrayb ko uban sa akong mga anak sa dihang nakabantay ko og usa ka batang lalaki nga naglakaw sa mingaw nga dalan. Human siya malabyi, duna koy tataw nga impresyon nga angay ko nga mobalik ug motabang niya. Apan nabalaka nga basin mahadlok siya nga hunongan siya sa usa ka estranghero, mipadayon ko sa pagdrayb. Ang kusog nga impresyon miabut og usab uban sa mga pulong diha sa akong hunahuna: “Tabangi kadtong bataa!”

Ako siyang gibalikan ug gipangutana, “Nagkinahanglan ka og tabang? Naa koy gibati nga angay kang tabangan.”

Milingi siya kanamo ug uban sa mga luha nga midagayday sa iyang mga aping miingon, “Motabang mo? Nagsige ko og ampo nga adunay motabang nako.”

Ang iyang pag-ampo alang sa tabang gitubag sa inspirasyon nga miabut kanako. Kini nga kasinatian sa pagdawat og klarong direksyon gikan sa Espiritu nagbilin og dili malimtan nga marka nga anaa gihapon sa akong kasingkasing.

Ug karon human sa 25 ka tuig ug pinaagi sa malumong kalooy, nakontak na usab nako kining batang lalaki sa unang higayon pipila ka bulan lang ang milabay. Akong nadiskubrehan nga ang kasinatian dili lang akong istorya—istorya usab niya kini. Si Deric Nance karon usa na ka amahan nga may kaugalingong pamilya. Siya usab wala makalimot niini nga kasinatian. Nakatabang kini kanamo sa pagbutang og pundasyon sa hugot nga pagtuo nga ang Dios naminaw ug motubag sa atong mga pag-ampo. Kaming duha migamit niini sa pagtudlo sa among



mga anak nga ang Dios nagbantay kanato. Wala kita mag-inusara.

Nianang gabhiuna, si Deric nagpabilin sa eskwelahan alang sa usa ka kalihokan ug wala kasakay sa katapusang bus. Isip batan-ong tin-edyer, masaligon siya nga makauli ra, mao nga misugod siya sa paglakaw.

Usa ka oras ug tunga ang milabay samtang naglakaw siya sa mingaw nga dalan. Pipila ka kilometro pa ang gilay-on gikan sa panimalay ug walay mga balay nga makita, nahadlok siya. Nawad-an sa paglaum, milakaw siya luyo sa pundok sa graba, miluhod, ug mihangyo og tabang sa Langitnong Amahan. Pipila lang ka minuto sa pagbalik ni Deric sa dalan, mihunong ko aron sa paghatag sa tabang nga maoy iyang giampo.

Ug karon human niining daghang katuigan, si Deric namalandong: “Ang Ginoo naghunahuna kanako, usa ka niwang, dautan og mata nga batang lalaki. Ug bisan pa sa tanang naga-hitabo sa kalibutan, nahibalo Siya sa akong sitwasyon ug nagmahal gayud kanako aron mopadala og tabang. Ang Ginoo mitubag sa akong mga pag-ampo sa makadaghang higayon sukad niadtong mingaw nga dalan. Ang Iyang mga tubag dili sa kanunay dihadiha ug klaro, apan ang Iyang pagkaila nako tataw gihapon karon sama niadtong mamingaw nga kagabhion. Matag higayon nga mabug-atan ko sa mga kabalaka sa kalibutan, nasayud ko nga kanunay aduna Siyay plano nga luwas ko nga makauli.”

Sama sa gipahayag ni Deric, dili tanan nga pag-ampo tubagon dihadiha. Apan sa tinuod ang atong Amahan nakaila nato ug nakadungog sa mga paghangyo sa atong kasingkasing. Iyang gibuhat ang Iyang mga milagro usa ka pag-ampo matag higayon, usa ka tawo matag higayon.

Makasalig kita nga motabang Siya kanato, dili lang sa paagi nga atong gusto apan sa paagi nga labing makatabang nato sa paglambo. Ang pagpaubos sa atong kabubut-on ngadto sa Iyaha tingali lisud, apan mahinungdanon kini aron mahimong sama Niya ug sa pagkaplag sa kalinaw nga Iyang gitanyag kanato.

Mahimo natong bation, sama sa gihulagway ni C. S. Lewis: “Nag-ampo ko kay dili ko makatabang sa akong kaugalingon. . . . Nag-ampo ko kay nagkinahanglan ako niini sa tanang panahon, nagmata ug natulog. Wala kini nag-usab sa Dios. Nag-usab kini kanako.”³

Dunay daghang mga istorya sa mga kasulatan niadtong misalig sa Ginoo ug kinsa natabangan ug naluwas Niya. Hunahunaa ang batan-ong David, kinsa nakaeskapo sa sigurdong kamatayon gikan sa kamot ni Goliath pinaagi sa pagsalig sa Ginoo. Hunahunaa si Nephi, kansang mga pangamuyo uban sa hugot nga pagtuo ngadto sa Dios nagluwas kaniya gikan sa iyang mga igsoon nga nagtinguha sa paghunos sa iyang kinabuhi. Hinumdomi ang batan-ong Joseph Smith, kinsa mainampuon nagtinguha sa tabang sa Ginoo. Giluwas siya gikan sa gahum sa kangitngit ug nakadawat og milagrosong tubag. Matag usa kanila miatubang og tinuod ug lisud nga mga hagit. Ang matag usa milihok uban sa hugot nga pagtuo ug misalig sa Ginoo. Ang matag usa nakadawat sa Iyang tabang. Ug sa ato gihapong panahon, ang gahum ug gugma sa Dios gipakita diha sa mga kinabuhi sa Iyang mga anak.

Bag-o lang nako kining nakita sa mga kinabuhi sa matitud-anong mga Santos sa Zimbabwe ug Botswana. Sa usa ka miting sa puasa ug pagpamatuod sa usa ka gamay nga branch, napaubos ug nadasig ko sa mga

pagpamatuod nga gipaambit sa daghan—mga bata, kabatan-onan, ug mga hamtong. Matag usa mihatag og gamhanang pagpadayag sa hugot nga pagtuo diha ni Ginoong Jesukristo. Uban sa mga hagit ug lisud nga mga sirkumstansya nga naglibut kanila, nagpakabuhi sila matag adlaw pinaagi sa pagsalig sa Dios. Ilang giila ang Iyang kamot diha sa ilang kinabuhi ug kanunayng mopadayag niini uban sa mga pulong “Mapasalamaton kaayo ko sa Dios.”

Pipila ka tuig ang milabay usa ka matinud-anong pamilya mihulagway alang sa mga miyembro sa among ward sa samang pagsalig sa Ginoo. Si Arn ug Venita Gatrell adunay malipayong kinabuhi sa dihang nasuta nga si Arn dunay agresibong kanser. Ang medikal nga opinyon makahugno—pipila na lang ka semana ang iyang kinabuhi. Ang pamilya gustong magtapok sa katapusang higayon. Mao nga ang tanang mga anak nagpundok, ang uban gikan sa lagyong mga dapit. Duna na lang silay 48 ka bililhong oras aron magkauban. Ang mga Gatrell mainampingong mipili unsay labing importante kanila—hulagway sa pamilya, pagpanihapon sa pamilya, ug usa ka sesyon sa Salt Lake Temple. Si Venita miingon, “Sa among pagpanggawas sa pultahan sa templo, kadto ang katapusang higayon nga magkauban kami niining kinabuhia.”

Apan mibiya sila uban sa kasiguroan nga adunay sobra pa alang kanila kay sa niini nga kinabuhi. Tungod sa sagradong mga pakigsaad sa templo, duna silay paglaum sa mga saad sa Dios. Mamahimo silang magkauban sa kahangturan.


Ang misunod nga duha ka bulan puno sa mga panalangin nga daghan kaayo para maihap. Ang hugot nga pagtuo ug pagsalig sa Ginoo ni Arn ug Venita nagkadako, nga makita niining mga pulong ni Venita: “Gisapnay ko. Akong nakat-unan nga mobati ka og kalinaw taliwala sa kasamok. Nasayud ko nga ang Ginoo nagbantay kanamo. Kon mosalig ka sa Ginoo, sa tinud-anay mabuntog nimo ang mga hagit sa kinabuhi.”

Usa sa ilang anak nga mga babaye midugang: “Nagtan-aw mi sa among



mga ginikanan ug nakita ang ilang ehemplo. Among nakita ang ilang hugot nga pagtuo ug giunsa nila kini pagdala. Dili gyud ko mohangyo alang niini nga pagsulay, apan dili gyud ni nako ipanghatag. Gilibutan kami sa gugma sa Dios.”

Siempre, ang pagkamatay ni Arn dili mao ang resulta nga gilauman sa mga Gatrell. Apan ang ilang krisis dili krisis sa hugot nga pagtuo. Ang ebanghelyo ni Jesukristo dili listahan sa mga butang nga buhaton; hinoon, kini nagpuyo sa atong mga kasingkasing. Ang ebanghelyo “dili palas-anon; makapagaan kini sa palas-anon.”⁴ Nagtabang kini kanato. Nakatabang kini sa mga Gatrell. Mibati sila og kalinaw taliwala sa unos. Mihupot sila sa usag usa ug sa mga pakigsaad sa



templo nga ilang gihimo ug gisunod. Milambo sila sa ilang abilidad sa pagsalig sa Ginoo ug nalig-on sa ilang hugot nga pagtuo ni Jesukristo ug sa Iyang maulaong gahum.

Bisan asa kita diha sa dalan sa pagkadisipulo, bisan unsa pa ang atong mga kabalaka ug mga hagit, wala kita mag-inusara. Wala kamo hikalimti. Sama ni Deric, mga Santos sa Africa, ug sa pamilyang Gatrell, makapili kita sa pagkab-ot sa kamot sa Dios sa atong panginahanglan. Makaatubang kita sa atong mga hagit uban sa pag-ampo ug pagsalig sa Ginoo. Ug niana nga proseso mas mahisama kita Kaniya.

Namulong sa matag usa kanato, ang Ginoo miingon, “Ayaw kahadlok; . . . kay ania ako uban kanimo: ayaw pagtalaw, kay ako mao ang imong Dios; palig-onon ko ikaw; . . . buligan ko ikaw; oo, ituboy ko ikaw sa tuong kamot sa akong pagkamatarung.”⁵

Akong ipaambit ang akong mapaubsanon apan siguradong saksi nga ang Dios atong Amahan personal nga nakaila kanato ug nagkab-ot sa pagtabang kanato. Pinaagi sa Iyang Hinigugmang Anak, si Jesukristo, makahimo kita sa pagbuntog sa mga hagit niining kalibutan ug luwas nga makapauli. Hinaut duna kitay hugot nga pagtuo sa pagsalig Kaniya, ako nag-ampo sa pangalan ni Jesukristo, amen. ■

MUBO NGA MGA SULAT

1. Moises 1:39.
2. 1 Nephi 1:20.
3. Gipamulong sa karakter ni C. S. Lewis nga gihulagway ni William Nicholson, *Shadowlands* (1989), 103.
4. Harry Emerson Fosdick, *Twelve Tests of Character* (1923), 88.
5. Isaias 41:10.



Ni Bishop Gary E. Stevenson
Presiding Bishop

Ang Inyong Upat ka Minuto

Ang milagro sa Pag-ula mohingpit sa mga kakulangan sa atong pagpaningkamot.

Ang bag-ohay nga Olympic Winter Games nakadani sa ka-libutan samtang ang mga atleta nga nagrepresentar sa 89 ka nasud nakigkompetensya sa 98 ka lain-laing dula. Talagsaon, 10 niining mga atleta mga miyembro sa Ang Simbahan ni Jesukristo sa mga Santos sa Ulahing mga Adlaw, diin 3 kanila nakadawat og medalya nga bag-ohay lang gipataw diha sa *Church News*: sila si Christopher Fogt, Noelle Pikus-Pace, ug Torah Bright.¹ Among ipaabut ang among pahalipay sa tanang mga atleta nga nakigkompetensya. Maayo!

Mamulong ko niining mga dula karong buntaga nga nagtumong sa akong hunahuna ngadto sa kabatanganan, ug sa mga young single adult—kamo kinsa anaa sa importanting mga tuig nga nagpahimutang sa dalan sa inyong kinabuhi. Gibati nako nga mahinungdanon kaayo nga mamulong nganha ninyo.

Aron inyong mabati ang kaimportante, ipakigbahin nako og una ang istorya ni Noelle Pikus-Pace, usa niadtong atleta nga Santos sa Ulahing mga Adlaw. Sa dula ni Noelle, ang skeleton, ang mga atleta makaangkon og gikusgon samtang sila mopaspas og dagan

ug dayon moambak nga mag-una ang ulo ngadto sa gamayng sled. Nga ang ilang mga nawong pipila ka pulgada lang ibabaw sa yuta, sila mopadailos subay sa nagliko-liko, nagka-ice nga track sa gipaspason nga mosobra sa 90 ka milya (145 km) kada oras.

Talagsaon, ang mga tuig sa pagpangandam makonsiderar nga kalam-pusan o kadismaya base sa mahitabo sulod lang sa upat ka grabeng 60 segundo nga dagan.

Ang kanhi pangandoy ni Noelle sa 2006 Olympic nagun-ob sa dihang siya



naaksidente nga nabali ang iyang paa. Sa 2010 Olympic ang iyang pangandoy wala na sab makab-ot sa dihang ikanapulo sa usa ka segundo na lang ang kuwang aron makaangkon siya og medalya.²

Inyo bang mahunahuna ang iyang kakulba samtang siya nagpaabut sa iyang unang dagan sa 2014 Olympics? Mga tuig sa pagpangandam matapos lamang sa mubo kaayo nga panahon. Mosumada og upat ka minuto. Miga-hin siya og mga tuig sa pagpangandam alang niadtong upat ka minuto ug mogahin siya sa tibuok kinabuhi inig kahuman sa paghunahuna niini.

Ang katapusang mga dagan ni Noelle halos wala gyuy sayop! Dili gyud namo makalimtan ang iyang pagsaka ngadto sa mga lingkuranan aron gacson ang iyang pamilya human mitabuk sa finish line, nagsyagit, “Atong nahimo!” Daghang tuig sa pagpangandam nagantihan. Among nakita ang iyang medalyon sa Young Women nga nagbitay sa iyang liog samtang ang silver nga medalya gisab-it tapad niini.³

Tingali daw dili makiangayon nga ang tibuok pangandoy ni Noelle sa Olympic nag-agad lang sa iyang mahimo sa upat ka mubo, kritikal nga mga minuto. Apan nahibalo siya niini, ug maong nagkugi siya og maayo sa pagpangandam. Iyang nabati ang gibug-aton, ug kaimportante sa iyang upat ka minuto, ug unsay kahulugan niini sa iyang tibuok kinabuhi.

Hinumduman usab nato si Christopher Fogt, sakop sa team nga nakadaug sa bronse nga medalya sa lumba sa bobsled nga tagtinagop-at. Samtang mahimo na unta siyang moundang human sa grabeng aksidente niadtong 2010 Olympics, siya mipili nga magpadayon. Human sa talagsaong, matubsanon nga dagan, iyang nakab-ut ang ganti nga iyang gitinguha pag-ayo.⁴

Karon, ikonsiderar ang inyong dalan padulong sa kinabuhing dayon nga susama sa “upat ka segundo nga pagpaningkamot” niini nga mga atleta. Kamo mahangturong mga binuhat. Sa wala pa kamo matawo, diha na kamo isip usa ka espiritu. Diha sa presensya sa mahigugmaong Langitnong

Amahan, kamo nagbansay ug nangan-dam nga moanhi sa yuta sulod sa mu-bong panahon ug, dayon, maghago. Kini nga kinabuhi maoy inyong upat ka minuto. Samtang kamo ania dinhi, ang inyong mga lihok motino kon makadaug ba mo sa ganti nga kina-buhing dayon. Gihulagway ni propeta Amulek, “Kini nga kinabuhi mao ang panahon . . . sa pagsugat sa Dios; oo, tan-awa ang adlaw niini nga kinabuhi mao ang adlaw . . . sa paghimo sa [inyong] mga buluhaton.”⁵

Kon hunahunaon, ang inyong upat ka minuto nagsugod na. Ang orasan naghagtik. Ang mga pulong ni Apostol Pablo ingon og hilabihan ka tukma: dumalagan kamo [sa lumba], aron makadawat kamo [sa ganti].⁶

Sa samang paagi nga may mga lakang nga kinahanglan sa mubo kaayo nga pagpaningkamot sa atleta sa Olympic—mga lukso o mga maniobra para sa mga skater ug snowboarder, pagmaniobra sa palikoliko nga pag-dagan sa bobsled, o pagkurbada agi sa mga gate sa dulhugon nga naka-zigzag (slalom) nga agianan—mao usab kini sa atong kinabuhi, diin pipila ka butang kinahanglanon kaayo—mga checkpoint nga modasig nato sa atong espiritwal nga pagpaningkamot dinhi sa yuta. Kining espiritwal nga mga timaan mao ang mga importanting ordinansa sa ebanghelyo nga gihatag sa Dios: bunyag, pagdawat sa gasa sa Espiritu Santo, mga pag-orden sa priesthood, mga ordinansa sa templo, ug pag-ambit sa sakrament kada semana.

“Diha sa mga ordinansa . . . , ang gahum sa pagkadiosnon gipakita.”⁷

Ug sa sama nga paagi nga ang disiplina sa pagbansay nag-andam sa atleta sa pagbuhat sa mga elemento sa iyang sport kutob sa iyang mahimo, ang pagsunod sa mga sugo makapa-sarang kaninyo sa pagdawat niining makaluwas nga mga ordinansa.

Gibati ninyo ang kaimportante?

Akong batan-ong mga higala, bisan asa na kamo sa inyong “upat ka mi-nuto nga pagpaningkamot,” giawhag ko kamo sa pagpamalandong, “Unsay akong angay sunod buhaton sa pagsi-guro sa akong medalya?” Tingali atol niini nga komperensya, ang Espiritu



naghunghong kaninyo kon unsa kana: ang pagpangandam og maayo para sa usa ka ordinansa sa inyong kaugmaon o pagdawat sa ordinansa nga inyo na untang nadawat sa dugay nga pana-hon. Bisan unsa pa kini, buhata kini karon. Ayaw paglangay. Ang inyong upat ka minuto daling molabay, ug aduna kamoy tibuok kahangturan sa paghunahuna kon unsay inyong gibu-hat niining kinabuhia.⁸

Ang pagdisiplina sa kaugalingon gikinahanglan. Kada adlaw nga pag-ampo, pagtuon sa kasulatan, ug pagsimba mao gayud ang sukaranan sa inyong pagbansay. Usa ka makanu-nayong sundanan sa pagsunod sa mga sugo, paghupot sa mga pakigsaad nga inyong nahimo, ug pagsunod sa sumbanan sa Ginoo nga mabasa diha sa *Alang sa Kalig-on sa mga Kabatan-onan* gikinahanglan.

Tingali nasayud mo sa mga butang sa inyong kinabuhi nga naghulga nga mopahinay o mopahunong sa inyong espiritwal nga paglambo. Kon mao, sunda kining tambag sa kasulatan: “Iwakli ta ang tanang kabug-at, ug ang sala nga nagapiit paglikos kanato, ug dalaganon ta nga malahutayon ang lumba nga atong ginaapilan.”⁹

Dili pa ulahi nga maghinulsol.

Apan basin mahitabo kana, tungod kay walay nahibalo kanus-a mahuman ang atong upat ka minuto.

Karon, tingali naghunahuna mo sa inyong mga kaugalingon, “Napakyas na ko. Ang akong upat ka minuto nadaot na. Maayo pa og moundang na lang ako.” Kon mao, hunong sa pag-hunahuna niana, ug ayaw gayud kini hunahunaa pag-usab. Ang milagro sa Pag-ula mohingpit sa mga kakulangan sa atong pagpaningkamot. Sama sa gitudlo ni Elder Jeffrey R. Holland:

“Alang kaninyo . . . nga nagduha-duha sa pag-apil, . . . ako mopama-tuod sa makapabag-ong gahum sa gugma sa Dios ug sa milagro sa Iyang grasya. . . .

“ . . . Dili pa *gayud* ulahi samtang ang Agalon . . . miingon aduna pay panahon. . . . Ayaw paglangan.”¹⁰

Hunahunaa, wala kamo mag-inusara. Ang Manluluwas nagsaad nga Siya dili mobiya kaninyo nga daw ilo.¹¹ Kamo usab may mga pamilya, mga higala, ug mga lider kinsa nagsu-porta kaninyo.

Bisan kon ang akong mga gipamu-long gidirekta sa kabatan-onan sa Sim-bahan, alang sa mga ginikanan ug mga apohan, motanyag ko sa mosunod:

Bag-ohay, si Elder David A. Bednar



mihulagway og yanong paagi sa pagtimbang-timbang sa pamilya aron matiman-an ang pag-uswag diha sa dalan sa pakigsaad pinaagi sa importanting mga ordinansa. Ang gikinahanglan lang mao ang usa ka pirasong papel nga may duha ka kolum: “pangalan” ug “plano alang sa sunod o gikinahanglan nga ordinansa.” Gibuhat ko kini bag-ohay lang, naglista sa matag sakop sa pamilya. Pipila kanila, akong gitiman-an ang masusong apo nga lalaki, nga hapit na panalanginan; sayis anyos nga apong lalaki, kansang pagpangandam sa bunyag importante; anak nga lalaki nga hapit na mag-18 anyos, kansang pagpangandam sa priesthood ug temple endowment hapit na gyud. Ang tanan nga naa sa listahan nagkinahanglan sa ordinansa sa sakrament. Kining yano nga buluhaton nakatabang ni Lesa ug nako sa pagtuman sa among tahas sa pagtabang sa kada sakop sa among pamilya subay sa dalan sa pakigsaad, nga adunay plano nga buhaton para kada usa nila. Tingali kini ideya para ninyo nga mosangpot sa mga diskusyon sa pamilya, mga leksyon sa family home evening, pagpangandam, ug gani mga imbitasyon sa importanting mga ordinansa sa inyong pamilya.¹²

Isip usa mismo ka skier ug snowboarder, nakadayeg kaayo ko sa “upat ka minuto” nga silver medal-winning

nga paningkamot sa Australyano nga LDS nga atleta ug snowboarder nga si Torah Bright sa sangka sa half-pipe. Iyang napahingangha ang kalibutan samtang nahuman niya ang daw way sayop nga dagan nga mitapos diha sa backside rodeo 720. Apan, ang mas makapadayeg ug makapasurpresa sa kalibutan mao ang paagi nga iyang gitabangan ug mipakita og Kristohanong gugma sa iyang mga kasangka. Iyang namatikdan nga ang Amerikanong snowboarder nga si Kelly Clark, kinsa dili maayo ang unang dagan sa final round, nakita nga gikuyawan sa iyang ikaduhang dagan. “Iya akong gigakos,” nakahinumdom si Clark. “Iya lang kong gigakos hangtud igo kong nakalma ug nahinay ang akong paghangos. Nindot kaayo nga adunay mogakos nga higala.” Sa kaulahin si Kelly Clark kauban ni Torah sa entablado sa mga mananaog isip bronze medalist.

Sa dihang gipangutana niining dili sagad nga kalooy ngadto sa iyang kasangka, nga nakaparisgo sa iyang kaugalingong silver nga medalya, yanong miingon si Torah, “Usa ko ka tigsangka—gusto nakong himoon ang akong pinakamaayo—apan gusto ko nga ang akong kaubang mga tigsangka mobuhat sa ilang pinakamaayo usab.”¹³

Uban niana nga hunahuna, aduna bay usa ka tawo nga nagkinahanglan sa inyong pagdasig? Usa ka sakop sa

pamilya? higala? kaklase o kaubang miyembro sa korum? Unsaon ninyo pagtabang nila sa ilang upat ka minuto?

Mahal kong mga higala, kamo anaa taliwala sa makapadasig nga panaw. Sa pipila ka paagi, kamo nakiglumba diha sa half-pipe o sled track, ug kini mahagiton sa pagbuhat sa matag elemento o pagmaniubra sa matag liko diha sa agianan. Apan hinumdumi, kamo nangandam niini sulod na sa milenyum. Kini mao ang inyong higayon nga maningkamot. Kini ang inyong upat ka minuto! Karon mao ang panahon!

Akong ipahayag ang akong dakong pagsalig sa inyong mga abilidad. Kauban ninyo ang Manluluwas sa kalibutan. Kon kamo motinguha sa Iyang tabang ug mosunod sa Iyang panudlo, sa unsang paagi kamo mapakyas?

Ako motapos uban sa akong pagpamatuod sa panalangin nga naangkon nato diha sa usa ka buhing propeta, si Presidente Thomas S. Monson, ug ni Jesukristo ug sa Iyang tahas isip atong Manluluwas ug Manunubos, pinaagi sa Iyang balaang pangalan, Jesukristo, amen. ■

MUBO NGA MGA SULAT

1. Tan-awa sa Christine Rappleye, “Mormons in the Olympics: 3 Medals for LDS Athletes at the Winter Games,” deseretnews.com/article/865597546/Mormons-in-the-Olympics-3-medals-for-LDS-athletes-at-the-Winter-Games.html.
2. Tan-awa sa Christine Rappleye, “Mormons in the Olympics”
3. Tan-awa sa Sarah Petersen, “Noelle Pikus-Pace Wears LDS Young Women Necklace throughout Olympics,” deseretnews.com/article/865596771/Noelle-Pikus-Pace-wears-LDS-Young-Women-necklace-throughout-Olympics.html.
4. Tan-awa sa Amy Donaldson, “Army, Faith Helped Push Mormon Bobsledder Chris Fogt to Olympic Success,” deseretnews.com/article/865597390/Army-faith-helped-push-Mormon-bobsledder-Chris-Fogt-to-Olympic-success.html.
5. Alma 34:32.
6. Tan-awa sa 1 Mga Taga-Corinto 9:24.
7. Doktrina ug mga Pakigsaad 84:20.
8. Tan-awa sa Alma 34:31–33.
9. Mga Hebreohanon 12:1.
10. Jeffrey R. Holland, “Mga Mamumuo sa Ubasan,” *Liahona*, Mayo 2012, 33.
11. Tan-awa sa Juan 14:18.
12. David A. Bednar, sa usa ka pakighinabi uban sa tagsulat.
13. Vidya Rao, “Snowboarder Kelly Clark: Hug from Competitor Helped Me Win Bronze,” today.com/sochi/snowboarder-kelly-clark-hug-competitor-helped-me-win-bronze-2D12108132.



Ni Elder David A. Bednar
Sa Korum sa Napulog Duha ka mga Apostoles

Makadaug sa Ilang mga Alantuson uban sa Kasayon

Ang talagsaon nga mga alantuson sa matag usa nato nga kinabuhi nagtabang kanato sa pagsalig diha sa mga maayong buhat, kalooy, ug grasya sa Balaang Mesiyas.

May suod akong higala kinsa, sa sayong katuigan sa iyang kaminyoon, nakumbinsir nga siya ug ang iyang pamilya nagkinahanglan og usa ka four-wheel-drive nga pick up truck. Ang iyang asawa nakasiguro nga ang iyang bana wala magkinahanglan apan gusto lang og bag-ong sakyanan. Usa ka tiaw-tiaw nga panag-istorya tali niining bana ug asawa misugod sa ilang pagtimbang-timbang sa mga kapuslanan ug walay kapuslanan sa maong pagpalit.

“Mahal, nagkinahanglan kita og four-wheel-drive nga truck.”

Nangutana ang asawa, “Nganong naghunahuna ka nga nagkinahanglan ta og bag-ong truck?”

Gitubag niya ang pangutana sa asawa sa unsay iyang gituohan nga mao ang perpektong tubag: “Unya kon manginahanglan ta og gatas para sa atong mga anak sa panahon sa grabing bagyo, ug ang paagi lamang nga ako makaadto sa grocery mao ang pickup?”

Mitubag ang iyang asawa nga nagpahiyum, “Kon mopalit kita og bag-ong truck, wala na kitay kwarta nga ikapalit og gatas—busa nganong mabalaka man mahitungod sa pag-adto og tindahan panahon sa emerhensiya!”

Nagpadayon sila sa pagtinambagay ug sa katapusan nakahukom nga mopalit sa truck. Sa wala madugay human mapalit ang bag-ong sakyanan, ang akong higala gustong mopakita sa kapuslanan sa truck ug mamatud-an ang iyang mga rason sa pagpalit niini. Busa mihukom siya nga mamutol ug mangarga og igsusugnod nga kahoy alang sa ilang panimalay. Tinglarag kini niana nga tuig, ug nagsnow na sa kabukiran diin siya naghunahuna nga mangita og kahoy. Samtang siya nagmaneho pasaka sa kilid sa bukid, ang snow inanay gayud nga nagkalawom. Nakabantay ang akong higala nga ang dangog nga mga kondisyon sa dalan adunay risgo, apan uban sa dakong kompanyansa sa bag-ong truck, mipadayon siya.

Subo lang, ang akong higala miabut og layo kaayo subay sa dalan nga baga og snow. Sa iyang pagpadaplin sa truck diha sa dapit nga iyang gihukman nga mamutol og kahoy, nalubong ang truck. Ang tanang upat ka mga ligid sa bag-ong truck miungot diha sa snow. Siya dayon nakahibalo nga dili siya makamao unsay buhaton sa paglingkawas sa iyang kaugalingon gikan niining makuyaw nga sitwasyon. Naulaw siya ug nabalaka.

Mihukom ang akong higala, “Aw, dili mahimong wala koy buhaton.” Migawas siya sa sakyanan ug misugod sa pagpamutol og kahoy. Gipuno niya ang luyo sa truck sa bug-at nga luwan. Ug dayon ang akong higala mihukom nga sulayan og kausa pa ang pagmaneho nga makalingkawas sa snow. Sa gipaandar niya ang pickup ug gisugdan sa pagmaneho, miabante kini og hinay. Sa hinayhinay ang truck nakagawas sa snow ug nakabalik sa dalan. Sa katapusan libre na siya nga makauli, usa ka malipayon ug mapaubsanong tawo.

Ang Atong Indibidwal nga Luwan

Nag-ampo ako alang sa panabang sa Espiritu Santo samtang akong





hatagan og gibug-aton ang importanting mga leksyon nga makat-unan gikan niini nga istorya mahitungod sa akong higala, sa truck ug sa kahoy. Ang nakatabang mao ang luwan. Ang luwan nga kahoy mao ang nakapakupot sa ligid nga gikinahanglan aron siya makagawas sa snow, makabalik ngadto sa dalan, ug makaabante. Ang luwan mao ang naghimo kaniya nga makapauli ngadto sa iyang pamilya ug sa iyang panimalay.

Ang matag usa kanato nagdala usab og luwan. Ang atong indibidwal nga luwan naglangkob sa mga gikinahanglan ug sa mga oportunidad, mga obligasyon ug mga pribilehiyo, mga kasakit ug mga panalangin, mga kapilian ug mga limitasyon. Duha ka makagiya nga mga pangutana makatabang samtang sa matag karon ug unya kita mainampuong mobana-bana sa atong luwan. “Ang luwan nga akong gidala naghatag ba og espiritwal nga gahum nga makahimo kanako sa paglahutay nga may hugot nga pagtuo diha ni Kristo sa higpit ug pig-ot nga dalan ug malikayan ang pagkalubong? Ang luwan nga akong gidala naghimo ba og igong espiritwal nga gahum aron ako sa katapusan makauli ngadto sa Langitnong Amahan?”

Usahay kita sayop sa paghunahuna nga ang kalipay mao ang pagkawalay

luwan. Apan ang pagpas-an og luwan usa ka gikinahanglan ug importanting bahin sa plano sa kalipay. Tungod kay ang atong indibidwal nga luwan gikinahanglan nga makahimo og espiritwal nga gahum, kita kinahanglan nga magbantay nga dili nato kargahan ang atong mga kinabuhi og daghang nindot apan wala kinahanglana nga mga butang nga kita malinga ug matipas gikan sa mga butang nga labing mahinungdanon.

Ang Makalig-on nga Gahum sa Pag-ula

Ang Manluluwas miingon:

“Umari kamo kanako, kamong tanan nga nabudlay ug nabug-atan, ug papahulayon ko kamo.

“Isangon ninyo ang akong yugo diha kaninyo, ug pagtuon kamo gikan kanako, kay ako maaghop ug mapaubsanon sa kasingkasing; ug makakaplag kamog pahulay alang sa inyong mga kalag.

“Kay masayon ang akong yugo, ug magaan ang akong luwan.” (Mateo 11:28–30).

Ang yugo usa ka kahoy nga gibabag, kasagarang gigamit taliwala sa pares nga baka o lain nga mga hayop nga makahimo kanila sa pagbitad og dungan sa luwan. Ang yugo nagbutang sa mga hayop nga mag-abay

aron sila makalihok og dungan aron mahimo ang usa ka buhat.

Hunahunaa ang talagsaong indibidwal nga pagdapit sa Ginoo nga “isangon ninyo ang akong yugo diha kaninyo.” Ang paghimo ug paghupot og sagradong mga pakigsaad nagyugo kanato ngadto ug uban ni Ginoong Jesukristo. Sa tinuod nga kahulugan, ang Manluluwas nagtawag kanato sa pagsalig diha ug pagbitad og dungan uban Kaniya, bisan tuod ang atong labing maayo nga paningkamot dili makatumbas ug dili ikatandi sa Iya. Samtang kita nagsalig ug nagbitad sa atong luwan uban Kaniya panahon sa atong panaw sa mortalidad, sa tinuod masayon ang Iyang yugo ug magaan ang Iyang luwan.

Kita dili ug dili gayud kinahanglan nga mag-inusara. Makalahutay kita sa atong inadlaw nga mga kinabuhi uban sa langitnong panabang. Pinaagi sa Pag-ula sa Manluluwas makadawat kita og kapasidad ug “kalig-on lapas sa [atong] kaugalingon” (“Lord I Would Follow Thee,” *Hymns*, nu. 220). Sama sa gipahayag sa Ginoo, “Busa, padayon sa inyong panaw ug himoa ang inyong kasingkasing nga malipay, kay tan-awa ug sud-onga, Ako mouban kaninyo gani ngadto sa katapusan” (D&P 100:12).

Hunahunaa ang ehemplo diha sa Basahon ni Mormon samtang gilutos ni Amulon si Alma ug ang iyang mga katawhan. Ang tingog sa Ginoo miabut ngadto niini nga mga disipulo diha sa ilang mga kasakit: “Ihangad ang inyong mga ulo ug pagmadasingon, kay Ako nasayud sa pakigsaad diin kamo mihimo ngari kanako; ug Ako makigsaad uban sa akong mga katawhan ug moluwas kanila gikan sa pagkaulipon” (Mosiah 24:13).

Timan-i ang ka importante sa mga pakigsaad ngadto sa saad sa kaluwasan. Ang mga pakigsaad nga nadawat ug gitahud nga may integridad ug mga ordinansa nga gipahigayon pinaagi sa tukmang awtoridad sa priesthood gikinahanglan aron madawat ang tanang mga panalangin nga anaa pinaagi sa Pag-ula ni Jesukristo. Kay diha sa mga ordinansa sa priesthood, ang gahum sa pagkadiosnon gipakita ngadto sa

katawhan diha sa mortalidad, lakip ang mga panalangin sa Pag-ula (tan-awa sa D&P 84:20–21).

Hinumdumi ang pahayag sa Manluluwas “Kay masayon ang akong yugo, ug magaan ang akong luwan” (Mateo 11:30) samtang atong hunahunaon ang sunod nga bersikulo diha sa asoy ni Alma ug sa iyang mga katawhan.

“Ug Ako usab mopagaan sa mga alantuson diin anaa gitungtong diha sa inyong mga abaga, gani kamo dili makabati kanila diha sa inyong mga buko-buko” (Mosiah 24:14).


Daghan kanato nagtuo nga kini nga kasulatan nagsugyot nga ang usa ka alantuson kalit ug permanenting pagakuhaon. Ang sunod nga bersikulo, hinoon, naghulagway giunsa pagpagaan sa palas-anon.

“Ug karon nahinabo nga ang mga alantuson diin gibutang diha kang Alma ug sa iyang mga kaigsoonan gihimo nga magaan; oo, *ang Ginoo mipalig-on kanila* nga sila maka-daug sa ilang mga alantuson uban sa kasayon, ug sila mitugyan sa maayo nga buot ug uban sa pailub ngadto sa tanan nga kabubut-on sa Ginoo” (Mosiah 24:15; emphasis gidugang).

Ang mga hagit ug mga kalisud wala diha-diha dayon gikuha gikan sa mga katawhan. Apan si Alma ug ang iyang mga sumusunod nalig-on, ug ang ilang nadugangan nga kapasidad

mihimo sa mga alantuson nga mas magaan. Kining maayo nga mga katawhan gihatagan og gahum pinaagi sa Pag-ula sa *paglihok* isip mga tinugyanan (tan-awa sa D&P 58:26–29) ug *maapektuhan* ang ilang mga kahimtang. Ug “diha sa kusog sa Ginoo” (Mga Pulong ni Mormon 1:14; Mosiah 9:17; 10:10; Alma 20:4), si Alma ug ang iyang mga katawhan gitudloan ngadto sa luwas nga yuta sa Zarahemla.

Dili lamang nga ang Pag-ula ni Jesukristo nagbuntog sa mga epekto sa Pagkapukan ni Adan ug naghimo niini nga posible ang kapasayloan sa atong indibdwal nga mga sala ug mga kalapasan, apan ang Iyang Pag-ula naghimo usab kanato sa pagbuhat og maayo ug mahimong mas maayo sa mga paagi nga lapas pa sa atong mortal nga mga kapasidad. Kadaghanan kanato nasayud nga kon kita nagbuhat og sayop nga mga butang ug nagkinahanglan og tabang sa pagbuntog sa mga epekto sa sala diha sa atong mga kinabuhi, ang Manluluwas naghimo niini nga posible alang kanato nga mahimong limpyo pinaagi sa Iyang matubsanong gahum. Apan nakasabut ba usab kita nga ang Pag-ula alang sa matinud-anong kalalakinhan ug kababayen-an kinsa mga masulundon, takus, ug mainampingon ug kinsa naningkamot nga mahimong mas maayo ug magserbisyo nga mas



matinud-anon? Naghunahuna ako kon napakyas ba kita sa pag-ila sa hingpit niining makapalig-ong aspeto sa Pag-ula diha sa atong mga kinabuhi ug sa sayop nagtuo nga kita kinahanglan gayud nga modala sa atong palas-anon nga mag-inusara—pinaagi sa determinasyon, lig-on nga kabubut-on, ug disiplina ug uban sa atong limitado nga mga kapasidad.

Kinahanglang makaila kita nga si Jesukristo mianhi sa yuta aron *mamatay* alang kanato. Apan kita nagkinahanglan usab nga mopasalamat nga ang Ginoo nagtinguha, pinaagi sa Iyang Pag-ula ug pinaagi sa gahum sa Espiritu Santo sa *pagpabuhi* kanato—dili lamang sa paggiya apan sa paglig-on ug pag-ayo usab kanato.

Ang Manluluwas Nag-abag sa Iyang mga Katawhan

Nagpasabut si Alma ngano ug giunsa sa Manluluwas nga makaabag kanato:

“Ug siya magpadayon, mag-antus sa mga sakit ug mga kasakit ug mga pagtintal sa matag matang; ug kini aron ang pulong matuman nga nag-ingon nga siya modala diha kaniya sa mga sakit ug mga balatian sa iyang mga katawhan.

“Ug siya modala diha kaniya sa kamatayon, nga siya mahimo nga mobadbad sa mga higot sa kamatayon diin naghigot sa iyang mga katawhan; ug siya modala diha kaniya sa ilang mga kahuyang, nga ang iyang kasingkasing mahimo nga mapuno



uban sa kalooy, sumala sa unod, nga siya mahimo nga masayud sumala sa unod unsaon pagtabang ang iyang mga katawhan sumala sa ilang mga kahuyang” (Alma 7:11–12).

Busa, giantus sa Manluluwas dili lamang ang alang sa atong mga sala ug mga kadautan—apan ang alang usab sa atong pisikal nga mga sakit ug pag-antos, atong mga kahuyang ug kasaypanan, atong mga kahadlok ug mga kapakyasan, atong mga kahigawad, ug kawalay kadasig, atong mga pagmahay ug pagbasol, atong pagkawalay paglaum, ang kawalay hustisya ug mga kadautan nga atong nasinati, ug ang mga sakit sa balatian nga naghasol kanato.

Walay pisikal nga sakit, walay espirital nga samad, walay kasakit sa kalag o kaguol, walay balatian o kaluya nga kamo o ako sukad nakahimamat niini nga mortalidad nga wala masinati og una sa Manluluwas. Diha sa higayon sa kahuyang mahimong mosinggit kita, “Walay nahibalo sama sa unsa kini. Walay makasabut.” Apan ang Anak sa Dios hingpit nga nakahibalo ug nakasabut, kay Iyang nabati ug napas-an ang atong indibidwal nga mga alantuson. Ug tungod sa Iyang walay katapusan ug mahangturong sakripisyo (tan-awa sa Alma 34:14), Siya adunay hingpit nga pagsabut ug makalugway ngari kanato sa Iyang bukton sa kalooy. Siya makakab-ot, makahikap, makaabag, makaayo, ug makalig-on kanato nga mahimong mas labaw kay sa ato mismong mahimo ug makatabang kanato sa pagbuhat niana nga kita dili gayud makahimo nga nagsalig lamang diha sa atong kaugalingong gahum. Sa tinuod, masayon ang Iyang yugo ug magaan ang Iyang luwan.

Usa ka Pagdapit, Saad, ug Paggpamatuod

Dapiton ko kamo sa pagtuon, pag-ampo, pagpamalandong, ug pagpaningkamot sa pagkat-on pa mahitungod sa Pag-ula sa Manluluwas samtang kamo nagbana-bana sa inyong indibidwal nga luwan. Daghang mga butang mahitungod sa Pag-ula nga kita dili gayud makatugkad



pinaagi sa atong mortal nga mga salabutan. Apan daghang mga aspeto sa Pag-ula kita makahimo ug kinahanglan nga makasabut.

Alang sa akong higala, ang luwan nga kahoy mihatag og makaluwas sa kinabuhi nga pagkupot sa ligid. Ang walay karga nga truck dili makaaginod diha sa snow, bisan pag four-wheel drive. Ang bug-at nga luwan gikinahanglan aron makakupot ang ligid sa yuta.

Ang nakatabang mao ang luwan. Ang luwan mao ang nakakupot sa ligid nga nakahimo sa akong higala sa paghaw-as, sa pagbalik diha sa dalan, sa pagpadayon, ug sa pagpauli ngadto sa iyang pamilya.

Ang talagsaon nga mga luwan sa atong matag kinabuhi nagtabang kanato sa pagsalig diha sa mga maayong buhat, kalooy, ug grasya sa Balaang Mesiyas (tan-awa sa 2 Nephi 2:8). Ako nagpamatuod ug nagsaad nga ang Manluluwas motabang kanato sa pagpas-an sa atong mga luwan uban sa kasayon (tan-awa sa Mosiah 24:15). Ingon nga kita giyugo ngadto Kaniya pinaagi sa sagrado nga mga pakig-saad ug nagdawat sa makaabag nga gahum sa Iyang Pag-ula diha sa atong nga mga kinabuhi, kita kanunay nga maningkamot sa pagsabut ug magpuyo sumala sa Iyang kabubut-on. Kita usab mag-ampo alang sa kalig-on nga makakat-on gikan sa, maka-usab, o modawat sa atong mga kahimtang

kay sa mag-ampo sa walay puas nga usbon sa Dios ang atong mga kahimtang sumala sa atong kabubut-on. Kita mahimo nga mga tinugyanan kinsa naglihok kay sa mga butang nga aghaton sa paglihok (tan-awa sa 2 Nephi 2:14). Kita mapanalanginan og espirital nga gahum.

Hinaut nga matag usa kanato mobuhat ug mahimong mas maayo pinaagi sa Pag-ula sa Manluluwas. Karon Abril 6. Nasayud kita pinaagi sa pinadayag nga karon mao ang tinuod ug eksaktong petsa sa pagkatawo sa Manluluwas. Ang Abril 6 usab mao ang adlaw sa pag-organisar sa Ang Simbahan ni Jesukristo sa mga Santos sa Ulahing mga Adlaw. (Tan-awa sa D&P 20:1; Harold B. Lee, “Strengthen the Stakes of Zion,” *Ensign*, Hulyo 1973, 2; Spencer W. Kimball, “Why call Me Lord, Lord, and Do Not the Things Which I Say” *Liahona*, Mayo 1975, 4; Spencer W. Kimball, “Remarks and Dedication of the Fayette, New York, Buildings,” *Ensign*, Mayo 1980, 54; *Discourses of President Gordon B. Hinckley, Volume 1: 1995–1999* [2005], 409.) Niining espesyal ug sagradong Igpapahulay nga adlaw, ako mopahayag sa akong pagsaksi nga si Jesukristo mao ang atong Manunubos. Siya buhi ug molimpyo, moayo, mogiya, mopanalipod, ug molig-on kanato. Niini nga mga butang ako malipayong mopamatuod diha sa sagradong pangalan ni Jesukristo, amen. ■



Ni Presidente Thomas S. Monson

Gugma—ang Kahulugan sa Ebanghelyo

Dili kita tinud-anay nga mahigugma sa Dios kon dili nato higugmaon ang atong isig ka ingon niining mortal nga kinabuhi.

Minahal ko nga mga kaigsoonan, sa dihang ang Manluluwas nangalagad sa mga tawo, gipangutana Siya sa usa ka abogado, “Magtutudlo, unsa man ang dakong sugo sa kasugoan?”

Girekord ni Mateo nga mitubag si Jesus:

“Higugmaa ang Ginoo nga imong Dios sa tibuok mong kasingkasing, ug sa tibuok mong kalag, ug sa tibuok mong salabutan.

“Mao kana ang dako ug unang sugo.

“Ug ang ikaduha sulosama ra, nga mao kini, Higugmaa ang imong silingan sama sa imong kaugalingon.”¹

Gitapos ni Marcos ang asoy uban sa pamahayag sa Manluluwas: “Wala nay laing sugo nga labi pang daku niini kanila.”²

Dili kita tinud-anay nga mahigugma sa Dios kon dili nato higugmaon ang atong isig ka ingon niining mortal nga kinabuhi. Sama usab, dili kita hingpit nga mahigugma sa atong

isig ka tawo kon dili nato higugmaon ang Dios, ang Amahan natong tanan. Si Apostol Juan misulti nato, “Gikan kaniya nabatongan ta kining maong sugo, nga ang nagahigugma sa Dios kinahanglan magahigugma sa iyang igsoon usab.”³ Kitang tanan espiritu nga mga anak sa atong Langitnong Amahan ug, sa ingon, mga managsoon. Samtang atong ibutang kini nga kamatuoran sa hunahuna, mahimong mas sayon ang paghigugma sa tanang mga anak sa Dios.

Sa tinuod, ang gugma mao ang kahulugan sa ebanghelyo ug si Jesukristo mao ang atong Ehemplo. Ang Iyang kinabuhi usa ka kabilin sa gugma. Ang masakiton nga Iyang giayo; ang linupigan nga Iyang gibayaw; ang makasasala nga Iyang giluwat. Sa katapusan ang masuk-anong panon sa katawhan mihunos sa Iyang kinabuhi. Ug bisan pa madungog gikan sa bungtod sa Golgota ang mga pulong: “Amahan pasayloa sila; kay wala sila makasabut sa ilang ginabuhat”⁴—usa

ka halangdong pagpadayag sa kapuanggod ug gugma diha sa pagkamortal.

Adunay daghang mga kinaiya nga maoy timailhan sa gugma, sama sa pagkamabination, pailub, pagkadili hakog, pagsabut, ug pagpasaylo. Sa tanan natong pakig-abin, kini ug ang ubang samang kinaiya makatabang sa pagpakita sa gugma nga anaa sa atong kasingkasing.

Sa kasagaran ang atong gugma makita sa atong adlaw-adlaw nga interaksyon sa usag usa. Ang importante mao ang atong abilidad nga makakita sa panginahanglan sa usa ka tawo ug dayon motabang. Ganahan kaayo ko sa sentimento nga gisulti sa mubo nga balak:

*Naghilak ko sa kagabhion
Tungod sa kakulang sa panan-awon
Nga sa panginahanglan sa uban
nakapabuta nako;
Apan sukad wala pa ko
Mobati og gamayng pagmahay
Sa akong sobra ka mabination.⁵*

Bag-o lang ko nga nakahibalo sa makapatandog nga ehemplo sa mahigugmaon nga pagkamabination—nga dunay wala damha nga mga resulta. Tuig 1933 kadto, nga tungod sa Dakong Depresyon, ang mga oportunidad sa panarbaho lisud kaayo. Ang dapit mao ang silangang bahin sa Estados Unidos. Si Arlene Biesecker bag-o lang nakagradwar sa high school. Human sa dugay kaayong pagpangita og trabaho, sa katapusan nakatrabaho siya sa buhatan sa sinina isip usa ka mananahi. Ang mga trabahante bayaran lang sa matag piraso nga maayo nilang pagkatahi kada adlaw. Kon daghan ang ilang mahuman, mas dako ang ilang bayad.

Usa ka adlaw sa iyang pagsugod sa tahianan, si Arlene nag-atubang og proseso nga nakapalibug ug nakapahigawad niya. Naglingkod siya atubangan sa iyang makina naninguha sa pagtas-tas sa wala matarung pagtahi nga sinina nga iyang gitrabaho. Daw walay makatabang niya, kay ang ubang mga mananahi nagdali nga makahuman og daghan kutob sa ilang mahimo. Gibati ni Arlene nga walay



mahimo ug walay paglaum. Sa hilom, siya misugod paghilak.

Sa atbang ni Arlene naglingkod si Bernice Rock. Mas magulang siya ug mas makamao nga mananahi. Naka-kita sa pag-antus ni Arlene, mibiya si Bernice sa iyang trabaho ug miduol ni Arlene, mitudlo ug mitabang niya. Wala siya mohawa hangtud si Arlene makamao na ug malampusong nakahuman sa sinina. Mibalik dayon si Bernice sa iyang makina, nakuhaan ang kahigayunan nga makahuman og daghang sinina, kon wala pa siya motabang.

Tungod niining buhat sa kamabination, si Bernice ug Arlene nahimong managhigala sa tibuok kinabuhi. Sila sa katapusan nangaminyo ug nanganak. Sa mga 1950, si Bernice, kinsa usa ka miyembro sa Simbahan, mihatag ni Arlene ug sa iyang pamilya og kopya sa Basahon ni Mormon. Niadtong 1960, si Arlene ug ang iyang bana ug mga anak nabunyagan nga mga miyembro sa Simbahan. Sa wala madugay sila nabugkos sa balaang templo sa Dios.

Isip resulta sa kalooy nga gipakita ni Bernice samtang siya mitabang sa

usa ka tawo nga wala niya mailhi apan nag-antus ug nagkinahanglan og tabang, dili maihap nga mga indibidwal, buhi ug patay, nakatagamtam karon sa makaluwas nga mga ordinansa sa ebanghelyo.

Kada adlaw sa atong mga kinabuhi gihatagan kita og mga oportunidad sa pagpakita og gugma ug kamabination niadtong anaa sa atong palibut. Miingon si Presidente Spencer W. Kimball: “Kinahanglang makahinumdom kita nga kadtong mga tawo nga atong mahimamat sa mga parkinganan, sa mga opisina, sa mga elevator, ug bisan asa mao ang bahin sa mga tawo nga gihatag sa Dios kanato aron higugmaon ug serbisyuhan. Wala kaayo kitay kaayohan nga mahimo sa paghisgot sa kinatibuk-ang panagigsoonay sa katawhan kon dili nato tagdon ang tanan nga naa sa atong palibut isip mga igsoon.”⁶

Sa kasagaran ang atong mga oportunidad sa pagpakita og gugma moabut nga wala damha. Usa ka ehemplo sa maong oportunidad migawas sa usa ka artikulo sa pamantalaan niadtong Oktubre 1981. Nadasig kaayo ko sa gugma ug kalooy nga giistorya niini

nga ako kining gigunting ug gitipigan sobra na sa 30 ka tuig.

Ang artikulo naghisgut nga usa ka biyahe sa Alaska Airlines gikan sa Anchorage, Alaska, padulong sa Seattle, Washington—usa ka biyahe nga nagdala og 150 ka mga pasahero—mitipas ngadto sa hilit nga lungsod sa Alaska aron sa pagdala sa bata nga grabing naangol. Ang dos anyos nga bata naputlan og ugat sa iyang bukton sa dihang natumba siya sa usa ka piraso nga bildo samtang nagdula duol sa iyang balay. Ang lungsod mga 450 ka milya (725km) sa habagatan sa Anchorage ug dili gyud agianan sa biyahe. Bisan pa, ang mga medic nga nagtabang sa bata nangayo og dinaliang tabang, ug mao nga ang biyahe gitipas aron sa pagkuha sa bata ug dad-on ngadto sa Seattle aron siya matambalan sa ospital.

Sa pagtugpa na sa eroplano duol sa hilit nga lungsod, ang mga medic mipahibalo sa piloto nga grabi ang pagdugo sa bata nga dili siya makabut ngadto sa Seattle. Usa ka desisyon ang nahimo sa paglupad og laing 200 ka milya (320) nga tipas sa agianan ngadto sa Juneau, Alaska, ang labing duol nga siyudad nga dunay ospital.

Human madala ang bata ngadto sa Juneau, ang biyahe mipaingon na sa Seattle, pila na ka oras nga ulahi sa iskediyul. Walay usa sa mga pasahero nga nagbagulbol, bisan og kadaghanan nila dili na kaabut sa mga appointment ug sa konektado nga mga biyahe. Gani, sa paglabay sa mga minuto ug oras, nangolekta sila, nakakuha og igong kantidad alang sa bata ug sa iyang pamilya.

Sa dihang ang eroplano hapit na motugpa sa Seattle, ang mga pasahero nangalipay sa dihang ang piloto mipahibalo nga nakadawat siya og tawag sa radyo nga ang bata mamaayo ra.⁷

Sa akong hunahuna miabut ang mga pulong sa kasulatan: “Ang gugma nga putli mao ang tiunay nga gugma ni Kristo, . . . ug bisan kinsa nga makaplagan nga aduna niini sa katapusan nga adlaw, kini makaayo uban kaniya.”⁸

Mga kaissoonan, ang uban sa atong labing dakong mga oportunidad



sa pagpakita sa atong gugma anaa sa sulod sa atong kaugalingong mga panimalay. Ang gugma kinahanglang mao ang sentro sa kinabuhi sa pamilya, apan usahay dili kini mao. Adunay sobra ka walay pasensya, sobra nga panaglalis, sobrang panag-away, sobrang hinilakay. Miingon si Presidente Gordon B. Hinckley: “Ngano man nga [kadtong] atong [labing] gimahal mao may kanunayng puntariya sa atong pintas nga mga pulong? Ngano man nga [kita] usahay mosulti ingon og gustong mopasakit sa emosyon?”⁹ Ang tubag niini nga mga pangutana mahimong managlahi sa matag usa kanato, apan ang lintunganay mao nga dili importante ang mga rason. Kon kita mosunod sa sugo



Vienna, Austria

sa paghigugma sa usag usa, kinahanglang tagdon nato ang usag usa uban sa pagbati ug pagtahud.

Siyempre adunay mga panahon nga kinahanglang modisiplina. Atong hinumduman, bisan pa niana, ang tambag nga makita sa Doktrina ug mga Pakigsaad—mao kini, nga kon gikinahanglan nato nga mobadlong sa usa, kita kinahanglang mopakita og dugang gugma pagkahuman.¹⁰

Manghinaut ko nga kita maning-kamot kanunay nga magmabination ug magsensitibo sa mga hunahuna ug mga pagbati ug mga kahintang niadtong anaa sa atong palibut. Dili ta manginsulto o mobiyabiay. Hinoon, magmaloloy-on ug magmaawhagon kita. Kinahanglang magbantay kita nga dili nato maguba ang pagsalig sa usa ka tawo pinaagi sa dinanghag nga mga pulong ug mga aksyon.

Ang pagpasaylo kanunay nga mag-uban sa gugma. Sa atong mga pamilya, ingon man usab sa atong mga higala, mahimong dunay masakit nga mga pagbati ug dili panag-uyon. Usab, dili gyud igsapayan kon unsa ka gamay ang isyu. Kinahanglan nga dili kini pasagdan nga mokutkut, modunot, ug sa katapusan moguba. Ang pagpasangil makapaumido sa samad. Ang pagpasaylo lamang ang makaayo.

Usa ka matahum nga babaye kinsa namatay na nakig-istorya nako usa ka adlaw niana ug wala damha miistorya sa mga pagmahay. Naghisgot siya sa usa ka insidente nga nahitabo dugay

na kaayo ug naglambigit sa silingan nga mag-uuma, kanhi usa ka higala apan wala ikasabut niya ug sa iyang bana sa daghang mga okasyon. Usa ka adlaw niana ang mag-uuma mihangyo kon makalaktud ba siya agi sa iyang yuta aron makaabut sa iyang kaugalingon yuta. Niining puntoha mihunong siya sa iyang istorya nako ug, sa nagkurog nga tingog, miingon, “Brother Monson, wala nako siya paagia sa akong yuta niana nga higayon ug sukad niana apan mipalakaw niya og layo aron makaabut sa iyang yuta. Nasayop ko, ug nagbasol ko niini. Wala na siya karon, apan, gusto unta akong mosulti niya og, ‘Pasayloa ko.’ Nanghinaut unta ko nga duna koy ikaduhang higayon nga magmabination.”

Samtang ako naminaw kaniya, akong nahinumduman ang masulubong obserbasyon ni John Greenleaf Whittier: “Sa tanang makaguol nga pulong sa dila o sa pluma ang pinakaguol mao kini: *‘Lagmit unta!’*”¹¹ Mga kaigsoonan, samtang atong pakitaan ang uban og gugma ug mabinationong konsiderasyon, malikayan nato ang maong mga pagmahay.

Ang gugma mapadayag sa daghang mga mailhan nga paagi: usa ka pahiyom, pagkaway-kaway, mabinationong komentaryo, usa ka pagdayeg. Laing mga ekspresyon tingali dili kaayo klaro, sama sa pagpakita og interes sa kalihokan sa uban, pagtudlo og baruganan uban ang pagkamabination ug pailub, pagbisita sa masakiton. Kini

nga mga pulong ug mga aksyon ug daghan pa makapakita og gugma.

Si Dale Carnegie, usa ka inila nga American author ug tig-lecture, nagtuo nga ang matag usa sa iyang kaugalingon adunay “gahum sa pagdugang sa gidaghanon [sa] kalipay sa kalibutan . . . pinaagi sa paghatag og pipila ka pulong sa pagtamud ngadto sa tawo nga nag-inusara o nawad-an og paglaum.” Miingon siya, “Tingali inyong makalimtan ugma ang mabintangion pulong nga inyong gisulti karon, apan ang inyong gisultian mahimong mohambin niini sa tibuok kinabuhi.”¹²

Hinaut nga magsugod kita karon, niining adlaw, sa pagpadayag og gugma ngadto sa tanang mga anak sa Dios, sakop man sa atong pamilya, atong mga higala, mga kaila, o dili kaila. Sa atong pagbangon matag buntag, atong ipasalig ang pagtubag uban sa gugma ug kalooy sa bisan unsay moabut kanato.

Dili matugkad, mga kaisoonan, ang gugma sa Dios kanato. Tungod niini nga gugma, Iyang gipadala ang Iyang Anak, kinsa nahigugma pag-ayo kanato nga mihatag sa Iyang kinabuhi alang nato, aron kita makabaton og kinabuhing dayon. Kon makasabut kita niining walay ikatandi nga gasa, ang atong mga kasingkasing mapuno sa gugma alang sa atong Amahan sa Kahangturan, alang sa atong Manluluwas, ug alang sa tanang katawhan. Kana mao unta ang mahitabo mao ang akong pag-ampo pinaagi sa sagra-dong pangalan ni Jesukristo, amen. ■

MUBO NGA MGA SULAT

1. Mateo 22:36-39.
2. Marcos 12:31.
3. 1 Juan 4:21.
4. Lucas 23:34.
5. Wala mailhi ang tigsulat, sa Richard L. Evans, “The Quality of Kindness,” *Improvement Era*, Mayo 1960, 340.
6. *The Teachings of Spencer W. Kimball*, ed. Edward L. Kimball (1982), 483.
7. Tan-awa sa “Injured Boy Flown to Safety,” *Daily Sitka Sentinel* (Alaska), Okt. 22, 1981.
8. Moroni 7:47.
9. Gordon B. Hinckley, “Let Love Be the Lodestar of Your Life,” *Ensign*, Mayo 1989, 67.
10. Tan-awa sa Doktrina ug mga Pakigsaad 121:43.
11. “Maud Muller,” sa *The Complete Poetical Works of John Greenleaf Whittier* (1878), 206; emphasis gidugang.
12. Dale Carnegie, sa, pananglitan, Larry Chang, *Wisdom for the Soul*. (2006), 54



Ni Presidente Boyd K. Packer

Presidente sa Korum sa Napulog Duha ka mga Apostoles

Ang Pagsaksi

Ganahan kong mopakigbahin kaninyo niadtong mga kamatuoran nga bililhon kaayong masayran.

Ang mga panahon sa gubat o kawalay kasigurohan adunay paagi sa pagpalambo sa atong pag-focus sa mga butang nga importante kaayo.

Ang Ikaduhang Gubat sa Kalibutan usa ka panahon sa grabe nga espirituhanong kagubot alang kanako. Mibiya ko sa akong panimalay sa Brigham City, Utah, nga may gamay nga pagpamatuod, ug mibati ko sa panginahanglan og dugang pa. Hapit tibuok namong senior class sa pipila lang ka semana padulong na ngadto sa panggubatan. Samtang gi-assign sa isla sa Ie Shima, amihanan sa Okinawa, Japan, nanlimbasug ko sa pagduhaduha ug kawalay kasigurohan. Gusto ko og personal nga pagpamatuod sa ebanghelyo. Gusto ko nga *masayud!*

Atol sa usa ka gabii nga walay tulog, mibiya ko sa akong tolda ug misulod sa bunker nga giporma pinaagi sa paglinya og mga drum nga sudlanan og 50 ka galon nga krudo nga puno sa balas ug gipatung-patong aron makaporma og koral [enclosure]. Walay atup, ug mao nga mikamang ko, mihangad sa kalangitan nga puno sa bitoon, ug miluhod aron mag-ampo.

Hapit na sa taliwala sa pag-ampo kini nahitabo. Dili nako mahulagway

ninyo unsay nahitabo kon akong isulti kaninyo. Lapas kini sa akong gahum sa pagpahayag, apan ingon kini kaklaro karon sama nianang gabhiona sobra na sa 65 ka tuig ang milabay. Nasayud ko nga pribado kaayo kini, tinagsa kaayo nga manipestasyon. Sa katapusan ako mismo nasayud. Ako *nasayud* gayud, kay gihatag kini kanako. Wala madugay, mikamang ko gikan niana nga bunker ug milakaw, o morag naglutaw, balik sa akong higdaanan. Gigahin nako ang tibuok gabii nga mibati sa kalipay ug katingala.

Imbis maghunahuna nga espesyal ko, naghunahuna ko nga kon ang maong butang miabut nako, nga kini moabut ngadto ni bisan kinsa. Mituo gihapon ko niana. Sa misunod nga katuigan, akong nasabtan nga ang maong kasinatian sa samang higayon usa ka kahayag nga sundon ug bug-at nga palas-anon.

Ganahan kong mopakigbahin kaninyo niadtong mga kamatuoran nga bililhon kaayong masayran, mga butang nga akong nakat-unan ug nasinati dula-an sa 90 ka tuig sa kinabuhi ug sobra sa 50 ka tuig isip General Authority. Daghan sa akong nasayran kabahin sa kategoriya sa mga butang nga dili matudlo apan mahimong makat-unan.



mga anak mahimong magmalipayon sa panimalay.

Kadtong wala maminyo o kadtong wala makabaton og anak dili ingon nga wala malakip sa mahangturong mga panalangin nga ilang gitinguha apan, sa pagkakaran, pabiling wala nila makab-ot. Dili nato kanunay nga mahibaloan kon sa unsang paagiha o kanus-a moabut ang mga panalangin, apan ang saad sa mahangturong pag-uswag dili ihikaw ni bisan kinsa nga matinud-anong indibidwal nga naghimo ug nagtuman sa sagradong mga pakigsaad.

Ang inyong tinago nga mga pangandoy ug hinilakan nga mga pangamuyo motandog sa kasingkasing sa Amahan ug sa Anak. Hatagan kamo og personal nga pasalig gikan Nila nga ang inyong kinabuhi mahimong puno ug walay importanting panalangin nga dili ninyo madawat.

Isip sulugoon sa Ginoo, nga nagbuhat sa katungdanan nga ako gi-orden, mosaad ko niadtong anaa sa samang mga kahimtang nga walay importante sa inyong kaluwasan ug kahimayaan nga dili ihatag kaninyo sa saktong panahon. Ang mga bukton nga karon haw-ang mapuno, ug mga kasingkasing nga karon nasakitan tungod sa wala matuman nga mga damgo ug pangandoy maayo.

Laing kamatuoran nga akong nasayran mao nga ang Espiritu Santo tinuod. Siya ang ikatulong sakop sa Dios nga Kapangulohan. Ang Iyang misyon mao ang pagpamatuod sa kamatuoran ug pagkamatarung. Iyang gipakita ang Iyang Kaugalingon sa daghang paagi, lakip na ang mga pagbati sa kalinaw ug pasalig og usab. Makahatag usab Siya og kahupayan, giya, ug pagkorihir kon gikinahanglan. Ang pakig-uban sa Espiritu Santo magpabilin sa tibuok natong kinabuhi pinaagi sa matarung nga pagpuyo.

Ang gasa sa Espiritu Santo itugyan pinaagi sa usa ka ordinansa sa ebanghelyo. Ang usa ka tawo nga adunay katungod mopatong sa iyang mga kamot sa ulo sa bag-ong miyembro sa Simbahan ug molitok og mga pulong nga sama niini: “Dawata ang Espiritu Santo.”

Sama sa kadaghanan sa mga butang nga dako og bili, ang kahibalo nga adunay mahangturong bili moabut lamang pinaagi sa personal nga pag-ampo ug pamalandong. Kini, inubanan sa pagpuasa ug pagtuon sa kasulatan, makadapit og mga impresyon ug mga pinadayag ug mga paghunghong sa Balaang Espiritu. Naghatag kini nato og panudlo gikan sa kahitas-an samtang nagkat-on kita lagda human sa usa ka lagda.

Ang mga pinadayag nagsaad nga “bisan unsa nga baruganan sa salabutan nga kita makakab-ut niini nga kinabuhi, kini madala uban kanato sa pagkabanhaw” ug nga ang “kahibalo ug salabutan [maangkon] pinaagi sa . . . kakugi ug pagkamasulundon” (D&P 130:18–19).

Usa ka mahangturong kamatuoran nga akong nasayran mao nga ang Dios buhi. Siya ang atong Amahan.

Kita Iyang mga anak. “[Kita] nagtuo sa Dios, ang Amahan sa Kahangturang, ug sa Iyang Anak, si Jesukristo, ug sa Espiritu Santo” (Mga Artikulo sa Hugot nga Pagtuo 1:1).

Sa tanang mga tawag nga Iya untang magamit, Iyang gipili nga tawagon nga “Amahan.” Ang Manluluwas mimando, “Ug niini nga paagi kamo mag-ampo: Amahan namo nga anaa sa langit” (3 Nephi 13:9; tan-awa usab sa Mateo 6:9). Ang Iyang paggamit sa ngalan nga “Amahan” usa ka leksyon alang sa tanan samtang atong masabtan unsay labing importante niining kinabuhia.

Ang pagkaginikanan usa ka sagrado nga pribilehiyo, ug depende sa pagkamatinud-anon, mahimo kining mahangturong panalangin. Ang pinakamaayo nga katuyoan sa tanang kalihokan sa Simbahan mao nga ang lalaki ug ang iyang asawa ug ang ilang



Siyudad sa Mexico, Mexico

Kini nga ordinansa lamang dili makapausab nato sa paagi nga mabantayan, apan kon kita maminaw ug mosunod sa mga pag-aghat, makadawat kita sa panalangin sa Espiritu Santo. Matag anak sa atong Langitnong Amahan masayud sa katinuod sa saad ni Moroni: “Pinaagi sa gahum sa Espiritu Santo kamo mahimo nga masayud sa *kamatuoran* sa tanan nga mga butang” (Moroni 10:5; emphasis gidugang).

Ang balaanong kamatuoran nga akong naangkon sa akong kinabuhi mao ang akong pagsaksi ni Ginoong Jesukristo.

Nag-una ug nagsuporta sa tanan natong gibuhay, nga gibase sa tibuok nga mga pinadayag, mao ang ngalan sa Ginoo, nga mao ang katungod diin kita naglihok diha sa Simbahan. Matag pag-ampo nga gihalad, bisan sa gagmayng mga bata, matapos diha sa ngalan ni Jesukristo. Matag panalangin, matag ordinansa, matag ordinasyon, matag opisyal nga buhat gihimo diha sa ngalan ni Jesukristo. Kini Iyang Simbahan, ug kini gipangalan Kaniya—Ang Simbahan ni Jesukristo sa mga Santos sa Ulahing mga Adlaw (tan-awa sa D&P 115:4).

Dihay dakong hitabo sa Basahon ni Mormon diin ang mga Nephite “nag-ampo ngadto sa Amahan diha sa ngalan [sa Ginoo].” Ang Ginoo mipakita ug nangutana:

“Unsa ang buot ninyo nga Ako mohatag nganha kaninyo?

“Ug sila miingon ngadto kaniya: Ginoo, kami buot unta nga ikaw molsulti kanamo sa ngalan diin kami motawag niini nga simbahan; kay dihay mga panaglalis taliwala sa mga katawhan mahitungod niini nga butang.

“Ug ang Ginoo miingon ngadto kaniya: Sa pagkatinuod, sa pagkatinuod, Ako moingon nganha kaninyo, ngano nga ang mga katawhan magbagulbol ug maglalis tungod niini nga butang?

“Wala ba sila magbasa sa mga kasulatan, diin nag-ingon nga kamo kinahanglan modala nganha kaninyo sa ngalan ni Kristo, diin mao ang akong ngalan? Kay pinaagi niini nga ngalan kamo pagatawgon sa katapusan nga adlaw;

“Ug bisan kinsa nga modala nganha kaniya sa akong ngalan, ug molahutay hangtud sa katapusan, ang mao maluwas. . . .

“Busa, bisan unsa ang inyong buhaton, kamo mobuhay niini pinaagi sa akong ngalan; busa kamo motawag sa simbahan sa akong ngalan; ug motawag kamo sa akong Amahan diha sa akong ngalan aron siya manalangin sa simbahan alang kanako” (3 Nephi 27:2–7).

Kini ang Iyang ngalan, Jesukristo, “kay walay bisan unsa pang lain nga ngalan sa silong sa langit, nga gikahatag ngadto sa mga tawo, nga pinaagi niini maluwas kita” (Mga Buhat 4:12).

Sa Simbahan kita nasayud kinsa Siya: si Jesukristo, ang Anak sa Dios. Siya ang

Bugtong Anak sa Amahan. Siya mao Siya kinsa gipatay ug Siya kinsa nabuhi pag-usab. Siya ang atong Manlalaban sa Amahan. “Hinumdumi nga kini diha sa lig-on nga sukaranan sa atong Manunubos, nga mao si Kristo, ang Anak sa Dios, nga kamo kinahanglan gayud motukod sa inyong tukuranan” (Helaman 5:12). Siya ang angkla nga nagkupert kanato ug nagprotekta kanato ug sa atong mga pamilya agi sa mga kalisdanan sa kinabuhi.

Matag Dominggo sa tibuok kalibutan diin ang mga kongregasyon nagpundok sa bisan unsa nga nasyonalidad o pinulongan, ang sakrament gipanalanginan sa samang mga pulong. Kita nagdala nganhi kanato sa ngalan ni Kristo ug sa kanunay mohinumdom Kaniya. Napatik kana nganhi kanato.

Si propeta Nephi namahayag, “Kami naghigot mahitungod kang Kristo, kami nalipay diha kang Kristo, kami nagsangyaw mahitungod kang Kristo, kami nanagna mahitungod kang Kristo, ug kami nagsulat sumala sa among mga panagna, nga ang among mga anak mahimo nga masayud sa unsa nga tinubdan sila mahimo nga mangita alang sa kapasayloan sa ilang mga sala” (2 Nephi 25:26).

Matag usa kanato kinahanglan nga makaangkon sa atong kaugalingon nga pagpamatuod ni Ginoong Jesukristo. Kita mopakigbahin dayon niana nga pagpamatuod sa atong pamilya ug sa uban.

Niining tanan, hinumduman nato nga adunay kaaway nga personal nga nagtinguha sa pagbabag sa buhat sa Ginoo. Kinahanglan kitang mopili kinsa ang sundon. Ang atong proteksyon ingon ra ka yano sa tinagsa nga pagdesisyon nga mosunod sa Manluluwas, mosiguro nga kita matinud-anong magpabilin sa Iyang habig.

Sa Bag-ong Tugon, si Juan mirekord nga dihay pipila nga wala mopasalig sa Manluluwas ug sa Iyang mga pagtulun-an, ug “tapus niini daghan sa iyang mga tinun-an mitalikod ug wala na managpanglakaw uban kaniya.

“Ug si Jesus nangutana sa napulong duha, Buot ba usab kamong mobiya kanako?

“Si Simon Pedro mitubag kaniya, Ginoo, kang kinsa man kami moadto? ikaw mao ang may mga pulong mahitungod sa kinabuhing dayon.

“Ug kami nagatuo ug among nasinati nga ikaw mao kanang Kristo, ang Anak sa buhi nga Dios” (Juan 6:66–69).

Si Pedro nakaangkon nianang butang nga makat-unan sa matag sumusunod sa Manluluwas. Aron mahimong mapahinunguron sa matinud-anong paagi ngadto kang Jesukristo, ato Siyang gidawat isip atong Manunubos ug mobuhat sa tanan kutob sa atong mahimo sa pagsunod sa Iyang mga pagtulun-an.

Human sa tanang katuigan nga ako nabuhi ug nagtudlo ug nagserbisyo, human sa minilyon ka milya nga akong nabiyahé sa tibuok kalibutan, nianang tanan nga akong nasinati, adunay usa ka dakong kamatuoran nga akong ipakigbahin. Kini ang akong pagsaksi sa Manluluwas nga si Jesukristo.

Sila si Joseph Smith ug Sidney Rigdon mirekord sa mosunod human sa usa ka sagradong kasinatian:

“Ug karon, human sa daghan nga mga pagpamatuod nga gihatag mahitungod kaniya, kini mao ang pagpamatuod, ang katapusan sa tanan, nga kami naghatag kaniya: Nga siya buhi!

“Kay kami nakakita kaniya” (D&P 76:22–23).

Ang ilang mga pulong akong mga pulong.

Ako mituo ug ako sigurado nga si Jesus mao ang Kristo, ang Anak sa Dios, ug nga Siya buhi. Siya ang Bugtong Anak sa Amahan, ug “pinaagi kaniya, ug ngadto kaniya, ug tungod kaniya, ang mga kalibutan nalalang, ug ang mga lumulupyo niana mao ang anak nga mga lalaki ug anak nga mga babaye sa Dios” (D&P 76:24).

Mohatag ko sa akong pagsaksi nga ang Manluluwas buhi. Ako *nakaila* sa Ginoo. Ako Iyang saksi. Ako nasa-yud sa Iyang dakong sakripisyo ug mahangturong gugma alang sa tanang mga anak sa Langitnong Amahan. Mohatag ko sa akong linain nga pagsaksi sa tanang pagpaubos apan sa hingpit nga kasigurohan, sa pangalan ni Jesukristo, amen. ■



Ni Elder William R. Walker
Sa Seventy

Pagpuyo nga Matinud-anon sa Tinuohan

Matag usa nato mapanalanginan og maayo kon kita makahibalo sa mga istorya sa hugot nga pagtuo ug sakripisyo nga naggiya sa atong mga katigulangan sa pag-apil sa Simbahan sa Ginoo.

Ganahan ko sa kasaysayan sa Simbahan. Tingali sama sa kadaghanan ninyo, ang akong pagtuo malig-on kon makahibalo ko sa talagsaong dedikasyon sa atong mga katigulangan nga midawat sa ebanghelyo ug nagpuyong matinud-anon sa tinuohan.

Usa ka bulan ang milabay, 12,000 ka talagsaong mga kabatan-onan sa Gilbert Arizona Temple District ang misaulog sa pagkahuman sa ilang bag-ong templo pinaagi sa makadasig nga pasundayag, nagpakita sa ilang pasalig nga magpuyo nga matarung. Ang tema sa ilang selebrasyon mao ang “Pagpuyo nga Matinud-anon sa Tinuohan.”

Sama sa gibuhát niadtong matinud-anong mga kabatan-onan sa Arizona, ang matag Santos sa Ulahing mga Adlaw mopasalig gayud sa “pagpuyo nga matinud-anon sa tinuohan.”

Ang mga pulong sa himno nag-ingon, “Matinud-anon sa tinuohan nga

gihambin sa atong mga ginikanan” (“True to the Faith,” *Hymns*, nu. 254).

Mahimo natong dugangan, “Magmatinud-anon sa tinuohan nga gihambin sa atong mga apohan.”

Naghunahuna ko kon matag usa niadtong madasigong mga kabatan-onan sa Arizona nakahibalo ba sa ilang kaugalingong kasaysayan sa Simbahan—kon nakahibalo ba sila sa kasaysayan kon sa unsang paagi nga ang *ilang* pamilya namiyembro sa Simbahan. Nindot kon ang matag Santos sa Ulahing mga Adlaw nakahibalo sa mga istorya sa pagkakabig sa ilang mga katigulangan.

Kaliwat man kamo o dili sa mga pioneer, ang panulundon sa pagtuo ug sakripisyo sa Mormon pioneer inyong panulundon. Usa kini ka halangdong panulundon sa Ang Simbahan ni Jesukristo sa mga Santos sa Ulahing mga Adlaw.

Usa sa talagsaong mga kapitulo sa kasaysayan sa Simbahan nahitabo sa

dihang si Wilford Woodruff, usa ka Apostol sa Ginoo, nagtudlo sa gipahiuli nga ebanghelyo ni Jesukristo sa tibuok Great Britain niadtong 1840–10 ka tuig lamang human maestablisar ang Simbahan.

Si Wilford Woodruff ug ang ubang mga Apostoles nagtrabaho sa mga dapit sa Liverpool ug Preston sa England, nga nagmalampuson. Si Elder Woodruff, nga sa kaulahian nahimong Presidente sa Simbahan, kanunayng nag-ampo sa Dios sa paggiya niya niining importanting buhat. Ang iyang mga pag-ampo migiya niya sa pag-adto sa laing lugar sa pagtudlo sa ebanghelyo.

Si Presidente Monson mitudlo nato nga kon kita makadawat og inspirasyon gikan sa langit sa pagbuhat og butang, buhaton nato kini karon—dili kita maglangay-langay. Mao gayud kana ang gibuhat ni Wilford Woodruff. Uban sa klaro nga direksyon sa Espiritu sa “pag-adto sa . . . habagatan,” si Elder Woodruff mibiya dayon ug mibiyahe sa usa ka dapit sa England nga

gitawag og Herefordshire—umahan sa habagatang-kasadpang England. Dinhi iyang gikahimamat ang mauswagong mag-uuma nga si John Benbow, diin siya giabi-abi “uban sa malipayong kasingkasing ug pasalamat” (Wilford Woodruff, sa Matthias F. Cowley, *Wilford Woodruff: History of His Life and Labors as Recorded in His Daily Journals* [1909], 117).

Usa ka grupo nga sobra sa 600 ka mga tawo, nga mitawag sa ilang kaugalingon nga Nagkahiusang mga Kaigsoonan [United Brethren], “nag-ampo alang sa kahayag ug kama-tuoran” (Wilford Woodruff, sa *Mga Pagtulun-an sa mga Presidente sa Simbahan: Wilford Woodruff* [2004], 99). Ang Ginoo mipadala ni Wilford Woodruff agig tubag sa ilang mga pag-ampo.

Ang pagtudlo ni Elder Woodruff namunga dayon, ug daghan ang nabunyagan. Sila si Brigham Young ug Willard Richards miapil niya sa Herefordshire, ug ang tulo ka mga Apostoles adunay talagsaong kalampusan.

Sa pila lang ka bulan, nakaorganisar sila og 33 ka mga branch alang sa 541 ka mga miyembro nga nagpasakop sa Simbahan. Ang ilang talagsaong trabaho nagpadayon, ug sa katapusan hapit tanan nga mga miyembro sa United Brethren nabunyagan ngadto sa Ang Simbahan ni Jesukristo sa mga Santos sa Ulahing mga Adlaw.

Ang apohang babaye sa akong apohan nga si Hannah Maria Eagles Harris maoy usa sa unang naminaw ni Wilford Woodruff. Iyang gipahibalo ang iyang bana, nga si Robert Harris Jr., nga siya nakadungog sa pulong sa Dios ug nga siya gusto nga magpabunyag. Si Robert wala malipay nga naminaw sa report sa iyang asawa. Iyang giingnan ang iyang asawa nga mokuyog siya sa sunod nga sermon sa Mormon nga misyonaryo, ug iya kining korihian.

Naglingkod duol sa atubangan sa pundok, uban sa determinasyon nga dili madala sa sermon, ug mosamok-samok sa bisita nga tigsangyaw, si Robert natandog dayon sa Espiritu, sama sa iyang asawa. Nasayud siya nga ang mensahe sa Pagpahiuli tinuod, ug siya ug ang iyang asawa nabunyagan.

Ang istorya sa ilang hugot nga pagtuo ug debosyon susama sa laing liboan ka mga tawo: sa dihang nakadungog sila sa mensahe sa ebanghelyo, nasayud sila nga kini tinuod!

Sama sa gisulti sa Ginoo, “Ang akong mga karnero nagapatalinghug sa akong tingog, ug ako nakaila kanila, ug sila nagasunod kanako” (Juan 10:27).

Kay nakadungog sa tingog sa Magbalantay, hingpit silang mapasaligon sa ilang mga kinabuhi sa pagpuyo sa ebanghelyo ug sa pagsunod sa direksyon sa propeta sa Ginoo. Mitubag sa tawag sa pagpundok ngadto sa Zion, ilang gibiyaan ang ilang panimalay sa England, mitabok sa Atlantic, ug nagpundok uban sa mga Santos didto sa Nauvoo, Illinois.

Ilang gidawat ang ebanghelyo sa ilang tibuok kasingkasing. Samtang nag-establisar sa ilang bag-ong panimalay, mitabang sila sa pagtukod sa Nauvoo Temple pinaagi sa ikapulo sa



ilang paghago—naggahin sa matag ikanapulo nga adlaw sa pagtukod sa templo.

Grabe ang ilang kaguol sa balita bahin sa kamatayon sa ilang minahal nga propeta, nga si Joseph Smith, ug sa iyang igsoon nga si Hyrum. Apan mipadayon sila! Nagpabilin sila nga matinud-anon sa tinuohan.

Sa dihang ang mga Santos gigukod ug giabug gikan sa Nauvoo, sila si Robert ug Maria mibati nga napanalanginan sa pagdawat sa endowment sa templo sa wala pa sila motabok sa Mississippi River ug mipaingon sa kasadpan. Bisan og sila wala maka-siguro sa ilang kaugmaon, nakasi-guro sila sa ilang pagtuo ug sa ilang pagpamatuod.

Uban sa unom ka mga anak, naglisud sila paglakaw subay sa kalapukan sa ilang pagtabok sa Iowa paingon sa kasadpan. Mitukod silag temporaryong kapasilongan sa daplin sa Missouri River nga nailhan nga Winter Quarters.

Kining maisugong mga pioneer naghulat sa direksyon gikan sa mga apostoles kon sa unsang paagiha ug kanus-a sila mopadulong sa kasadpan. Ang mga plano sa matag usa nausab sa dihang si Brigham Young, ang Presidente sa Korum sa Napulog Duha, miisyu og tawag sa mga lalaki nga moboluntaryo sa pagserbisyo sa Kasundalohan sa Estados Unidos nga nailhan nga ang Mormon Batalyon.

Si Robert Harris Jr. maoy usa sa sobra sa 500 ka Mormon pioneer nga mga lalaki nga misanong sa tawag ni Brigham Young. Nagpalista siya, bisan nagpasabut kini nga iyang mabiyaan ang iyang mabdos nga asawa ug unom ka gagmayng mga anak.

Ngano nga siya ug ang ubang mga lalaki mohimo sa mao nga butang?

Ang tubag mahatag gikan sa kaugalingong mga pulong sa apohang lalaki sa akong apohan. Sa sulat ngadto sa iyang asawa sa dihang ang batalyon padulong na ngadto sa Santa Fe, siya misulat, “Ang akong pagtuo mas milig-on [ug kon maghunahuna ko sa mga butang nga gisulti ni Brigham Young kanamo], nagtuo ako niini nga sama ra nga ang Halangdong Dios ang nagsulti kanako.”



Sa laktud, nasayud siya nga siya naminaw sa propeta sa Dios, sama sa laing mga lalaki. Mao nga ila kining gibuhat! Nasayud sila nga gigiyahan sila sa usa ka propeta sa Dios.

Nianang sama nga sulat, iyang gipadayag ang iyang malumong mga pagbati alang sa iyang asawa ug mga anak ug naghigut bahin sa kanunay niyang mga pag-ampo nga ang iyang asawa ug mga anak mapanalanginan.

Sa ulahing bahin sa sulat, iyang gisulti kining gamhanang pamahayag: “Kinahanglang dili nato kalimtan ang mga butang nga nadungog nimo ug nako ug [nasinati] sulod sa Templo sa Ginoo.”

Uban sa iyang unang pagpamatuod nga “kita gigiyahan sa Propeta sa Dios,” kining duha ka sagradong mga pahimangno nahimong sama sa kasulatan ngari nako.

Dise-otso ka bulan human mobiya sa batalyon, si Robert Harris luwas nga nahibalik sa iyang minahal nga si Maria. Nagpabilin sila nga matinud-onon ug matinud-anon sa gipahiuli nga ebanghelyo sa ilang tibuok kinabuhi. Sila adunay 15 ka mga anak, 13 niini ang nabuhi ngadto sa pagkahingkod. Ang akong lola nga si Fannye Walker, sa Raymond, Alberta, Canada, usa sa ilang 136 ka mga apo.

Si Lola Walker mapasigarbuhon sa kamatuoran nga ang *iyang* lolo

nakaserbisyo sa Mormon Batalyon, ug gusto siya nga ang iyang tanang mga apo makahibalo niini. Karon nga ako usa na ka apohan, nakasabut ko nganong kini importante kaayo kaniya. Gusto niya nga ipabalik ang mga kasingkasing sa mga anak ngadto sa mga amahan. Gusto niya nga ang iyang mga apo makahibalo sa ilang matarung nga panulundon—tungod kay siya nasayud nga kini makapanalangin sa ilang kinabuhi.

Kon mobati kita nga konektado sa atong matarung nga mga katigulangan, mas makahimo kita og maalamon ug matarung nga mga pagpili.

Kini tinuod. Matag usa nato mapanalanginan og maayo kon kita makahibalo sa mga istorya sa hugot nga pagtuo ug sakripisyo nga naggiya sa atong mga katigulangan sa pag-apil sa Simbahan sa Ginoo.

Gikan sa unang higayon nga si Robert ug Maria nakadungog ni Wilford Woodruff nga nagtudlo ug nagpamatuod sa Pagpahiuli sa ebanghelyo, nasayud sila nga ang ebanghelyo tinuod.

Nasayud usab sila nga bisan unsang mga pagsulay o mga kalisdanan nga moabut kanila, mapanalanginan sila tungod sa pagpabiling matinud-anon sa tinuohan. Ingon og nakadungog sila sa mga pulong sa atong propeta karon, kinsa miingon, “Walay sakripisyo nga dako kaayo . . . aron

makadawat [sa] mga panalangin [sa templo]” (Thomas S. Monson, “Ang Balaan nga Templo—ang Suga sa Kalibutan,” *Liahona*, Mayo 2011, 92).

Ang duha ka libra nga sinsilyo sa United Kingdom adunay nakasulat nga, “Standing on the Shoulder of Giants [Nagbarug diha sa Abaga sa mga Higante].” Kon maghunahuna ko sa atong bantugang mga katigulangang pioneer, akong gibati nga kitang *tanan* nagbarug diha sa mga abaga sa mga higante.

Bisan og ang pahimangno nagagikan sa sulat ni Robert Harris, nagtuo ko nga dili maihap nga mga katigulangan ang mopadala sa samang mensahe ngadto sa ilang mga anak ug mga apo: Una, kinahanglang dili nato kalimtan ang mga kasinatian nga atong nasinati sulod sa templo, ug kinahanglang dili nato kalimtan ang mga saad ug mga panalangin nga moabut sa matag usa kanato tungod sa templo. Ikaduha, kinahanglang dili nato kalimtan nga kita gigiyahan sa usa ka propeta sa Dios.

Ako mopamatuod nga kita *mga* giniyahan sa usa ka propeta sa Dios. Gipahiuli sa Ginoo ang Iyang Simbahan sa ulahing mga adlaw pinaagi ni Propeta Joseph Smith, ug kinahanglang dili nato kalimtan nga kita gigiyahan sa wala maputol nga hut-ong sa mga propeta sa Dios, gikan ni Joseph ngadto ni Brigham ug sa misunod nga Presidente sa Simbahan hangtud sa atong propeta karon—si Thomas S. Monson. Nakaila ko kaniya, mopasidungog ko kaniya, ug gimahal nako siya. Ako mopamatuod nga siya ang propeta sa Ginoo sa kalibutan karon.

Tinguha kini sa akong kasingkasing nga, uban sa akong mga anak ug mga apo, nga among tauron ang kabilin sa among matarung nga mga katigulangan—kadtong matitud-anong Mormon nga mga pioneer kinsa andam nga mosakripisyo sa tanan ug sa pagpanalipod sa ilang Dios ug sa ilang tinuohan. Ako nag-ampo nga ang matag usa kanato magpuyo nga matitud-anon sa tinuohan nga gihambin sa atong mga ginikanan. Sa balaan ug sagradong pangalan ni Jesukristo, amen. ■



Ni Elder L. Tom Perry

Sa Korum sa Napulog Duha ka mga Apostoles

Pagkamasulundon pinaagi sa Atong Pagkamatinud-anon

Ang pagkamasulundon maoy timaan sa atong pagtuo sa kaalam ug gahum sa labing taas nga awtoridad, nga mao ang Dios.

Ang mga family home evening nga among ginabuhay ni Sister Perry matag Lunes sa gabii kalit lang nga midaghan ang nangapil. Ang akong igsoon, iyang anak, igsoong lalaki ni Barbara, ug usa ka pag-umangkong babaye ug ang iyang bana mibalhin sa among condominium complex. Kadto ang bugtong higayon nga napanalanginan ko sukad sa bata pa nga dunay pamilya nga nagpuyo sa duol. Nianang higayuna, ang akong pamilya nagpuyo sa samang dapit kauban ang pipila ka mga sakop sa pamilya sa habig sa akong mama. Ang balay ni Lolo Sonne anaa tupad sa among balay sa amihanang bahin, ug ang balay ni Tiya Emma anaa tupad sa among balay sa habagatang bahin. Sa habagatang bahin sa dapit nagpuyo si Tiya Josephine, ug sa silangang bahin sa dapit nagpuyo si Tiyo Alma.

Sa bata pa ko, kada adlaw mi nga mag-abot sa mga sakop sa among nagkadakong pamilya ug magkauban sa mga higayon sa pagtrabaho,

pagdula, ug pakig-istoryahanay. Dili mi kahimo og mga binuang nga dili masumbong dayon ngadto sa among mga inahan. Lahi na ang among kalibutan karon—ang mga sakop sa kadaghanan sa mga pamilya nagkatag na. Bisan kon nagpuyo sila nga medyo duol sa usag usa, kasagaran dili sila tapad og pinuy-anan. Bisan pa, nagtuo ko nga ang akong pagkabata ug ang kasamtangang sitwasyon sama og gamay sa langit, nga ang pinalanggang mga sakop sa pamilya nagpuyo duol sa usag usa. Nagsilbi kining kanunay nga pahinumdom kanako sa mahang-turong kahimtang sa pamilya.

Sa nagdako ko, ako adunay espesyal nga relasyon ngadto sa akong lolo. Ako ang kinamagulangang anak nga lalaki sa pamilya. Ako ang manghawan sa snow gikan sa mga agianan sa tingtugnaw ug moatiman sa mga nataran sa ting-init alang sa among balay, sa balay sa akong Lolo ug sa mga balay sa akong duha ka iyaan. Kasagaran maglingkod ra si lolo sa kayda

samtang nanghabas ko sa iyang nataran. Kon mahuman na ko, molingkod ko sa may hagdan ug makig-istorya niya. Kadtong mga higayuna bililhong mga panumduman alang nako.

Usa ka adlaw nangutana ko sa akong lolo unsaon nako pagkasayud kon nagbuhat ko kanunay sa hustong butang, kay ang kinabuhi adunay daghan kaayong kapilian. Sama sa sagad buhaton sa akong lolo, iya kong tubagon gamit ang usa ka kasinatian gikan sa kinabuhi sa uma.

Mitudlo siya nako bahin sa pagbansay sa usa ka pundok sa mga kabayo aron maghiusa sila pagtrabaho. Iyang gipasabut nga ang pundok sa mga kabayo kinahanglang masayud kanunay kinsay sundon. Usa sa mga paagi sa pagkontrolar ug paggiya sa kabayo mao ang kasangkapan sa pangabayog ug bokado. Kon ang usa ka kabayo nagtuo nga dili kinahanglang mosunod sa gusto sa nagmaneho, ang pundok sa mga kabayo dili gayud mobitad ug maghiusang motrabaho aron mapahimuslan ang ilang abilidad.

Karon atong tukion ang leksyon nga gitudlo sa akong lolo kanako gamit kini nga ehemplo. Kinsa ang nagmaneho niining pundok sa mga kabayo? Ang akong lolo nagtuo nga kini mao ang Ginoo. Siya ang adunay katuyoan ug plano. Siya usab ang tigbansay ug tig-ugmad sa pundok sa mga kabayo ug sa tagsa-tagsa ka kabayo. Ang nagmaneho ang labing nasayud, ug ang bugtong paagi nga ang kabayo masayud nga kanunay kining nagbuhat sa saktong butang mao ang magmasulundon ug mosunod sa paggiya sa nagmaneho.

Unsa may giparehas sa akong lolo sa kasangkapan sa pangabayog ug bokado? Nagtuo ko kaniadto, sama nga nagtuo ko karon, nga ang akong lolo nagtudlo kanako sa pagsunod sa mga pag-aghat sa Espiritu Santo. Sa iyang hunahuna, ang kasangkapan sa pangabayog ug bokado espiritwal. Ang masulundon nga kabayo nga parte sa maayong pagkatudlo nga pundok sa mga kabayo nagkinahanglan og hinay lang nga pagbira sa nagmaneho aron eksaktong mobuhat sa unsay iyang ipabuhat niini. Kining hinay nga



pagbira maoy katumbas sa ligdong, hinay nga tingog nga gamiton sa Ginoo sa pagpamulong ngari nato. Agi og respeto sa atong kabubut-on, dili gayud kini kusog, pwersado nga pagbira.

Ang mga tawo nga mobaliwala sa maaghup nga mga pag-aghat sa Espiritu kanunayng makakat-on, sama sa anak nga nawala [prodigal son], pinaagi sa natural nga mga sangputanan sa pagkamasupakon ug pagpakabuhi nga mapatuyangon. Human lamang nga ang natural nga mga sangputanan mipaubos sa anak nga nawala nga “nahuilian na siya sa pamuot” ug nadungog ang mga paghunghong sa Espiritu nga nagsulti kaniya nga mouli sa balay sa iyang amahan (tan-awa sa Lucas 15:11–32).

Busa ang leksyon nga gitudlo sa akong lolo kanako mao nga kanunay nga andam sa pagdawat sa maaghup nga bira sa Espiritu. Iya kong gitudloan nga kanunay ko nga makadawat sa ingon nga pag-aghat kon motipas gyud ko sa dalan. Ug dili gyud ko makahimo og seryusong mga sayop kon tugutan nako ang Espiritu nga mogiya nako sa akong mga desisyon.

Sama sa gipahayag sa Santiago 3:3, “Kon tauran tag bokado ang ba-ba sa mga kabayo aron sila mopatuo kanato, mahimo nato ang pagpaliso-liso sa ilang tibuok lawas.”

Kinahanglang sensitibo kita sa atong espirituhanong mga bokado. Bisan sa labing hinay nga bira sa atong Agalon, kinahanglang andam kita nga mousab sa hingpit sa atong padulngan. Aron magmalampuson sa kinabuhi, kinahanglang atong tudloan ang atong espiritu ug lawas nga magtinabangay sa pagsunod sa mga sugo sa Dios. Kon mosunod kita sa maaghup nga mga pag-aghat sa Espiritu Santo, makahiusa kini sa atong mga espiritu ug mga lawas sa katuyoan nga mogiya nato balik sa atong mahangturong pamilyal aron mopuyo uban sa atong mahangturong Amahan sa Langit.

Ang atong ikatulo nga artikulo sa hugot nga pagtuo nagtudlo kanato bahin sa kaimportante sa pagkamasulundon: “[Kita] nagtuo nga pinaagi sa Pag-ula ni Kristo, ang tanan nga mga katawhan mahimo nga maluwas, pinaagi sa pagsunod sa mga balaod ug mga ordinansa sa Ebanghelyo.”

Ang matang sa pagkamasulundon nga gihulagway sa akong lolo sa iyang ehemplo sa pundok sa mga kabayo nagkinahanglan usab og espesyal nga pagsalig—nga mao, ang hingpit nga pagtuo diha sa nagmaneho sa pundok. Busa ang leksyon nga gitudlo sa akong lolo kanako, may kalabutan usab sa unang baruganan sa ebanghelyo—hugot nga pagtuo diha ni Jesukristo.



Si Apostol Pablo mitudlo, “Karon ang pagtuo mao ang pasalog kanato sa mga butang nga atong ginapaabut, ug ang panghimatuod sa pagkaanaa sa mga butang nga dili nato makita” (Mga Hebreohanon 11:1). Dayon si Pablo migamit sa mga ehemplo nila ni Abel, Enoch, Noe, ug Abraham sa pagtudlo kabahin sa hugot nga pagtuo. Mi-focus siya sa istorya ni Abraham, kay si Abraham ang amahan sa mga matinud-anon:

“Tungod sa pagtuo si Abraham misugot sa diha nga gitawag siya sa pag-adto sa usa ka dapit nga iyang pagadawatong ingon nga panulundon; ug siya miadto nga wala lang mahibalo kon asa siya paingon.

“Tungod sa pagtuo siya mipuyo didto sa yuta sa saad, nga daw sa laing yuta. . . .

“Tungod sa pagtuo bisan si Sara na gayud nakadawat pa og gahum sa pagpanamkon, bisan tuod siya lapas na sa panuigon alang niini, sanglit iya mang giisip nga kasaligan kadtong naghimo sa saad” (Mga Hebreohanon 11:8–9, 11).

Nasayud kita nga pinaagi sa anak ni Abraham ug Sara nga si Isaac, usa

ka saad gihatag ngadto kang Abraham ug Sara—usa ka saad sa kaliwatan “nga ingon kadaghan sa mga bitoon sa kalangitan, ug nga ingon sa dili maisip nga balas sa kabaybayonan” (tan-awa sa bersikulo 12; tan-awa usab sa Genesis 17:15–16). Ug dayon ang hugot nga pagtuo ni Abraham gisulayan sa paagi nga daghan kanato mokonsiderar nga lisud sabton.

Naghunahuna ko sa makadaghan sa istorya ni Abraham ug Isaac, ug sa gihapon dili ko motuo nga hingpit nakong nasabtan ang katinud-anon ug kamasulundon ni Abraham. Tingali siya akong mahunahuna nga matinud-anong nangandam nga molakaw sayo sa buntag, apan giunsa niya paglakaw kauban ang iyang anak nga si Isaac sulod sa tulo ka adlaw nga panaw ngadto sa tiilan sa Bukid sa Moria? Giunsa nila pagdala ang kahoy alang sa kayo ngadto sa taas sa bukid? Giunsa niya paghimo ang altar? Giunsa niya paghigot si Isaac ug giunsa siya pagpahimutang sa altar? Giunsa niya pagpasabut kaniya nga siya ang isakripisyo? Ug giunsa niya pagkaangkon sa kusog nga iisa ang kutsilyo sa pagpatay sa iyang anak? Ang hugot nga

pagtuo ni Abraham nagtugot kaniya nga eksakto nga mosunod sa sugo sa Dios hangtud sa milagrosong higayon nga ang anghel gitawag gikan sa langit, mipahibalo kang Abraham nga nakapasas sa sakit nga pagsulay. Ug dayon ang anghel sa Ginoo misulti pag-usab sa pakigsaad nga gihimo sa Dios ngadto ni Abraham.

Nahibalo ko nga ang mga hagit nga may kalabutan sa pagbaton og hugot nga pagtuo ni Jesukristo ug pagkamasulundon mas lisud sa pipila kay sa uban. Ako adunay igong kasinatian sulod sa katuigan aron masayud nga ang mga kinaiya sa mga kabayo mahimong lahi kaayo ug, sa ingon, ang ubang mga kabayo mahimong mas sayon o mas lisud nga bansayon ug ang pagkalainlain sa mga tawo mas labaw pa. Matag usa kanato anak sa Dios, ug kita adunay talagsaon nga istorya sa kinabuhi sa wala pa dinhi sa yuta ug sa dinhi na sa yuta. Tungod niana, pipila ra ang mga solusyon nga mohaum sa tanan. Ug nahibalo gyud ko nga ang kinabuhi naglakip og daghang pagsulay ug kapakyasan ug, labing importante, kanunay kitang nagkinahanglan sa ikaduhang baruganan sa ebanghelyo, nga mao ang paghinulsol.

Tinuod usab nga ang panahon nga buhi pa ang akong lolo mas yano nga panahon, ilabi na kalabut sa mga pagpili tali sa saktong ug sayop. Samtang ang mga utokan ug puno kaayo sa panabut nga mga tawo tingali nagtuo nga ang atong mas komplikado nga panahon nagkinahanglan og mas komplikado nga mga solusyon, dili ko kumbinsido nga saktong sila. Hinoon, ako nagtuo nga ang kakomplikado karon nagkinahanglan og mas dakong kasayon, sama sa tubag sa akong lolo sa akong sinserong pangutana unsaon pag-ila sa saktong ug sayop. Nasayud ko nga ang akong ikatanyag karon yano ra nga pormula, apan makapamatuod ko nga epektibo kaayo kini ngari nako. Morekomendar ko niini ninyo ug gani modapit ninyo nga sulayan ang akong gisulti, ug kon inyong buhaton, mosaad ko nga mogiya kini ninyo ngadto sa klaro nga pagpili kon gilibutan kamo og mga kapilian ug

moresulta kini sa yanong mga tubag sa mga pangutana nga milibug sa mga makinaadmanon ug niadtong nagtuo nga sila maalamon.

Kasagaran maghunahuna kita sa pagkamasulundon nga mosunod ra sa mga mando o diktar sa mas taas nga awtoridad nga dili maghunahuna. Sa tinuod lang, sa labing maayo niini, ang pagkamasulundon maoy timaan sa atong pagtuo sa kaalam ug gahum sa labing taas nga awtoridad, nga mao ang Dios. Sa dihang si Abraham mipakita sa iyang lig-on nga pagkamatinud-anon ug pagkamasulundon sa Dios, bisan kon gisugo sa pagsakripisyo sa iyang anak, giluwat siya sa Dios. Sama niini, kon mopakita kita sa atong pagkamatinud-anon pinaagi sa pagkamasulundon, ang Dios sa katapusan moluwat kanato.

Kadtong nagsalig lang sa ilang kaugalingon ug nagsunod lamang sa ilang kaugalingong mga tinguha ug mga hilig limitado kaayo kon ikumpara niadtong nagsunod sa Dios ug makagamit sa Iyang panabut, gahum, ug mga gasa. Ginaingon nga ang tawo nga naghunahuna lang gayud sa iyang kaugalingon usa siya ka matang sa tawo nga mubo ra kaayo og kabuot. Ang lig-on, aktibo nga pagkamasulundon dili gayud kahuyang o walay pulos. Kini ang paagi nga atong mapadayag ang atong hugot nga pagtuo sa Dios ug mahimong takus ang atong kaugalingon nga modawat sa gahum sa langit. Ang pagkamasulundon usa ka pagpili. Pagpili kini tali sa atong limitado nga kahibalo ug gahum ug sa walay kinutuban nga kaalam ug gahum sa Dios. Sumala sa leksyon nga gihatag sa akong lolo kanako, usa kini ka pagpili nga mabati ang espiritwal nga bokado sa atong mga ba-ba ug mosunod sa giya sa nagmaneho.

Hinaut nga mahimo kitang mga manununod sa pakigsaad ug binhi ni Abraham pinaagi sa atong pagkamatinud-anon ug pinaagi sa pagdawat sa mga ordinansa sa gipahiuli nga ebanghelyo. Mosaad ko kaninyo nga ang mga panalangin sa kinabuhing dayon anaa alang sa tanan kinsa matinuod-anon ug masulundon. Sa pangalan ni Jesukristo, amen. ■



Ni Elder Lawrence E. Corbridge
Sa Seventy

Si Propeta Joseph Smith

Ang mga pinadayag nga gipadangat ngadto kang Joseph Smith nagpamatuod nga siya propeta sa Dios.

Ang Unang Panan-awon

Usa ka batang lalaki nakabasa sa Biblia, ug ang iyang mga mata nakatutok sa lahi nga tudling sa kasulatan. Usa kini ka gutlo nga mousab sa kalibutan.

Madasigon siyang masayud kon unsa nga simbahan ang makagiya niya sa kamatuoran ug kaluwasan. Nasulayan na niya hapit tanan, ug karon midangup siya sa Biblia ug nakabasa niini nga mga pulong: “Ug kon aduna man kaninyoy nakulangan og kaalam, papangayoa siya sa Dios, nga

nagapanghatag ngadto sa tanang mga tawo sa madagayaon gayud, ug sa walay pagpamoyboy; ug kini igahatag kaniya.”¹

Balik-balik siyang namalandong niini. Ang unang gilaw sa kahayag midulot sa kangitngit. Mao ba kini ang tubag, ang dalan pagawas sa kalibug ug kangitngit? Ingon ani ba kini ka yano? Mangutana sa Dios ug Siya motubag? Sa katapusan nakahukom siya nga kinahanglan siyang mangutana sa Dios o magpabilin na lang sa kangitngit ug kalibug.

Ug bisan ingon siya ka madasigon, wala siya modagan sa usa ka hilum nga dapit sa daplin ug daling militok og pag-ampo. Siya 14 anyos pa lang, apan bisan tuod nga gusto siyang masayud sa tubag sa labing madali, mainampingon gihapon siya kon unsaon sa paghimo niini. Dili kini ingon nga basta-basta lang nga pag-ampo. Midesisyon siya asa moadto ug kanus-a kadto himoon. Nangandam siya sa pagpakigsulti sa Dios.

Ug dayon ang adlaw miabut. Kini usa “ka buntag sa usa ka matahum, maayo nga panahon, sayo sa tingpamulak sa [1820].”² Naglakaw siya nga nag-inusara paingon sa duol nga hilum nga kakahoyan, ilawom sa tag-as nga mga kahoy ibabaw niya. Miabut siya sa dapit nga giplanohan na niyang





adtoan. Miluhod siya ug mipagawas sa tinguha sa iyang kasingkasing.

Mihulagway sa unsay sunod nga nahitabo, siya miingon:

“Ako nakakita og usa ka dako nga gilis sa kahayag ibabaw gayud sa akong ulo, labaw sa kahayag sa adlaw, nga nag-anam og paubos hangtud kini midapat kanako.

“ . . . Sa diha nga ang kahayag midapat kanako ako nakakita og duha ka Personahe, kansang kahayag ug himaya dili mahulagway, nagtindog ibabaw kanako diha sa kawanangan. Usa kanila misulti ngari kanako, nagtawag kanako sa akong ngalan ug miingon, nagtudlo ngadto sa lain—[Joseph,] *Kini mao ang Akong Hinigugmang Anak. Paminaw Kaniya!*”³

24 ka tuig lamang human niana, si Joseph Smith ug ang iyang igsoon nga si Hyrum namatay tungod sa unsay nagsugod dinhi.

Katugbang

Si Joseph miingon nga sa dihing 17 anyos siya, usa ka anghel ang misulti niya nga ang iyang “ngalan pagagamiton alang sa maayo ug sa dautan diha sa tanan nga mga kanasuran, . . . taliwala sa tanan nga mga katawhan.”⁴ Kining talagsaon nga panagna padayon nga natuman karon sa pagkaylap

sa Ang Simbahan ni Jesukristo sa mga Santos sa Ulahing mga Adlaw sa tibuok kalibutan.

Ang katugbang, pagsaway, ug kasilag mga kauban na sa kamatuoran. Sa higayon nga ang kamatuoran kalabut sa katuyoan ug kapalaran sa tawo ipadayag, kanunay gayud nga adunay pwera nga mosupak niini. Sugod kang Adan ug Eva didto sa Tanaman sa Eden, hangtud na sa pagpangalagad ni Kristo, ug hangtud na sa atong panahon, kanunay gayud nga diha nay paningkamot sa paglingla, pagpahisalaag, pagsupak, ug pagpugong sa plano sa kinabuhi ug magpadayon pa.

Ang tawo nga nakadawat sa daghang dili makiangayon nga pagpangukod kay sa lain mao ang Usa nga labing gisupak, gihagit, ug gisalikway, gilatus, gibiyaan, ug gilansang, ang Usa kinsa mipaubos sa tanang butang, ug dinha makita ninyo ang kamatuoran, ang Anak sa Dios, ang Manluluwas sa tanang katawhan. Nganong wala man lang nila Siya pasagdi?

Ngano man? Tungod kay Siya ang kamatuoran, ug ang kamatuoran kanunay gayud nga supakon.

Ug dayon pangitaa ang tawo nga mipagawas sa laing tugon ni Jesukristo ug uban pang kasulatan, pangitaa ang tawo nga nahimong instrumento

nga pinaagi niya ang kahingpitan sa ebanghelyo ug ang Simbahan ni Jesukristo gipahiuli sa yuta, pangitaa siya ug paabuta na lang nga dauton sa mga tawo. Nganong dili man lang siya pasagdan?

Ngano man? Tungod kay nagtudlo siya sa kamatuoran, ug ang kamatuoran kanunay gayud nga supakon.

Ang Pagdagsa sa Pinadayag

Ang mga pinadayag nga gipadangat ngadto kang Joseph Smith nagpamatuod nga siya propeta sa Dios. Atong tan-awon ang pipila niini—tan-awon ang pipila sa kahayag ug kamatuoran nga gipadayag pinaagi kaniya nga lahi gayud kaayo sa sagad nga gituohan sa iyang panahon ug sa ato:

- Ang Dios personal, nahimaya nga binuhat, usa ka Mahangturong Amahan. Siya ang atong Amahan.
- Ang Dios nga Amahan, si Jesukristo, ug ang Espiritu Santo managlahi nga mga binuhat.⁵
- Kamong sobra pa kay sa tawhanon. Kamong anak sa Dios nga Mahangturong Amahan ug mahimong mahisama Kaniya⁶ kon kamong magbaton og pagtuo diha sa Iyang Anak, maghinulsol, makadawat og mga ordinansa,

modawat sa Espiritu Santo, ug molahutay sa katapusan.⁷

- Ang Simbahan ni Jesukristo karon susama ra sa Simbahan nga Iyang giorganisar atol sa Iyang mortal nga pangalagad, nga adunay mga propeta ug mga apostoles, Melchizedek ug Levitical Priesthood, mga elder, high priest, deacon, teacher, bishop, ug seventy, ang tanan sigun sa gihulagway sa Biblia.
- Ang awtoridad sa Priesthood gikuha gikan sa yuta human sa kamatayon sa Manluluwas ug sa Iyang mga Apostoles ug gipahiuli pag-usab sa atong panahon.
- Ang mga pinadayag wala mahunong, ug ang kalangitan wala masira. Ang Dios nakigsulti sa mga propeta karon, ug Siya makigsulti usab kaninyo ug kanako.⁸
- Adunay mas daghan pa human niining kinabuhia kay sa langit ug impyerno lamang. Adunay mga ang-ang sa himaya, ug importante kaayo kon unsay atong gibuhay niining kinabuhia.⁹
- Labaw pa kay sa basta lang motuo kang Kristo nga walay buhat, kinahanglan nato ang “paghuhuna ngari [Kaniya] sa matag hunahuna,”¹⁰ “mobuhay sa tanan nga [atong buhaton] diha sa ngalan sa Anak,”¹¹ ug “sa kanunay mohinumdom kaniya ug maghupot sa iyang mga sugo . . . nga [kita] unta sa kanunay makabaton sa iyang Espiritu uban [kanato].”¹²
- Ang binilyon nga nabuhi ug namatay nga walay ebanghelyo ug mga ordinansa nga gikinahanglan alang sa kaluwasan wala kalimti. “Pinaagi sa Pag-ula ni Kristo, ang tanan nga mga katawhan mahimo nga maluwas, pinaagi sa pagsunod sa mga balaod ug mga ordinansa sa Ebanghelyo,”¹³ nga gipangalagad alang sa buhi ug sa patay.¹⁴
- Ang tanan wala magsugod sa pagkahimugso. Nagpuyo kamo sa una sa presensya sa Dios isip Iyang mga anak ug nangandam alang niining mortal nga kinabuhi.¹⁵
- Ang kaminyoon ug pamilya dili mga tradisyon sa mga tawo nga hangtud lamang sa kamatayon.

Gitakda kini nga mahimong mahangturong pinaagi sa mga pakigsaad nga atong gihimo ngadto sa Dios. Ang pamilya usa ka sumbanaan sa langit.¹⁶

Ug parte lamang kini sa pagdagsa sa pinadayag nga gipadangat ngadto kang Joseph Smith. Diin man kini tanan gikan, kining mga pinadayag nga naghatag og kahayag sa kangitngit, katin-awan sa pagduha-duha, ug nakapadasig, nakapanalangin, ug nakapalambo sa minilyon ka mga tawo? Unsa may lagmit nahitabo, nga iyang nahunahunaan kining tanan nga siya ra o nga siya adunay tabang gikan sa langit? Ang mga kasulatan ba nga iyang nahimo daw sama sa mga pulong sa tawo o mga pulong sa Dios?

Panapos

Walay makalalis sa nahimo ni Joseph Smith, kondili giunsa niya paghimo ang iyang nahimo ug ngano man. Ug walay daghang kapilian. Tigpakaaron-ingnon ba o siya usa ka propeta. Gihimo niya ang iyang nahimo nga nag-inusara, o adunay tabang gikan sa langit. Tan-awa ang ebidensya, apan tan-awa ang tanang ebidensya, ang kinatibukang nahitabo sa iyang kinabuhi, dili ang tinagsa-tagsa. Labaw sa tanan, buhata ang gihimo sa batan-ong si Joseph ug “pangayoa . . . sa Dios, nga



nagapanghatag ngadto sa tanang mga tawo sa madagayaon gayud, ug sa walay pagpamoyboy; ug kini igahatag [kaninyo].”¹⁷ Dili lamang kini ang pagi nga kamo makakat-on sa kamatuoran kalabut sa Basahon ni Mormon ug ni Joseph Smith, mao usab kini ang sumbanaan sa pagkasayud sa kamatuoran sa tanang mga butang.¹⁸

Si Joseph Smith usa ka propeta sa Dios, sama nga si Thomas S. Monson usa ka propeta karon. Pinaagi kang Joseph Smith, “ang mga yawe sa gingharian sa Dios [subling] gitugyan ngadto sa tawo sa yuta, ug . . . ang ebanghelyo mokaylap . . . ingon sa bato nga gipikas gikan sa bukid nga walay gigamit nga mga kamot . . . , hangtud kini mopuno sa tibuok yuta.”¹⁹

Ang Dios mao ang atong Mahangturong Amahan, ug si Jesus mao ang Kristo. Sila atong gisimba. Walay ikatandi sa Ilang mga gilalang, sa plano sa kaluwasan, ug sa maulaong sakripisyo sa Kordero sa Dios. Niini nga dispensasyon, atong gituman ang plano sa Amahan ug miambit sa mga bunga sa Pag-ula pinaagi lamang sa pagsunod sa mga balaod ug mga ordinansa sa ebanghelyo, nga gipahiuli pinaagi ni Propeta Joseph Smith. Mohatag ko sa akong pagpamatuod mahitungod Kanila—sa Dios nga Mahangturong Amahan ug kang Jesukristo, ang Manluluwas sa kalibutan. Ug ako mobuhay sa ingon sa pangalan ni Jesukristo, amen. ■

MUBO NGA MGA SULAT

1. Santiago 1:5.
2. Joseph Smith—Kasaysayan 1:14.
3. Joseph Smith—Kasaysayan 1:16–17.
4. Joseph Smith—Kasaysayan 1:33.
5. Tan-awa sa Doktrina ug mga Pakigsaad 130:22.
6. Tan-awa sa Doktrina ug mga Pakigsaad 50:24.
7. Tan-awa sa 2 Nephi 31; 3 Nephi 27.
8. Tan-awa sa Moroni 10:3–5.
9. Tan-awa sa Doktrina ug mga Pakigsaad 76.
10. Doktrina ug mga Pakigsaad 6:36.
11. Moises 5:8.
12. Doktrina ug mga Pakigsaad 20:77.
13. Mga Artikulo sa Hugot nga Pagtuo 1:3.
14. Tan-awa sa Doktrina ug mga Pakigsaad 76; 128; 138.
15. Tan-awa sa Doktrina ug mga Pakigsaad 49:17; 138; Moises 3:5; 6:36.
16. Tan-awa sa Doktrina ug mga Pakigsaad 131:1–2; 132:5–33.
17. Santiago 1:5.
18. Tan-awa sa Moroni 10:3–5.
19. Doktrina ug mga Pakigsaad 65:2.



Ni Elder Michael John U. Teh
Sa Seventy

Hain Gani ang Imong Bahandi

Kon dili kita magbantay, magsugod kita sa pagtinguha sa temporal kay sa espiritwal.

Wala madugay human sa kinatibuk-ang komperensya niadtong Oktubre 2007, usa sa akong kaigsoonan misulti nako nga mga pito ka tuig sa dili pa moabut kining malisud nga kasinatian pag-usab ngari kanako. Nahupay ako ug misulti kaniya nga akong hunahunaon kini nga akong “pito ka tuig sa dakong pagkadagaya.” Tan-awa, ania ako; ang akong pito ko ka tuig sa dakong pagkadagaya natapos na.

Sa milabay nga Enero ang akong asawa nga si Grace, ug ako nakadawat og buluhaton sa pagduaw sa mga miyembro sa Pilipinas kinsa nadaot pag-ayo sa dakong linog ug kusog kaayo nga bagyo. Nalipay kami kay ang buluhaton usa ka tubag sa among mga pag-ampo ug kamatuoran sa kalooy ug kaayo sa usa ka mahigugmaong Amahan sa Langit. Kini naghatag og katumanan sa among tinguha nga personal nga makapahayag ngadto kanila sa among gugma ug kabalaka.

Kadaghanan sa mga miyembro nga among gikahimamat nagpuyo giha-pon sa temporaryong mga kapasilongan sama sa mga tolda, mga sentro sa komunidad, ug mga meetinghouse sa Simbahan. Ang mga panimalay nga

among gibisitahan may atop nga wala mahuman o wala gayuy atop. Ang katawhan wala gayuy igo nga ikasugod, ug gianod ang gamay nilang kabtangan. Dihay lapok ug mga nangaguba bisan asa. Bisan pa niana, puno sila sa pasalamat sa gamay nga tabang nga ilang nadawat ug madasigon bisan anaa sa nagpadayong malisud kaayo nga mga kahimtang. Sa among pagpangutana nila kon giunsa nila pagsugakod, ang tanan tataw nga mitubag, “OK ra mi.” Klaro, ang ilang hugot



nga pagtuo kang Jesukristo mihatag kanila og paglaum nga ang tanan mamaayo ra sa kadugayan. Matag panimalay, matag tolda, si Sister Teh ug ako natudloan niining matinud-anong mga Santos.

Sa panahon sa mga kalamidad o trahedya, ang Ginoo may paagi sa pagpahunahuna og balik kanato ug sa atong mga prayoridad. Sa kalit lang, ang tanang materyal nga mga butang nga gitrabahoan nato og maayo aron maangkon walay kapuslanan. Ang importante sa tanan mao ang atong pamilya ug ang atong mga relasyon sa usag usa. Usa ka buotang sister ang misulti niini nga paagi: “Human mohubas ang tubig ug panahon na sa paglimpyo, gitan-aw nako ang palibut sa akong panimalay ug naghunahuna, ‘Hala, nakatigum kog daghang basura sa daghang katuigan.’”

Nagtuo ako nga kini nga sister nakabaton og mas maayong panglantaw ug sukad niana mabinantayon kaayo sa paghukom kon unsa nga mga butang ang gikinahanglan ug unsa ang wala gayud niya kinahanglana.

Sa pakigtrabaho uban sa daghang mga miyembro sulod sa mga katuigan, malipayon kaming nagsud-ong sa kaabunda sa espiritwal nga kalig-on. Nakita usab namo ang kaabunda ug kakulang sa materyal nga kabtangan niining matinud-anong mga miyembro.

Kay gikinahanglan man, kadaghanan nato nangita og kwarta ug nakaangkon sa pipila ka mga butang dinhi sa kalibutan aron sa pagsustiner sa atong mga pamilya. Kini nagkinahanglan og dakong bahin sa atong panahon ug pagtagad. Walay katapusan sa unsay ikatanyag sa kalibutan, busa importante nga kita makakat-on sa pag-ila kon kita aduna nay igo. Kon dili kita magbantay, magsugod kita sa pagtinguha sa temporal kay sa espiritwal. Ang atong pagpaninguha alang sa espiritwal ug sa mahangturon anaa na sa ulahi, imbis kini ang mag-una. Makapasubo lang, kay ingon og may kusog nga pagkahilig sa pag-angkon og daghan pa ug sa pagpanag-iya sa labing bag-o ug labing nindot nga mga butang.

Unsaon nato sa pagsiguro nga kita dili matintal sa pagsubay niini nga dalan? Si Jacob mihatag niini nga tambag: “Busa, ayaw paggasto og salapi alang niana nga walay bili, ni ang inyong kahago niana nga dili makatagbaw. Patalinghug sa kakugi ngari kanako, ug hinumdumi ang mga pulong diin ako namulong; ug duol ngadto sa Usa nga Balaan sa Israel, ug pagbusog kamo niana nga dili mahanaw, ni madunot, ug himoa nga mahinangop ang inyong kalag sa kabuhong.”¹

Nanghinaut ako nga walay usa kanato nga naggasto og salapi alang niana nga walay bili ni naghago alang niana nga dili makatagbaw.

Ang Manluluwas mitudlo sa mosunod ngadto sa mga Judeo ug sa mga Nephite:

“Ayaw kamo pagtigum og mga bahandi alang kaninyo dinhi sa yuta diin ang tangkob ug ang taya nagakutkot, ug diin ang mga kawatan nagapanakasaka ug nagapangawat:

“Hinonoa pagtigum kamog mga bahandi alang kaninyo didto sa langit, diin walay tangkob ni taya nga magakutkot, ug diin walay mga kawatan nga magapanakasaka ug magapangawat:

“Kay hain gani ang imong bahandi, atua usab didto ang imong kasingkasing.”²

Sa lain nga kahimtang, ang Manluluwas mihatag niini nga sambingay:

“Ang yuta sa usa ka tawong dato mihatag og daghang abut:

“Ug namalandong siya sa iyang kaugalingon, nga nag-ingon, Unsa may akong buhaton, kay wala man akoy katipigan sa akong mga abut?

“Ug siya miingon, Ang akong buhaton mao kini: akong gubaon ang akong mga bodega, ug tukuron ko ang labi pang dagko; ug sulod niini tipigan ko ang akong tanang abut ug mga kabtangan.

“Ug unya magaingon ako sa akong kalag, Kalag, gikatagan-an na ikawg ubay-ubayng bahandi alang sa daghang katuigan; pumahulay ka, kumaon ka, uminom ka, ug magsadya ka.

“Apan ang Dios miingon kaniya, Oy, buang! Karong gabhiona ang



imong kalag pagakuhaon gikan kanimo: ug kinsa na may makapanag-iyang sa mga butang nga imong gitagana?

“Maingon niana ang nagatigum og mga bahandi alang sa iyang kaugalingon, apan dili bahandianon ngadto sa Dios.”³

Si Presidente Dieter F. Uchtdorf mihatag sa mosunod nga tambag sa dili pa kaayo dugay:

“Ang atong Langitnong Amahan nakakita sa atong tinuorayng potensyal. Siya nasayud sa mga butang bahin nato nga wala nato mahibaloi. Siya nagdasig kanato sa pagpuno sa sukod sa atong pagkalinalang dinhi sa yuta, sa pagpuyo og maayong kinabuhi, ug sa pagbalik ngadto sa Iyang atubangan.

“Nan, nganong daghan man tag gigahin nga panahon ug kusog sa mga butang nga temporaryo, dili importante, ug dili bililhon? Wala ba nato makita ang kabuang sa pagtinguha sa walay hinungdan ug temporaryo lang nga mga butang?”⁴

Kitang tanan nahibalo nga ang atong lista sa kalibutanong mga bahandi naglangkob sa garbo, katigayunan, materyal nga mga butang, gahum, ug pasidungog sa mga tawo. Kini wala na magkinahanglan pa og panahon ug pagtagad, busa ako mo-focus hinoon sa mga butang nga maglangkob sa atong mga bahandi sa langit.

Unsa ang pipila ka mga bahandi sa langit nga atong matigum alang sa atong kaugalingon? Sa pagsugod,

maayo kini alang kanato sa pagbaton sa Kristohanong mga hiyas sa hugot nga pagtuo, paglaum, pagpaubos, ug gugmang putli. Kita gitambagan pirme sa “[pagsalikway] sa kinaiyanhon nga pagkatawo ug . . . [mahimo] nga ingon sa usa ka bata.”⁵ Ang pahimangno sa Manluluwas mao nga kita maningkamot nga mahimo nga hingpit sama Kaniya ug sa atong Langitnong Amahan.⁶

Ikaduha, kita kinahanglang mohatag og dugang panahon ug paningkamot sa paglig-on sa mga relasyon sa pamilya. Kay human sa tanan, “ang pamilya gi-orden sa Dios. Pinakaimportante kini nga unit karon ug sa kahangturan.”⁷

Ikatulo, ang pagserbisyo sa uban usa ka kinaiya sa tinuod nga sumusunod ni Kristo. Siya miingon, “Maingon nga gibuhay ninyo kini ngadto sa usa sa mga labing gagmay niining akong mga igsoon, gibuhay usab ninyo kini kanako.”⁸

Ikaupat, ang pagsabot sa doktrina ni Kristo ug ang paglig-on sa atong pagpamatuod usa ka paghago nga makahatag og tinuod nga kalipay ug katagbawan. Nagkinahanglan kita og makanunayong pagtuon sa mga pulong ni Kristo ingon nga makaplagan diha sa mga kasulatan ug sa mga pulong sa buhing mga propeta. “Kay tan-awa, ang mga pulong ni Kristo magtug-an kaninyo sa tanan nga mga butang nga inyong buhaton.”⁹

Akong tapuson pinaagi sa istorya sa usa ka 73 anyos nga biyuda kinsa among gikahimamat atol sa among biyahe ngadto sa Pilipinas:

Sa dihang ang linog miigo sa isla sa Bohol, ang panimalay nga gipundar niya ug sa iyang anhing bana maayong pagkaguba, mipatay sa iyang anak nga babaye ug apo nga lalaki. Karon kay nag-inusara na lang, kinahanglan siyang motrabaho sa pagsuporta sa iyang kaugalingon. Nagsugod siya og panglabada (nga iyang gikinamot) ug kinahanglan nga motungas ug modulhog og igong gidak-on nga bungtod sa makadaghang higayon sa usa ka adlaw sa paghakot og tubig. Sa among pagbisita kaniya, nagpuyo gihapon siya sa usa ka tolda.

Mao kini ang iyang mga pulong: “Elder, gidawat nako ang tanan nga gihatag sa Dios kanako. Wala akoy kaligutgot. Akong gimahal ang akong temple recommend ug gitagoan kini ilawom sa akong unlan. Hibalo niya intawon nga ako nagbayad og hingpit nga ikapulo sa akong gamay nga sweldo sa pagpanglabada. Bisan unsa pay mahitabo, kanunay akong mobayad sa akong ikapulo.”

Ako magpamatuod kaninyo nga ang atong mga prayoridad, mga tumong, mga kahilig, mga tinguha, mga kagana, ug mga kainit sa pagbati adunay direkta nga kalabutan sa atong sunod nga kinabuhi. Hinumdu-man nato kanunay ang mga pulong sa Manluluwas: “Kay hain gani ang imong bahandi, atua usab didto ang imong kasingkasing.” Hinaut nga ang atong mga kasingkasing maanaa sa hustong dapit mao ang akong pag-ampo, sa pangalan ni Jesukristo, amen. ■

MUBO NGA MGA SULAT

1. 2 Nephi 9:51.
2. Mateo 6:19–21; tan-awa usab sa 3 Nephi 13:19–21.
3. Lucas 12:16–21.
4. Dieter F. Uchtdorf, “Mga Pagmahay ug Resolusyon,” *Liahona*, Nob. 2012, 22–23.
5. Mosiah 3:19.
6. Tan-awa sa 3 Nephi 12:48.
7. *Handbook 2: Administering the Church* (2010), 1.1.1.
8. Mateo 25:40.
9. 2 Nephi 32:3.



Ni Elder Marcos A. Aidukaiitis
Sa Seventy

Kon Kamo Kulang sa Kaalam

Ipadayag sa Dios ang kamatuoran ngadto sa nangita niini kay gisulti man kini sa kasulatan.

Sa miaging adlaw ang 10 anyos nakong anak nga lalaki nagtuon bahin sa utok sa tawo diha sa Internet. Pangandoy niya nga mahimong doktor sa umaabut. Dili lisud mabantayan nga mas makamao pa siya kay kanako.

Ganahan mi sa Internet. Sa balay makigsulti mi sa among pamilya ug mga higala pinaagi sa social media, pinaagi sa email, ug sa ubang paagi. Ang akong mga anak sagad magtrabaho sa ilang gimbuhaton sa eskwela-han gamit ang Internet.

Bisan unsang pangutana, kon mangita mi og dugang nga impormasyon, pangitaon namo kini sa Internet. Pila lang ka segundo manggawas ang daghang materyal. Katingalahan kini.

Ang Internet naghatag og daghang oportunidad sa pagkat-on. Apan, si Satan gusto nga mahimo kitang miserable, ug iyang tuison ang tinuod nga katuyoan sa mga butang. Gamiton niya kining talagsaong himan aron mamugna ang pagduha-duha ug kahadlok ug aron gub-on ang pagtuo ug paglaum.

Sa daghan kaayo nga anaa sa Internet, kinahanglang hunahunaon nato og maayo kon asa gamiton ang atong

mga paningkamot. Si Satan mopa-busy kanato, mosamok, ug pasudlan kita og dili maayong impormasyon, daghan niini nga walay pulos.

Dili nato angayng suhiron ang mga walay pulos.

Paminawa kining giya, nga gihatag sa kasulatan: “Ang Espiritu ni Kristo gihatag ngadto sa matag tawo, siya masayud sa maayo gikan sa dautan; busa, ako mopakita nganha kaninyo sa paagi sa paghukom; kay ang matag butang nga modapit sa paghimo sa maayo, ug sa pagdani sa pagtuo diha kang Kristo, gipadala pinaagi sa gahum ug gasa ni Kristo; busa kamo mahimo nga masayud . . . nga kini gikan sa Dios.”¹

Sa tinuod lang, susama ang problema nga atong giatubang sa nasinait ni Joseph Smith sa batan-on pa siya. Sagad kulang usab ang atong kaalam.

Sa gingharian sa Dios, ang pagpangita sa kamatuoran gidayeg, giawhag, ug dili gayud ikaulaw o ikahadlok. Ang mga miyembro sa simbahan gitambagan gayud sa Ginoo Mismo sa pagtinguha og kahibalo.² Siya miingon, “Pangitaa ninyo nga maku-gihon . . . ; oo, pangitaa ninyo gikan sa labing maayo nga mga basahon

ang mga pulong sa kaalam; pangitaa ang pagtulun-an, gani pinaagi sa pagtuon ug usab pinaagi sa hugot nga pagtuo.”³ Apan, unsaon man nato sa pag-ila ang kamatuoran dinhi sa kalibutan nga nagkagrabe ang direktang pagpangataki sa mga butang sa Dios?

Gitudloan kita sa kasulatan unsaon:

Una, mahibaloan nato ang kamatuoran pinaagi sa pagpaniid unsay mga bunga niini.

Sa Iyang talagsaong Wali sa Bukid, ang Ginoo miingon:

“Sa ingon niana ang matag usa ka maayong kahoy magabungag mga maayong bunga; apan ang walay pulos nga kahoy magabungag mga bungang walay pulos. . . .

“Sa ingon niana maila ninyo sila pinaagi sa ilang mga bunga.”⁴

Si propeta Mormon mitudlo sa samang baruganan sa dihang siya miingon, “Pinaagi sa ilang mga buhat kamo masayud kanila; kay kon ang ilang mga buhat maayo, sila maayo usab.”⁵

Among dapiton ang tanan sa pag-susi sa mga bunga ug mga buhat niini nga Simbahan.

Kadtong mga interesado sa kamatuoran makakita sa kalainan nga gihimo sa Simbahan ug sa mga miyembro niini diha sa mga komunidad diin sila anaa. Makita usab nila ang kalamboan sa kinabuhi niadtong nagsunod sa mga pagtulun-an niini. Kadtong mosusi niining mga bunga makadiskubre nga ang mga bunga sa Ang Simbahan ni Jesukristo sa mga Santos sa Ulahing mga Adlaw maanindot ug madanihon.

Ikaduha, atong makit-an ang kamatuoran pinaagi sa pag-eksperimento sa pulong nga kita mismo.

Si propeta Alma mitudlo:

“Kita motandi sa pulong ngadto sa usa ka binhi. . . . Kon kamo mohatag og luna, nga ang usa ka binhi mahimo nga matanom diha sa inyong kasingkasing, tan-awa, kon kini usa ka tinuod nga binhi, [ug] . . . kon kamo dili molabay niini pinaagi sa inyong pagkawalay pagtuo, . . . tan-awa, kini mosugod sa pagtubo diha sulod sa inyong mga dughan; ug . . . kamo magsugod pag-ingon diha sa inyong kaugalingon—Kini kinahanglan . . .

nga usa ka maayo nga binhi, . . . kay kini misugod pagpadako sa akong kalag; oo, kini misugod sa pagdan-ag sa akong salabutan, oo, kini misugod sa pagkaanindot ngari kanako. . . .

“ . . . Ug karon, . . . dili ba kini makapalig-on sa inyong hugot nga pagtuo? Oo, kini makapalig-on sa inyong hugot nga pagtuo. . . .

“ . . . Kay matag binhi mamunga ngadto sa iyang kaugalingon nga panagway.”⁶

Pagkanindot nga pagdapit gikan sa propeta sa Ginoo! Ikatandi kini sa siyentipikanhong pag-eksperimento. Gidapit kita sa pag-testing sa pulong, gisultihan kita unsaon, ug gisultihan sa mahitabo sa pag-testing kon sundon nato ang mga instruksyon.

Sa ingon gitudloan kita sa kasulatan nga mahibaloan nato ang kamatuoran pinaagi sa pagpaniid unsay mga bunga niini o sa personal nga pag-eksperimento niini, maghatag og dapit alang sa pulong diha sa atong kasingkasing ug mag-atiman niini sama sa usa ka binhi.

Hinoon, adunay ikatulo nga paagi aron mahibalo sa kamatuoran, ug kana ang personal nga pagpadayag.

Ang ika-8 nga seksyon sa Doktrina ug mga Pakigsaad nagtudlo nga ang pagpadayag usa ka kahibalo—“kahibalo sa bisan unsa nga mga butang nga [atong] pangayoon sa hugot nga pagtuo, uban sa matinuoron nga kasingkasing, nagtuo nga [kita] makadawat.”⁷

Ug gisultihan kita sa Ginoo unsaon nato pagkadawat niini nga pagpadayag. Siya miingon, “Ako mosulti kanimo diha sa imong hunahuna ug sa imong kasingkasing, pinaagi sa Espiritu Santo, nga moabut diha kanimo ug nga mopuyo diha sa imong kasingkasing.”⁸

Sa ingon gitudloan kita nga madawat ang pagpadayag pinaagi sa pagpangayo diha sa hugot nga pagtuo, matinuoron nga kasingkasing, ug motuo nga kita makadawat.

Apan bantayi nga giklaro sa Ginoo dihang mipasidaan Siya, “Hinumdumi nga kon wala ang hugot nga pagtuo ikaw walay mahimo; busa pangayo diha sa hugot nga pagtuo.”⁹ Ang hugot nga pagtuo nagkinahanglan og buhat—sama sa pagtuon niini sa inyong hunahuna, dayon mangayo diha sa pag-ampo kon kini husto ba.

Ang Ginoo miingon:





Pleasant Grove, Utah, USA

“Kon kini husto Ako mohimo sa imong dughan nga moinit diha sulod kanimo; busa, imong mabati nga kini husto.

“Apan kon kini dili husto ikaw dili makabaton niana nga mga pagbati, apan ikaw makabaton og kasamok sa hunahuna nga makahimo kanimo sa pagkalimot sa butang nga sayop.”¹⁰

Ang hugot nga pagtuo patay kon kini walay binuhatan.¹¹ Sa ingon, “mangayo uban sa pagtuo, sa walay pagduha-duha.”¹²

May higala ko, dili miyembro sa atong tinuohan, kinsa miingon kanako nga dili siya espirital nga tawo. Dili siya magtuon sa kasulatan o mag-ampo kay dili kuno siya kasabut sa mga pulong sa Dios, dili usab siya sigurado kon dunay Dios. Kini nga kinaiya nagpakita lang sa kakulang sa iyang espiritalidad ug moresulta ngadto sa sukwahi sa pagpadayag, sigun sa gipasabut ni Alma. Miingon siya “Ug busa, siya nga mopatig-a sa iyang kasingkasing, ang mao modawat sa gamay nga bahin sa pulong.”

Apan, midugang si Alma, “siya nga dili mopatig-a sa iyang kasingkasing, ngadto kaniya ihatag ang dako nga bahin sa pulong, hangtud kini ihatag ngadto kaniya ang kasayuran sa mga misteryo sa Dios hangtud siya masayud kanila sa hingpit.”¹³

Si Alma ug ang mga anak ni Mosiah mga ehemplo sa baruganan nga ang

hugot nga pagtuo nagkinahanglan og buhat. Diha sa Basahon ni Mormon atong mabasa:

“Sila misiksik sa mga kasulatan sa kakugi, nga sila unta masayud sa pulong sa Dios.

“Apan kini dili ang tanan; sila naghatag ngadto sa ilang kaugalingon ngadto sa tuman nga pag-ampo, ug pagpuasa; busa sila adunay espiritu sa pagpanagna, ug espiritu sa pagpadayag.”¹⁴

Ang pagpangayo uban sa matinuoron nga kasingkasing parehong importante niini nga proseso. Kon sinsero kitang nangita sa kamatuoran, ang tanan atong himoon aron makit-an kini, nga naglakip sa pagbasa sa kasulatan, pagsimba, ug pagbuhat sa atong pinakamaayo sa pagtuman sa mga sugo sa Dios. Nagpasabut usab kini nga andam kitang mobuhat sa kabubut-on sa Dios kon makit-an nato kini.

Ang gibuhay ni Joseph Smith sa iyang pagpangita og kaalam usa ka hingpit nga ehemplo kon unsay ipasabut sa dunay matinuoron nga kasingkasing. Miingon siya nga gusto siyang masayud hain sa mga tinuohan ang tinuod aron “nga [siya] unta masayud asa magpasakop.”¹⁵ Gani sa wala pa mag-ampo, andam na niyang buhaton kon unsa man ang tubag.

Kinahanglan kitang mangayo nga may hugot nga pagtuo ug uban sa

matinuoron nga kasingkasing. Apan dili kay kana ra. Tuohan usab gayud nato nga kita makadawat og pagpadayag. Mosalig gayud kita sa Ginoo ug molaum sa Iyang mga saad. Hinumdumi ang nakasulat: “Kon aduna man kaninyoy nakulangan og kaalam, papangayoa siya sa Dios, nga naga-panghatag ngadto sa tanang mga tawo sa madagayaon gayud, ug sa walay pagpamoyboy; ug kini igahatag kaniya.”¹⁶ Pagkanindot nga saad!

Akong dapiton ang tanan sa pagpangita sa kamatuoran gamit ang bisan unsa niining mga pamaagi apan ilabi na ang gikan sa Dios pinaagi sa personal nga pagpadayag. Ipadayag sa Dios ang kamatuoran ngadto sa nangita niini kay gisulti man kini sa kasulatan. Dugang nga paningkamot ang gikinahanglan kay sa pag-search lang sa Internet, apan angay lamang kini.

Mohatag ko sa akong pagpamatuod nga kini ang tinuod nga Simbahan ni Jesukristo. Akong nakita ang mga bunga niini diha sa mga komunidad ug sa liboang mga kinabuhi, lakip na ang mga sakop sa pamilya; mao nga nasayud kong tinuod kini. Nasulayan usab nako ang pulong sa akong kinabuhi sa daghang katuigan, ug mibati ko sa mga epekto niini sa akong kalag; mao nga nasayud kong tinuod kini. Apan ang pina-kaimportante, nahibaloan nako ang kamatuoran niini sa akong kaugalingon mismo pinaagi sa pagpadayag sa gahum sa Espiritu Santo; mao nga nasayud kong tinuod kini. Akong dapiton kamong tanan sa paghimo sa ingon. Sa pangalan ni Jesukristo, amen. ■

MUBO NGA MGA SULAT

1. Moroni 7:16.
2. Tan-awa sa Doktrina ug mga Pakigsaad 88:78.
3. Doktrina ug mga Pakigsaad 88:118.
4. Mateo 7:17, 20.
5. Moroni 7:5.
6. Alma 32:28, 30–31.
7. Doktrina ug mga Pakigsaad 8:1.
8. Doktrina ug mga Pakigsaad 8:2.
9. Doktrina ug mga Pakigsaad 8:10.
10. Doktrina ug mga Pakigsaad 9:8–9.
11. Tan-awa sa Santiago 2:17.
12. Santiago 1:6.
13. Alma 12:10.
14. Alma 17:2–3.
15. Joseph Smith—Kasaysayan 1:18.
16. Santiago 1:5.



Ni Elder D. Todd Christofferson

Sa Korum sa Napulog Duha ka mga Apostoles

Ang Pagkabanhaw ni Jesukristo

Si Jesus sa Nazaret mao ang nabanhaw nga Manunubos, ug ako mopamatuod bahin sa tanan nga resulta gikan sa kamatuoran sa Iyang Pagkabanhaw.

U sa ka makapahugno nga pagbati sa kapildihan ug kasagmuyo ang milukop sa Iyang mga disipulo samtang si Jesus nag-antus ug namatay sa krus ug ang Iyang lawas gipahimutang nga wala nay kinabuhi diha sa lubnganan. Bisan pa man sa gibalik-balik og sulti sa Manluluwas bahin sa Iyang kamatayon ug sa mosunod nga pagbangon pag-usab, wala sila makasabut. Ang mangitngit nga hapon sa Iyang Pagkalansang sa Krus, hinoon, gisundan sa malipayong buntag sa Iyang Pagkabanhaw. Apan kana nga kalipay miabut lamang samtang ang mga disipulo nahimong mga saksi sa Pagkabanhaw, kay bisan ang pamahayag sa mga anghel nga Siya nabuhi pag-usab sa sinugdanan wala masabti—butang kadto nga wala gayud damha.

Si Maria Magdalena ug pipila ka matinud-anong mga babaye miabut og sayo sa lubnganan sa Manluluwas nianang Dominggo sa buntag, nagdala og mga pahumot ug mga ighahaplas sa pagkompleto sa pagdihog nga nagsugod dihang ang lawas sa Ginoo daling gipahimutang sa lubnganan sa wala pa moabut

ang Igpapahulay. Niining espesyal kaayo nga buntag, misugat sa ilang panan-aw ang abli nga lubnganan, ang tabon nga bato giligid, ug duha ka anghel kinsa namahayag:

“Ngano nga ang buhi anha man ninyo pangitaa diha sa mga patay?”

“Wala Siya dinhi, kondili nabanhaw: hinumdumi ang iyang gisulti kaninyo sa didto pa siya sa Galilea,

“Nga, Ang Anak sa tawo kinahanglan igatugyan ngadto sa mga kamot sa mga tawong makasasala, ug igalansang sa krus, ug sa ikatulo ka adlaw mabanhaw siya.”¹

“Umari kamo, tan-awa ninyo ang dapit nga nahimutangan sa Ginoo.

“Ug dumali kamo pagpangkaw, ug suginli ninyo ang iyang mga tinun-an nga nabanhaw siya gikan sa mga patay.”²

Ingon sa gimando sa mga anghel, si Maria Magdalena mitan-aw didto sa lubnganan, apan morag ang nahunahunaan lang niya mao nga ang lawas sa Ginoo nawala. Nagdali siya aron mosugilon sa mga Apostoles ug, pagkakita kang Pedro ug kang Juan, miingon kanila, “Ang Ginoo ilang gikuha gikan sa lubnganan, ug wala kami masayud kon diin siya nila ibutang.”³ Sila si Pedro ug Juan midagan ngadto sa nahimutangan ug nasuta nga wala gayuy sulod ang lubnganan, nakita “ang panaptong lino nga nahimutang didto . . . ug ang panapton nga giputos sa iyang ulo, . . . naglain kini nga linukot sa usa ka dapit.”⁴ Si Juan ang unang nakasabut sa talagsaong mensahe sa pagkabanhaw. Siya misulat



nga “siya nakakita, ug mituo,” samtang ang uban nianang higayuna “wala pa man gihapon makasabut sa kasulatan nga kinahanglan mabanhaw [si Jesus] gikan sa mga patay.”⁵

Sila si Pedro ug Juan namauli, apan si Maria nga nagpabilin, padayong nagbangutan. Sa makadiyot ang mga anghel mibalik ug malumong nangutana niya, “Babaye, nganong nagahilak ikaw? Siya miingon kanila, Kay ila mang gikuha ang akong Ginoo, ug wala ako masayud kon diin siya nila ibutang.”⁶ Nianang higayuna ang nabanhaw nga Manluluwas, nga nagbarug sa luyo niya, miingon, “Babaye, nganong nagahilak ikaw? kinsa may imong gipangita? Sa pagdahum niya nga kadto mao ang magbalantay sa tanaman, si Maria miingon kaniya, Senyor, kon ikaw man ang nagkuha kaniya, tug-ani ako diin mo siya ibutang, ug ako siyang kuahon.”⁷

Si Elder James E. Talmage misulat: “Kadto mao si Jesus nga iyang gipakigsultihan, ang iyang minahal nga Ginoo, bisan wala siya masayud niini. Usa ka pulong gikan sa Iyang buhi nga mga ngabil nakapausab sa iyang pagbangutan ngadto sa tumang kalipay. ‘Si Jesus miingon kaniya, Maria.’ Ang tingog, ang tono, ang malumong paglitok nga iyang nadungog ug gimahal sa miaging mga adlaw mibayaw kaniya gikan sa makapahugno nga kasubo nga iyang gibati. Siya milingi, ug nakita ang Ginoo. Tungod sa tumang kalipay gituyhad niya ang iyang kamot aron gakson Siya, militok lamang og madanihon ug matinahuron nga pulong, ‘Rabboni,’ nagpasabut nga Akong minahal nga Magtutudlo.”⁸

Ug busa kining bulahan nga babaye nahimong kinaunhang mortal nga nakakita ug nakigsulti sa nabanhaw nga Kristo. Unya nianang adlaw gihapon Siya mipakita ngadto kang Pedro diha o duol sa Jerusalem;⁹ ngadto sa duha ka tinun-an diha sa dalan paingon sa Emaus;¹⁰ ug pagkagabii ngadto sa 10 ka mga Apostoles ug uban pa, mitunga og kalit taliwala kanila, nga miingon, “Tan-awa ninyo ang akong mga kamot ug mga tiil, nga mao gayud ako: hikapa ninyo ako, ug tan-awa; kay ang espiritu walay unod



ug mga bukog, ingon sa inyong nakita nga anaa kanako.”¹¹ Unya aron mas makumbinser sila “samtang sa ilang kalipay sila wala pa motuo niini, ug nahibulong,”¹² Siya mikaon sa isda nga sinugba sa ilang atubangan.¹³ Unya Siya miingon kanila, “Kamo mao unya ang akong mga saksi sa Jerusalem, ug sa tibuok Judea, ug Samaria, ug hangtud sa kinatumyan sa yuta.”¹⁴

Gawas niining kumpirmado nga mga saksi sa Jerusalem, anaa kanato ang walay sama nga pangalagad sa nabanhaw nga Ginoo ngadto sa karaan nga lumulupyo sa Kasadpang Bahin sa kalibutan. Didto sa yuta sa Bountiful, Siya mikunsad gikan sa langit ug midapit sa nagpundok nga katawhan, mga 2,500, nga moduol tagsa-tagsa hangtud nga silang tanang nakaduol, mihikap sa Iyang kilid ug mibati sa agi sa lansang sa Iyang mga kamot ug sa Iyang mga tiil.¹⁵

“Ug sa diha nga nakaduol na silang tanan ug nakasaksi sa ilang kaugalingon, sila naghiusa sa pagsinggit, nag-ingon:

“Hosanna! Bulahan ang ngalan sa Labing Halangdon nga Dios! Ug sila nangluhod sa tiilan ni Jesus, ug nagsimba kaniya.”¹⁶

Ang Pagkabanhaw ni Kristo nagpakita nga ang Iyang pagkaanaa gawasnon ug mahangturon. “Kay maingon nga ang Amahan may kinabuhi diha sa iyang kaugalingon; maingon man gitugot niya sa Anak ang pagkabaton usab og kinabuhi diha sa iyang

kaugalingon.”¹⁷ Si Jesus miingon:

“Ako gihigugma sa Amahan sa katarungan nga mao kini, kay ako magahalad man sa pagpakamatay sa akong kinabuhi, sa paghalad niini aron mabawi ko ra usab kini.

“Walay tawo nga makakuha niini gikan kanako, hinonoa ginahalad ko kini sa kinaugalingon kong pagbuot. May kagahum ako sa paghalad niini, ug may kagahum ako sa pagbawi niini.”¹⁸

Ang Manluluwas wala magsalig sa pagkaon o tubig o oxygen o sa uban pang butang o gahum, o tawo aron mabuhi. Isip Jehova ug Mesiyas, Siya ang halangdon nga Ako Mao, ang Dios nga anaa tungod sa Iyang kaugalingong kabubut-on ug gahum.¹⁹ Siya anaa karon ug anaa sa kanunay.

Pinaagi sa Iyang Pag-ula ug Pagkabanhaw, si Jesukristo nakabuntog sa tanang aspeto sa Pagkapukan. Ang pisikal nga kamatayon temporaryo lang, ug gani ang espirituhanong kamatayon adunay katapusan, kay kitang tanan mobalik ngadto sa presensya sa Dios, maayo kay temporaryo lang, aron pagahukman. Kita makasalig gayud sa Iyang gahum sa pagbuntog sa uban pa ug paghatag kanato og kinabuhing walay katapusan.

“Kay maingon nga pinaagi sa usa ka tawo miabut ang kamatayon, pinaagi usab sa usa ka tawo nahiaabut ang pagkabanhaw sa mga patay.

“Kay maingon nga diha kang Adan ang tanan nangamatay, maingon man usab diha kang Kristo ang tanan mangabuhi.”²⁰

Sa mga pulong ni Elder Neal A. Maxwell: “Ang kadaugan ni Kristo ibabaw sa kamatayon mitapos sa tawhanong kalisdanan. Karon may indibidwal na lamang nga kalisdanan, ug gikan usab niini mahimo kitang maluwas pinaagi sa pagsunod sa mga pagtulun-an niya nga miluwas kanato gikan sa dakong kalaglagan.”²¹

Kay gitubag ang gipangayo nga kaangayan, si Kristo anaa na sa dapit sa kaangayan; o ingnon nato nga Siya mao ang kaangayan, ingon nga Siya mao ang gugma.²² Ingon man, gawas sa pagka- “hingpit nga makiangayon nga Dios,” Siya usa ka hingpit nga

maloloy-on nga Dios.²³ Busa, ang Manluluwas mihimo sa tanang butang nga matarung. Walay in hustisya sa mortalidad nga permanente, bisan ang kamatayon, kay Siya mipahiuli sa kinabuhi pag-usab. Walay mga kasakit, kakulangan, pagluib, o pang-abuso nga dili kabayran sa katapusan tungod sa Iyang walay kinutuban nga kaangayan ug kalooy.

Sa samang paagi, kitang tanan manubag Kaniya sa atong kinabuhi, mga pagpili, ug mga binuhatan, bisan sa atong mga hunahuna. Kay Siya mitubos kanato gikan sa Pagkapukan, ang atong kinabuhi sa tinuod lang Iyaha gayud. Siya namahayag:

“Tan-awa Ako mihatag nganha kaninyo sa akong ebanghelyo, ug kini mao ang ebanghelyo diin Ako mihatag nganha kaninyo—nga Ako mianhi dinhi sa kalibutan aron sa pagbuhat sa kabubut-on sa akong Amahan, tungod kay ang akong Amahan mipadala kanako.

“Ug ang akong Amahan mipadala kanako nga Ako unta ituboy nganha sa krus; ug human niana nga Ako matuboy diha sa krus, nga Ako unta makadala sa tanan nga mga tawo ngari kanako, nga ingon nga Ako gituboy sa mga tawo mao usab ang mga tawo ituboy pinaagi sa Amahan, sa pagbarug sa akong atubangan, aron pagahukman sa ilang mga buhat.”²⁴

Hunahunaa sa makadiyot ang kamahinungdanon sa Pagkabanhaw sa pagsulbad gayud sa tinuod nga pagkatawo ni Jesus sa Nazaret ug sa dagkong pilosopikanhong panagbangi ug mga pangutana sa kinabuhi. Kon si Jesus tinuod gayud nga nabanhaw, mosunod dayon niini nga Siya usa ka balaanong binuhat. Walay mortal nga tawo nga dunay gahum sa iyang kaugalingon nga mabuhi og balik human mamatay. Tungod kay Siya nabanhaw, si Jesus dili mahimong usa lang ka panday, magtutudlo, rabbi, o propeta. Tungod kay Siya nabanhaw, si Jesus usa gayud ka Dios, gani ang Bugtong Anak sa Amahan.

Busa, unsay Iyang gitudlo tinuod; ang Dios dili magbakak.²⁵

Busa, Siya ang Tiglalang sa yuta, sama sa Iyang gisulti.²⁶

Busa, ang langit ug ang impyerno tinuod, sama sa Iyang gitudlo.²⁷

Busa, dunay usa ka kalibutan sa mga espiritu, nga Iyang gibisita human sa Iyang kamatayon.²⁸


Busa, moanhi Siya pag-usab, sama sa giingon sa mga anghel,²⁹ ug “mohari dinhi sa yuta.”³⁰

Busa, dunay pagkabanhaw ug katapusang paghukom alang sa tanan.³¹

Tungod sa katinuod sa Pagkabanhaw ni Kristo, ang mga pagduha-duha bahin sa pagkamakagagahum sa tanan, pagkasayud sa tanan, ug pagkamanggiloy-on sa Dios nga Amahan—kinsa mihatag sa Iyang Bugtong Anak alang sa katubsan sa kalibutan—mawala. Ang mga pagduha-duha bahin sa kahulugan ug katuyoan sa kinabuhi mahanaw. Si Jesukristo gani mao lang ang pangalan o paagi diin ang kaluwasan mahimong moabut ngadto sa katawhan. Ang grasya ni Kristo tinuod, mohatag og kapasayloan ug kalimpyo ngadto sa naghinulsol nga makasasala. Ang hugot

nga pagtuo mas labaw pa kay sa imahinasyon o mugna sa hunahuna. Adunay labing mahinungdanon ug malukpanong kamatuoran, ug adunay katuyoan ug dili mausab nga mga sumbanan sa moral, sama sa Iyang gitudlo.

Tungod sa katinuod sa Pagkabanhaw ni Kristo, ang paghinulsol sa bisan unsa nga pagsupak sa Iyang balaod ug mga sugo usa ka posible ug dinalian nga butang. Ang mga milagro sa Manluluwas tinuod, sama sa Iyang gisaad ngadto sa Iyang mga disipulo nga sila unta makabuhat sa ingon ug labi pa gani ka dagkong mga buhat.³² Ang Iyang priesthood tinuod gayud nga gahum nga “nangalagad sa ebanghelyo ug naghupot sa yawe sa mga misteryo sa gingharian, gani ang yawe sa kahibalo sa Dios. Busa, diha sa mga ordinansa niana, ang gahum sa pagkadiosnon gipakita.”³³ Tungod sa katinuod sa Pagkabanhaw ni Kristo, ang kamatayon dili mao ang atong katapusan, ug bisan kon ang mga





ulod modunot sa [atong mga lawas], apan sa [atong] unod makita [nato] ang Dios.”³⁴

Si Presidente Thomas S. Monson misugilon bahin ni Robert Blatchford kinsa, 100 ka tuig na ang milabay “sa iyang libro nga *God and My Neighbor*, grabeng miataki sa gidawat nga mga pagtuong Kristiyano, sama sa Dios, Kristo, pag-ampo, ug pagka-imal. Siya maisugong miingon, ‘Ako moangkong nga nakapamatuod sa tanan nakong gustong pamatud-an sa hingpit ug tataw nga paagi nga walay Kristiyano, bisan unsa pa siya ka bantugan o maayo, ang makatubag sa akong mga argumento o makapatay-og sa akong baruganan.’ Iyang gituyokan ang iyang kaugalingon sa bongbong sa pagkamadudahon. Unya usa ka makapakugang nga butang ang nahitabo. Ang iyang bongbong kalit lang nga nahugno. . . . Sa hinay-hinay nagsugod siya sa pagbalik sa iyang tinuohan nga iyang gisaway ug gibugal-bugalan. Unsa may hinungdan sa hilabihang pagkausab sa iyang panglantaw? *Ang iyang asawa [na]matay*. Uban sa masulub-on nga kasingkasing, misulod siya sa lawak diin ang mortal nga lawas sa iyang asawa naghigda. Mitan-aw siya pag-usab sa nawong nga gimahal niya pag-ayo. Migawas, siya misulti sa usa ka higala: ‘Siya kadto, apan dili siya mao. Ang tanan nausab. Adunay butang nga diha sa una gikuha. Dili na siya parehas. Unsa man diay ang mawala kondili ang kalag?’”³⁵

Ang Ginoo sa pagkatinuod namatay ba ug nabuhi pag-usab? Oo. “Ang sukaranan nga mga baruganan sa atong relihiyon mao ang pagpamatuod sa mga Apostoles ug mga Propeta, mahitungod ni Jesukristo, nga Siya namatay, gilubong, ug mibangon sa ikatulong adlaw, ug mikayab ngadto sa langit; ug sa ubang mga butang nga may kalabutan sa atong relihiyon sumpay lamang niini.”³⁶

Samtang ang gipanagna nga pagkahimugso ni Jesus hapit na moabut, adunay mga tawo taliwala sa karaang mga katawhan nga Nephite ug Lamanite kinsa mituo, bisan kon kadaghanan nagduha-duha. Pag-abut sa panahon, ang timailhan sa Iyang pagkahimugso miabut—usa ka adlaw ug usa ka gabii ug usa ka adlaw nga walay kangitngit—ug ang tanan nasayud.³⁷ Ingon man usab karon, ang uban mituo sa Pagkabanhaw ni Kristo, ug daghan ang nagduha-duha o wala motuo. Apan ang uban nasayud. Pag-abut sa panahon, ang tanan makakita ug ang tanan masayud; gani, “matag tuhod moluhod, ug matag dila mokumpisal sa atubangan niya.”³⁸

Hangtud niana, mituo ko sa daghang mga saksi sa Pagkabanhaw sa Manluluwas kansang mga kasinatian ug mga pagpamatuod makita diha sa Bag-ong Tugon—kang Pedro ug sa iyang kaubanan sa Napulog Duha ug sa minahal, putli nga Maria sa Magdala, taliwala sa uban pa. Mituo ko sa mga pagpamatuod nga makita diha sa Basahon ni Mormon—kang Nephi ang

Apostol ug sa wala hingnanli nga mga katawhan sa yuta sa Bountiful, taliwala sa uban pa. Ug ako mituo sa pagpamatuod ni Joseph Smith ug ni Sidney Rigdon kinsa, human sa daghan nga mga pagpamatuod, mipahayag sa mahinungdanong pagsaksi niining katapusang dispensasyon “nga siya buhi! Kay kami nakakita kaniya.”³⁹ Ubos sa Iyang mga mata nga makakita sa tanan, ako mobarug isip usa ka saksi nga si Jesus sa Nazaret mao ang nabanhaw nga Manunubos, ug ako mopamatuod bahin sa tanan nga resulta gikan sa *kamatuoran* sa Iyang Pagkabanhaw. Unta madawat ninyo ang konbiksyon ug kahupayan nianang samang pagsaksi, ako nag-ampo sa pangalan ni Jesukristo, amen. ■

MUBO NGA MGA SULAT

1. Lucas 24:5–7.
2. Mateo 28:6–7.
3. Juan 20:2.
4. Juan 20:5, 7.
5. Juan 20:8, 9.
6. Juan 20:13.
7. Juan 20:15.
8. James E. Talmage, *Jesus the Christ*, 3rd ed. (1916), 681.
9. Tan-awa sa Lucas 24:34; 1 Mga Taga-Corinto 15:5.
10. Tan-awa sa Marcos 16:12; Lucas 24:13–35.
11. Lucas 24:39.
12. Lucas 24:41.
13. Tan-awa sa Lucas 24:42–43.
14. Mga Buhat 1:8.
15. Tan-awa sa 3 Nephi 11:14–15.
16. 3 Nephi 11:16–17.
17. Juan 5:26.
18. Juan 10:17–18.
19. Tan-awa sa Exodo 3:14.
20. 1 Mga Taga-Corinto 15:21–22.
21. *The Neal A. Maxwell Quote Book*, ed. Cory H. Maxwell (1997), 287.
22. Tan-awa sa 1 Juan 4:8.
23. Alma 42:15; tan-awa usab sa Mosiah 15:8–9.
24. 3 Nephi 27:13–14.
25. Tan-awa sa Enos 1:6.
26. Tan-awa, pananglit, 3 Nephi 9:15.
27. Tan-awa, pananglit, Doktrina ug mga Pakigsaad 76.
28. Tan-awa sa Doktrina ug mga Pakigsaad 138.
29. Tan-awa sa Mga Buhat 1:10–11.
30. Mga Artikulo sa Hugot nga Pagtuo 1:10; tan-awa usab sa Topical Guide, “Jesus Christ, Millennial Reign.”
31. Tan-awa, pananglit, 2 Nephi 9:15.
32. Tan-awa sa Juan 14:12.
33. Doktrina ug mga Pakigsaad 84:19–20.
34. Job 19:26.
35. Thomas S. Monson, “Ako Nasayud Nga Ang Akong Manunubos Buhi!” *Liahona*, Mayo 2007, 23.
36. *Mga Pagtulun-an sa mga Presidente sa Simbahan: Joseph Smith* (2007), 58.
37. Tan-awa sa 3 Nephi 1:15–20.
38. Mosiah 27:31.
39. Doktrina ug mga Pakigsaad 76:22–23.



Ni Presidente Thomas S. Monson

Hangtud sa Sunod Natong Panagkita

Unta ang Espiritu nga atong gibati sa miaging duha ka adlaw magauban kanato samtang magpadayon kita sa pagpahigayon sa atong inadlaw nga buluhaton.

Akong mga kaigsoonan, pagkaindot niini nga komperensya. Napakaon kita sa espirituhanong paagi samtang naminaw kita sa dinasig nga mga pulong sa mga lalaki ug mga babaye nga namulong kanato. Pagkanindot sa mga musika, ang mga mensahe giandam ug gipamulong ubos sa mga pag-aghat sa Balaang Espiritu, ug ang mga pag-ampo mas mipaduol kanato sa langit. Nadasig kita sa tanang paagi samtang kita dungan nga miapil.

Manghinaut ko nga atong gahinan og panahon ang pagbasa sa mga mensahe sa komperensya kon anaa na kini sa LDS.org sa moabut nga pipila ka adlaw ug kon maprinta na kini sa mosunod nga mga isyu sa magasin nga *Ensign* ug *Liahona*, kay takus man kini alang sa mainampingon natong pagribyu ug pagtuon.

Nahibalo ko nga miduyog kamo kanako sa paghatag sa among sinserong pasalamat ngadto sa mga kaigsoonan ug mga sister kinsa gi-release atol niini nga komperensya. Miserbisyo gayud sila ug mihimo og makahuluganong mga kontribusyon sa buhat sa Ginoo. Ang ilang dedikasyon hingpit gayud.

Gi-sustain usab nato, pinaagi sa pag-isa sa atong mga kamot, ang mga kaigsoonan nga gitawag ngadto sa bag-ong mga katungdanan. Sila among gihangop ug gusto nga mahibalo sila nga among gilantaw ang pagserbisyo uban nila alang sa kawsa sa atong Agalon.

Samtang atong pamalandungan ang mga mensahe nga atong nadungog, unta makahunahuna kita sa paghimo og mas maayo kay sa ato nang nahimo sa nangagi. Unta magmabination ug



magmahigugmaon kita ngadto sa lahi kanato og pagtuo ug mga sumbanaan. Ang Manluluwas midala dinhi sa yuta og usa ka mensahe sa gugma ug pakigdait sa tanang mga lalaki ug mga babaye. Unta atong ipadayon ang pag-sunod sa Iyang ehemplo.

Nag-atubang kita og grabing mga hagit sa kalibutan karon, apan akong ipaniguro kaninyo nga ang atong Langitnong Amahan mahunahunaon kanato. Siya mogiya ug mopanalangin kanato samtang kita mopakita sa atong pagtuo ug pagsalig Kaniya ug motabang kanato sa bisan unsang mga kalisdanan nga atong masinati.

Unta ang mga panalangin sa langit maanaa sa matag usa kanato. Unta mapuno ang atong mga panimalay sa gugma ug kamaayo ug sa Espiritu sa Ginoo. Unta padayon natong alimahan ang atong mga pagpamatuod sa ebanghelyo, nga kini mahimong panalipod kanato batok sa mga paghampak sa kaaway. Unta ang Espiritu nga atong gibati sa miaging duha ka adlaw magauban kanato samtang magpadayon kita sa pagpahigayon sa atong inadlaw nga buluhaton, ug unta kanunay kitang mohimo sa buhat sa Ginoo.

Mopamatuod ko nga kini nga buhat tinuod, nga buhi ang atong Manluluwas, ug nga Siya naggiya ug nangulo sa Iyang Simbahan dinhi sa yuta. Akong ibilin kaninyo ang akong pagsaksi ug akong pagpamatuod nga ang Dios nga atong Mahangturong Amahan buhi ug nahigugma kanato. Siya sa pagkatinuod mao ang atong Amahan, ug Siya anaa ug tinuod gayud. Unta makaamgo kita nga andam kaayo Siya nga moduol kanato, andam kaayo Siya nga motabang kanato, ug nahigugma gayud Siya kanato.

Mga kaigsoonan, unta panalangi-nan kamo sa Dios. Unta ang Iyang gisaad nga kalinaw maanaa kaninyo karon ug sa kanunay.

Manamilit ko kaninyo hangtud sa sunod natong panagkita sa sunod nga unom ka bulan, ug ako mobuhat sa ingon sa pangalan ni Jesukristo, ang atong Ginoo ug Manluluwas, amen. ■



Ni Rosemary M. Wixom
Kinatibuk-ang Presidente sa Primary

Ang Pagtuman sa mga Pakigsaad Moprotekta, Moandam, ug Mohatag og Gahum Kanato

Kita mga babaye nga lain-lain og edad nga naghimo og mga pakigsaad nga naglakaw sa dalan sa mortalidad balik ngadto sa Iyang presensya.

O h, mga sister, gimahal namo kamo. Samtang nagbisita sa Mexico bag-ohay lang, nasinati nako ang panag-igsoonay nga gibati natong tanan karon. Hunahunaa kini nga talan-awon: Mao pay pagkahuman namo sa Primary pagka-Dominggo sa buntag ug ang mga bata, mga magtutudlo, ug ako mipaingon sa hallway nga puno sa mga tawo. Dayon ang pultahan sa klase sa Young Women naabli, ug nakita nako ang batan-ong mga babaye ug ang ilang mga lider. Kaming tanan naghinangpanay. Uban sa mga bata nga naggunit sa akong sayal ug ang batan-ong mga babaye nagalirong nako, gusto nakong ipahayag ang akong gibati nianang higayuna.

Dili ko makasulti og Kinatsila, busa Iningles ra ang akong mahunahunaan. Mitan-aw ko sa ilang mga nawong ug



Siyudad sa Mexico, Mexico

miingon, “[Kita] mga anak nga babaye sa [atong] Langitnong Amahan, kinsa nahigugma [kanato], ug [kita] nahigugma Kaniya.” Ang tanan dayon miapil og sulti, sa Kinatsila. Diha kami sa hallway nga puno sa mga tawo, nagdungan og sulti sa tema sa Young Women samtang nagsulti kami, “Kami mobarug ingon nga mga saksi sa Dios sa tanan nga mga panahon ug diha sa tanan nga mga butang, ug diha sa tanan nga mga dapit.”

Karong gabhiona nagkapundok kita sa tibuok kalibutan isip Iyang mga disipulo, uban sa tinguha sa pagpanalipod ug pagsuporta sa gingharian sa Dios. Kita mga anak nga babaye sa atong Langitnong Amahan. Kita mga babaye nga lain-lain og edad nga naghimo og mga pakigsaad nga naglakaw sa dalan sa mortalidad balik ngadto sa Iyang presensya. Ang pagtuman sa mga pakigsaad moprotekta, moandam, ug mohatag og gahum kanato.

Dunay mga batang babaye uban nato karon nga Primary pa ang edad. Ang pipila kaninyo naghimo nianang unang lakang diha sa dalan ngadto sa kinabuhing dayon pinaagi sa ordinansa sa bunyag.

Tan-awa ang inyong palibut. Ang umaabut hayag samtang motan-aw kamo sa mga babaye nga mihimo usab sa mga pakigsaad ug andam sa pagpakita kaninyo sa dalan sa unahan.

Kon kamo 8, 9, 10, o 11 anyos, diha sa Conference Center man, sa inyong balay, o sa meetinghouse sa tibuok kalibutan, palihug mahimo ba nga mobarug kamo? Welcome sa kinatibuk-ang miting sa kababayen-an. Karon,

palihug pabiling magbarug kay gusto namo nga dapiton kamo karong gabhiona nga moapil. Akong i-hum ang usa ka kanta sa Primary. Ug kon mahibaloan na ninyo ang tono, mahimo ba mong modungan og kanta nako? Karon, kinahanglang kusgon ninyo og kanta aron ang tanan makadungog.

*Tudloi ko paglakaw's kahayag;
Tudloi kong mag-ampo's Amahan;
Tudloi ko sa angay'ng buhaton;
Tudloi ko, diha's kahayag.*

Pabiling magbarug, mga batang babaye, samtang ang tanan nga 12 anyos ug mas magulang pa mokanta karon sa ikaduhang verse.

*Dali, anak magkat-on tang duha
Sa sugo Niyang makabalik ta
Didto sa langit, uban Kaniya—
Kanunay'ng maglakaw's kahayag.*¹

Pagkaanindot niana. Mahimo na kamong molingkod. Salamat.

Isip mga babaye nga lain-lain og edad, maglakaw kita diha sa *Iyang* kahayag. Ang atong panaw diha sa dalan personal ug maayong pagkadan-ag uban sa gugma sa Manluluwas.

Misulod kita sa ganghaan ngadto sa dalan sa kinabuhing dayon uban sa ordinansa ug pakigsaad sa bunyag, ug dayon nadawat nato ang gasa sa Espiritu Santo. Si Elder Robert D. Hales nangutana nato, “Nakasabut ba [kita] ug nakasabut ba ang [atong] mga anak nga dihang [kita] nabunyagan [kita] nausab sa kahangturan?”

Siya mipasabut usab nga “kon kita nakasabut sa atong pakigsaad sa bunyag ug sa gasa sa Espiritu Santo, kini mousab sa atong kinabuhi ug moestablisar sa atong hingpit nga pagkama-unungon sa gingharian sa Dios. Kon ang mga tintasyon moabut nato, kon kita maminaw, ang Espiritu Santo mopahinumdom nato nga kita misaad sa paghinumdom sa atong Manluluwas ug pagtuman sa mga sugo sa Dios.”²

Matag semana samtang kita moambit sa mga simbolo sa sakrament, gibag-o nato ang atong pakigsaad sa bunyag. Si Elder David A. Bednar miingon: “Sa atong pagbarug diha sa



tubig sa bunyag, kita nagpaabut sa panalangin sa templo. Sa atong pagambit sa sakrament, kita naghunahuna sa templo. Kita nagsaad nga mohinumdom sa Manluluwas ug mosunod sa Iyang mga sugo isip pagpangandam sa pag-apil sa sagrado nga mga ordinansa sa templo.”³

Ang mga ordinansa sa templo mo-giya ngadto sa mahinungdanong mga panalangin nga anaa pinaagi sa Pag-ula ni Jesukristo. Kini mao ang mga ordinansa nga kinahanglanon sa atong kahimayaan sa celestial nga gingharian. Kon maningkamot kita sa pagtuman sa atong mga pakigsaad, ang atong mga pagbati sa kakulang ug pagkadili perpekto magsugod og kawala, samtang ang mga ordinansa ug mga pakigsaad sa templo adunay dugang kahulugan. Ang tanan welcome nga molakaw sa dalan ngadto sa kinabuhing dayon.

Nakadayeg ko sa kalig-on sa mga batang babaye, mga batan-ong babaye, ug mga babaye nga akong nahimamat sa tibuok kalibutan nga nagtuman sa ilang pakigsaad. Mopakigbahin ko og pipila ka ehemplo sa mga batang babaye ug batan-ong mga babaye nga akong nahimamat.

Si Luana 11 anyos dihang mibisita ko sa iyang pamilya sa Buenos Aires, Argentina. Tungod sa makatruma nga panghitabo sa bata pa siya, si Luana dili makasulti. Dili siya makasulti sulod sa mga katuigan. Hilum siya nga naglingkod samtang nag-istoryahanay kaming tanan. Nanghinaut ko bisan man lang hagawhaw gikan niya. Mitan-aw siya og maayo nako nga daw ang paglitok dili kinahanglanon aron masayran nako ang iyang pagbati. Human sa pag-ampo, mibarug kami aron mobiya, ug si Luana mihatag nako og usa ka drowing. Gi-drowing niya si Jesukristo sa Tanaman sa Getsemani. Akong nasayran ang iyang pagsaksi nga kusog ug klaro. Si Luana nakahimo og pakigsaad atol sa bunyag nga mobarug ingon nga saksi sa Dios “sa tanan nga mga panahon ug diha sa tanan nga mga butang, ug diha sa tanan nga mga dapit.”⁴ Nakasabut siya sa Pag-ula ni Jesukristo, sama sa masaksihan pinaagi sa iyang drowing. Nakahibalo ba siya nga, pinaagi sa makapalig-on nga gahum sa Pag-ula, mamaayo siya ug makasulti pag-usab? Sukad nianang adlaw na tulo ka tuig na ang milabay, si Luana naglambo

sa iyang paningkamot nga maka-sulti. Karon moapil na siya sa Young Women uban sa iyang mga higala. Nagmatinud-anon sa pakigsaad nga iyang gihimo atol sa bunyag, siya nagpadayon sa pagpakigbahin sa iyang pagsaksi sa Manluluwas.

Ang kabatan-onan sa tibuok kalibutan interesado sa mga templo. Sa Lima, Peru, nakahimamat ko og usa ka amahan ug tulo sa iyang anak nga mga babaye sa gawas sa entrada sa templo. Nakita nako ang kasanag sa ilang panagway. Ang duha sa anak nga mga babaye grabe ang kakulangan ug naglingkod sa wheelchair. Ang ikatulo nga anak nga babaye, samtang mitabang sa iyang igsoong mga babaye, mipasabut nga duna pa siyay duha ka igsoong babaye sa balay. Sila usab nanag-wheelchair. Dili sila makahimo sa pagbiyahe og 14 ka oras paingon sa templo. Ang templo importante kaayo niining amahan ug sa iyang anak nga mga babaye nga silang upat miadto sa templo nianang adlaw—ang duha nila motan-aw lang

sa tawo nga bunyagan alang sa mga patay ug mopahigayon nianang sa-grado nga ordinansa. Sama ni Nephi, sila “[nahimuot] diha sa mga pakigsaad sa Ginoo.”⁵

Usa ka single nga babaye nga akong nailhan mihatag og bili sa sinemana nga ordinansa sa sakrament ug sa sagradong saad niini “nga [siya] unta sa kanunay makabaton sa iyang Espiritu uban [kaniya].⁶ Kanang kanunay nga pakig-uban usa ka saad nga nakapasayon sa iyang pag-atubang sa pagbati nga nag-inusara. Kini nakapalig-on niya nga mo-focus sa pagpalambo sa iyang mga talento ug tinguha sa pagserbisyo sa Ginoo. Nakaplagaan niya ang dakong kalipay sa paghigugma sa mga bata sa iyang kinabuhi, ug kon magtinguha siya og kalinaw, makit-an ninyo siya sa templo.

Sa katapusan, usa ka tigulang nga babaye nga nag-edad og mga 90 nakakita sa iyang mga anak ug mga apo nga nagtubo ug mga apo sa tuhod nga natawo dinhi sa kalibutan. Sama sa

kadaghanan nato, siya dunay kinabuhi nga puno sa kaguol, kasakit, ug tumang kalipay. Miangkon siya nga kon matangtang pa lang ang ubang butang nga nahitabo sa iyang kinabuhi, buhaton niya kana. Apan, mapahiyumon, miingon siya, “Kinahanglan lang nga mabuhi pa ko og taud-taud ug makita kon unsay resulta niining tanan!” Padayon siya nga naghupot sa mga pakigsaad diha sa dalan.

Si Nephi mitudlo:

“Human kamo makasulod niini nga higpit ug pig-ot nga dalan, ako mangutana kon ang tanan natuman ba? Tan-awa, ako moingon nganha kaninyo, Wala. . . .

“Busa, kamo kinahanglan gayud nga mopadayon sa unahan uban ang pagkamakanunayon kang Kristo, magbaton sa usa ka hingpit nga kahayag sa paglaum, ug usa ka gugma sa Dios ug sa tanan nga mga tawo. Busa, kon kamo mopadayon sa unahan, magbusog sa pulong ni Kristo, ug molahutay hangtud sa katapusan, tan-awa, sa ingon miingon ang Amahan: Kamo makabaton og kinabuhi nga dayon.”⁷

Matag usa nato anaa niana nga dalan. Karong gabhiona nanganta kita bahin sa paglakaw sa dalan diha sa kahayag. Isip mga indibidwal, kita lig-on. Kon maghiusa uban sa Dios, dili kita mapugngan.

Ang Ginoo miingon ni Emma Smith, “Ipataas ang imong kasingkasing ug paglipay, ug hupot ngadto sa pakigsaad nga ikaw mihimo.”⁸

Maglipay kita nga pinaagi sa pagtuman sa atong mga pakigsaad, unta mabati nato ang gugma sa atong Langitnong Amahan ug sa atong Manluluwas, nga si Jesukristo. Ako mopamatuod nga Sila buhi. Sa pangalan ni Jesukristo, amen. ■

MUBO NGA MGA SULAT

1. “Tudloi ko Paglakaw sa Kahayag,” *Hymns*, nu. 304; o *Songbook sa mga Bata*, 70.
2. Robert D. Hales, “Ang Pakigsaad sa Bunyag: Nga Maanaa sa Gingharian ug Iya sa Gingharian,” *Liahona*, Ene. 2001, 8, 7.
3. David A. Bednar, “Madungganon nga Paghupot og usa ka Pangalan ug Katungdanan,” *Liahona*, Mayo 2009, 98.
4. Mosiah 18:9.
5. 2 Nephi 11:5.
6. Doktrina ug mga Pakigsaad 20:77.
7. 2 Nephi 31:19–20.
8. Doktrina ug mga Pakigsaad 25:13.





Ni Bonnie L. Oscarson
Kinatibuk-ang Presidente sa Young Women

Panag-igsoonay sa Kababayen-an: Nagkinahanglan Gayud Kita sa Usag Usa

Kinahanglan nga hunungon nato ang pagpamantay sa atong panaglahi ug tan-awon unsay komon kanato.

Niana nga video atong nakita ang walo ka nasud ug nadungog ang siyam ka lain-laing pinulongan. Hunahunaa kon pila ka pinulongan ang gidugang nianang katapusang bersikulo. Makahinam hunahunaon nga isip tibuok kalibutang panag-igsoonay sa kababayen-an atong napataas ang atong mga tingog sa pagpamatuod sa mahangturong kamatuoran nga kita mga anak sa mapinanggaong Langitnong Amahan.

Pagkadakong pribilehiyo nga maania dinhi sa makasaysayanon nga okasyon ug mamulong sa tanang kababayen-an nga nag-edad og walo pataas. Anaa ang labihang kalig-on sa atong panaghiusa karong gabhiona. Samtang akong nakita kitang tanan nga nagpundok sa Conference Center ug naghunahuna sa liboan pa nga nagtan-aw niini nga

sibya sa tibuok kalibutan, ang hini-usang gahum sa atong mga pagpamatuod ug pagtuo kang Jesukristo naglangkob gayud sa pinakapuno sa

pagtuo ug gahum nga panagtigum sa kababayen-an sa kasaysayan sa Simbahan, kondili man sa kalibutan.

Karong gabhiona nagmaya kita sa daghan kaayo natong managlahi nga mga tahas isip kababayen-an sa Simbahan. Bisan sa daghang paagi managlahi kita ug talagsaon, kita usab miila nga kitang tanan mga anak sa sama nga Langitnong Amahan, mao nga managsoon kita. Gihiusa kita sa tuyo sa pagtukod sa gingharian sa Dios ug diha sa mga pakigsaad nga atong gihimo, bisan unsa pa ang atong mga kahimtang. Kini nga hiniusang panagtigum, sa walay duda, mao ang pinakamahimayaong panag-igsoonay sa kababayen-an dinhi sa yuta!¹

Ang pagka-sister nagpasabut nga anaa kanato ang walay pagkabugto nga higot. Ang mga sister mag-atiman sa usag usa, magbantay sa usag usa, maghupay sa usag usa, ug anaa alang sa usag usa sa panahon sa kaharuhay ug sa kalisud. Ang Ginoo miingon, “Ako moingon nganha kaninyo, paghiusa; ug kon kamo dili magkahiusa kamo dili akò.”²

Ang kaaway gusto nga manghinaway kita o manghukom sa usag usa. Gusto siya nga kita manghimantay sa atong panaglahi ug makigtandi sa usag usa. Tingali ganahan mo og grabing ehersisyo usa ka oras kada adlaw kay makaayo ni ninyo, apan para nako tingali kalbaryo kaayo ang pagtikang sa hagdan imbis mosakay sa elevator. Mahimo gihapon kitang managhighala, di ba?



Sydney, Australia

Kita isip mga kababayan-an sagad makapanaway sa atong kaugalingon. Kon ang atong kaugalingon atong itandi sa usag usa, bation nato kanunay ang kakulang o kayugot sa uban. Si Sister Patricia T. Holland kausa miingon, “Ang punto mao ni, dili kita makaingon nga Kristiyano kita ug padayon kitang manghukom sa usag usa—o sa atong kaugalingon—sa kabangis.”³ Mipadayon siya nga walay igong butang nga irason nganong mawala ang atong kamanggiloy-on ug panag-igsoonay. Kinahanglan lang kitang mag-relaks ug magmaya sa balaan natong panaglahi. Atong hibaloan nga kitang tanan nagtinguha sa pagserbisyo sa gingharian, gamit ang talagsaon natong mga talento ug mga gasa sa atong kaugalingong mga paagi. Niana atong matagamtam ang atong panag-igsoonay ug ang atong asosasyon ug magsugod sa pagserbisyo.

Ang tinuod mao, nga kita nagkinahanglan gayud sa usag usa. Natural lang nga ang mga babaye mangita og higala, suporta, ug kauban. May daghan kitang angay kat-unan sa usag usa, ug sagad kita ra ang mobutang og mga babag nga makawala sa atong panaghigalaay nga unta maoy makahatag sa pinakadakong mga panalangin sa atong kinabuhi. Sama pananglit, kami nga mas magulang nagkinahanglan sa unsay matanyag ninyong mga Primary. Kaninyo makakat-on kami bahin sa Kristohanong pagserbisyo ug paghigugma.

Bag-o lang nakadungog ko og nindot nga istorya bahin sa bata nga si Sarah, kansang inahan dunay oportunidad sa pagtabang og laing babaye sa iyang ward nga ginganlan og Brenda, nga may sakit nga multiple sclerosis. Si Sarah ganahan nga mokuyog sa iyang mama sa pagtabang ni Brenda. Si Sarah mobutang og lotion sa mga kamot ni Brenda ug masahian ang iyang mga tudlo ug mga bukton kay kanunay kining magsakit. Nakat-unan ni Sarah ang paghinay og inat sa mga bukton ni Brenda ibabaw aron ma-exercise ang iyang kaunuran. Sudlayon ni Sarah ang buhok ni Brenda ug istoryahan



siya samtang ang iyang mama may laing gibuhat. Nakat-unan ni Sarah ang importansya ug kalipay sa pagserbisyo sa laing tawo ug nakasabut nga bisan ang bata makahimo og dakong kalainan sa kinabuhi sa uban.

Ganahan ko sa sanglitanan nga naa sa unang kapitulo sa Lucas nga naghulagway sa nindot nga relasyon nila ni Maria, ang inahan ni Jesus, ug sa iyang ig-agaw nga si Elisabet. Si Maria batan-on pa dihang gipahibalo siya sa talagsaon niyang misyon nga mahimong inahan sa Anak sa Dios. Sa sinugdanan ingon og bug-at kini nga responsibilidad nga inusarang pasanon. Ang Ginoo Mismo ang mihatag ni Maria og kauban nga makatabang kaniya. Pinaagi sa mensahe gikan sa anghel nga si Gabriel, gihatag kang Maria ang ngalan sa kasaligan ug masinabtanong babaye nga makatabang kaniya—ang iyang ig-agaw nga si Elisabet.

Kining batan-on nga dalaga ug ang iyang ig-agaw, kinsa “taas na kaayog panuigon,”⁴ pareho og kasinatian sa milagroso nilang pagsabak, ug naghunahuna ko sa kaimportante sa tulo ka bulan nilang panag-uban diin sila nagkaistoryahanay, nagbinatiay sa usag usa, ug nagsuportahay sa usag usa sa talagsaon nilang mga tawag. Pagkanindot nila nga mga modelo sa

kababayan-an sa managlahing kaliwat nga mialima sa usag usa.

Kita nga mas hingkod na makahimo og dakong impluwensya sa mas batan-on nga mga henerasyon. Sa bata pa ang akong mama, ang iyang mga ginikanan dili aktibo sa Simbahan. Bisin sa iyang edad nga singko anyos, lakawon ra niya ang simbahan aron makatambong og mga miting—Primary, Sunday School, ug sakrament miting—tanan sa managlahi nga oras.

Bag-o lang nangutana ko ni mama nganong gihimo niya kana kada semana nga walay suporta og pagdasig gikan sa ginikanan. Ang iyang tubag mao ni: “Duna koy mga magtutudlo sa Primary nga nahigugma nako.” Kini nga mga magtutudlo nagpangga kaniya ug mitudlo kaniya sa ebanghelyo. Sila mitudlo kaniya nga siya adunay Amahan sa Langit, kinsa nahigugma kaniya, ug ang ilang pagpakabana kaniya maoy hinungdan nga mosimba siya matag semana. Giingnan ko ni mama, “Usa kadto sa pinakaimportante nga impluwensya sa akong kinabuhi.” Unta makapasalamat ko niining talagsaon nga mga sister ugma damlag! Dili babag ang edad kon mahitungod sa Kristohanong pagserbisyo.

Mga duha ka semana na ang milabay, nakahimamat ko og stake Young Women president sa California kinsa miingon nako nga ang iyang 81 anyos nga mama bag-o lang gitawag nga Mia Maid adviser. Naintriga gyud ko mao nga akong gitawagan ang iyang mama. Dihang ang bishop ni Sister Val Baker mihangyo nga makigkita niya, naghunahuna siya nga tawagon siya nga librarian og ward historian. Dihang gihangyo siya nga moserbisyo isip Mia Maid adviser sa Young Women, ang reaksyon niya mao, “Sigurado ka?”

Ang iyang bishop matinahurong mitubag, “Sister Baker, walay sayop; kini nga tawag gikan sa Ginoo.”

Miingon siya nga wala siyay laing gitubag kondili, “Oo.”

Ganahan ko sa inspirasyon niini nga bishop diin ang upat ka Mia Maid sa iyang ward daghan og angayang makat-unan gikan sa kaalam, kasinatian, ug tibuok kinabuhing ehemplo niining hingkod nga sister. Ug tag-ana

kinsa man kahay adtoon ni Sister Baker kon gusto siyang magpatabang sa pag-set up sa iyang Facebook page?

Naghunahuna ko sa talagsaong tabang nga mahimo sa mga sister sa Relief Society sa pag-abiabi sa batan-ong mga sister nga bag-ohay lang nga diha sa Young Women. Kasagaran mobati ang atong mga batan-ong sister nga layo ra ang ilang pagbati sa unsay anaa sa Relief Society. Sa dili pa sila mag-18, ilang gikinahanglan ang mga lider sa Young Women ug mga inahan nga malipayong magpamatuod sa dakong mga panalangin nga mahisakop sa Relief Society. Kinahanglan nga ilang bation ang kahinam nga mahimong kabahin sa ingon ka mahimayang organisasyon. Kon ang batan-ong mga babaye magsugod og tambong sa Relief Society, nagkinahanglan kaayo sila og katapad nga higala, bukton nga mohupay, ug oportunidad sa pagtudlo ug pagserbisyo. Kitang tanan magtinabangay sa usag usa sa pagsinati sa mga kausaban ug importanting mga panahon sa atong kinabuhi.

Salamat sa tanang kababayan-an sa Simbahan kinsa mitabang sa pagpanalangin ug pagserbisyo sa uban nga wala magtagad sa edad ug kultura. Ang batan-ong mga babaye nagserbisyo sa mga Primary ug sa tigulang na. Ang tanang single nga mga sister nga lainlain og edad naggahin og dili maihap nga mga oras nga nag-atiman sa mga panginahanglan niadtong anaa sa ilang palibut. Atong giila ang liboan ka batan-ong mga babaye nga mihatag sa 18 ka bulan sa ilang kinabuhi aron mopakigbahin sa ebanghelyo sa kalibutan. Kining tanang butang mga ebidensya, sigun sa giingon sa atong ganahang himno, “Ang buluhaton sa mga anghel gihatag ngadto sa kababayan-an.”⁵

Kon adunay mga babag, kini tungod kay kita ra usab ang naghimo niini mismo. Kinahanglan nga hununon nato ang pagpamantay sa atong panaglahi ug tan-awon unsay komon kanato; dayon masugdan nato ang pag-ila sa talagsaon natong potensyal ug makab-ot ang pinakamaayo niini nga kalibutan. Si Sister Marjorie P. Hinckley kausa miingon, “Nagkinahanglan gayud kita sa usag usa. Kami



Vienna, Austria

nga mga tigulang na nagkinahanglan kaninyong mga batan-on. Ug, hinaut, kamong mga batan-on nagkinahanglan sa pipila kanamo nga tigulang na. Tinuod nga sa katilingban ang mga babaye nagkinahanglan og mga babaye. Atong gikinahanglan ang makatagbaw ug maunungong panaghigalaay sa usag usa.”⁶ Husto si Sister Hinckley; nagkinahanglan gayud kita sa usag usa!

Mga sister, walay laing pundok sa kababayan-an sa kalibutan nga adunay access sa talagsaong mga panalangin kay kanatong kababayan-an nga mga Santos sa Ulahing mga Adlaw. Mga miyembro kita sa Simbahan sa Ginoo, ug bisan unsa pa ang atong mga kahimtang, kitang tanan makatagamtam sa kinatibuk-ang mga panalangin sa gahum sa priesthood pinaagi sa pagtuman sa mga pakigsaad nga atong gihimo sa bunyag ug sa templo. Kita adunay buhing mga propeta nga naggiya ug nagtudlo kanato, ug kita makatagamtam sa talagsaong gasa sa Espiritu Santo, nga maoy nagsilbing kahupayan ug giya sa atong kinabuhi. Bulahan kita nga makigtambayayong sa matarung nga igsoong mga lalaki samtang naglig-on kita sa atong mga panimalay ug mga pamilya. Kita adunay access sa kalig-on ug gahum sa mga ordinansa sa templo ug daghan pa.

Agig dugang sa pagtagamtam sa tanan niining talagsaong mga

panalangin, ania kita—mga sister sa ebanghelyo ni Jesukristo. Gipanalanginan kita og malumo ug mahigugmaong kinaiyahan aron kita makahatag sa Kristohanong paghigugma ug pagserbisyo niadtong naglibut kanato. Samtang gitan-aw nato ang mga kalahian sa edad, kultura, ug kahimtang sa pag-alima ug pagserbisyo sa usag usa, mapuno kita sa tiunay nga gugma ni Kristo ug sa inspirasyon aron mahibalo kita kanus-a ug kinsa ang alagaran.

Akong ipaabut kaninyo ang pagdapit nga gihimo na kaniadto sa kinatibuk-ang presidente sa Relief Society nga miingon, “Ako modapit kaninyo nga dili lamang mas mohigugma sa usag usa apan higugmaon ang usag usa og *mas labaw pa*.”⁷ Unta atong maamguhan kon unsa gayud nato kakinahanglan ang usag usa, ug unta kitang tanan mas maghigugmaay sa usag usa, mao ang akong pag-ampo sa pangalan ni Jesukristo, amen. ■

MUBO NGA MGA SULAT

1. Tan-awa sa Barbara B. Smith, “The Bonds of Sisterhood,” *Ensign*, Mar. 1983, 20–23.
2. Doktrina ug mga Pakigsaad 38:27.
3. Patricia T. Holland, “One Thing Needful: Becoming Women of Greater Faith in Christ,” *Ensign*, Okt. 1987, 29.
4. Lucas 1:7.
5. “As Sisters in Zion,” *Hymns*, nu. 309.
6. *Glimpses into the Life and Heart of Marjorie Pay Hinckley*, ed. Virginia H. Pearce (1999), 254–55.
7. Bonnie D. Parkin, “Pagpili sa Gugmang Putli: Nianang Maayong Bahin,” *Liahona*, Nob. 2003, 106.



Ni Linda K. Burton

Kinatibuk-ang Presidente sa Relief Society

Gikinahanglan: Mga Kamot ug mga Kasingkasing sa Pagpadali sa Buhat

Makatanyag kita sa atong mga kamot sa pagtabang ug sa mga kasingkasing sa pagpadali sa talagsaong buhat sa Langitnong Amahan.

Minahal nga mga sister, gimahal namo kamo! Samtang nagtan-aw kita sa nindot nga video, nakita ba ninyo ang inyong kaugalingong kamot nga mitabang sa usa ka tawo diha sa dalan sa pakig-saad? Naghunahuna ko sa batang babaye sa Primary nga ginganlan og Brynn nga usa ray kamot, ug gigamit kana sa pagtabang sa pagpanalangin sa iyang pamilya ug sa iyang mga higala—mga Santos sa Ulahing mga Adlaw ug sa laing tinuohan. Dili ba matahum siya? Ug kamo usab! Mga sister, makatanyag kita sa atong mga kamot sa pagtabang ug sa mga kasingkasing sa pagpadali sa talagsaong buhat sa Langitnong Amahan.

Sama sa matinud-anong mga sister diha sa kasulatan, pareha nila ni Eva, Sarah, Maria, ug daghan pa, nasayud sa ilang pagkatawo ug katuyoan, si Brynn nasayud nga siya anak sa

Dios.¹ Kita usab mahimong masayud sa atong balaanong panulundon isip pinalanggang anak nga mga babaye sa Dios ug sa mahinungdanong buhat



nga Iyang ipahimo kanato.

Ang Manluluwas mitudlo, “Kon tuyoon ni bisan kinsa ang pagbuhat sa kabubut-on sa Dios, nan iyang mahibaloan ang akong gitudlo.”² Unsa ang kinahanglan natong masayran ug buhaton “nga makabalik sa Amahang Langitnon?”³ Makakat-on kita sa istorya sa batan-ong adunahan nga nangutana ni Jesus unsay iyang buhaton aron makadawat og kinabuhing dayon.

Si Jesus mitubag kaniya, “Kon gusto kang mosulod sa kinabuhi, bantayi ang mga sugo.”

Ang batan-ong lalaki nangutana Kaniya kon hain niini. Unya si Jesus mipahinumdum niya sa pipila sa Napulo ka mga Sugo nga pamilyar nato.

Ang batan-ong lalaki mitubag, “Kang tanan ako nang ginabantayan: unsa pa may akong kulang?”

Si Jesus miingon, “Kon buot ikaw mamahingpit, lumakaw ka, ibaligya ang imong kabtangan, ug ang halin ihatag sa mga kabus, ug makabaton kag bahandi didto sa langit: ug unya umanhi ka ug sumunod kanako.”⁴

Si Jesus mitawag kaniya nga mahimong kabahin sa Iyang buhat—ang buhat sa usa ka disipulo. Ang atong buhat susama. Kita kinahanglang “mosalikway sa mga butang niini [nga] kalibutan, . . . [mo]hupot ngadto sa [atong] mga pakigsaad,”⁵ ug moduol kang Kristo ug mosunod Kaniya. Mao kana ang buhaton sa mga disipulo!

Karon, mga sister, dili kita mobati og dili maayo sa atong kaugalingon tungod sa gisulti sa Manluluwas sa batan-ong adunahan bahin sa pagkahimong perpekto. Ang pulong *perpekto* niini nga asoy gihubad gikan sa pulong nga Griyego nga nagpasabut nga “kompleto.” Kon maningkamot kita sa atong labing maayo sa pagpadayon sa unahan sa dalan sa pakigsaad, mahimo kita nga mas completo ug perpekto niini nga kinabuhi.

Sama sa batan-ong adunahan sa panahon ni Jesus, usahay matintal kita nga dili mopadayon o mobalik sa agi tungod kay tingali naghunahuna kita nga dili makahimo niini nga mag-inusara. Ug sakto kita! Dili kita makahimo sa lisud nga mga butang

nga gipabuhat kanato kon walay tabang. Ang tabang moabut pinaagi sa Pag-ula ni Jesukristo, sa giya sa Espiritu Santo, ug sa matinabangong mga kamot sa uban.

Usa ka matinud-anong single nga sister bag-ohay lang mipamatuod nga pinaagi sa Pag-ula, nakaplagan niya ang kalig-on sa paggamit sa iyang matinabangong mga kamot ug andam nga kasingkasing sa pagpadako sa upat ka mga anak sa iyang igsoong babaye nga namatay sa kanser. Kana nakapahinumdom nako sa gisulti ni Elder Neal A. Maxwell: “Ang tanan nga sayon nga mga butang nga angayng buhaton sa Simbahan nahimo na.

Gikan karon, mas lisud na, ug ang atong pagkamasulundon masulayan sa pipila ka paagi.”⁶ Gipadala kamo dinhi sa yuta niini nga dispensasyon tungod kon si kinsa kamo ug kon sa unsa nga buhat kamo giandam! Bisan unsa pa ang pagpanglingla ni Satanas kanato sa paghunahuna kon kinsa kita, ang atong tinuod nga pagkatawo mao nga usa ka disipulo ni Jesukristo!

Si Mormon usa ka tinuod nga disipulo nga nagpuyo sa panahon diin ang “matag kasingkasing gipatig-a, . . . ug walay sama ka hilabihan nga pagkadautan taliwala sa tanan nga mga anak ni Lehi.”⁷ Unsa kaha kon nagpuyo kamo nianang panahona? Ug sa gihapon si Mormon kusganong



Gilbert, Arizona, USA

namahayag, “Tan-awa, ako usa ka tinun-an ni Jesukristo, ang Anak sa Dios.”⁸

Dili ba mo ganahan ni Mormon? Nasayud siya kon kinsa siya ug kon unsa ang iyang misyon ug wala malingka sa dautan nga naglibut niya. Gani, gikonsiderar niya ang iyang calling nga usa ka gasa.⁹

Hunahunaa kon unsa ka dakong panalangin nga tawagon aron ihatag ang atong gasa sa inadlaw-adlaw nga pagkadisipulo sa Ginoo, mamahayag sa pulong ug sa buhat nga, “Tan-awa, ako usa ka tinun-an ni Jesukristo!”

Ganahan ko sa istorya nga gisulti ni Presidente Boyd K. Packer bahin sa usa

ka sister nga gibugalbugalan tungod sa pagsunod sa tambag sa propeta nga magtipig og pagkaon. Ang tawo nga misaway misugyot nga kon moabut ang lisud nga panahon, ang iyang mga lider mohangyo niya nga ipakigbahin sa uban ang iyang gipundo nga pagkaon. Ang iyang yano ug lig-ong tubag isip disipulo mao, “Maayo na lang duna koy madala.”¹⁰

Gihigugma nako ang mga babaye sa Simbahan, mga batan-on ug tigulang. Nakita nako ang inyong kalig-on. Nakita nako ang inyong hugot nga pagtuo. Kamo dunay ikahatag ug andam nga mohatag niini. Gihimo ninyo kini nga walay pagpahibalo o pagpasikat, naghatag og pagtagad sa Dios nga atong gisimba, dili sa inyong kaugalingon, ug wala maghunahuna og balus.¹¹ Kana ang gihimo sa mga disipulo!

Bag-ohay lang nakahimamat ko og batan-ong babaye sa Pilipinas nga ang pamilya nahimong dili aktibo sa Simbahan dihang 7 anyos pa siya, pasagdan ra siya nga maglakaw sa kuyaw nga dalan paingon sa simbahan kada semana. Misulti siya kon nganong sa edad nga 14 nakahukom siya nga magmatinud-anon sa iyang mga pakigsaad aron takus siya nga mopadako sa iyang umaabut nga pamilya sa panimalay nga “sa priesthood gipanalanginan.”¹² Ang labing maayong paagi sa paglig-on sa panimalay, karon o sa umaabut, mao ang pagtuman sa mga pakigsaad, mga saad nga atong gihimo sa usag usa ug sa Dios.




Mao kana ang buhaton sa mga disipulo!

Usa ka matinud-anong sister nga Japanese ug ang iyang bana mibisita sa among misyon sa Korea. Dili siya makasulti og Korean ug dili kaayo makasulti og Iningles, apan siya dunay andam nga kasingkasing sa paggamit sa iyang talagsaong gasa ug matinabangong mga kamot sa paghimo sa buhat sa Ginoo. Mao kana ang buhaton sa mga disipulo! Gitudloan niya ang among mga misyonaryo unsaon paghimo og yanong piraso sa origami—usa ka ba-ba nga moabli ug motak-om. Unya migamit siya og pipila ka pulong nga Iningles nga iyang nahibaloan sa pagtudlo sa mga misyonaryo nga “ablihan ang ilang ba-ba” aron isangyaw ang ebanghelyo—ang leksyon nga dili nila makalimtan, ni akong makalimtan.

Handurawa og kadali nga kamo ug ako nagbarug uban sa minilyon ka mga kaigsoonan sa Iyang Simbahan, maisugong moadto, mohimo sa gibuhat sa mga disipulo—nagserbisyo ug nahigugma sama sa Manluluwas. Unsa ang kahulugan niini nganha kaninyo nga mahimong disipulo ni Jesukristo?

Ang Mormon Helping Hands nga mga vest ug mga t-shirt gisul-ob sa gatasan ka libo nga mga disipulo ni Jesukristo nga wala maghunahuna sa kaugalingon nga mihangup sa oportunidad nga moserbisyo. Apan dunay uban pang mga paagi sa pagserbisyo isip maunungon nga mga disipulo. Paghunahuna uban nako og pipila ka posibling mga karatula sa “tabang nga gikinahanglan” kalabut sa buhat sa kaluwasan:

- Tabang nga gikinahanglan: mga ginikanan nga mopadako sa ilang mga anak diha sa kahayag ug kamatuoran
- Tabang nga gikinahanglan: mga anak, mga managsuon, mga iyaan ug uyoan, mga ig-agaw, mga apohan, ug tinuod nga mga higala nga moserbisyo isip tigtudlo ug motabang diha sa dalan sa pakigsaad
- Tabang nga gikinahanglan: kad-tong maminaw sa mga pag-aghat sa Espiritu Santo ug molihok base sa mga panghunahuna nga nadawat



- Tabang nga gikinahanglan: kad-tong mosunod sa ebanghelyo matag adlaw sa ginagmay ug yano nga mga paagi
- Tabang nga gikinahanglan: mga family history ug temple worker nga mosumpay sa mga pamilya sa hangtud
- Tabang nga gikinahanglan: mga misyonaryo ug mga miyembro nga mosangyaw sa “maayong mga balita”—ang ebanghelyo ni Jesukristo
- Tabang nga gikinahanglan: mga tigluwas nga mangita sa mga nahisalaag
- Tabang nga gikinahanglan: mga motuman sa pakigsaad nga lig-ong mobarug alang sa kamatuoran ug matarung
- Tabang nga gikinahanglan: tinuod nga mga disipulo ni Ginoong Jesukristo

Katuigan ang milabay, si Elder M. Russell Ballard mihimo og kusganong hangyo sa mga sister sa Simbahan dihang miingon siya:

“Tali karon ug sa panahon sa pag-anhi pag-usab sa Ginoo, nagkinahanglan Siya og mga babaye diha sa matag pamilya, matag ward, matag komunidad, matag nasud nga maglakaw sa pagkamatarung ug moingon pinaagi sa ilang mga pulong ug mga lihok, ‘Ania ako, ipadala ako.’

“Ang akong pangutana mao, ‘Usa ba kamo niana nga mga babaye?’¹³ Unta matag usa nato motubag og

kusog nga “Oo!” Tapuson ko kini uban sa kanta sa Primary:

Kita [anak nga mga babaye] sa pakigsaad nga may gugmang ikahatag.

Motudlo sa ebanghelyo pinaagi sa ehemplo.

Sa pulong ug sa buhat, kita mopamatuod:

Kita nagtuo, ug nagserbisyo ni Jesukristo.¹⁴

Isip tinuod nga mga disipulo, unta atong itanyag ang atong andam nga mga kasingkasing ug matinabangong mga kamot sa pagpadali sa Iyang buhat. Dili igsapayan kon, sama ni Brynn, kita adunay usa ra ka kamot. Dili igsapayan kon kita dili pa perpekto ug kompleto. Kita maunungon nga mga disipulo nga motabang sa usag usa diha sa dalan. Ang atong panag-igsoonay moabut ngadto sa mga henerasyon niadtong matinud-anong mga sister nga nag-una kanato. Sa pagtinabangay, isip mga sister ug sa pakighi-usa uban sa buhing mga propeta, mga manalagna, ug mga tigpadayag uban sa gipahiuli nga mga yawe sa priesthood, makalakaw kita isip usa, isip mga disipulo, isip mga sulugoon nga may andam nga kasingkasing ug mga kamot sa pagpadali sa buhat sa kaluwasan. Kon kita mohimo niini, kita mahisama sa Manluluwas. Ako mopamatuod sa pangalan ni Jesukristo, amen. ■

MUBO NGA MGA SULAT

1. Tan-awa sa “Brynn,” [lds.org/media-library/video/2011-01-007-brynn](https://www.lds.org/media-library/video/2011-01-007-brynn).
2. Juan 7:17.
3. “Ako Anak sa Dios,” *Hymns*, nu. 301; o *Songbook sa mga Bata*, 2–3.
4. Tan-awa sa Mateo 19:16–22.
5. Doktrina ug mga Pakigsaad 25:10, 13.
6. Neal A. Maxwell, “The Old Testament: Relevancy within Antiquity” (pakigpulong ngadto sa mga religious educator sa Church Educational System, Ago. 16, 1979), 4; si.lds.org.
7. Mormon 4:11–12.
8. 3 Nephi 5:13.
9. Tan-awa sa Moroni 7:2.
10. Sa Boyd K. Packer, “The Circle of Sisters,” *Ensign*, Nob. 1980, 111.
11. Tan-awa sa 2 Nephi 26:29–30.
12. “Ang Gugma Gipamulong Dinhi,” *Songbook sa mga Bata*, 102–103.
13. M. Russell Ballard, “Mga Babaye sa Pagkamatarung,” *Liahona*, Dis. 2002, 39.
14. “Nagkahiusa sa Tibuok Kalibutan,” *Ang Higala*, Okt. 2003, H12–13.



Ni Presidente Henry B. Eyring
Unang Magtatambag sa Unang Kapangulohan

Anak nga mga Babaye sa Pakigsaad

Ang dalan . . . nga angay natong subayon sa atong panaw balik sa atong Langitnong Amahan . . . gimarkahan og sagradong mga pakigsaad uban sa Dios.

Natudloan kita karong gabhiona uban sa espirituhanong gahum. Manghinaut ko nga ang mga gipamulong niining talagsaong mga lider nga sister motuhop sa inyong kasingkasing ingon nga kini mituhop ngari kanako.

Makasaysayanon kini nga miting. Ang tanang kababayan-an sa Simbahan nga nag-edad og walo ka tuig pataas gidapit sa pag-apil kanato karong gabhiona. Daghan kanato ang nag-ampo nga ang Espiritu Santo makig-uban kanato. Kana nga panalangin gihatag samtang naminaw kita niining mga sister nga namulong ug naminaw sa makadasig nga musika. Akong pag-ampo nga ang Espiritu padayong makig-uban kanato samtang mohatag ko og pipila ka mga pulong sa pagdasig ug pagpamatuod agig dugang sa unsay gipamulong na—ug ilabi na ang pagpamatuod nga unsay gisulti ngari kanato mao ang gusto sa Ginoo nga atong madungog.

Ako mamulong karong gabhiona kabahin sa dalan—nga sa ingon ka nindot nga mga paagi gihulagway karon—nga angay natong subayon sa atong panaw balik sa atong

Langitnong Amahan. Kana nga dalan gimarkahan og sagradong mga pakigsaad uban sa Dios. Akong hisgutan nganha ninyo ang bahin sa kalipay sa paghimo ug pagtuman niana nga mga pakigsaad ug pagtabang sa uban sa pagtuman niini.

Daghan kaninyo ang nabunyagan bag-o lang ug nakadawat sa gasa sa Espiritu Santo pinaagi sa pagpandong sa mga kamot. Kana presko pa sa inyong panumduman. Ang uban dugay nang

nabunyagan, mao nga ang panumduman sa mga pagbati niana nga kasinatian sa pakigsaad tingali hanap-hanap na, apan ang uban nianang mga pagbati manumbalik kon madungog ninyo ang mga pag-ampo sa sakrament.

Walay duha kanato nga pareho og panumduman sa adlaw nga atong gihimo kanang sagradong pakigsaad sa bunyag ug nakadawat sa gasa sa Espiritu Santo. Apan matag usa kanato mibati sa pag-aprubar sa Dios. Ug atong gibati ang tinguha sa pagpasaylo ug mapasaylo ug ang dakong determinasyon sa paghimo sa husto.

Kon unsa ka lawom ang pagtuhop niini diha sa inyong kasingkasing mag-agad kon giunsa kamo sa pagandam pinaagi sa mahigugmaong mga tawo. Manghinaut ko nga kamo nga bag-o pang mipasakop sa gingharian may panalangin nga katapad ang inyong inahan. Kon mao, mahimo mong mopahiyom niya agi og pasalamat karon dayon. Akong mahinumduman ang pagbati sa kalipay ug pasalamat samtang naglingkod ko luyo sa akong mama sa among pagpamauli human sa akong bunyag didto sa Philadelphia, Pennsylvania.

Ang akong mama mao gayud ang miandam nako og maayo sa paghimo niana nga pakigsaad ug sa tanan pang butang nga misunod. Matinud-anon siya ngadto niini nga buluhaton gikan sa Ginoo:

“Ug usab, tungod kay ang mga ginikanan adunay mga anak diha sa



Raymond, Alberta, Canada



Palmyra, New York, USA

Zion, o diha sa bisan diin sa iyang mga istaka nga natukod, nga wala magtudlo kanila sa pagsabut sa doktrina sa paghinulsol, hugot nga pagtuo diha ni Kristo ang Anak sa buhi nga Dios, ug sa bunyag ug sa gasa sa Espiritu Santo pinaagi sa pagpandong sa mga kamot, kon walo ka tuig ang panuigon, ang sala anaa diha sa mga ulo sa mga ginikanan.

“Kay kini mao ang balaod ngadto sa mga lumulupyong sa Zion, o diha sa bisan diin sa iyang mga istaka nga natukod.

“Ug ang ilang mga anak pagabun-yagan alang sa kapasayloan sa ilang mga sala kon moabut sa walo ka tuig ang panuigon, ug makadawat sa [Espiritu Santo].”¹

Nahimo sa akong inahan ang iyang bahin. Iyang naandam ang iyang mga anak sa mga pulong sama sa gisulti ni Alma, nga narekord sa Basahon ni Mormon:

“Ug nahinabo nga siya miingon ngadto kanila: Tan-awa, ania ang mga katubigan sa Mormon (kay sa ingon sila gitawag) ug karon, ingon nga kamo mga matinguhaon sa pag-ipon ngadto sa panon sa Dios, ug pagataw-gon nga iyang mga katawhan, ug andam sa pagtambayayong sa usag usa nga mga alantuson, nga sila mahimo nga magaan;

“Oo, ug mga andam sa pagbangutan uban niadto nga nagbangutan; oo, ug sa paghupay niadto nga

nagkinahanglan sa kahupayan, ug mobarug ingon nga mga saksi sa Dios sa tanan nga mga panahon ug diha sa tanan nga mga butang, ug diha sa tanan nga mga dapit nga kamo mahimo nga maanaa, bisan hangtud sa kamatayon, nga kamo mahimo nga matubos sa Dios, ug malakip uban niadto nga diha sa unang pagkabanhaw, nga kamo makabaton og kinabuhi nga dayon—

“Karon ako moingon nganha kaninyo, kon mao kini ang tinguha sa inyong mga kasingkasing, unsay anaa kaninyo batok sa pagpabun-yag diha sa ngalan sa Ginoo, ingon og usa ka saksi sa iyang atubangan nga kamo nakasulod ngadto sa usa ka pakigsaad uban kaniya, nga kamo mag-alagad kaniya ug maghupot sa iyang mga sugo, nga siya unta mobu-bu sa kabuhong sa iyang Espiritu diha kaninyo?

“Ug karon sa diha nga ang mga katawhan nakadungog niini nga mga pulong, sila namakpak sa ilang mga kamot tungod sa hingpit nga kalipay, ug misinggit: Kini mao ang tinguha sa among mga kasingkasing.”²

Tingali wala kamo mamakpak dihang una ninyong nadungog kanang pagdapit nga makigsaad pinaagi sa bunyag, apan sigurado nga kamo mibati sa gugma sa Manluluwas ug sa dakong komitment sa pag-alima sa uban alang Kaniya. Makaingon ko nga “sigurado” kay kana nga mga pagbati mituhop gayud sa kasingkasing sa

tanang anak nga mga babaye sa Langitnong Amahan. Kabahin kana sa inyong balaang panulundon gikan Kaniya.

Iya kamong gitudloan sa wala pa kamo mianhi niini nga kinabuhi. Gitabangan Niya kamo nga makasabut ug modawat nga kamo adunay mga pagsulay, ug mga oportunidad nga haum gayud alang kaninyo. Inyong nahibaloan nga ang atong Amahan adunay usa ka plano sa kalipay aron luwas kamong makasugakod nianang mga pagsulay ug kamo motabang sa uban aron luwas silang makasugakod sa ilang mga pagsulay. Kini nga plano gimarkahan pinaagi sa mga pakigsaad uban sa Dios.

Atong kabubut-on ang pagpili kon kita mobuhat ba ug motuman nianang mga pakigsaad. Diyutay ra sa Iyang anak nga mga babaye ang may oportunidad niining kinabuhia sa pagkat-on niana nga mga pakigsaad. Usa kamo niadtong diyutay ra nga bulahan. Kamong minahal nga mga sister, matag usa kaninyo anak nga babaye sa pakigsaad.

Gitudloan kamo sa Langitnong Amahan sa wala pa kamo matawo bahin sa maagian ninyong mga kasi-natian dihang kamo mibiya Kaniya ug mianhi sa yuta. Gitudloan kamo nga ang dalan balik ngadto Kaniya dili sayon. Nasayud Siya nga lisud kaayo alang ninyo ang paghimo sa panaw nga walay tabang.

Gipanalanginan kamo dili lang sa higayon nga makahimo niana nga mga pakigsaad niining kinabuhia apan gilibutan usab kamo sa uban nga makatabang—kinsa, sama kaninyo, anak nga mga babaye sa Langitnong Amahan sa pakigsaad.

Tanan kamo mibati sa panalangin nga makig-uban sa pundok sa anak nga mga babaye sa Dios karong gabhiona kinsa ubos usab sa pakigsaad aron motabang ug mogiya kaninyo sumala sa ilang gisaad nga buhaton. Akong nakita ang unsay inyong nakita samtang gituman sa mga sister sa pakigsaad kana nga komitment sa paghupay ug pagtabang—ug pagbuhat niini uban sa pahiyom.

Nahinumdom ko sa pahiyom ni Sister Ruby Haight. Asawa siya ni

Elder David B. Haight, nga usa ka sakop sa Korum sa Napulog Duha ka mga Apostoles. Isip usa ka batan-on nagserbisyo siya isip presidente sa Palo Alto Stake sa California. Nag-ampo siya, ug may kabalaka, bahin sa batang mga babaye sa klase sa Mia Maid sa iyang ward.

Mao nga si Presidente Haight nadasig sa paghangyo sa bishop nga si Ruby Haight tawagon nga motudlo nianang batan-ong mga babaye. Nasayud siya nga mahimo siyang saksi sa Dios kinsa modasig, mohupay, ug mohigugma sa batang mga babaye niana nga klase.

Si Sister Haight may mga 30 ka tuig ang pagkamagulang sa batang mga babaye nga iyang gitudloan. Gani 40 ka tuig human siya nakatudlo kanila, matag higayon nga magkita sila sa akong asawa, kinsa usa sa batang mga babaye sa iyang klase, mogakus siya, mopahiyom, ug moingon kang Kathy, “Ah! Ang akong Mia Maid.” Mas labaw pa ang akong nakita kay sa iyang pahiyom. Akong gibati ang dako niyang gugma sa usa ka sister nga iya gihapong gipangga sama sa kaugalingon niyang anak. Ang iyang pahiyom ug pag-abi-abi naggikan sa pagkakita nga ang sister ug anak nga babaye sa Dios nagsubay pa sa dalan sa pakigsaad pauli sa panimalay.

Ang Langitnong Amahan mopahiyom usab kaninyo kon kamo Iyang makita nga mitabang og usa sa Iyang anak nga mga babaye subay sa dalan sa pakigsaad padulong sa kinabuhing dayon. Ug malipay Siya sa matag higayon nga maningkamot kamo sa pagpili sa husto. Nakita Niya dili lang kay unsa kamo apan kon unsay posible usab ninyong makab-ot.

Tingali duna kamoy mga ginikanan nga naghunahuna nga mahimo kamong mas maayo kay sa inyong gituhan. Ingon niana ang akong mama.

Ang wala nako mahibaloi sa bata pa ko mao nga ang akong Langitnong Amahan, ang inyong Langitnong Amahan, nakakita sa mas dakong potensyal sa Iyang mga anak kay kanato o gani sa unsay nakita sa atong mga inahan kanato. Ug sa matag higayon nga mouswag kamo niana nga



dalan padulong sa inyong potensyal, makahatag kini Kaniya og kalipay. Ug inyong bation ang Iyang pag-aprubar.

Iyang makita kana nga mahimayang potensyal sa tanan Niyang anak nga mga babaye, bisan asa sila. Karon, dako kana nga responsibilidad sa matag usa kaninyo. Gilauman Niya nga tagdon ninyo ang matag tawo nga inyong mahimamat isip anak sa Dios. Mao kana ang hinungdan nga kita Iyang gisugo sa paghigugma sa atong mga silingan sama sa paghigugma sa atong kaugalingon ug sa pagpasaylo kanila. Ang inyong kamabination ug pagpasaylo sa uban miabut isip balaan nga kabilin gikan Kaniya isip Iyang anak. Ang matag tawo nga inyong mahimamat Iyang pinalangga nga espiritung anak.

Samtang mobati kamo nianang talagsaong panag-igsoonay sa kababayen-an, ang atong gituohan nga mobungkag kanato mawala. Sama pananglit, ang mga sister nga mas bata o mas magulang mopakigbahin sa ilang mga pagbati nga naglaum nga masabtan ug madawat. Mas daghan ang inyong pagkapareho isip anak nga mga babaye sa Dios kay sa pagkalahi ninyo.

Niana nga punto, ang batan-ong mga babaye kinahanglang mahinamon

sa ilang pagka-Relief Society isip oportunidad nga mas modaghan ang mga sister nga ilang mailhan, madayeg, ug mahigugma.

Kanang sama nga kapasidad nga makakita unsay posible nga atong makab-ot nagkadaghan diha sa mga pamilya ug sa Primary. Nanghitabo kana sa mga family home evening ug sa mga programa sa Primary. Nadasig ang gagmayng mga bata sa pagsulti og mahinungdanon ug katingalahang mga butang, sama sa ilang gihimo sa dihang ang Manluluwas miluag sa ilang mga dila dihang nanudlo Siya kanila human Siya nabanhaw.³

Samtang si Satanas mahimong moataki sa mga sister sa bata pa, ang Ginoo mibayaw sa mga sister sa mas taas pa nga lebel sa espiritwalidad. Sama pananglit, ang batan-ong mga babaye nagtudlo sa ilang mga inahan unsaon paggamit ang FamilySearch sa pagpangita ug pagluwas sa ilang mga katigulangan. Ang ubang batan-ong mga sister nga akong nailhan mipili nga moadto sa templo og sayo sa buntag aron sa pagpabunyag alang sa mga patay sa walay pagpamugos lapas sa espiritu ni Elijah.

Sa mga misyon dinhi sa yuta, ang mga sister gitawag nga moserbisyo isip mga lider. Ang Ginoo mimugna



motabang kaniya ug sa iyang pamilya bisan unsa nga mga kasubo ug kasagmuyo ang moabut. Nahibalo si Eva nga makasalig siya Kanila.

“Sumalig ka sa Ginoo sa bug-os mong kasingkasing; Ug ayaw pagsalig sa imong kaugalingong salabutan.

“Sa tanan nimong mga dalan ilha siya, Ug siya magamando sa imong mga alagianan.”⁷

Nasayud ko nga si Eva misagubang og mga kasubo ug kasagmuyo, apan ako nasayud usab nga nakaplagan niya ang kalipay diha sa kahibalo nga siya ug ang iyang pamilya makabalik og puyo uban sa Dios. Nasayud ko nga daghan kaninyo nga ania dinhi nagsagubang og mga kasubo ug kasagmuyo. Akong ibilin kaninyo ang akong panalangin nga, sama ni Eva, mobati kamo sa sama nga kalipay nga iyang gibati samtang magbiyahe kamo pauli.

Duna koy sigurado nga pagsaksi nga ang Dios nga Amahan mapinangaog nagbantay kaninyo. Matag usa ninyo Iyang gihigugma. Kamo Iyang anak nga mga babaye sa pakigsaad. Kay Siya nahigugma kaninyo, Iyang ihatag ang tabang nga inyong gikinahanglan aron kamo ug ang uban mo-uswag padulong sa Iyang presensya.

Nasayud ko nga ang Manluluwas mibayad sa bugti sa tanan natong mga sala ug ang Espiritu Santo mopamatuod sa kamatuoran. Gibati ninyo kana nga kahupayan dinhi niini nga miting. Ako adunay pagpamatuod nga ang tanang mga yawe nga mobugkos sa sagradong mga pakigsaad gipahiulna. Gihuptan ug gigamit kini karon sa atong buhi nga propeta, si Presidente Thomas S. Monson. Ibilin nako kining mga pulong sa kahupayan ug panghinaut nganha kaninyo, Iyang pinalanggang anak nga mga babaye sa pakigsaad, sa sagradong pangalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 68:25–27.
2. Mosiah 18:8–11.
3. Tan-awa sa 3 Nephi 26:14.
4. Russell M. Nelson, “Constancy amid Change,” *Ensign*, Nob. 1993, 34.
5. Abraham 5:14.
6. Moises 5:11.
7. Mga Proverbio 3:5–6.

og panginahanglan alang sa ilang serbisyo pinaagi sa pagtandog sa daghang kasingkasing sa mga sister sa pagserbisyo. Ubay-ubay sa mga presidente sa misyon nakakita nga ang mga sister nga misyonaryo nahimong mas impluwensyal nga tig-proselyte ug ilabi na isip tig-alima nga mga lider.

Nagserbisyo man kamo isip full-time nga misyonaryo o dili, maangkon ninyo ang sama nga abilidad sa pagpalambo sa inyong kaminyoon ug kapasidad sa pagpadako og madungganong mga anak pinaagi sa pagsunod sa mga ehemplo sa talagsaong mga babaye.

Hunahunaa si Eva, ang inahan sa tanang buhi. Si Elder Russell M. Nelson miingon bahin ni Eva: “Kita ug ang tanang katawhan nabulahan sa kahangturan tungod sa dakong kaisug ug kaalam ni Eva. Sa pagkaon og una sa prutas, gihimo niya ang angayan nga buhaton. Si Adan usab maalamon sa paghimo sa ingon.”⁴

Ang matag anak nga babaye ni Eva adunay potensyal sa pagdala sa parehong panalangin ngadto sa iyang pamilya sama sa gidala ni Eva ngadto sa iyang pamilya. Importante kaayo siya sa pag-establisar sa mga pamilya diin mao kini ang report sa paglalang kaniya: “Ug ang mga Dios miingon:

Maghimo kita og katabang alang sa lalaki, kay dili maayo nga ang lalaki mag-inusara, busa mag-umol kita og katabang alang kaniya.”⁵

Wala kita masayud sa tanan nga gikatabang ni Eva ngadto ni Adan ug sa ilang pamilya. Apan nasayud kita sa usa ka talagsaong gasa nga gi-hatag ni Eva, nga matag usa kaninyo makahatag usab: mitabang si Eva sa iyang pamilya nga makakita sa dalan pauli dihang ang dalan sa unahan daw lisud. “Ug si Eva, iyang asawa, nakadungog niining tanan nga mga butang ug nalipay, nag-ingon: Kon dili pa unta sa atong kalapasan kita dili unta makaangkon og binhi, ug dili gayud masayud sa maayo ug sa dautan, ug sa kalipay sa atong katubsan, ug sa kinabuhi nga dayon nga gihatag sa Dios ngadto sa tanan nga masulundon.”⁶

Anaa ang iyang ehemplo nga angayan ninyong sundon.

Pinaagi sa pagpadayag, nahibaloan ni Eva ang dalan pabalik sa Dios. Nasayud siya nga ang Pag-ula ni Jesukristo nakahimong posible sa kinabuhing dayon sa mga pamilya. Sigurado si Eva, sama usab kaninyo, nga dihang gituman niya ang iyang mga pakigsaad uban sa iyang Langitnong Amahan, ang Manunubos ug ang Espiritu Santo

Indeks sa mga Istorya sa Komperensya

Ang mosunod usa ka lista sa pinili nga mga kasinatian gikan sa mga pakigpulong sa kinatibuk-ang komperensya nga magamit sa personal nga pagtuon, family home evening, ug ubang pagtudlo. Ang numero nagpasabut sa unang pahina sa pakigpulong.

MAMUMULONG ISTORYA

Neil L. Andersen	(18) Usa ka Laurel mibarug alang sa tradisyonal nga mga kaminyoon bisan og gibiy-biy ug gibalikas.
M. Russell Ballard	(78) Si M. Russell Ballard “mi-follow-up” ni Barbara Bowen, kinsa iyang nahimamat sa sayaw sa kolehiyo, nagsugod sa pagpakig-date, ug sa katapusan naminyo. Usa ka otso-anyos nga batang lalaki midapit sa mga higala ug mga higala sa iyang pamilya ngadto sa ward open house sa Buenos Aires.
David A. Bednar	(87) Usa ka truck nakakupot sa snow human kini napuno sa bug-at nga karga nga kahoy.
Linda K. Burton	(122) Usa ka batan-ong babaye sa Pilipinas nga nagpabiling nagmatinuoron sa iyang mga pakigsaad. Usa ka sister nga Japanese mibisita sa Korea nagtudlo sa mga misionaryo.
Quentin L. Cook	(44) Si Vilate Kimball misulat sa iyang bana mahitungod sa “mahimayaong doktrina” sa bunyag alang sa mga patay, ingon nga gipadayag pinaagi ni Joseph Smith.
Henry B. Eyring	(22) Si Heinrich Eyring milalin ngadto sa Amerika, miapil sa Simbahan, nagserbisyo sa tulo ka matitud-anong misyon, ug mibilin sa iyang pamilya og panulundon sa paglaum. (62) Nahulma ang kinabuhi ni Henry B. Eyring tungod sa mga bayani sa pagkabatan-on: ang iyang amahan, iyang mga lider sa Aaronic Priesthood, usa ka US marine, ug baseball player nga si Joe DiMaggio. (125) Kwarenta ka tuig human gitawag sa pagtudlo ni Kathy Johnson (umaabut nga asawa ni Henry B. Eyring), si Ruby Haight nagpakita gihapon og gugma ug kahingawa alang kaniya.
Donald L. Hallstrom	(53) Bisan pa sa pisikal nga limitasyon, usa ka matitud-anon nga lalaki sa India nagserbisyo og misyon ug nag-andam sa iyang pamilya nga mabugkos sa Templo sa Hong Kong China.
Jeffrey R. Holland	(6) Duha ka mga sister nga misionaryo mipahilayo nga walay gisulti nga butang ngadto sa usa ka tawo kinsa namalikas kanila, milabay og pagkaon kanila, ug misulay sa pag-igo sa usa kanila.
Thomas S. Monson	(66) Usa ka 18 anyos nga navy seaman nag-ampo kada gabii bisan pa sa mga pagbiay-biy sa uban sa iyang pundok. Usa ka batan-ong lalaki nagpamatudot atol sa sakrament miting apan nakita nianang adlaw nga nanigarilyo. (91) Duha ka mga babaye mahimong mga higala sa tibuok kinabuhi human ang usa miatabang sa lain nga makat-on sa iyang trabaho isip usa ka mananahi sa usa ka tahianan. Ang mga pasahero sa usa ka biyahe sa eroplano wala moreklamo sa dihang ang ilang eroplano mitipas sa pagkuha og usa ka batang lalaki nga samaran ug midala kaniya sa ospital. Usa ka babaye nagbasol nga wala mosugot sa usa ka silingan nga moagi sa iyang yuta.
Russell M. Nelson	(29) Ang anak nga babaye ni Russell M. Nelson nga si Emily nagpakita og kaisug ug hugot nga pagtuo samtang himatyon sa kanser.
Bonnie L. Oscarson	(119) Usa ka batan-ong babaye nakat-on og hingpit nga kalipay sa pagserbisyo sa uban samtang siya og ang iyang inahan nag-amuma sa usa ka babaye nga dunay multiple sclerosis. Usa ka 81-anyos nga sister gitawag sa pagpakigbahin sa iyang kaalam, kasinatian, ug ehemplo isip adviser sa Mia Maid sa ward.
Boyd K. Packer	(94) Si Boyd K. Packer nakadawat og usa ka espirituhanon nga pagpakita sa kamatuoran sa ebanghelyo samtang nag-ampo sa usa ka tagoanan atol sa Ikaduhang Gubat sa Kalibutan.
Ronald A. Rasband	(9) Ang batang babaye nga anaa sa fifth-grade ang naabtan sa buhawi ug gipanalipdan sa mga anghel.
Linda S. Reeves	(15) Si Linda S. Reeves nagtudlo sa iyang anak nga babaye kon unsaon pag-angkon og kahupayan pinaagi sa Pag-ula sa Manluwas human ang anak nga babaye nakakita og dili maayong talan-awon sa telebisyon.
Randall L. Ridd	(56) Usa ka batan-ong lalaki mihukom nga magmision kay sa magmision human siya makaangkon og daklit nga panglantaw kon si kinsa siya didto sa kinabuhi sa wala pa dinhi sa yuta.
Richard G. Scott	(32) Ang gugma og ehemplo sa apohang babaye ni Richard G. Scott og sa iyang umaabut nga asawa nakatabang kaniya sa iyang espirituhanon pag-uswag.
Jean A. Stevens	(81) Si Jean A. Stevens naaghat sa pagpasakay sa usa ka batan-ong lalaki kinsa nabiyaan sa bus aron mopauli gikan sa eskwelahan. Ang mga sakop sa pamilyang Gattrell nagpabiling lig-on sa ebanghelyo human si Brother Gattrell nahiling nga dunay agresibo nga kanser.
Gary E. Stevenson	(84) LDS Olympian nga si Noelle Pikus-Pace nakadaog og silver medal sa skeleton human sa katuigan sa pagpraktis og pagpangandam. LDS Olympian nga si Torah Bright nagpakita sa Kristohanong gugma pinaagi sa paggagos sa gikulbaan nga half-pipe competitor.
Michael John U. Teh	(106) Usa ka 73 anyos nga babaye nga Filipino nga padayong nagmatinuoron sa ebanghelyo human sa ling og bagyo nga mipatay sa iyang pamilya.
William R. Walker	(97) Si Robert og Maria Harris magpamiyembro sa Simbahan og magpabiling matinuoron og matitud-anon sa ebanghelyo bisan pa sa kalisud og sa panagbulag.
Claudio D. Zivic	(39) Si Claudio D. Zivic misubay sa sayop nga dalan pinaagi sa pagsunod sa laing nag-hike.
W. Craig Zwick	(41) Si W. Craig Zwick og ang iyang asawa mipakita og gugma sa usag usa human ang asawa milukso uban sa ilang masusong anak nga lalaki gikan sa napuno og aso nga semi-truck.

Paghimo sa Komperensya nga Kabahin sa Atong Kinabuhi

Hunahunaa ang paggamit sa pipila niini nga mga kalihokan ug mga pangutana isip pagsugod sa panaghisgutan o personal nga pagpamalandong.

Para sa mga Bata

- Si Presidente Dieter F. Uchtdorf, Ikaduhang Magtatambag sa Unang Kapangulohan, mitudlo nga kita makapili sa pagpasalamat sa bisan unsang malisud nga mga butang nga mahitabo sa atong mga kinabuhi (pahina 70). Ang pagkama-pasalamaton makatabang nato nga mas magmalipayon ug mas mabination ug adunay hugot nga pagtuo ug pagsalig sa Dios. Unsa ang inyong bation kon kamo mapasalamaton? Unsay inyong mabuhat sa pagbati sa pasalamat matag adlaw?
- Si Bonnie L. Oscarson, kinatibukang presidente sa Young Women, misulti mahitungod ni Sarah, usa ka batan-ong babaye kinsa mikuyog sa iyang mama sa pagtabang ni Brenda, usa ka babaye nga dunay multiple sclerosis. Si Sarah misudlay sa buhok ni Brenda, mibutang og lotion sa iyang mga kamot, mima-sahe sa iyang mga tudlo ug mga bukton, ug mitabang kaniya nga makapaugnat (pahina 119). Paghunahuna og mga paagi nga kamo makaserbisyo. Bisan kon kamo batan-on, daghang mga butang ang inyong mahimo.
- Si Elder L. Tom Perry sa Korum sa

Napulog Duha ka mga Apostoles mitudlo mahitungod kon sa unsang paagi ang nagmaneho mogamit og kasangkapan sa pangabayog ug bokado aron sa paggiya og pundok sa mga kabayo (pahina 100). Ang nagmaneho nasayud sa labing maayo, ug ang kabayo nagsunod sa giya sa nagmaneho, sama nga ang Ginoo nasayud unsa ang labing maayo alang kanato, ug kita magmalipayon kon kita mosunod kaniya. Ang kasangkapan sa pangabayog



ug bokado sama sa aghat sa Espiritu Santo. Kanus-a kamo mibati nga ang Espiritu Santo naggiya kaninyo? Unsay inyong gibati?

- Si Jean A. Stevens, unang magtatambag sa kinatibukang kapangulohan sa Primary, misulti og usa ka istorya mahitungod sa usa ka batang lalaki kinsa nabiyagan sa katapusang bus nianang adlaw ug naglakaw pauli (pahina 81). Sa layo pa kaayo siya sa ila, siya nahadlok ug miluhod aron mag-ampo. Minutos ang milabay, si Sister Stevens naaghat pinaagi sa Espiritu sa paghunong ug sa pagtabang kaniya. Makahunahuna ba kamo sa mga panahon dihang ang Langitnong Amahan mitubag sa inyong mga pag-ampo? Sa unsang paagi kamo mitabang sa pagtubag sa pag-ampo sa laing tawo?

Para sa mga Kabatan-onan

- Si Presidente Thomas S. Monson nagtudlo nga kita kinahanglan “sa kaisug sa pagsulti og dili kon gikinahanglan, sa kaisug sa pagsulti og oo kon kini angay, sa kaisug sa pagbuhat sa sakto nga butang tungod kay kini husto.” Samtang kamo magtuo niini nga pakigpulong (pahina 66), paghunahuna sa mga hagit nga inyong giatubang. Unsa nga mga plano ang inyong mahimo sa pagpalambo niining matanga sa kaisug?
- Si Elder Jeffrey R. Holland sa Korum sa Napulog Duha ka mga Apostoles mipahinumdom nato nga kon kita nahigugma sa Manlu-luwas, atong tumanon ang Iyang mga sugo ug higugmaon ang uban sama sa Iyang paghigugma (pahina 6). Bisan kon buhaton nato kini, kita kinahanglang andam nga manalipod sa atong mga gituohan “uban sa maayong kabubut-on ug uban sa kalooy.” Aduna ba kamoy kaila kinsa supak sa bisan unsa sa inyong pagtuo? Sa unsang paagi kamo magmatinahuron samtang kamo maghisgot ug manalipod niadtomg mga pagtuo?
- Daghang mga mamumulong direktang namulong ngadto sa



mga kabatan-onan. Sama pananglit, si Elder Neil L. Andersen sa Korum sa Napulog Duha ka mga Apostoles mihatag og daghang mga sugyot ngadto sa kabatan-onan kon unsaon sa pagbuntog sa “esprituhanong alimpulos”, sama sa pagpangita og kalinaw diha sa templo (pahina 18). Samtang kamo magbasa sa iyang ug uban pang mga pakigpulong sa kinatibuk-ang komperensya, ikonsiderar ang pagsulat sa mga ideya kon unsaon nga magpabiling lig-on.

- Usa sa pinakadautan karon mao ang pornograpiya. Si Linda S. Reeves, ikaduhang magtatambag sa kinatibuk-ang kapangulohan sa Relief Society, miingon nga ang labing maayong panagang batok sa mga dautan mao ang usa ka lawom ug makanunayong pagpamatuod sa ebanghelyo ni Jesukristo (pahina 15). Unsa ka lig-on ang inyong personal nga panagang? Unsay inyong mabuhay sa paglig-on niini?

Para sa mga Hamtong

- Si Presidente Thomas S. Monson nagtudlo nga samtang kita makasabut sa “dili matupngan nga gasa” sa Pag-ula, kita mapuno og gugma sa Langitnong Amahan, sa Manluluwas, ug sa tanang mga anak sa Dios (pahina 91). Sa unsang paagi kini nga kahibalo makapalambo sa inyong pagtuon sa kinabuhi ug


Pag-ula sa Manluluwas atol sa personal ug pamilya nga pagtuon sa kasulatan ug samtang diha sa klase sa simbahan?

- Si Presidente Henry B. Eyring, Unang Magtatambag sa Unang Kapangulohan, miingon nga utang niya ang iyang kalipay sa usa ka apohan sa tuhod kinsa mipasakop sa Simbahan, matinud-anong miserbisyo, ug nagpabilin nga makanunayon hangtud sa katapusan, mibilin sa iyang pamilya og usa ka panulundon sa paglaum (pahina 22). Hunahunaa ang paghimo og lista sa tanan sa inyong pamilya ug pagsulat kon unsa nga mga pakigsaad ug mga ordinansa nga ilang gikinahanglan aron magpadayon diha sa dalan sa pakigsaad. Paghimo og plano aron sa pagtabang sa mga sakop sa inyong pamilya

nga makadawat sa ilang sunod nga mga pakigsaad. Inyong masusi ang mga paagi nga ang inyong mga pakigsaad dunay mas importante nga bahin sa inyong kinabuhi aron kamo makahatag sa inyong pamilya og panulundon sa paglaum.

- Si Elder David A. Bednar sa Korum sa Napulog Duha ka mga Apostoles namahayag nga ang kalisdanan makadala nato sa pagsalig sa “maayong buhat, kalooy ug grasya sa Balaang Mesiyas,” kinsa “motabang kanato sa pagpas-an sa atong mga luwan uban sa kasayon” (pahina 87). Samtang kamo mobasa sa iyang pakigpulong ug sa mga pakigpulong nga nagsugod sa pahina 9, 18, 70, 81, ug 106, pangitaa ang mga paagi nga ang Manluluwas ug ang Iyang ebanghelyo makatabang kaninyo sa pag-atubang sa mga hagit sa kinabuhi.
- Ang kurikulum sa kabatan-onan niadtong Mayo nag-focus sa mga propeta ug mga pagpadayag. Isip kabahin sa inyong panaghisgutan sa ebanghelyo uban sa kabatan-onan diha sa panimalay ug sa simbahan, hunahunaa ang pagtuon sa mga pakigpulong ni Elder Lawrence E. Corbridge (pahina 103) ug Marcos A. Aidukaitis (pahina 108) sa Seventy, nga mangita sa mga tubag sa mosunod nga mga pangutana: Nganong dili man lang pasagdan sa mga tiglibak si Joseph Smith? Sa unsang paagi kita makaila sa kamatuoran sa kalibutan nga nagsige og ataki sa mga pagtulun-an sa ebanghelyo? ■





Gihatagan og Gibug-aton ang Paglambo sa mga Templo, Bag-ong mga Opisyales Gipaluyohan atol sa Kinatibuk-ang Komperensya

Sa nanglabay nga unom ka bulan, “ang buhat sa Simbahan nagpadayon sa walay pagkabalda,” miingon si Presidente Thomas S. Monson sa iyang pangbukas nga pakigpulong sa Ika-184 nga Tinuig nga Kinatibuk-ang Komperensya.

Naghinumdom sa pagpahinungod sa Gilbert Arizona Temple niadtong Marso 2, 2014, naghinam-himan sa umaabut nga pagpahinungod sa Fort Lauderdale Florida Temple, ug nagpabut nga mahuman ug mapahinungod ang daghang templo sa lain-laing bahin sa kalibutan inigka 2014 ug 2015, gihatagan og gibug-aton ni Presidente Monson nga kon ang tanang gipahibalo na nga mga templo makompleto, ang Simbahan adunay 170 ka mga templo sa tibuok kalibutan.

“Bisan tuod nga kami kasamtangang nag-focus sa among mga pangingkamot sa paghuman sa gipahibalo

sa una nga mga templo ug dili pa magpahibalo og bisan unsa nga templo sa umaabut,” siya miingon, “magpadayon kami sa proseso sa pagtino sa mga panginahanglan ug pagpangita og mga luna alang sa umaabut nga mga templo. Ang mga pagpahibalo pagahimoon dayon sa umaabut nga mga kinatibuk-ang komperensya. Mga katawhan kita nga tigtukod ug tigtambungan og templo.”

Atol sa komperensya, usa ka bag-ong sakop sa Kapangulohan sa Seventy, upat ka bag-ong mga General Authority, bag-o nga kinatibuk-ang kapangulohan sa Sunday School, ug 42 ka mga Area Seventy ang gipaluyohan.

Si Elder Lynn G. Robbins gitawag ngadto sa Kapangulohan sa Seventy.

Sila Elder Jörg Klebingat sa Kyiv, Ukraine, ug Elder Chi Hong (Sam) Wong sa Hong Kong, China, gipaluyohan nga moserbisyo sa Unang Korum

sa Seventy. Sila Elder Larry S. Kacher sa Midway, Utah, ug Elder Hugo E. Martinez sa Arecibo, Puerto Rico, gipaluyohan isip mga sakop sa Ikaduhang Korum sa Seventy.

Si Elder Tad R. Callister, kinsa nagserbisyo sa Kapangulohan sa Seventy ug isip sakop sa Ikaduhang Korum sa Seventy, gipaluyohan isip kinatibuk-ang presidente sa Sunday School, uban ni John S. Tanner isip unang magtatambag ug Devin G. Durrant isip ikaduhang magtatambag.

Tan-awa ang kompleto nga lista sa mga gipaluyohan ug gipang-release sa mga pahina 26–27, ug pangitaa ang mga biography nila ni Elder Robbins, bag-ong natawag nga mga Seventy, ug kinatibuk-ang kapangulohan sa Sunday School sugod sa pahina 141.

Usa ka semana sa wala pa ang kinatibuk-ang komperensya, ang unang kinatibuk-ang miting sa mga babaye—para sa tanang mga babaye, batan-ong mga babaye, ug mga babaye nga otso anyos ug mas magulang pa—gipahigayon sa Conference Center. Kini nga miting mopuli sa miaging kinatibuk-ang miting sa Relief Society ug sa Young Women. Tanang mga mensahe gikan sa miting sa kababayan-an makita sa mga pahina 116–28.

Sa wala pa ang komperensya, ang general board sa Young Women giorganisar og usab, uban sa mga sister nga unang gitawag gikan sa Peru; South Africa; Japan; Brazil; ug Brooklyn, New York, USA isip dugang niadtong anaa sa Siyudad sa Salt Lake. Basaha ang mga biography ug tan-awa ang mga litrato sa lds.org/callings/young-women.

“Ang Manluluwas midala dinhi sa yuta og usa ka mensahe sa gugma ug pakigdait sa tanang mga lalaki ug mga babaye,” miingon si Presidente Monson sa pagtapos sa kinatibuk-ang komperensya. “Unta atong ipadayon ang pagsunod sa Iyang ehemplo.” Iyang gisiguro sa mga miyembro sa Simbahan ug sa uban nga naminaw nga ang “Langitnong Amahan mahunahunaon kanato. Siya mogiya ug mopanalangin kanato samtang kita mopakita sa atong pagtuo ug pagsalig Kaniya.” ■

ANG MGA ARTIST GIDAPIT NGA MOAPIL SA KOMPETISYON

Ang Church History Museum nagdapit sa mga artist nga Santos sa Ulahing mga Adlaw sa pagmugna og bag-ong mga buhat sa art para sa ika-10 nga International Art Competition. Ang mga artist giawhag sa paggamit sa ilang mga talento sa pagmugna og mga art nga nagpakita sa tema sa exhibit, "Suginli Ko sa mga Kaagi ni Jesus." Para lang niining kompetisyon, ang mga buhat kinahanglang mag-focus sa mga istorya gikan sa Bag-ong Tugon.

Ang mga detalye ug online registration anaa sa lds.org/artcomp, ug ang mga artist kinsa nagpa-register makadawat og mga update. Ang mga salmot dawaton sugod Nobyembre 3, 2014, hangtud Pebrero 27, 2015. Tanang artistic media, estilo, ug kultural nga mga paagi dawaton. Ang mga partisipante kinahanglan 18 anyos o magulang pa. Ang mga salmot pagahukman, ug ang mga buhat nga napilian i-display sa Church History Museum ug sa Internet sugod Oktubre 2015.

ANG PAGBANSAY SA PAGPANGULO SA AUXILIARY MAANAA SA LDS.ORG

Aron mas makatubag sa mga panginahanglan sa nagtubo nga Simbahan, nagtinguha ang kinatibuk-ang kapangulohan sa Relief Society, Primary, Young Women, Young Men, ug Sunday School nga mobansay sa tibuok kalibutan matag tuig pinaagi sa Internet. Gilauman nga kini nga pagbansay maanaa na sa LDS.org sa tunga-tunga sa kada tuig sa daghang pinulongan.

Ang mga miting sa pagbansay sa pagpangulo sa auxiliary nga gihimo sa Siyudad sa Salt Lake agig dugang sa kinatibuk-ang kompensya sa Abril gihunong na. Ang kinatibuk-ang kapangulohan sa auxiliary ug ilang mga board padayong personal nga magbansay diha sa mga miting sa multistake, sumala sa gisangon.

Bag-o nga Salida Makamugna og Oportunidad nga Mahimamat ang mga Mormon

Usahay inyo bang nakaplagan ang inyong kaugalingon nga nanghinaut nga adunay yano nga paagi sa pagpahibalo sa uban nga ang mga Santos sa Ulahing mga Adlaw normal lang nga mga tawo kinsa nakakaplag og katuyoan ug direksyon samtang ilang gi-focus ilang kinabuhi kang Jesukristo? Mao kini ang documentary nga salida nga sa dili madugay ipagawas sa Simbahan aron makatabang ninyo.

Ang *Himamata ang mga Mormon* nagsugod sa panglantaw sa mga miyembro sa Simbahan kabahin sa sayop nga panglantaw sa uban. Dayon kini mopakita sa unom ka pamilya, kada usa nagpakigbahin sa ilang personal nga mga kasinatian ug naghulagway kon sa unsang paagi ang ebanghelyo nakatabang sa ilang kinabuhi. Kad-tong gipakita naglakip sa:

Bishop. Si Jermaine Sullivan ug iyang asawa, si Kembe, gikan sa Atlanta, Georgia, USA, naningkamot nga mahiusa ang nagkalain-laing komunidad samtang nagpadako sa ilang tulo ka batan-ong mga lalaki.

Coach. Si Ken Niumatalolo, ang head coach sa U.S. Naval Academy football team sa Annapolis, Maryland, USA, ug iyang asawa, si Barbara, uban sa suporta sa ilang mga anak ug mga kawani, padayon nga gibalaan ang adlaw sa Igpapahulay.

Candy Bomber. Si Gail Halvorsen, 93 anyos nga beterano sa Ikaduhang Gubat sa Kalibutan, ug iyang asawa si Lorraine, 90 anyos, gikan sa Amado, Arizona, USA, nagpahinumdom sa mga bata sa bili sa pagserbisyo. Piloto ra gihapon, si Brother Halvorsen nagpahulog og kendi gikan sa eroplano sama sa iyang gibuhay atol sa Berlin Airlift human sa gubat.

Fighter. Si Carolina Marin, usa ka kickboxer gikan sa San José, Costa Rica, ug iyang tigbansay ug bana, si Milton, nagbalanse sa ilang mga tahas



Sa open house sa mga apil sa salida, si Presidente ug Sister Uchtdorf mitimbaya ni Carolina Marin sa Costa Rica.

isip kapikas ug ginikanan sa ilang batan-ong mga anak uban sa ilang kahinam sa kompetisyon.

Humanitarian. Sila Bishnu ug Mangala Adhikari, sa Kathmandu, Nepal, nagtahud sa mga gituohan ug panulundon sa ilang yutang natawhan.

Si Brother Adhikari usa ka engineer kinsa nagtukod og mga dalan, mga eskwelahan, ug mga sistema sa pagkuha og limpyo nga tubig nga nakapanalangin sa daghang gagmay nga mga komunidad.

Missionary Mom. Sila si Craig ug Dawn Armstrong ug ilang anak nga lalaki si Anthony, gikan sa Siyudad sa Salt Lake, Utah, USA, nagsaysay kon sa unsang paagi si Sister Armstrong nahimong single mother nga walay pinuyanan sa dihang iyang nahimamat ang mga misyonaryo. Ang ebanghelyo nga ilang gipakigbahin kaniya nakapausab gyud sa iyang kinabuhi. Sa wala madugay siya naminyo ni Craig, ug ang istorya natapos sa dihang si Anthony miserbisyo og full-time misyon sa South Africa aron ipakigbahin ang ebanghelyo nga nakapanalanginan og maayo sa iyang inahan.

Ang *Himamata ang mga Mormon* ipasalida sa Joseph Smith Memorial Building sa Siyudad sa Salt Lake, Utah, USA, ug sa ubang mga dapit nga tinuon pa. ■

Ang Pagtudlo diha sa Simbahan Kinahanglang Nagsunod sa Ehempro ni Kristo

Kita maningkamot sa pagsunod sa mga tunob sa Manluluwas sa pagtudlo,” miingon ang bag-ong kinatibuk-ang presidente sa Sunday School, Tad R. Callister, human sa kinatibuk-ang komperensya.

Nagpasabut kana sa pagpangutana og dinasig nga mga pangutana nga makatabang sa mga tawo nga makabig, siya miingon. Ang tumong mao ang “pagtabang kanila nga makasabut ug mobati sa Espiritu sa ebanghelyo diha sa ilang kinabuhi.”

Siya miingon nga siya nakadayeg sa *Come, Follow Me*, ang online nga kurikulum sa mga batan-onan nga naglakip sa pinakabag-o nga pakigpulong sa kinatibuk-ang komperensya ingon man sa media nga gihimo sa Simbahan. Ang partisipasyon mihulip sa mga lecture, siya miingon, ug “adunay klaro nga kausaban gikan sa pagtudlo lang sa leksyon ngadto sa paningkamot nga ipahaum kini ngadto sa mga panginahanglan sa mga estudyante sa klase.”

Siya midugang nga ang *Come, Follow Me* nakatabang sa pagkakabig ug dili lang sa pagpasa og importasyon. “Sa akong hunahuna kita nagpadako og henerasyon sa mga batan-on nga mahimong pinakamaayong magtutudlo sa kalibutan, pinakamaayong mga ginikanan sa kalibutan,” siya miingon, “tungod kay sila nakasinati niini samtang batan-on pa ug dili na magpaabut nga [sila] mahimong hamtong . . . aron masayran unsa ang epektibong pagtudlo ug pagsabut.”

Si Jesukristo mao ang Gamhanan nga Magtutudlo, miingon si Brother Callister, ug ang atong pagtudlo diha sa simbahan kinahanglan makapaduol sa mga tawo ngadto kang Kristo. Ang paghatag og gibug-aton sa panginahanglan sa pagtudlo sa doktrina nga klaro ug tukma, siya miingon “kon kita maningkamot sa pagsunod sa Manluluwas, naghimo kita sa Iyang gipabuhat.” ■



NAGKADAGHAN ANG MANANAN-AW SA MORMON CHANNEL

Minilyon sa mga tigpaminaw ug mananan-aw sa tibuok kalibutan naganahan sa Mormon Channel, nga gisibya sa English ug Spanish sa 24 ka oras kada adlaw, pito ka adlaw matag semana, gikan sa Temple Square sa Siyudad sa Salt Lake, Utah, USA.

Kining opisyal nga media channel sa simbahan nalusad lima na ka tuig ang milabay. Daghang mga Santos sa Ulahing mga Adlaw gikalipay sa pagpakigbahin sa mga sulod niini ngadto sa kaubang mga miyembro ug sa ubang tawo. Wala kini pahinumdom ug naglakip sa tulo ka mga pakigpulong ug mga music radio stream ug mubong mga Mormon Message nga video.

Pangitaa ang Mormon Channel sa mormonchannel.org ug usab diha sa YouTube, iTunes, Roku, Tumblr, Facebook ug Twitter. Libre nga mga mobile application alang sa mga naggamit og iOS ug sa Android.

Mga Pagtulun-an alang sa Atong Panahon

Gikan sa Mayo 2014 hangtud sa Oktubre 2014, ang mga leksyon sa Melchizedek Priesthood ug Relief Society sa ikaupat nga Dominggo kinahanglang andamon gikan sa usa o daghan pa nga mga pakigpulong nga gipamulong sa Abril 2014 nga kinatibuk-ang komperensya. Inig ka Oktubre 2014, ang pakigpulong mahimong pilion gikan sa sa Abril 2014 o sa Oktubre 2014 nga kinatibuk-ang komperensya. Ang mga presidente sa stake ug district kinahanglan nga mopili unsa nga mga pakigpulong ang gamiton sa ilang mga dapit, o sila mahimong modelegar niini nga responsibilidad ngadto sa bishop ug mga presidente sa branch.

Kadtong motambong sa ikaupat nga Dominggo nga mga leksyon giawhag sa pagtuon daan sa mga pinili nga mga pakigpulong. Ang mga pakigpulong sa komperensya anaa sa daghang pinulongan sa conference.lds.org. ■

Ang Teknolohiya ug Social Media Nakapalapad sa Maabtan sa Kinatibuk-ang Komperensya sa Tibuok Kalibutan

Agig dugang sa kapin sa 100,000 nga nangapil sa lima ka sesyon sa ika- 184 nga Tinuig nga Kinatibuk-ang Komperensya sa Conference Center sa Siyudad sa Salt Lake, Utah, USA, labaw sa minilyon ang nanan-aw o naminaw sa mga sesyon sa 95 ka mga pinulongan pinaagi sa telebisyon, radyo, satellite, ug mga sibya sa Internet.

Samtang ang Conference Center sa Siyudad sa Salt Lake mopaigo sa 21,000 ka mga tawo, ang mga tigpaminaw sa kinatibuk-ang komperensya mikatap sa tibuok kalibutan samtang ang minilyon ka mga miyembro sa Simbahan ug ang uban pa naminaw. Labaw na sa 50 ka tuig, ang Simbahan mihubad sa mga kalihokan sa daghan nga pinulongan. Karon, ang teknolohiya nakapahimong posible nga makita live sa kapin sa 200 ka mga

nasud sa tibuok kalibutan.

Agi og dugang sa mga sibya sa lokal nga mga chapel, ang Simbahan nag-stream sa komperensya nga live sa LDS.org, BYUtv, BYUtv International, sa Mormon Channel, Roku, Facebook, ug YouTube. Misaka ang Online viewership atol sa kinatibuk-ang komperensya sa Oktubre 2013 sa gibana-bana nga 30 porsyento itandi ngadto sa miaging komperensya.


Daghan usab ang misalmot sa kinatibuk-ang komperensya pinaagi sa social media. Gibaha sa mga tweet uban sa #ldsconf hashtag gibutang sa Twitter atol sa matag usa sa mga lima ka sesyon sa komperensya, naghimo sa kinatibuk-ang komperensya nga usa sa kinadaghanan nga gihisgutan sa Twitter adtong panahona. Pananglit-an, atol sa Oktubre 2013, 155,000 ang nag-tweet kalabut sa kinatibuk-ang

komperensya nga gi-post. (Ang matag tweet maoy komentaryo sa kada indibidwal sa 140 ka mga titik o mas minus.)

Pinaagi niining mga opisyal nga channel sa social media, ang Simbahan nagbutang og live nga mga mensahe gikan sa komperensya sa daghang pinulongan, ug kini nag-awhag sa uban sa pagpakigbahin niadtong mga mensahe. Atol sa kinatibuk-ang komperensya sa Oktubre 2013, daghang nadugang nga nanan-aw nga mitutok o naminaw sa mga mensahe sa kinatibuk-ang komperensya human nakita ang gi-post sa social media. Ang mga gipang-post gipakigbahin sa English, Spanish ug Portuguese.

Ang mga kalihokan sa komperensya magamit na karon sa nagkadaghan gayud nga mga audience. ■

Ang komperensya maanaa na sa daghang mananan-aw ug tigpaminaw, salamat sa teknolohiya ug social media.



Mga Website nga Naghisgot og Serbisyo, Hugot nga Pagtuo

Ang mga Santos sa Ulahing mga Adlaw nagserbisyo ug nagpakigbahin sa ilang tinuohan sa tibuok kalibutan. Ang mga asoy mahitungod sa maong mga kalihokan makita sa mga country newsroom website, diin kanunay gi-summarize sa newsroom.lds.org, ang opisyal nga kapanguhaan sa Simbahan alang sa mga media, impluwensiyadong mga lider, ug sa publiko.

Sa dapit sa Pasipiko, ang mga Santos sa Ulahing mga Adlaw gisuplayan og tubig, pagkaon, mga chain saw, mga filter sa tubig, mga generator, ug ubang mga suplay sa emerhensya aron sa pagtabang sa mga taga-Tonga pagkahuman sa kaudat panahon sa Tropical Cyclone Ian. Sa Samoa, ang kabatan-onan sa LDS miapil sa duha ka adlaw nga interdenominational

nga kalihokan uban sa espirituhanong mga pagdasig, musika, sayaw ug mga sport.

Sa Brazil, ang mga miyembro sa Simbahan nga nanagsul-ob sa Mormon Helping Hands mitabang sa mga paningkamot sa pagpanglimpyo ug pag-apud-apod sa mga suplay ngadto sa mga kasilinganan ug negosyo nga nadaut tungod sa baha, nakapahimo nga daghan ang nawad-an og panimalay. Bisan asa, ang mga miyembro mitabang sa pag-apud-apod sa dihang ang Humanitarian Services sa Simbahan midonar sa 211 ka mga wheelchair ngadto sa mga indibidwal nga may espesyal nga panginahanglan. Ang padayon nga donasyon sa Brazil karon sumada na dul-an sa 700 ka mga wheelchair.

Sa Africa, ang nasyonal ug global

nga mga organisasyon nagtambayayong uban sa LDS Charities, ang humanitarian nga buhatan sa Simbahan, sa unang nasyonal nga pangampanya sa pagwagtang sa tipdas ug rubella didto sa Ghana pinaagi sa pagpangbakuna sa mga bata hangtud sa edad nga 14. Sa Nigeria ug Ghana, ang Helping Hands day nakabenepisyo sa liboan ka mga tawo sa 100 ka mga komunidad samtang ang mga Santos sa Ulahing mga Adlaw sa tanang edad nagtinabangay sa pagtukod og mga taytayan, pagpananom og kahoy, pangguna, pagpintal sa mga estruktura, ug pagpanglimpyo ug pagpandot sa kasilinganan. Sa Zimbabwe, sobra sa 60 ka kabatan-onan nga LDS miboluntaryo sa pagdonar og dugo. Ug sa South Africa, ang Santos sa Ulahing mga Adlaw nga si Nozibele Makanda, ang inahan sa unom ka anak, napili isip mayor sa Queenstown, usa ka siyudad nga may 200,000 ka tawo.

Sa Central America, labaw sa 500 ka kabatan-onan nga LDS sa Guatemala nakigtambayayong sa lokal nga gobyerno sa pagtanom sa 1,944 nga kahoy. Sa Costa Rica, mga meetinghouse sa LDS nahimong mga punduhanan sa koleksyon sa gatas, ug 370 ka mga boluntaryo sa Simbahan mitabang sa paghatud niini ngadto sa mga merkado nga miapil sa kalihokan sa pagsangkap alang niadtong nanginahanglan.

Ug sa Canada, ang mga Santos sa Ulahing mga Adlaw nakigtambayayong sa Christian-Jewish Dialogue of Montreal (Quebec) sa pag-andam og mga video sa interbyu sa dili ang hearing sa gobyerno mahitungod sa mga hiyas. Kadtong nainterbyu namulong nga mosuporta sa pasalig sa komunidad sa pagtahud, pagsabut, pagkamauyonon ug kagawasan sa relihiyon, naghatag og gibug-aton nga ang relihiyon nagpabilin nga importante sa kinabuhi sa daghan nga mga lungsuranon sa Quebec.

Alang sa usa ka lista sa mga website sa newsroom sa internasyonal nga mga nasud sa nagkalain-lain nga pinulongan, tan-awa sa mormonnewsroom.org/newsroom-country-sites. ■

Sa Guatemala, sobra sa 500 ka mga batan-on nga Santos sa Ulahing mga Adlaw nagpundok sa pagtanom og 1,944 ka mga kahoy.



Ang Visitor's Center sa Mexico City Temple nagpakita sa daghang mga display nga nagtudlo sa kamatuoran sa ebanghelyo sa paglig-on sa mga pamilya.



Giablihan Pag-usab ang Visitors' Center sa Mexico City Temple


Sa mosunod nga bulan human sa subling pag-abli, kapin sa 30,000 ang mibisita sa Visitors' Center sa Mexico City Temple, nga miagi na sa duha ka tuig sa pagpanindot ug sa pagpalapad niini. Ang tanang exhibit anaa karon sa Spanish ug naglakip sa orihinal nga mga media nga gimugma para sa bisita nga taga-Mexico. Ang gipanindot nga sentro mao usab ang unang visitors' center nga naglakip og usa ka dapit nga ang tibuk exhibit gihimo alang sa pagtudlo sa mga baruganan sa

ebanghelyo ngadto sa mga bata.

Kining visitors center mao ang ikatulo nga kinadak-an sa 17 ka mga pasilidad, kadaghanan niini nahimutang duol sa templo o sa makasaysayanon nga dapit sa Simbahan. Usa ka visitors' center ang kasamtangang gitukod duol sa templo nga gitukod sa Rome, Italy, ug ang mga center makita sa England, New Zealand, Hawaii, ug sa siyam ka mga estado sa kontinente sa U.S. Ang mga center, gidesinyo sa pagabiabi sa aktibo ug dili kaayo aktibo nga mga Santos sa Ulahing mga

Adlaw ingon man usab sa laing tinuohan, dili lamang sa pagpaila sa mga katawhan sa Simbahan apan sa pagtabang usab kanila nga makasabut niini nga mga pagtuo ug modasig og tinguha sa pagkat-on pa mahitungod sa Manluluwas ug sa Pagpahiuli sa ebanghelyo. Kini naglig-on usab sa mga pamilya.

Ang Mexico usa sa lig-on nga dapit sa Simbahan, mosobra na sa 1.2 ka milyon ka mga miyembro, labaw sa 200 ka mga stake ug sa 12 ka mga templo. ■



Atol sa ilang mga kasinatian sa MTC, mga misyonaryo makadawat og mga panudlo mahitungod sa pagtudlo sa ebanghelyo ni Jesukristo.

Ang Missionary Training Center Nagtabang nga Mapadali ang Buhat sa Kaluwasan

Sa tibuok kalibutan, 15 missionary training center ang mihatag og pagbansay alang sa sobra sa 85,000 nga mga misyonaryo gikan sa 143 ka nasud. Tiningub nga paagi ang mga misyonaryo makakat-on og 55 ka mga pinulongan gikan sa 1,600 mga magtutudlo, dayon moserbisyo ngadto sa duha ka tuig 405 ka misyon sa sobra sa 150 ka nasud.

Uban sa pagtubo sa gidaghanon sa mga misyonaryo sukad nga ang mga kinahanglanon sa edad nausab niadtong Oktubre 2012, ang MTC mopaigo na og mas dakong gidaghanon sa mga misyonaryo kaysa nangagi. Uban sa usa ka MTC sa matag bahin sa kalibutan, walay hunong ang pagbansay.

Kadaghanan sa mga misyonaryo moabut sa MTC mga may pundasyon sa relihiyoso nga kahibalo nga

naangkon gikan sa mga instruksyon diha sa panimalay ug diha sa Simbahan. Ang center naghatag og dugang nga mga pagbansay nga naglakip sa unsaon sa pagtudlo sa pamaagi nga gitudlo ni Jesukristo ug unsaon sa pagdapit sa mga tawo sa pagsunod Kaniya. Pagpraktis og tudlo sa mga misyonaryo nga sitwasyon, makadawat sa pagbansay sa pinulongan kon gikinahanglan, maminaw sa sinemana nga mga pakigpulong sa debosyonal gikan sa mga lider sa Simbahan ug mga kawani sa MTC, ug pag-apil sa mga oportunidad sa pagserbisyo.

Ang pinakadako nga MTC nahimutang sa Provo, Utah, USA. Naghatag kini og pagbansay alang sa liboan ka mga misyonaryo sa 55 ka mga pinulongan. Ang ikaduhang pinakadako nga MTC anaa sa

Siyudad sa Mexico, Mexico. Niadtong Hunyo 2013 gibalhin kini gikan sa gagmayng building ngadto sa 90-acre nga campus nga kaniadto gigamit nga usa ka pribadong eskwelahan nga gipanag-iya sa Simbahan para sa high school, Benemerito de las Amerika. Ang kanhi nga dapit nga kaigo 125 ka mga misyonaryo matag higayon; sa bag-o nga dapit ang pagsangkap og kapin sa 1,000.

Dugang MTC nahimutang sa Buenos Aires, Argentina; São Paulo, Brazil; Santiago, Chile; Bogotá, Colombia; Santo Domingo, Dominican Republic; Preston, England; Accra, Ghana; Siyudad sa Guatemala, Guatemala; Auckland, New Zealand; Lima, Peru; Manila, Philippines; Johannesburg, South Africa; ug Madrid, Spain. ■

Ang Simbahan Naggamit sa mga Baruganan sa Welfare aron Makabarug og Balik ang Pilipinas

Mga bulan human sa pag-igo sa Bagyong Yolanda sa Pilipinas niadtong Nobyembre 2013, miguba sa dul-an sa 1.2 ka milyon ka mga panimalay ug mipatay og sobra 6,200 ka mga tawo, ang Simbahan nagpadayon sa paghatag og kahupayan, miusab sa mga paningkamot gikan sa pagtubag sa katalagman ngadto sa paghatag og malungtaron nga kahupayan. Usa ka malampuson kaayo nga paningkamot naglakip sa mga boluntaryo nga nakat-on sa pagtukod og mga balay alang niadtong wala gihapoy kapuy-an.

Ang mosunod nga mga sakop sa komunidad nga naapektuhan sa bagyo nalakip niadtong kadaghanan nga mipahayag og pasalamat sa tabang nga ilang nadawat gikan sa Simbahan, bisan tuod sila dili mga Santos sa Ulahing mga Adlaw:

- Usa ka babaye kinsa midangop ngadto sa usa ka chapel sa Mormon atol sa bagyo nakahibalo pagkahuman nga ang iyang balay naguba sa dihang natumbahan kini sa mga lubi. Siya ug ang iyang pamilya walay kapanguhaan sa pagpaayo niini, apan mga boluntaryo mitabang kaniya sa pagtukod og bag-ong balay, ug karon siya nagtabang sa laing pamilya sa paghimo og balay. “Nakat-on ko sa pagtrabaho kauban niadtong kinsa nanginahanglan usab, aron dungan kami nga makabarug human sa [bagyo],” siya miingon.
- Usa ka tawo nga nawad-an sa iyang trabaho sa dihang naguba ang negosyo diin siya nagtrabaho karon nagkat-on sa pagtukod og mga pinuy-anan alang sa iyang pamilya ug sa uban. “Nasayud mi nga kinahanglan kami nga magtinabangay aron dali mahuman ang

trabaho,” miingon siya, midugang nga siya mapasalamaton alang sa mga tabang gikan sa Simbahan.

Si Presiding Bishop Gary E. Stevenson miingon nga, uban sa pag-atiman sa kabus ug timawa, “nakita usab nato nga ang mga baruganan sa pagpaningkamot sa kaugalingon gigitmit karon, ug kini talagsaon gayud.” Siya miingon, “Usa sa mga butang nga among gipaningkamutan nga buhaton mao ang paghatag og mga materyal samtang [ang mga nakadawat] maoy motrabaho. Bisan kinsa nga modawat og kapuy-an nagtrabaho usab aron sa pagtukod niana nga kapuy-an sa ilang mga kaugalingon.”

Ang lokal nga mga lider sa Simbahan ug mga representante sa humanitarian nga grupo nakigmiting sa lokal nga mga lider sa komunidad sa paghatag og bokasyonal nga pagbansay ug sertipikasyon ngadto sa mga tawo kinsa nakakat-on sa mga kahanas sa pagpamanday. Ang mga kapanguhaan sa Makanunayong Pundo sa Edukasyon gigitmit aron sa pagdala sa 20 ka banggiitan nga mga karpentero aron sa pagtabang sa pagbansay, ug 2,000 na sa 3,000 ka gitumong nga mga balay ang nahuman.

Ang lokal nga mga gipangbansay nagpakita sa ilang nakat-unan pinaagi sa pagtukod og 10 ka mga pinuy-anan aron makadawat og sertipikasyon sa gobyerno ug usa ka toolbox gikan sa Simbahan, nga makatabang nila sa pagpangita og trabaho. Dako kaayo ang panginahanglan alang sa mga trabahante sa konstruksyon nga ang Catholic Relief Services miuyon nga moempleyo og gatusan ka mga karpentero nga gibansay sa LDS nga Simbahan.

Si Bishop Stevenson miingon nga 500 ka mga miyembro sa Simbahan mitambong og usa ka miting diin ang



Ang mga boluntaryo milansang sa plywood ngadto sa bayanan sa usa ka bag-ong balay sa Tacloban, Pilipinas.

eklesiastikanhong mga lider mihulagway sa pagbansay sa trabaho ug sertipikasyon, “ug samtang gihulagway kini ngadto kanila, sila namakpak ug nakahilak, nasayud nga sila makakita og paagi . . . sa pagsangkap alang sa ilang mga pamilya.”

Ang Simbahan nakig-alayon usab sa pipila ka charitable nga mga organisasyon ingon man usab sa gobyerno sa Pilipinas sa padayon nga paningkamot aron sa paghatud og pagkaon, tubig, mga suplay sa medikal, hygiene kit, generator, mga gamit sa panimalay, pangluto, pangisda ug mga liso nga pangtanom.

Ang Simbahan nakakat-on nga ang labing epektibo nga paagi sa pagtubag sa katalagman mao ang pagtrabaho diha sa lokal nga paagi, pagpalit sa gikinahanglang suplay sa naapektuhan nga mga nasud, nga labing duol sa katalagman kutob sa mahimo. Dili lamang kini mosiguro nga ang butang angay alang sa dapit, apan kini usab makatabang nga maulian ang naapektuhan nga lokal nga ekonomiya.

Ang mga miyembro sa tibuok kalibutan giawhag sa pag-ampo alang niadtong anaa sa mga dapit sa katalagman nga layo sa ilang gipuy-an, ug ikonsiderar ang pagdugang sa ilang mga donasyon sa halad sa puasa o modonar ngadto sa humanitarian fund sa Simbahan. ■

Ang Proyekto sa Limpyo nga Tubig Nakatabang og Minilyon sa Africa

Sobra na sa duha ka dekada, ang Simbahan nalambigit sa mga proyekto sa limpyo nga tubig sa sobra sa 100 ka mga nasud. Diha lang sa Africa, kini nga mga proyekto nakapanalangin sa kinabuhi sa sobra sa upat ka milyon ka mga tawo pinaagi sa paghatag og mga atabay, mga sistema sa pagpundo ug paghatud sa tubig, ug pagpalimpyo sa tubig.

Usa niini nga proyekto gipahigayon sa Idugo Isla, duol sa baybayon sa Mozambique. Kadaghanan sa mga 15,000 ka tawo kinsa nagpuyo sa isla nagtrabaho sa mga umahan sa pamilya, mangisda sa naglibut nga mga tubig sa Indian Ocean, o nagtrabaho sa mga evaporation pond sa pagkuha og asin gikan sa tubig sa dagat. Ang isla walay nagdagayday nga tubig, kuryente, mga dalan, o mga sakyanan. Maabut ang isla pinaagi sa hinimo sa kamot nga mga sakayan o gikulit nga mga baroto.

Sulod na sa pipila ka siglo, ang bugtong tinubdan sa tubig nga mainom sa Idugo mao ang mabaw nga mga atabay nga gikalot pinaagi sa kamot. Ang mga atabay kanunay mapuno sa mga binanlas ug mga hugaw. Naghatag kini og lapukon, lisud makuha nga tubig. Panahon sa ting-ulan, ang tubig mahugawan, nga maoy hinungdan sa kolera, kalibanga, ug uban pang mga sakit.

Sa dihang nakadungog ang humanitarian nga mga misyonaryo sa Simbahan mahitungod sa kahimtang sa Idugo, sila nakighimamat sa mga lider sa komunidad didto. Nagtinabangay sila sa paghimo og plano nga ang Church Humanitarian Services mohatag og mga materyal, mga himan ug mga instruksyon sa paghimo og 10 ka mga atabay nga gihanigan og semento nga adunay puthaw nga tabon, matag usa magamit sa sa 1,000 ka mga tawo. Ang mga



Sa Idugo Isla, Mozambique, ang mga lumulupyo ug lokal nga mga opisyal mitambong sa usa ka seremonya diin ang opisyal nga paggamit sa atabay sa komunidad gisugdan.

misyonaryo mohatag og pagbansay sa hygiene ug sanitasyon, ug ang mga lumulupyo magkugi aron sa pagtukod ug sa pagmentinar sa mga atabay.

Gikan sa usa ka dapit diin sila nanukad sa mainland, upat ka mga dump truck sa graba, 300 ka mga bag nga semento, duha ka karga sa balas, kabilya, ug hinimo daan nga hulmahan sa semento gidala ngadto sa mga isla. Ang mga suplay dayon gidala tabok sa isla pinaagi sa pagpas-an o gamit ang kariton. Pipila ka mga miyembro sa Simbahan gikan sa Quelimane, Mozambique, mipuyo didto sa isla sulod sa tulo ka bulan aron motabang sa pagtudlo ug sa pagtukod.

Ang mga atabay gidesinyo nga adunay kaagian ang tubig sa ulan, nga makawagtang sa pagkahugaw. Sa pipila ka mga komunidad, ang mga lumulupyo mihimo og mga koral nga kahoy ug bika nga mga agianan palibut sa mga atabay, naggamit sa mga bika nga ila mismong nakat-unan sa paghimo gikan sa mga materyal nga gidonar sa Simbahan.

Sa opisyal nga mga seremonya, ang pagpanag-iya sa mga atabay gitugyan ngadto sa mga tawo sa matag balangay. Pipila ka mga lumulupyo kinsa nakatrabaho sa mga atabay mipahayag og pasalamat nga ang ilang nakat-unan nga bag-ong kahanas—paghimo

og mga bika, pagtrabaho gamit ang semento ug lig-unon kini gamit sa asero, ug sa paggamit sa mga himan—makatabang kanila nga makakita og dugang nga mga trabaho. Ang uban mipahayag og pasalamat alang sa oportunidad sa pagkat-on og mga kahanas sa pagpangulo.

Human sa sunod ting-ulan, walay nataho nga mga sakit tungod sa tubig diha sa mga balangay nga dunay atabay.

Sumala sa World Health Organization, kapin sa usa ka bilyon ka tawo sa tibuok kalibutan walay makuhaan og limpyo nga tubig. Salamat sa proyekto sa limpyo nga tubig sa Simbahan, kana nga gidaghanon naminusan pinaagi sa usa ka proseso nga naglakip sa mga miyembro sa komunidad sa pagplano ug pag-implementar sa mga proyekto, paghatag og trabaho aron matukod ang gikinahanglan nga mga pasilidad, pagdawat og pagbansay, ug pagmentinar sa nakompleto nga mga kapanguhaan.

Agig dugang sa mga proyekto sa limpyo nga tubig sa tibuok Africa, ang Simbahan nagpasiugda og proyekto sa limpyo nga tubig sa Asia, Central America, Eastern Europe, India, Indonesia, mga Isla sa Pasipiko, South America, Southeast Asia, ug uban pang mga dapit sa tibuok kalibutan. ■



Elder Lynn G. Robbins

Kapangulohan sa Seventy

Sukad nga gitawag isip General Authority niadtong Abril 1997, si Elder Lynn G. Robbins nakatagamtam sa “tam-is nga panalangin nga mahimamat ang mga Santos sa tibuok kalibutan.”

“Mobati kamo diha-diha dayon og kasuod uban sa mga tawo bisan asa mo moadto,” siya miingon.

Si Elder Robbins naglaum nga mopadayon sa pakig-himamat sa mga Santos sa Ulahing mga Adlaw sa tibuok kalibutan samtang nagserbisyo isip usa ka sakop sa Kapangulohan sa Seventy.

Si Lynn Grant Robbins natawo niadtong Oktubre 27, 1952, sa Payson, Utah, ngadto kang Joshua Grant ug ni Evelyn R. Robbins. Siya migahin sa sayong bahin sa iyang kinabuhi sa Springville, Utah, diin iyang nahimamat si Jan Nielson, nga iyang nakaila sukad pagkabata. Sila naminyo niadtong Hunyo 27, 1974, sa Manti Utah Temple ug mga ginikanan sa pito ka mga anak; sila adunay 15 ka mga apo.

Si Elder Robbins nakadawat og bachelor’s degree sa Spanish ug political science didto sa Utah State University ug MBA sa international management gikan sa American Graduate School of International Management sa Glendale, Arizona, USA. Siya mao ang cofounder ug senior vice president sa Franklin Quest.

Si Elder Robbins nagserbisyo isip presidente sa Uruguay Montevideo Mission sa dihang nadawat niya ang iyang call ngadto sa Ikaduhang Korum sa Seventy. Paglabay sa tulo ka tuig siya nahimong sakop sa Unang Korum sa Seventy. Nakaserbisyo siya isip presidente sa South America South Area, sa Central America Area, ug sa North America West Area. Nakaserbisyo usab siya sa North America Central Area.

Usa ka dako nga panalangin niini nga pagserbisyo mao ang kahigayunan sa pagbalik ngadto sa Argentina, diin siya miserbisyo isip full-time nga misyonaryo. Samtang didto sa Argentina isip usa ka batan-ong elder, miserbisyo siya sa Jujuy, usa ka dapit nga dunay usa ka branch. Sa dihang siya mibalik ngadto sa area paglabay sa mga katuigan, siya nakakita og usa ka stake sa Simbahan nga may usa ka dosena nga mga unit.

“Makita ninyo kana sa tibuok kalibutan,” siya miingon. “Kini ang panahon sa mga milagro.” ■



Elder Jörg Klebingat

Unang Korum sa Seventy

Si Elder Jörg Klebingat nagkinabuhi nga makanunayon. Nagtuo siya sa pagkamasulundon, pagsunod sa mga sugo ug aghat sa Espiritu.

Natawo niadtong Disyembre 19, 1967, ngadto ni Klaus-Peter ug Doris Elke Klebingat, si Elder Klebingat nagtubo sa Zweibrücken, Germany, nga walay impluwensya sa ebanghelyo. Isip usa ka tin-edyer, siya nakahimamat og usa ka miyembro sa Simbahan sa usa ka konsyerto sa musika, ug ang duha nahimong mga higala.

“Sa dihang mibisita ko sa akong bag-ong higala, nakadayeg ko sa iyang pamilya,” siya mihinumdom. “Akong gibati ang Espiritu sa iyang panimalay ug gusto nga motambong sa simbahan.”

Niadtong unang miting sa Simbahan nga siya nakadungog sa Basahon ni Mormon. Ang iyang higala mihatag kaniya og kopya uban sa iyang pagpamatuod nga kini tinuod, ug si Elder Klebingat mibiya sa mga miting nga determinado nga masayud mismo sa iyang kaugalingon.

“Nagbasa ko sa may 1 Nephi sa dihang nadawat nako akong pagsaksi nga ang basahon tinuod,” miingon si Elder Klebingat. “Ang pag-angkon og pagsaksi ni Propeta Joseph Smith usa usab ka makahuluganon nga panghitabo alang kanako. Sa akong misyon, ako kanunay mohangyo sa akong kauban kon ako ang makasugilon niana nga bahin sa istorya.”

Sa wala pa ang iyang full-time nga misyon sa Colorado Denver mission, si Elder Klebingat miserbisyo sa army sa Germany sulod sa 18 ka bulan. Siya nabugkos ngadto ni Julia Poltorak didto sa Salt Lake Temple niadtong Disyembre 21, 1992. Sila adunay tulo ka mga anak.

Si Elder Klebingat nakaangkon og degree sa Russian language studies gikan sa Ricks College ug sa wala madugay usa ka master’s degree sa organizational behavior gikan sa Brigham Young University. Nakatrabaho siya isip usa ka business management consultant sa Price Waterhouse ug Arthur Andersen ug sa pipila ka mga kapasidad alang sa Simbahan.

Sa wala pa niini nga tawag, si Elder Klebingat nagserbisyo isip usa ka young single adult representative sa stake, presidente sa elders quorum, presidente sa Young Men, high councilor, presidente sa branch, ug bishop. Mahuman siya sa pagserbisyo isip presidente sa Ukraine Kyiv Mission sa Hunyo 2014. Siya gipaluyohan isip usa ka sakop sa Unang Korum sa Seventy niadtong Abril 5, 2014. ■



Elder Chi Hong (Sam) Wong

Unang Korum sa Seventy

Isip usa ka bag-ong kinabig ug estudyante sa Brigham Young University-Hawaii, si Elder Chi Hong (Sam) Wong nakaangkon og labaw pa kay sa edukasyon—siya nakaangkon og usa ka sigurado nga kahibalo nga adunay usa ka Dios kinsa nasayud “sa mga detalye sa atong mga kinabuhi.”

Natawo niadtong Mayo 25, 1962, sa Hong Kong, China, ngadto ni Ngan Kan ug Fat Wong, si Elder Wong usa sa pito ka mga anak nga nagtubo sa usa ka gamay nga apartment.

Sa trabaho nahimamat niya si Carol Lu, kinsa mipaila-ila kaniya sa ebanghelyo. Ang batan-ong investigator nabunyagan niadtong Pebrero 14, 1982.

Usa ka tuig ang milabay, niadtong Hulyo 9, 1983, iyang giminyoan si Carol. Mibalhin sila ngadto sa Laie, Hawaii, USA, aron siya makaeskwela. Tungod kay duna lang siyay student visa, si Elder Wong makatrabaho lang og 20 ka oras sa usa ka semana. “Kinahanglan gayud namo nga mogamit sa among hugot nga pagtuo ug mga pag-ampo,” miingon siya kabahin sa panginahanglan aron sa pagpatunhay sa iyang pamilya.

Siya naningkamot og maayo aron nakaangkon og scholarship, dayon mikuha siya og daghang unit kutob sa tugotan sa unibersidad. “Dili kadto sayon,” siya mihinumdom. “Sa higayon nga kita aduna niana nga kasinatian nasayud kita nga kanunay kita makasalig sa gahum sa langit.”

Ang mga Wong nabugkos didto sa Laie Hawaii Temple niadtong Agosto 9, 1984, ug ang ilang kinamagulangang anak natawo; tulo pa ka mga bata ang nadugang sa pamilya. “Kadtong mga katuigan espesyal kaayo, sagrado kaayo,” miingon si Elder Wong.

Si Elder Wong nakaangkon og bachelor of science degree sa accounting ug usa ka associate of science degree sa computer science; dayon siya mibati sa panginahanglan “nga mobalik sa Hong Kong aron moserbisyo.”

Sa wala madugay siya nakadawat og MBA gikan sa Hong Kong Open University. Si Elder Wong mao ang founder ug partner sa usa ka business ug quality consulting nga kompaniya ug mitrabaho usab sa usa ka grupo sa pagtesting ug pagsusi sa mga materyal diin siya nagsugod isip senior nga accountant ug mibiya sa kompaniya isip deputy managing director.

Sa wala pa siya mapaluyohi niadtong Abril 5, 2014, isip sakop sa Unang Korum sa Seventy, nagserbisyo siya isip usa ka bishop, presidente sa stake, ug Area Seventy. ■



Elder Larry S. Kacher

*Ikaduha nga Korum sa
Seventy*

Human sa daghang mga pag-aghat panahon sa iyang pagka-young adult, si Elder Larry S. Kacher misugod sa pag-ila sa mas dako nga gahum nga naggiya kaniya sa iyang kinabuhi. Sa edad nga 19, ang pagkasensitibo ngadto sa Espiritu migiya kaniya sa ebanghelyo ni Jesu-kristo—usa ka kausaban nga nakahimo sa tanang kalainan.

Siya natawo niadtong Pebrero 12, 1952, ikaduha gikan sa kinamagulangan sa lima ka mga bata nga natawo nila ni Albert ug Elaine Kacher; nagdako siya sa Bloomington, Minnesota, USA.

Human sa high school miadto siya sa Uropa aron mag-ski, ug human sa sobra unom ka bulan didto iyang gibati nga kinahanglan niya nga mouli. Sa nakauli na, iyang gibati nga daw kinahanglan niya nga moadto og laing lugar apan wala masayud kon asa. Usa ka higala sa pagkabata nagplano nga mobalhin ngadto sa Utah, ug si Elder Kacher mihukom sa pagbalhin uban kaniya. Samtang didto sa Utah, si Elder Kacher mi-enrol sa Brigham Young University, nakakat-on kabahin sa Simbahan, ug nabunyagan.

“Samtang ang mga misyonaryo mitudlo kanamo, mibati ko nga kadto tinuod,” siya miingon. “Samtang ako nag-ampo, akong gibati nga ang Simbahan tinuod.”

Siya mihukom nga moserbisyo og misyon ug gitawag ngadto sa Tahiti Papeete Mission niadtong 1973. Pag-uli, siya mibalik og eskwela sa BYU, diin iyang nahimamat si Pauline Miller. Sila naminyo sa Templo sa Manti Utah niadtong Oktubre 29, 1976, ug mga ginikanan sa unom ka anak ug mga apohan sa 11 ka mga apo.

Si Elder Kacher nakaangkon og bachelor’s degree sa psychology ug master’s degree sa organizational behavior—kini parehong gikan sa BYU. Ang iyang trabaho naglakip sa pagkonsulta sa dagko nga mga kompanya sa nasud ug sa tibuok kalibutan.

Sa wala pa siya mapaluyohi niadtong Abril 5, 2014, isip sakop sa Ikaduhang Korum sa Seventy, si Elder Kacher nagserbisyo isip presidente sa branch, presidente sa elders quorum, bishop, ug magtatambag sa presidente sa stake. Siya nangulo sa Switzerland Geneva Mission gikan 2000 hangtud 2003. Pipila ka tuig human sa iyang pagbalik gikan sa Switzerland, ang iyang trabaho midala kaniya ngadto sa Abu Dhabi, United Arab Emirates, diin siya gitawag sa pagserbisyo isip pinakaunang Area Seventy sa Middle East. ■



Elder Hugo E. Martinez

Ikaduha nga Korum sa Seventy

Niadtong 1982, si Elder Hugo E. Martinez ug ang iyang asawa, si Sister Nuria Alvarez de Martinez, pareho nga nagbansay sa ilang trabaho sa pagkadoktor didto sa Mississippi, USA, dihang sa wala dahuma dunay nanuktok sa atubangan nilang pultahan.

Didto anaa ang duha ka Mormon nga mga misyonaryo nga nagbarug.

“Giabli namo ang among balay alang kanila, apan kami walay nahibaloan bahin sa Ang Simbahan ni Jesukristo sa mga Santos sa Ulahing mga Adlaw. Wala gani kami masayud bahin sa Mormon Tabernacle Choir,” miingon si Elder Martinez, nga nagpahiyum.

Sa gihapon, ang mga leksyon sa ebanghelyo nga gipakigbahin sa mga elder diha-diha dayon mitandog sa bag-ong magtiayon. Sa wala madugay gidawat nila ang pagdapit sa mga misyonaryo nga magpabunyag.

“Ug wala gayud mi magmahay.”

Niadtong Abril 5, 2014, si Elder Martinez gitawag ngadto sa Ikaduhang Korum sa Seventy, nahimong una nga General Authority nga taga-Caribbean. Masabut nga Siya “nabugatan” sa iyang bag-ong buluhaton.

“Apan dayon ang usa ka maanindot nga pagbati sa kalina miabut kanako ug mipahibalo nga ang Ginoo ra ang bahala,” miingon siya.

Usa ka tuig ug usa ka bulan human sa ilang bunyag, si Hugo ug Nuria Martinez na-sealed sa Templo sa Salt Lake niadtong Oktubre 3, 1983. Mga ginikanan sila sa lima ka anak ug adunay lima ka apo nga babaye.

Si Elder Martinez natawo niadtong Enero 10, 1957, sa Mayagüez, Puerto Rico, kang Hugo E. Martinez Sandin ug Daly Morales-Alamo de Martinez. Samtang siya batan-on pa, gipili niya nga sundon ang propesyonal nga dalan sa iyang amahan ug mahimong usa ka doktor. Siya nakadawat sa iyang medical degree gikan sa Unibersidad sa Puerto Rico (1981) ug nakakompleto sa iyang propesyon sa Unibersidad sa Mississippi (1984). Gigamit niya ang iyang propesyon hangtud sa iyang pagretiro niadtong 2004.

Sa mubong panahon human sa iyang bunyag, gitawag siya nga mahimong usa ka magtutudlo sa Sunday School sa kabatan-onan. Siya sa wala madugay miserbisyo isip usa ka bishop, magtatambag sa kapangulohan sa stake, presidente sa district, ug magtatambag sa kapangulohan sa Puerto Rico San Juan Mission. Siya nangulo usab sa Guatemala Guatemala City Central Mission ug nagserbisyo isip Area Seventy sa dihang siya gitawag nga mahimong usa ka General Authority. ■



Tad R. Callister

Kinatibuk-ang Presidente sa Sunday School

Mga dekada sa wala pa ang iyang bag-ong call isip kinatibuk-ang presidente sa Sunday School, ang Sunday School adunay mahinungdanon nga bahin sa kinabuhi ni Tad R. Callister.

Samtang si Brother Callister nagserbisyo isip presidente sa Sunday School sa ward sa Brigham Young University, iyang nakaila ang umaabut niyang asawa, si Kathryn L. Saporiti, nga iyang gipakaslan niadtong Disyembre 20, 1968, sa Los Angeles Temple.

Sila mga ginikanan sa duha ka anak nga babaye ug upat ka lalaki; sila usab dunay 24 ka apo. “Daghang maayo nga mga butang ang mahitabo kon ikaw presidente sa Sunday School,” miingon si Brother Callister.

Natawo niadtong Disyembre 17, 1945, sa Glendale, California, kang Reed Eddington ug Norinne Callister, siya mipahayag nga siya—sama ni Nephi—natawo gikan sa “matarung nga mga ginikanan.”


“Ang akong amahan maoy akong bishop sa dihang nagdako ko,” miingon si Brother Callister. “Sagad siyang magdala og gagmayng kard, ug magmemorya og mga pulong gikan sa diksyonaryo ug sa kasulatan ug ni Shakespeare.”

Sama sa iyang amahan, si Brother Callister nakaangkon og legal nga trabaho. Human makagradwar sa accounting sa Brigham Young University, mieskwela siya og abogasiya sa University of California, Los Angeles, ug naangkon ang master’s degree sa tax law sa New York University. Siya nakatrabaho isip usa ka practicing attorney sa kompaniya sa Callister & Callister.

Sa dihang gitawag siya, si Brother Callister bag-o pa lang na-release sa iyang calling sa Kapangulohan sa Seventy ug sa Ikaduhang Korum sa Seventy, diin siya miserbisyo niini sukad 2008.

Sa wala pa kana, miserbisyo siya isip presidente sa Canada Toronto East Mission, Area Seventy, regional representative, presidente sa stake, bishop, stake mission president, presidente sa elders quorum ug, sa pagkabatan-on, nagmision sa Eastern Atlantic States Mission.

Mikomentaryo bahin sa nagsingabut nga mga kausaban sa kurikulum alang sa Sunday School sa mga adult, miingon si Brother Callister, “Ang kurikulum, siyempre, importante kaayo, apan kini dili sama kaimportante sa pamaagi kon unsaon kini sa pagtudlo. Ang labing importante mao nga kita motudlo sama sa pamaagi sa Manluluwas, nga kita magtudlo pinaagi sa Espiritu, ug nga kita motudlo aron makakabig.” ■



John S. Tanner

*Unang Magtatambag
sa Kinatibuk-ang
Kapangulohan sa Sunday
School*

Gikan sa iyang pagkabata, si Juan Sears Tanner naka-kaplag sa hingpit nga kalipay sa pagkat-on. Kana nga kahinam milungtad hangtud sa iyang edukasyon, panarbaho, ug sa iyang daghang oportunidad sa pagtudlo sa ebanghelyo: una isip misyonaryo sa Brazil South Mission ug isip usa ka bishop, presidente sa stake, high councilor, magtutudlo sa klase sa Doktrina sa Ebanghelyo, presidente sa Brazil São Paulo South Mission (nga mahuman karong ting-init), ug karon isip unang magtatambag sa kinatibuk-ang kapangulohan sa Sunday School.

“Kon ang [pagtudlo] husto ang pagkahimo, maanaa ang Espiritu Santo ug inyong bation ang kahinam sa pagkat-on; inyong bation nga anaa kamo sa sagrado nga dapit,” mii-ngon si Presidente Tanner.

Natawo sa Siyudad sa Salt Lake, Utah, niadtong Hulyo 27, 1950, kang William Coat Tanner Jr. ug ni Athelia Sears Tanner, si Presidente Tanner nagtubo sa Habagatang Pasadena, California, USA, nga maoy ikalima sa 13 ka anak. Ang iyang mga ginikanan mihimo og mabungahong palibut sa edukasyon diha sa panimalay, lakip ang usa ka lig-on nga pundasyon diha sa ebanghelyo. “Wala koy mahinum-duman nga akong nakat-unan sa simbahan nga wala nako makat-uni una sa panimalay,” siya miingon. Siya usab nakapalambo og gugma alang sa literatura nga naalimahan samtang mikuha siya og English degree sa Brigham Young University ug doctorate sa English sa University of California, Berkeley.

Samtang didto sa BYU iyang nahimamat si Susan Winder. Nagkasuod sila og maayo diin mibunga sa maanindot nga relasyon. Nagpakasal sila sa Salt Lake Temple niadtong 1974. Sila dunay lima ka anak.

Gisugdan ni Presidente Tanner ang iyang akademik nga propesyon isip assistant nga propesor sa Florida State University. Nahimo siyang sakop sa magtutudlo sa BYU niadtong 1982; sukad niadto nagtrabaho siya didto isip assistant, associate, ug hingpit nga propesor sa English, ug isip department chairman ug academic vice-president.

Ang labing importante nga bahin sa pagtudlo sa ebanghelyo, siya miingon, naggikan sa butang nga iyang nakat-unan sa sayo nga bahin sa iyang pagpanarbaho: ang pagtudlo kinahanglang dili maggikan sa usa ka dapit sa kahadlok o ambisyon apan gikan sa usa ka dapit sa gugma—gikan sa gugma nga putli, ang tiunay nga gugma ni Kristo. ■



Devin G. Durrant

*Ikaduhang Magtatambag
sa Kinatibuk-ang
Kapangulohan sa Sunday
School*

Si Devin G. Durrant gitawag isip ikaduhang magtatambag sa kinatibuk-ang kapangulohan sa Sunday School, posible nga daghang miyembro sa Simbahan mahinumdom sa malampuson niyang mga adlaw sa Brigham Young University basketball jersey.

Ang sports, siyempre, adunay importante nga bahin sa kinabuhi ni Presidente Durrant. Siya gani migahin og panahon sa NBA batok sa pinakamaayo nga magdudula sa Estados Unidos. Apan siya nahimong mas labaw pa kaysa usa ka sikat nga atleta: misyonaryo siya sa Madrid, Spain, usa ka bana, amahan, apohan, usa ka tigsulat, negosyante, matinud-anon nga miyembro, ug presidente sa Texas Dallas Mission sa milabayng duha ug tunga ka tuig.

Si Presidente Durrant, natawo niadtong Oktubre 20, 1960, sa Siyudad sa Brigham, Utah, miingon nga ang iyang panimalay sa bata pa siya nakahimo og mahinungdanong tahas sa pag-andam kaniya alang sa matag tahas sa kinabuhi. Ang iyang mga ginikanan, si George ug Marilyn Durrant, batid nga mga magtutudlo.

“Sigurado, nanudlo sila pinaagi sa ilang mga pulong—mao gayud, ang talagsaong pagtulun-an nga akong nasinati sa panimalay mao ang pagkakita kon giunsa nila sa pagpakabuhi.”

Si Presidente Durrant ug ang iyang asawa, si Julie Mink Durrant, nasayud kaayo sa kaimportante sa lig-ong mga magtutudlo alang sa pag-andam og mga misyonaryo sa umaabut.

“[Ang mga misyonaryo sa umaabut] natudloan og maayo sa ilang mga ginikanan diha sa panimalay ug sa ilang mga magtutudlo sa simbahan ug sa maayo kaayong mga programa sa seminary ug institute.”

Ang programa sa Sunday School, dugang pa niya, nagtugot sa mga magtutudlo ug sa mga estudyante sa tanang pangidaron “sa pagtudlo sa pamaagi sa Manluluwas.”

Si Presidente ug Sister Durrant naminyo sa Salt Lake Temple niadtong Abril 23, 1983, ug ginikanan sila sa unom ka anak ug adunay unom ka mga apo.

Sa wala pa ang iyang tawag sa pagka-presidente sa misyon, miserbisyo siya isip usa ka bishop, magtatambag sa kapangulohan sa stake, sakop sa kapangulohan sa Sunday School sa stake, ug magtutudlo sa institute.

Iyang naangkon ang undergraduate degree sa American Studies sa Brigham Young University ug usa siya ka MBA gikan sa University of Utah. Siya ang tag-iya sa usa ka kompanya sa real estate investment. ■



Pagtubo sa Kahayag, ni Elspeth Young

Niadtong 1830, si Isaac Morley mipahulam sa 12 anyos nga si Mary Elizabeth Rollins sa iyang bag-ong kopya sa Basahon ni Mormon. Kini mao ang bugtong kopya sa Basahon ni Mormon didto sa Kirtland, Ohio, nianang higayona, ang bag-ong nabunyagan nga si Mary Elizabeth ug iyang pamilya nagpuli-puli sa pagbasa niini sa lawom nga kagabhion. Sayo sa pagkasunod nga buntag, siya miabli sa basahon pag-usab ug misag-ulo sa sinugdanan nga mga linya sa 1 Nephi. Ang kahayag sa painting nagsimbolo sa kahayag nga midan-ag ni Mary Elizabeth samtang siya nagbasa.



“Samtang atong pamalandungan ang mga mensahe nga atong nadungog, unta makahunahuna kita sa paghimo og mas maayo kay sa ato nang nahimo, miingon si Presidente Thomas S. Monson atol sa panapos nga sesyon sa ika-184 nga Tinuig nga Kinatibuk-ang Komperensya sa Simbahan. “Magmabination kita ug magmahigugmaon ngadto sa lahi kanato og pagtuo ug mga sumbanan. Ang Manluluwas midala dinhi sa yuta sa mensahe sa gugma ug pakigdait sa tanang lalaki ug babaye. Atong ipadayon ang pagsunod sa Iyang ehemplo.”

ANG SIMBAHAN NI
JESUKRISTO
SA MGA SANTOS
SA ULAHING MGA ADLAW